

續碑傳集卷五十一

江陰繆荃孫纂錄

武臣

提督銜陝西延綏鎮總兵官楊剛介公神道碑

王先謙

公姓楊氏諱昌泗字廉泉湖南乾州廳人曾祖正舉祖通能父光重皆不仕以公貴

贈如其官光重讀書有至性鄉里稱善人乾隆五十九年大學士福康安奉

命督辦苗疆軍務光重在幕中時獲苗人數十將戮之大學士問光重識否光重不忍對曰皆識之苗得不死夫人姚氏有子二人長昌凱甘肅貴德營遊擊署礮伯營副將從征廣東有功

賞花翎次卽公也年十三苗賊劫公里公祖母黃太夫人挈公走遇賊賊戕太夫人公悲憤躍起奪賊刀追刃之長老驚爲神勇以武學生入乾州協右營游補千總道光十二年永州徭叛奉檄往捕毀洋泉賊巢禽趙金隴弟滿子擢鎮筵標前營守備平廣東連州八排徭賞花翎

賜驍勇巴圖魯號擢沅州都司調寶慶協中軍都司十六年禽武岡州賊羅在清等擢永州鎮中營游擊二十年擢貴州朗洞營參將雲貴總督用廉明公正足膺重寄奏薦遷直隸大沽協副將甘肅西甯鎮廣東高州鎮總兵官咸豐元年平欽州土賊下部優敘以營勇滋事失察奪職三年粵寇大煽

特詔赴山東辦理防剿至湖北總督等奏留領兵平黃州游匪破田家鎮賊四年以違總督節制復被劾發軍臺公壁武昌連擊走漢鎮賊船毀磯窩壘免發遣武昌陷公從巡撫青磨入湖南荊州將軍官文奏率所部擊賊監利螺山大破之火漢陽賊船剗蝦蟆磯鸚鵡洲壘毀大別山下木柵數十生禽偽將總制等薄漢陽城先登克之明日克漢鎮復原官駐蘄州疏防竄賊摘頂戴復廣濟黃梅

賞還授陝西延綏鎮總兵官五年漢鎮復陷公扼賊沔陽破之浙河仙桃鎮從官文再復漢陽功最加提督銜七年之任河南擒賊熾八年詔公督軍馳剿公聞

命卽行抵開封疾亟十一月二十四日卒於軍年七十有六遺疏聞照提督例

賜卹

賞銀二百兩治喪廕一子六品頂戴送部引

見錄用

予諡剛介公自少迄老積勞兵間將無懦卒當無強寇應機立辦退若無事所至有聲績尤久於湖北同時領將多拔自義勇由驟升公以行伍老成頡頏其閒臨事不後論功不先議論局量越儕輩咸斂手傾服無忌嫉者意氣奮發忘其老至不以榮辱易心夷險異節故雖累獲嚴譴而

眷倚不衰咸豐九年三月葬廳城南獅子山妻田氏夫人廳學生宏受女後公卒於同治六年六月初十日年八十有五別葬城南象山子男三人勝棠武學生衡州協把總勝業乾州協把總並從征廣東賞藍翎勝棠從公戰湖北沒於軍勝業戰廣西以傷沒勝傑五品軍功把總女三人適某某孫男二人秀觀二品廕生運同銜湖北候補同知秀實以廕

賞主事官工部營繕司來以碑銘請銘曰

武水環帶天門隆崇地氣鬱雄生我楊公楊公峩峩家服健勁關機銜

刀以磔梟獍忠義激發鬚髯奮張孰謂公老萬夫失強屹矣鄂疆喋血

周歷滔滔江漢詠公之績致身成志瘁於道馳

帝獎賢勞三軍泣思池蓬之砦毘羅之阪我銘公幽維以示遠

蔣東才傳亳州志 蔣東才字軼眾亳州人咸豐中投效豫軍隨剿捻匪給六品頂戴八年

在毫北與賊接仗擒首南道就禽

賞戴藍翎以把總拔補十一年管帶東震營敗賊盧家廟集禽巨捻彭

春等又截剿劉天祥股匪存都司同治三年汝南一律肅清進副將

銜游擊三年四月在息縣連克賊巢巨捻趙國良簡世然等伏誅五年

剿賊商邱大周集敗之累保副將加總兵銜七年攻克陝西綏德州城

復移軍山東破賊於濟陽東北九月擒匪平擢記名提督

給三代正一品封典八年統毅字後營在海鹽子地方剿賊出力

賞額騰額巴圖魯勇號嗣駐師榆林邊境截剿竄回論功

賞戴花翎十二年克肅州城雖以眾軍合力得集大功而東才之忠勇

實爲尤著旋奉

賞穿黃馬褂光緒六年督豫軍搶護黃河隄岸民賴以安八年改挑賈

魯新河事辦而民不擾民交頌之十年丁母憂回籍呈請在籍守制不允敦促就道遂督率所部馳赴直隸張家灣防所十一年六月撤防調至京師濬內外城河事竣

恩賞大緞二疋遵

旨回豫補授甘肅涼州鎮總兵經河南巡撫邊寶泉奏留仍統豫軍精銳各營十三年八月河汛大至督軍往來搶護不避風雨以疾卒於工次時年五十奉

旨照軍營立功後積勞病故例從優議卹

賜祭葬建專祠並宣史館立傳廕一子尙謙六品官

固慶傳吉林通志

固慶姓額蘇里氏隸滿洲正黃旗道光八年舉人十五年由刑部員外

郎

賞頭等侍衛充哈密辦事大臣累遷杭州副都統三十年授吉林將軍咸豐元年疏言吉林為根本重地近聞盜賊之盛實由窩藏之多此地旗人盡屬屯居與民雜處宵小最易溷跡已嚴飭各旗並地方官編查保甲但吉林地方遼闊密林深谷在在藏奸當日原設有各旗界官各

管各界更有巡緝捕盜之員率領兵役按段梭巡搜捕立法未嘗不善  
近如巴彥鄂佛羅邊門所在杜莊毗連山谷多有無主屍身或有傷或  
無傷未據該界官與巡緝之員稟報則日久怠玩已有名無實吉林所  
屬人命事件舊責成地方官旗員不與處分故遇事輒諉諸地方並不  
稟報請將專設捕盜官悉停遇有盜賊滋擾處所不難隨時派員往捕  
且嗣後不論旗界民界一體查報再有玩延卽行參劾又疏雙城堡各  
屯旗丁可六千餘戶人數浮於前各處移來之人性情不一易滋事端  
惟一協領不足以資彈壓擬以該堡協領改爲副都統職銜總管所有  
應辦事件徑咨報將軍衙門以專責成並將該堡佐領選派一員爲委  
協領幫辦一切事件又疏雙城堡所設協領佐領驍騎校各員遇有缺  
出以次拔補原爲就地取材俾諳屯務以期有益惟所轄之人皆童而  
習之不但不能彈壓且往往互相迴護擬以該堡協領一員佐領七員  
改爲公缺於吉林應選人員一體揀選驍騎校八員亦改爲挑選通省  
防禦之缺其協領佐領三年任滿准調補各處相當之缺又疏雙城堡  
水涸地九千餘晌與熟地毗連非禁荒可比請分撥各佃認墾輸租充  
該堡官兵俸餉又疏吉林六旗馬廠地租歷年賞兵所搏節餘錢三萬

八千串請以三萬串生息歲可三千餘串存將軍衙門爲捐辦修理要工經費免攤扣官兵俸餉餘八千串留爲現在修理各工之用均從之明年疏言吉林土著旗民生齒日繁野無曠土其禁荒數處係備將來遇有酌量安置之用誠恐各邊卡日久疏懈流民復潛來將致人浮於地於旗民生計大有關礙吉林與蒙古荒界毗連難保無流民依親就食者而奸頑逃罪之徒或廁其內及乎日久小則逞刁健訟大則習爲盜賊恐吉林渾樸之鄉漸染澆漓之習數嚴飭邊卡員弁認真稽察如有潛來之戶卽行阻回其內地流民請

敕山海關副都統及奉天嚴飭各屬要隘凡有票行旅驗明放行無票者不准偷過

詔如所請尋以粵逆肆擾請率吉林官兵前赴軍營

詔吉林官兵已派大員統帶該將軍所轄亦屬緊要無庸前往軍營尋

奉命挑吉林馬隊二千派雙城堡副都統銜總管西昌阿等統領赴河南三年與副都統琦忠互訐並坐禡六年賞藍翎侍衛充庫車辦事大臣尋

賞二等侍衛充葉爾羌幫辦大臣平巴爾楚克土賊及英吉沙爾回匪  
賞頭等侍衛充喀什噶爾辦事大臣九年以疾乞休同治九年卒

富春傳

吉林通志

富春姓韓氏隸蒙古鑲紅旗吉林駐防道光七年從攻回疆喀什噶爾  
城先登

賞藍翎十四年洊擢協領二十一年擢黑龍江副都統時英夷肆擾以  
所部防守錦州之高橋二十四年傳習邪教海康之女於黑龍江配所  
潛逃坐革職留任尋以非副都統所管轄

詔免議明年入覲

賞換花翎二十六年以病請罷咸豐二年粵逆陷湖北武昌

命吉林將軍調兵往防楚豫之交時富春病請赴軍自效

詔如所請明年賊陷江南會城督兵於六合縣境禦賊數有功授甯古  
塔副都統仍留軍六年賊陷揚州我軍進攻有賊來自西北甚眾將襲  
我營偕總管西昌阿分道禦之戰七里旬既捷合軍躡擊至黃家莊獲  
賊目五長髮賊六十有奇斬千餘級

賞頭品頂戴大軍復揚州以所部伏截竄賊殲斃無算



賜號伊伯德恩巴圖魯八年春江甯賊渡江援江浦合烏江據賊營石  
積橋江浦賊千餘出應大軍擊賊敗之平其壘富春獨率所部禦城  
賊戰於濠邊斬百餘級和州復烏江芝麻河等賊將遁分路要擊俘馘  
及崩江以斃者甚夥其夏皖賊下援江甯趨江浦糾捻逆會大劉莊與  
大軍分路攻之會大雨如注乘勢猛進賊不支狂奔自相踐蹋死者甚  
眾秋戰江浦被創養傷邵伯鎮欽差大臣德興阿以聞

詔富春創不甚重輒自離營以年邁且著有勞績免予治罪因罷職九  
年卒於家富春雖終斥要猶經戰陳非但具官資如托雲也

託雲保傳

吉林通志

託雲保姓額哲特氏吉林人隸滿洲正黃旗嘉慶十八年從征河南教  
匪以功授藍翎長道光七年回疆平隨欽差大臣那彥成往辦善後事  
宜歷擢護軍參領充虎槍長及諳達三十年擢頭等侍衛在

乾清門行走充歷馬大臣授上駟院卿咸豐元年擢正紅旗漢軍副都

統明年

文宗自

慕陵旋蹕中途馬蹶坐平日騎壓不慎被吏議三年粵逆洪秀全等陷

江南會城奉

命率吉林兵二千赴大軍剿之賊擾河南往援道出延津縣所部擄民間牲畜傷人爲欽差大差直隸總督訥爾經額所劾鑄三級調用仍留營秋賊渡河北攻懷慶府甚急我援軍營丹河鋪池南季村以騎兵與會戰於城下焚環城賊壘多所斬馘賊竄濟源縣而設伏風門山口前軍追賊入伏督所部馳救槍殪賊目賊驚靡禽斬大半別賊闖入山西

陷平陽府據之欽差大臣都統勝保劾追截不力  
命摘頂翎賊尋竄直隸據靜海縣及獨流鎮隨勝保自深州疾馳至獨流鎮連戰皆勝

還頂翎我軍營葡萄窪逼攻獨流鎮靜海賊來援分兵擊之斬級五百有奇賊勢益蹙會以病回旗四年秋病痊仍赴勝保軍冬授正藍旗蒙古副都統於是賊竄山東陷高唐州據之勝保移師圍攻數月未下明年春勝保以老師被逮賊尋自高唐竄據馮官屯隨參贊大臣科爾沁親王僧格林沁破之俘賊渠李開芳

賞換花翎調正紅旗蒙古副都統還京

命在御前侍衛上行走授奉宸院卿冬擢甯夏將軍先是道光二十二

年甯夏兵每歲添演秋圍將軍與副都統番率至賀蘭山肄馬上鳥槍及諸技著爲令旣以甘肅協餉不繼暫停六年

文宗以各軍馬隊得力令西安甯夏官兵一律添演秋圍借副都統疏言甯夏駐防官兵行圍錢糧官借官償兵借兵償視綏遠城以卡倫房租作公項給發者不同見餉項不足兵力亦艱若復加行圍給項不特不能清償且累上加累請俟協餉充裕照例演習

詔如所請八年以病乞休明年卒

吳璋傳 畿輔通志

吳璋字晉廷其先隸正紅旗至巴彥達改籍清苑璋其孫也璋有力能挽強道光初由行伍補白羊峪把總遷前營守備謂海防以火器爲先創造炸礮旋轉如意式如瓶重五百斤遠及三里子炸二畝許繪圖說上之尋遷北塘營遊擊二十九年三月英人入犯璋列營禦之夷繫礮於檣乘夜攻擊璋息鐙罷鼓去營里餘鹽灘中篝火三五爲疑兵當夷船之未至也我軍演礮以敝舟爲準至是令精卒伺夷船至其地始開礮夷知其備乃退次日篝火處果得礮子十數枚有重二十餘斤者

文宗登極詔疆臣密保將材璋名預焉咸豐三年粵逆北犯隨總督訥

爾經額赴河南防禦師抵柳園口粵逆數萬潛謀夜渡璋兵分兩隊伏  
左右約聞礮乃起賊以十舟先濟甫登岸礮發伏起斬獲數千毀賊船  
六生禽四十人餘賊不能渡乃西竄時欽差大臣勝保尾賊後意賊必  
由北渡至是忽西竄知有兵截擊因詢璋戰狀大服卽奏調同赴懷慶  
進剿璋擊賊西南礮臺破之有違節度者掌其頰二百眾曰營無此刑  
也璋曰軍法重者殺次杖次貫耳行兵勝負靡常杖重不能行儻逢不  
測是罪不應死而置死地也眾皆感泣八月賊竄西北入平陽城璋尾  
之及門未閉遂北竄直隸璋由霍州至滹沱賊自下流結筏將濟璋覓  
舟不得擇善水者泅渡繫繩以涉進追至天津之得勝口四年粵逆回  
竄璋追及念祖橋斬千餘人賊由舒城鎮南竄璋追急至柳林橋誤出  
賊前夜半狂風迷所向賊從後突至璋分所部爲十隊以八隊掩火禦  
敵自率二隊沖殺賊勢將退比曉知我兵少乃合圍幸救至得不敗賊  
據阜城璋乘其未定督兵進攻單騎先入所向披靡身受矛傷二大軍  
繼之連破賊營四殺賊六七千江南賊遣救至賊復熾璋奉  
旨充前敵先鋒官隨勝保分兵截剿抵臨清州南三十里俟賊過擊其  
尾將戰璋傳令曰不俘不馘殺賊以左耳爲驗拾衣械者殺面受傷者

受上賞遂以少勝多賊既破臨清分股營清水集璋潛師待半過夜擊之追至豐殲焉以殄滅全股

聞擢副將尋擊李開芳於連鎮傷右股明日復戰傷左股時武弁皆怕首璋以爲怯每戰不去冠勝保以爲言璋曰不敢畏死壞

朝廷制度五年勝保獲罪璋隸忠親王僧格林沁軍未幾改隸欽差大臣西隆阿軍璋前與用事者不能協至是因事陷璋璋曰死讐不若死寇吾甯效命疆場以馬革裹尸耳每戰必先連克西河常陵平定市興隆集厯山等處師抵德安府時降賊將復叛璋廉得其情密上當事當事笑置之未幾降者果反與賊合遂圍璋於武城之西厯十八日糧盡援絕死傷過半璋夜率卒銜枚至賊濠布陣僞爲救援之師者賊不敢出軍還用事者斬其勇將萬寶來軍益孤六年請歸伍同治七年卒

袁富將軍戰略

屠寄

公諱富明阿字洽安黑龍江正白旗漢軍年昌阿佐領下人本袁氏明兵部尙書督師崇煥六世孫也崇煥見法前史以爲冤妻子流寓汝甯明鼎既革有子曰文弼從征有功編入甯古塔正白旗漢軍生爾漢康熙二十三年從征雅克薩留防黑龍江城爾漢生貴貴生常在常在生

趕趕三子長世有次世寬三世福世福卽公披甲入伍用今名公少孤  
事母孝性沈勇弱冠以馬甲從領隊大臣阿勒罕保征喀什噶爾前鋒  
轉戰洋阿爾巴特和園鐵蓋山斬馘十六執馘五補委官轉無品級筆  
帖式由七品屯官期滿例改驍騎校徒佐領以委參領暨委營總結黑  
龍江馬隊從都統琦善公剿捻河南咸豐三年琦善以欽差大臣督師  
揚州號江北大營仍以公自從時劇賊數千結桴爭渡三叉河命公將  
三百騎迎拒人挾三矢公以爲少請益二不可難之予杖八十猶不肯  
行琦善怒將案以軍法公不得已往志必死遇賊東青鋪彈著右股洞  
穿未及裹創令從騎鼓弦注矢近賊二十步縱賊前行應聲踣後陳大  
擾蹙之河溺死無算須歸箠尙餘一矢琦善喜曰爲將不當如是邪具  
以狀聞

文宗奇之賜玉觥以微弁拜玉觥之賜蓋異數也旣而累戰虹橋尹橋  
閒多所克獲射殺黃衣賊一以功戴花翎遙補甯古塔協領加副都統  
銜六年正月從欽差大臣德興阿公克復揚州儀徵功多

賜號奇車伯巴圖魯銀百兩徙黑龍江火器營參領不之官別將再擊  
瓜洲賊敗之又敗之土橋七年十一月從戰瓜洲功最以副都統記名

仍

詔軍機處遇缺題奏德興阿資公謀勇令總理營務翼長八月先登克江浦四月拔來安

賞頭品頂戴遙授甯古塔副都統

文宗稔公才可大受九年

命幫辦欽差大臣和春軍務時六合新陷縣令溫紹原死賊得志城內外蜂屯公身赴盪賊洶洶前鬪公怒躍馬奮稍直入其陳左右驍果從者數百人縱橫縈攪所當摧靡賊潰而公亦身中九矛創甚不能軍給奉予休

穆宗卽位有

旨扶傷赴闕至則署正紅旗漢軍都統頃之真除

命總神機營卽南苑訓練不數月皆可用是時東南被賊久所在糜爛唯通泰十餘州縣總名裏下河者蹂躪未及尙號完富稻米魚鹽流行境外

朝廷資此一隅益調租庸緡算分餽南北征防各軍而賊亦矚其殷饒旦夕伺竄取朝議憂之

命公馳傳南下會江甯將軍都興阿公謀戰守時防營餉頗絀公以治軍必先足食請拓商販鹽省并釐卡杜中飽節糜費軍用果給更以其贏冶鑄開花礮器械亦精時江南羣賊欲遙解金陵之圍又被滬軍攻逼日益窮蹙而南岸民戶凋亡田野荒穢掠無所得食驟飢謀北渡轉亟公聞自出江上視師所至集其將佐指授方略則益廣江路之防西起浦口觀音門東訖狼福二山之閒上下三百數十里分四汛命參將梁正源提督賴鎮海副將林宜華總兵郭定猷按地守邊而總統於福建水師提督吳全美首尾援應東西截擊無一賊得渡而江防固矣同治二年苗沛霖叛疊陷潁上壽州懷遠并力圍蒙城塹三重深廣二丈餘塞淮水夾岸築營以鉅礮守之斷官軍餉道知縣事賀緒蕃與縣人李南華嬰城守糧盡擷浮萍爲食旣迺噉死人時六安鳳陽諸州府處處賊蹤安徽巡撫唐訓方累戰不利退保臨淮縣絕不得救總兵陳國瑞提兵徐州來猛進與賊搏傷亡多

詔公身赴蒙爲諸援軍節度公中分麾下命翼長徐州鎮總兵詹啟綸先鋒五日發自率步騎八百人督師繼進次宿州訶捻首相盤紆黨七千遮道則命都統克蒙額百騎繞出賊背伏八里莊侍衛壽昌佐領富



陞二百騎張兩翼爲顏行總兵王萬清步隊五百疏綴其後公居中督策戰於唐莊火器舉左右翼抄其旁步勇短兵冒煙堵進賊方三面抗而克蒙額伏發賊愕顧我師夾擊奔之追斬千計留兵四百護後運而以其餘徑抵蒙去城北二里登高覽形勢賊掩至指揮諸將奮擊奪浮橋不得飛礮墮其上瞭樓賊還走壁於是令詹啟綸循渦南王萬清渦北連營前與陳國瑞及吳棠部將姚廣武知潁州府事英翰諸軍合勢進攻梯衝地道螳螂擊將士更代眠食連日夜不休賊亦馮壘外禦俛仰自救聞出死黨度濠來斫營彼此所殺傷等公慮多折銳士命緩攻綴敵別出奇兵要寇糧以其閒徇下旁近五十圩賊黨羽漸落是時李世忠亦自五河轉戰而西道克柏家圩中心渡小古墩鏟壽南三十餘寨增兵萬人進規下蔡探賊老巢賊勢愈困會科爾沁博多勒噶臺親王僧格林沁奉

命督援師與侍郎國瑞先後至馬步總集軍聲益張脅從者望風送款爭請擊賊自贖十月己亥公會王國瑞勒兵攻賊蔡圩糧臺毀堅壘一其夜賊連營二十四不戰自遁圩空南路遂開而環城賊壘吼不動庚子官軍期日中四面進薄總兵何建鼇挾西洋炸礮擬賊西南衝一丸

著輒十餘丈壁摧聲如雷賊賊傳振邦揮步隊躍入同時陳國瑞自東南英翰正南詹啟綸正西大呼焱進城上守兵望見亦鼓譟應之賊不知所爲皆棄壘奔逸都統恆齡等飛騎縱擊之免者什一抵莫渦南北唯七壘未下陳國瑞姚廣武分軍午夜攻之王萬清挈親兵行北塹昏黑中見三五人偷越前一人跳而顛萬清突前斫之有人從後驚呼苗先生死矣萬清則曳屍入營李南華識沛霖以火燭之良是於時蒙城受圍凡八月矣及是始解城中官民相慶皆曰更生更生有喜極至涕泗者皖北平是役也公自力跨馬督戰股傷復裂乞假就清淮醫許之三年都興阿公移師歸遠

詔公回駐揚防公前已擢荊州將軍至是兼權江甯將軍丹陽城小而堅提督馮公子材鎮江兵單力不能獨取公分兵萬人授詹啟綸渡江與子材並力四月壬申夜攻拔之合前蒙城勞

賞服黃馬褂六月甲申湘軍克復江甯

穆宗以大功告成推恩羣帥嘉公肅清皖北坐鎮淮南

錫騎都尉世職卽授江甯將軍公案國初江甯駐防額設官百二十有三兵四千七百十有一承平日久生齒寢繁至咸豐初元丁口逾三萬

壬子之難將軍祥厚以下一時同殉男女老弱得脫者裁六百餘人其閒職官佐領一防禦一驍騎校二員而已京口駐防官兵向日九千餘人遭亂死亡存者亦不逮半至是連白規復大小官制以銷檔壯丁百有五另戶歸農遷他省駐防閒丁補江甯兵額修復官署兵房籌給十成奉餉以散勇軍械公私餘馬授滿營披甲揚州軍米三千石振遺戶目前之飢餉鹽餘利銀八千三百兩備他日吉凶賞借所請並見施行是年十月兼權漕運總督明年引疾乞休

優詔木許賚假入都

穆宗念公足疾不良於行

特命緩程進發中途仍奉賞乘肩輿之

旨至闕未覲前命管神機營其禮遇如此久之傷疾不愈固請罷退乃聽解蹇歸須疾差還闕未幾東三省馬賊起五年正月起家授吉林將軍

詔便道之官隨方討擊公不得已復出應

命力疾督師進搜山險分遣將領越境追捕會不移時大致破散於是修城湟編保甲躡獲餘孽遠近清夷先是黑龍江吉林歲科并試生童

取集盛京遠者二千餘里公創建考棚疏請學政臨試船廠學者便之  
境內有牡丹江者女真所謂按出虎水也亦曰金源導自五常敦化東  
貫甯古塔折東北流逕三姓入松阿里其水左右巖澗重阻披沙數尺  
往往得金是以關內流人窟壑淘取私畜兵杖禁防已身不爲抄盜然  
人數既猥姦軌亡命時或竄迹其中公分別開誘招使歸農賦授閒田  
課之耕植終公之任闢地至數萬頃諸流人遂成土著其後將軍銘安  
因公規畫條上便宜竟開建郡縣焉在任五年以舊傷轉劇表請辭職  
溫旨見許仍食全奉於家光緒八年十月初二日卒年七十有七

詔立功省及原籍建專祠

予諡威勤公英果有思略束髮荷甲累作軍鋒身三百六十餘戰雖妻  
被創夷志氣不折再任方面並起家傷病之中扶杖登鞍臨討前敵未  
嘗稍自退縮其忠勇蓋天性也自受琦善公杖以兩矢卻敵膺  
懋賞始悟兵法置之死地而生由是膽氣益壯所向有功及貴每自爲  
人說之以爲終身受琦善公之教焉生平任氣在揚州日嘗以兵事謁  
都興阿公議不合爭之不能得忿極宣惡言拂衣而出都興阿公笑置  
之人或病都興阿公身元帥安受公辱不之較以爲懦都興阿公聞曰

若誠辱我雖然吾輩自視臨大敵奮不顧身孰與若方為

國討賊奈何以口舌之故失其歡邪論者於是多都興阿公長者而知公有以折其心也子壽山以蔭為員外郎永山三等侍衛光緒二十年永山領兵拒日本鳳皇城力戰死諡壯愍事蹟與公並付史館人以為類公云先是有富爾丹富僧格為黑龍江將軍咸有名稱富將軍故土人兼公漢姓稱袁富將軍以別之

烏魯木齊都統鏘僧額巴圖魯世襲二等輕車都尉贈太子太保薩爾

果敏公行狀

董沛

曾祖某襲雲騎尉 誥贈光祿大夫振威將軍妣某氏贈一品夫人

祖文祿雲南普洱鎮總兵官襲雲騎尉 誥贈光祿大夫振威將軍

妣某氏贈一品夫人

父福隆阿襲雲騎尉 誥贈光祿大夫振威將軍母宗室氏封一品

太夫人

本貫滿洲正紅旗人年四十有九

公諱英翰字西林先代從入京以忠節膺世秩公少好讀書才略明敏年十四成諸生甫冠舉道光己酉順天鄉試咸豐四年揀發安徽以知

縣用方是時粵寇洪秀全等據金陵橫擾江南北皖豫之交賊燄蠡起  
捻首劉元吉李士林孫葵心等羣相屯聚而張樂行起蒙城雉河集勢  
尤張鳳穎一帶苗沛霖假名團練陰持兩端安慶旣失行省移廬州又  
移壽州全皖糜爛幾無完土公至皖謁巡撫翁文勤公於行臺屢進策  
畫文勤深器之九年署合肥合肥已陷賊紳民各爲團練而頗相仇殺  
公解之不能得乃擇魁傑之士而陰部署之其後淮軍負盛名將才輩  
出公有以啟之也敗粵寇陳玉成於華子岡再敗之於小河灣勦雷麻  
店吳家山黃泥灘五顯廟諸土賊皆平之未幾攝鳳臺旋調霍邱苗沛  
霖者故鳳臺諸生也乘亂糾眾跨地數百里先後大吏皆羈縻之累戰  
功奏授川北道加布政使銜而沛霖益驕公知其必變謁大吏亟言之  
且謂速誅則禍小緩誅則禍大大吏以時事方亟猶藉其團練丁爲枝  
梧它盜計不敢決也十一年擢知宿州宿當皖之北境地廣民悍平時  
號難治道光中周文忠公刺州用法嚴峻宿人憚之軍事興文忠駐師  
於宿莠民不敢動及文忠歿而亂作一城之外圩寨林立諸大將傅振  
邦伊興額等屢勦之互有勝負公奉檄攜一僕徑往貫賊隊直入城中  
受篆視事威信大行遂收湖溝澮河諸圩單騎徧造之圩中久不見麾

蓋卽羣呼曰好官來羅拜受約束公取其豪以置麾下今宿州城南有英刺史單騎受降碑紀其事也嘗偵某圩有反志親率數十騎擣其巢執巨魁斬之餘黨讐服苗沛霖遣黨丁潮臣踞固鎮以阻臨淮大軍之路公計禽之梟於西關苗稍斂迹而張樂行猶熾傾巢出擾蔓十數州縣

朝命僧忠親王督大軍分路進討屢戰屢捷樂行遁歸老巢同治二年春官軍破雉河集公撫降賊李勤邦劉添祥等爲用密授策禽樂行及其子濤義子王宛兒送親王軍前正法傳首三省天下快之於是僧忠親王及漕督袁端敏公文章侈公勞績

天子方南憂淮甸遂駸駸嚮用公矣擢潁州府知府加道銜賞戴花翎始苗沛霖陷壽州忌蒙城團練綴其老巢不能遠出也屢驅悍黨攻掠之公方經營宿州未遑西顧至是東路告定率舊部練丁出境馳援而苗沛霖已先踞丹鳳集及穆張蔡諸圩皆反正旋署鳳廬潁道接統蒙亳諸軍屯小澗集破滄北宋家圩遂與臨淮大軍接公所部才二千人糧仗無轉運取給於宿宿民感公深竭蹶以應公日食粗糲夜宿單布帳與最下卒同甘苦每戰必出陳躬指揮小卻則馳十數騎

陷賊陳時出其背而未嘗有毫髮傷忠親王按視知之歎爲奇才沛霖  
以大隊逼蒙城公遣部將黃秉忠率親卒翼城而營爲蒙城之援賊黨  
陳大喜等驟合圍秉忠與外營隔絕而公營益單鏖戰無虛日猶時以  
騎軍齎糧糗濟城守者別遣副將程文炳克高鑪集斬賊首高加逾月  
而總兵陳國瑞之師自山東至又逾月而將軍富明阿之師自揚州至  
又逾月而忠親王大軍乃畢至遂解蒙城圍斬沛霖降懷遠穎上諸賊  
目撫圩寨之懷反側者皖北略定方沛霖之圍蒙城也繞城爲牆繞牆  
爲塹中聯數十百營環伺而守營各有塹三五重塹深而牆高基土陡  
削不可以容趾鑿壁爲坎匿其中以避鎗礮官軍卽逼塹寂無聲夜則  
巡壁上聯袂呼警諸將輪攻不能破公建議環賊營外復築重垣以賊  
之攻城者攻之垣外掘地道令軍士蛇行而進破一壘餘壘潰賊自  
限於濠塹不得出公督諸軍四面齊入賊瓦解沛霖乘夜竄卒爲我軍  
守外垣者所獲時二年十一月也其年八月公已擢安徽按察使司次  
年巡撫喬勤恪公奏平苗寇功  
賞格洪額巴圖魯尋以保舉降人爲忠親王所劾銷勇號部議降調  
上心重公



特旨改降五級留任張樂行之誅也其賊總愚糾別賊入豫與粵寇賴  
汶光捻首任柱合五月圍湖北之麻城東逼英霍忠親王檄公援之由  
高城會剿道遇賊大小三十餘戰乃達於石橋灣距城八十里而軍賊  
號四十萬阨山險編木爲圍木五重閒以磚一層阻我進路公與陳國  
瑞相次上陳欲併公軍不可得故後期俾公以孤軍出欲陣陷公公陽  
歡與結而招其部將郭寶昌率銳士二百夜踰崖入賊圍火之賊大潰  
向羅田西走陳軍徘徊欲爲亂寶昌洩於公公急告勤恪密疏其狀而  
陰解其黨羽軍心以安寶昌遂舉所部從公矣七月粵寇僞輔王陳得  
才僞端王藍成春自陝援金陵公四出軍拒之一戰於土門再戰於楊  
柳灣三戰於黑石渡皆大捷得才窮蹙仰藥死成春及僞左護軍將馬  
永和相率詣軍降公夜張燈肩輿從三騎直入其營撫十萬眾歸命懽  
呼雜髮委器械山積遂戮成春以徇分別散遣者八萬餘人九月擢布  
政使復

賞鏗僧額巴圖魯四年春賊擾河南

上命公帥師赴援勤恪以皖防亟疏留之賊尋入山東四月僧忠親王  
殞於曹州賊勢大熾

朝議以曾文正公爲欽差大臣節制三省賊覬蒙宿舊巢大舉南犯公督道員史念祖等屯雒河集以拒之黃秉忠駐龍山集易開俊駐蒙城相爲犄角賊十餘萬分踞石弓山龍王廟臨渙集諸險要賴張任三賊首皆會秉忠開俊俱會以軍寡俱退而雒河之營遂孤糧道阻絕援師不敢前勢危殆公屬念祖等堅守而自以二十騎夜突圍至西洋集挾援師俱至於是張得勝總兵首破高鑪集挫賊鋒淮軍劉銘傳破石弓山豫軍張曜宋慶破張家園分道并集公書夜嚴陣直薄賊壘史念祖困圍中已四十五日聞援師至卽同總兵程文炳等開營出賊腹背受敵遂大敗復竄河南公與諸將士執手相慰勞無不泣下其後勤恪奏立渦陽縣於雒河增設龍山營游擊以重皖防皆公在雒河定策也二年之中賊由陳汝徐沛屢犯皖境公率諸軍嚴遏之奏渦河迎仙店諸捷賊死咋不能入尺寸五年八月擢安徽巡撫九月賊首任柱賴汝光自豫竄山東號東捻張總愚自豫入秦號西捻秦撫新敗以勤恪代之勤恪知秦愚軍不足恃奏以郭寶昌從征皖之良也公念事亟遂遣之月饗四萬仍給於皖郭軍戰關中戰河北皆大有聲厥後提督金運昌接統其軍從定西域十餘年中饋皖饗數百萬皆公首定規也十一月

東捻突過沙河由固始犯皖皖軍扼之遂由光山竄麻城公率張得勝分防六安之流破潼山之漫水河諸處賊尋西走會文正有疾辭軍事朝命肅毅伯李公督師駐徐州六年五月賊復由楚涉豫浸入山東公與李公定計就運河樹壁壘因地圈賊使不能爲流寇先後入告詔從之公乃督諸將渡淮黃秉鈞統英字軍八營赴宿遷扼上游張得勝統凱字軍九營赴貓兒窩灘扼下游程文炳統強字軍八營居中策應而以騎軍五營往來巡哨並調水師余承先等三營由洪澤湖駛入運河爲陸路聲援與築隄牆晝夜併工膠菜河之防亦同時告竣東捻之勢始蹙十月丁外報疏聞

賞假百日專理軍務有移孝作忠之

諭時淮軍斬僞魯王任柱餘黨四散圖撲運河皖軍徼之牛師韓降曹禧等千餘人徐登善降高春等方長華降王鳳等各數百人而程文炳追賊沈陽亦降任根柱等百餘人僞遵王賴汶光爲揚州軍所禽僞魏王李允罪大不可赦請

旨斬之東捻平論功

賞三等輕車都尉世職公再疏乞守制已得

旨俞允而西捻張總愚越黃河由晉入豫七年正月犯畿南公以京輔

戒嚴義不得顧私遂馳至軍入援行至開封奉駐劄河南之

命公以全軍奏交豫撫李公鶴年調遣三上疏乞守制

詔慰留之尋諭公統所部渡河李公於臨清用前計守北運河自張秋迤至天津如

守南運法皖軍畿軍淮軍楚軍山東軍分地設汛兼防德州運河西捻

亦困六月諸軍大集張總愚數萬眾就殲於徒駭河之東北路肅清

詔敘平賊功加公太子少保

命安插降人回皖乃奉太夫人致贈公之喪假滿

命仍攝皖撫四疏乞終喪不許服闋遂真除八年沿江水災拜疏請振

未及報先動帑以濟民賴全活水既涸檄州縣吏建築江隄植蘆柳以

護之并修復東湖水利清丈廣德建平甯國田俾主客戶相安至今無

事叛將宋景詩逃山東巨寇楊輔清逃福建密購禽之悉寘於法皖南

關文貴皖北李六思謀爲亂皆及其未萌誅之其他小醜殄滅無子遺

境內熙熙咸樂休養加厚士類設中江書院延名師課之所識拔多英

俊省垣風氣頗尙華美或以告公曰皖北民椎悍諸將自兵間來尤桀

驚不易馴也今使覩冠裳之盛陶之以歌詠而節之以威儀彼知朝廷爵祿之可榮斯潛移默化於不自知矣非所謂銷禍無形歟聞者胥服十三年擢兩廣總督遵

旨入

觀光緒元年

陛辭從海道南行至廣州二月視事以議收闡姓捐爲將軍巡撫副都統所劾闡姓捐者粵東一巨款也前歲以科道言禁之而莠民私踵行不能革公因革監司之請判允之而遂以是望吏議落職公回京閉門奉太夫人未嘗有外交

朝廷念公前勞以其年十月

賞還世職旋

賞二品頂戴署烏魯木齊都統二年春西出關七月至古城接篆遂赴迪化州邊疆新復城野荒寥蔚傳不能給公一安之唯以守備單弱爲慮奏通籌善後一疏及眞除

命下公已病瘧四十餘日強起謝

恩翼日復患痢自知不起力疾草遺疏十二月八日薨事聞

賞還花翎及巴圖魯名號

贈太子太保照軍營病故例從優議卹復以母氏年高

賞白金二千兩人羨六兩

予公諡果敏宣付史館立傳竝準安徽省城穎壽亳宿渦陽蒙城諸郡縣建立專祠公以先世勳故襲雲騎尉赴粵時

恩命併襲晉二等輕車都尉配蘇完瓜爾佳氏

誥封一品夫人後公十五日歿於京師尙未知公訃也公無子遺女一未行弟曰英壽年甫十三太夫人之年已七十有三矣公一生仕歷與兵閒相終始以守土官轉經軍旅盤根錯節勉盡職守而未嘗有乞閒乞假之牘待僚吏馭將卒開誠布公賞罰必當尤善用降人能盡其力事變猝臨當幾立斷經權互用而不拘拘於常格故能戡大難成大功還全皖之士俾江南北數千里之民重睹天日卽粵東被議一事公明知其非政體然當此需材孔亟之際出下策以濟時艱亦勞臣謀國之苦衷可使天下有識者共白其無他而不能不見屈於同官持正之口此則九京之下公之所猶飲憾者也公自以世臣同國休戚雖非其職掌亦力言之如陳畿輔善後疏論日本通商疏條議海防疏皆洞中時

弊可見施行粵東解任疏論吏治防務累千百言不以身之退而遂默也遺疏中痛論中外大局感憤溢言表身殞絕域而心繫

闕廷斯可謂之盡臣也已公既無嗣而一弟尚幼疆事本末恐致湮漏江西巡撫李公文敏公門下士也屬沛狀其事乃卽當時奏報條繫年月參以諸家紀載及故吏之所傳述者爲文一通上之史館以備采擇且傳示公弟以爲異日祠碑神誥之底本焉謹狀

程忠烈公神道碑

吳汝繪

咸豐十一年冬上海人閒道至皖乞師於曾文正公當是時江蘇全境淪陷獨上海一縣藉外國兵助守勢岌業不自保文正公疏薦今合肥李相國用道員往署江蘇巡撫援上海李相國既募淮士五千人遂請於文正公願得參將程某自助文正許之程公諱學啟字方中安徽桐城人始從賊中自拔歸曾忠襄軍忠襄克安慶公功爲多忠襄進覲金陵且倚公辦賊公亦自誓滅賊以報國家及李公募軍東行忠襄亦還湘增募軍文正知忠襄惜留公不欲斥與人也貽書忠襄曰吾督江南且二載無一兵達江蘇李君新軍遠涉不可不資以健將於是竟以公與李公李公新軍號淮軍公本以隸

曾公爲湘軍軍瀕行文正令公軍改湘爲淮公曰無九帥命不敢文正  
歎異以爲不倍本九帥者忠襄也公以參將隨李公東援同治元年三  
月軍至上海是時江蘇兵尙五六萬不能戰戰輒敗匪賊張甚賴英法  
外國兵代復嘉定松江已又棄嘉定不守李公新軍至當勒習軍陳外  
國將趣新軍疾戰新軍將多未當大敵獨公所領千人爲勁旅李公檄  
公屯虹橋不遽言戰也公行至漕河涇卒與賊遇敗之遂據虹橋明日  
賊大至又破之追至七里堡大破之從李公進攻泗涇鏖戰三日解松  
江之圍進擢副將與美將華爾會克青浦還援北新涇馳入壘與守將  
并力禦賊卻之移守嘉定以總兵記名簡放賊圍四江口從李公救之  
襄創力戰卻敵加提督銜公起虹橋至四江口連三大捷皆用少擊眾  
李公於是增公軍至三千人使進規蘇州道太倉太倉賊乞降察其詐  
陽許之嚴陳以待與英將戈登會克太倉進攻崑山告李公曰崑山三  
面阻水一面陸走蘇州先據其陸斷蘇崑要脊賊必膽落從其計克之  
補南贛鎮總兵記名提督先是太倉旣克李公令公總領諸軍軍將人  
人異言及見公臨敵指揮則皆大服諸軍統將軍中號之曰統領公旣  
總領諸軍李公令軍中別稱公爲統率以旌異公是時前江蘇巡撫薛



煥入觀

太后臨朝問程統率狀貌戰績良久而外國將初侮吾軍及是戈登自  
崑山貽書李公稱公有大略足自制賊不煩外國兵佐助公亦盛稱戈  
登智勇以爲中國諸將莫能及也蘇州城大而堅四面阻水自盤門至  
婁門賊築長城十餘里長城內穴地爲石壘以避礮外憑水爲固公自  
崑山進攻蘇州連拔花涇同里下吳江悉平太湖洞庭山賊壘抵婁門  
而軍破嘉湖援賊自寶帶橋直入遂碎其長城先是劇賊李秀成守蘇  
及是急援金陵留死黨譚紹洸據蘇守禦長城旣破賊將郜雲官汪有  
爲等恟懼介副將鄭國魁乞降國魁者雲官舊識也公與國魁單騎會  
雲官約以斬獻紹洸頭爲信已約攻城益急紹洸召雲官有爲等乘城  
有爲突起拔佩刀刺殺紹洸賊眾擾亂擊殺數十百人夜開齊門降翠  
巨雲官等持紹洸頭來獻公入城鎮撫是時城賊尙十餘萬降酋八人  
請署爲十營八人分領之讓蘇城之半處官軍自踞半城助守公陽許  
諾語雲官等旦日出謁巡撫遂還軍密白李公請誅八人者以定亂是  
時常州嘉興皆未復李公愕然曰殺已降不祥且今常嘉賊聞風死守  
是自樹敵不可公爭不能得則脫所著冠提李公曰以此還公某從

訣矣今賊眾尚廿餘萬多吾軍數倍徒以戰敗畏死乞降其心故未服也今釋首惡不殺使各將數萬人麋軍餉大萬百餘與吾軍分城而處變在肘腋吾屬無遺類矣拂衣徑出李公急起挽公曰徐之吾今聽若何怒爲公曰苟見聽請一依某指揮明日李公過公裨將營入降人者出城屏騶騎上謁李公勞苦良久給總兵副將冠服有差留宴軍中且去曰吾屬有公事當去吾令此裨將代吾爲主人觴若等八人者旣謁送李公入就坐坐定酒三巡伏甲起八人驚愕格鬪皆死先是公嚴陳入城及八人首至諭眾曰八人反側已伏誅矣餘人不問逆黨驚擾凡殺二千人而定降眾廿萬分別遣留皆安堵帖服無事蘇州平當是時鄭國魁怨公次骨以謂公賣友而外國法尤以殺降爲大禁戈登至欲勒兵與公角鬪逾時乃解而曾文正公在皖聞蘇州殺八降將歎李公明決能斷大事也自軍到上海至蘇州凡八月蘇州旣平軍威益振乘勝援浙江拔平望復嘉善遂薄嘉興嘉興城守不下吾軍驟勝且驕於是公陳斬臨戰逗撓者守備姜寶勝以徇士皆股栗用命攻嘉興而月城破矣賊輒堵禦復完公募死士登城四登四卻憤甚突出奮身先登飛彈貫腦踣復起部將繼登竟克嘉興奏入

天子曰程某創甚其加意療治已而以傷卒諸軍將士皆慟哭失聲遠近士民涕泣相弔同治三年三月也得年三十有六事聞

追贈太子太保

子諡忠烈遣官弔祭有加禮公爲將紀律精整機捷出陰陽闔開神鬼眩賊大小百餘戰未嘗敗挫賊望公旗輒走自到上海見外國兵械勁利深研潛討一變中國舊法師彼長技淮軍用西域槍礮自公倡始李公以外國將驕蹇難制馭獨令公挾以攻戰起太倉迄蘇州與戈登交推互服殺八降將議論中乖及聞公死戈登乃獨流涕歎惜從李公求得公戰時大旗二攜歸英國以爲表記曾忠襄在金陵聞公戰比有功深惜公軍去已文正亦悔嘗曰吾湘部坐失程某一名將吾媿吾弟屢檄召公還公亦誓平吳會還軍助忠襄答知已迄不得還竟齎志以歿公歿卅年中國與日本戰諸將失利李公匡居歎息曰程方中若何在何憂勅敵爲其遺烈在人如此曾祖允中祖列義考大林三世皆以公

貴

贈如公官妣皆

贈夫人前夫人高氏生一子與公同陷賊中公自拔來歸夫人母子皆

遇害夫人之父復以季女與公爲繼室後夫人高氏後公九年以同治  
十一卒年廿八無子以弟子建勳爲主後前後累得襲併爲三等男既  
冠引

見爲員外郎某年某月葬公某所二高夫人耐建勳以墓碑屬汝綸乃  
爲之銘曰

運圯不反得人則轉大盜據江東顧席卷海壖片土借人息喘李公東  
討旗始孤偃公提一旅單進深阻刺賊胷膂使解身首挈吳會壤復還  
蘇撫江東事已藏熱厚土論功中興諸將未有在公猶小大世未覩絕  
域萬里懸隔自古東耀厥武械器是寶我寫而放如魚脫鮫試之三紀  
永勁我旅追元溯初伊公本始得粗畫止微漠不討持以應客恃失其  
所使公不死國孰我侮曷不憇遺藏茲功緒

清故振威將軍提督署大名鎮總兵許公墓志銘

顧雲

公諱保清字勳臣姓許氏河南商邱人大王父方輝郡庠生王父鏞邑  
庠生父永理大學生以公貴皆

贈如公官公雖儒家子軀幹岐嶷聲洪而碩顧盼肅然也嚴於操守居  
喪以孝聞而廉直已甚咸豐之季粵捻交劇袁端敏公辦賊安徽公謁

論軍事端敏公奇之從戰壽春穎亳閒既有功矣用都司統五百人爲一軍號中正營營制尙黑當時所稱黑旗隊者也會端敏公入覲移隸廬鳳道金剛愍公當是時軍與半天下竭所在正供不足給軍食而他省饒沃兼釐金所入歲巨萬計卒未至大紉安徽視旁近獨號瘠壤商賈不通故軍府威儀多所未逮而公部尤藍縷剛愍公閱之不之右也人日給裁百二十錢又歲大凶荒軍中至雜野菜爲糜日再啜公亦與同啜焉公嘗曰兵殺賊衛民者也若縱兵擾民兵卽賊矣又奚以殺賊爲以是雖飢憊無或肆者俄而捻逆七八千號萬人覬與粵逆合剛愍公令以所部五百人當之而自當粵逆於是公病數日矣聞令跳身起五百人者皆奮誓於軍門曰彼軍人給二百五十錢而我半之以我不任戰也今戰而死猶賢於飢而死且我公何爲者乃同我啜菜糜言次人泣數行下公倚鞍慰勉然後鼓之人自爲戰銳不可遏賊抵死拒我軍遽洞入中堅縱橫盪決不可復陳遂大潰以北而我軍拒粵逆者失利會粵逆聞捻旣北乃退去剛愍公乃大犒公軍日給與所部等嗣是大小數十戰當輒摧敗黑旗隊遂雒視諸軍會端敏公膺督師安徽之

命重臨其軍公建議軍行無定便利是趨而淮泗諸流動阻所嚮非別立水師與陸軍相輔賊未易辦也端敏公韙其議公乃退改所部且立且增成水師四營統之而懷遠臨淮鳳陽以次復積功擢副將

賞戴花翎於是軍事小定矣辭其軍回籍埽墓行既有日乃無以辦裝先是軍興久所在統將什軍列入其二而器仗衣糧復彙辦自上裒其直以賦於軍以故長千夫數年累貲必鉅萬公前後所部獨盈其數卽補換中間無所於給必會牒所司儲賞戰士尤勇者爲統將幾十年所入俸料外不別名一錢至是乃稱貸以去旣復出一總高寶湖防務去之蘇州蘇撫今合肥相國李公檄行撫標中軍參將事相國督師征捻逆復領行營中軍捻逆平積功擢提督

賞冠勇巴圖魯名號又總防務相國督直隸行大名鎮總兵事兼統保定大名馬步練軍督修東河隄工旣竣

給一品封典公以廉爲眾疾又彊直不解事人相國雅重公徒以事多所執又用禮自持視諸貪猥不直一唾而亦不能無所嗛焉故公自著聲鳳穎後戰績遂無犖犖大者旣櫻疾工所遂謝歸歸未幾而卒卒頃屬諸子而告之曰吾家世儒業以天下多故杖策從軍馬革裹尸故其

志也不自意獲終牖下爲幸多矣年六十有奇葬邑之某原配趙氏一品夫人子三懋功知縣懋德同知懋賞鹽大使女二適黃適陳孫四幼懋賞故雲友以公狀來請銘銘曰

猗公儒素爲

國干城有歷鳳穎桓桓厥聲端敏知言絕去文飾敷公於

朝忠廉正直維廉且直當世則希中興諸將疇克庶幾商邱之原公所

歸宅視千百年吾銘維覈

江誠恪公別傳

李元度

江公忠義字味根新甯人忠烈公忠源從弟也咸豐二年忠烈帥楚勇回援長沙公年十八固請從軍每戰輒出奇創賊忠烈喜曰吾家將才也從轉戰湖北江西

賞藍翎忠烈殉難廬州遂分領舊部五年隨江南提督和春破廬州城外賊壘敘府經歷縣丞尋丁父憂和公疏留軍十一月廬州復

詔擢知縣明年歸以在籍防勦功加同知銜七年春候補道劉公長佑攻臨江失利南撫駱公檄公帥新練勇千人赴之八月從劉公大破偽翼王石達開援賊十二月復臨江

詔賞孔雀翎晉知府八年敗賊新城晉道銜江西肅靖凱歸明年春石  
逆由南安陷桂陽將窺衡州爲陳戶部士杰魏主簿喻義所扼乃繞道  
嘉禾犯永州公奉檄援永敗賊煙竹埔圍解

詔擢巡守道亡何賊陷東安公念賊仇視新甯久卽夤夜馳回甫入城  
賊至敗諸摩訶嶺帥壯士火其巢賊遁時三月二十八日也四月賊再  
犯新甯將趨武岡時劉公駐新甯公遂帥千五百人倍道入武岡賊至  
見楚軍列幟城上驚曰來何速也遂引去

詔錫四品封典及賊圍寶慶公繇武岡馳援每戰輒挫賊圍解追禽僞  
將軍李定發等數十人斬級數百賊遁廣西

詔賞勇號曰額爾德木巴圖魯十年春石逆終不釋意於楚由融縣窺  
綏靖公帥二千人赴綏靖搃之十月母憂歸賊遂陷綏甯尋陷城步趨  
武岡公分軍守新甯自援武岡賊至擊走之旋以新甯警將回援謀報  
賊謀潛襲東安乃從間道改援至則東安已陷一戰復之

詔加按察使銜方東安之復也賊改由零陵窺道州公兼程抵甯遠出  
賊前與賊遇於四廣橋血戰五晝夜賊崩潰斬首數千十一年正月石  
逆遣黨由貴州獨山繞道犯全州道州戒嚴公扼四廣橋敗賊白芒營



又會勦於宜章栗源堡降賊眾萬人公回駐新甯當是時賊蹤颯忽東則江華永州西則綏甯靖州北則武岡寶慶無夕無警報公一軍搯拏其閒卷甲疾馳無虛日遺民聞公至則皆喜至必大創賊石逆挾全力犯楚百計不得逞卒竄黔蜀以死繇公等摧其角距也四月廣西別賊竄義甯公遣參將江忠朝等扼諸全州賊故畏楚軍僞丞相余成義斬其魁以降湖南解嚴

詔加布政使銜冬十月

特旨賞二品服署貴州巡撫公以母服未闋具疏辭得

旨允其終制仍令墨經從軍在本籍帥師勦賊居亡何石逆復自粵竄楚眾號十萬公以三千人扼諸會同榆樹灣及浦市均大破之賊勢促乃結湖北來鳳賊黨撓我軍公會諸軍急擊拔來鳳賊遁入川方會同之陷也公繇洪江進攻突遇賊值天大雨公整隊進石逆親率死黨來決戰公揮軍縱橫抉盪戰三時賊敗石逆墜馬者再千總江忠倬怒馬取之幾獲矣逆黨以死護之去自是不敢復窺楚矣同治元年移師援

黔七月克天柱

詔署貴州提督南撫毛公鴻賓疏調公征粵西遂克修仁殪逆渠張高

友大捷於蓮塘會皖南賊勢張兩江總督曾公疏調公援皖而劉公長佑時已撫粵西屢疏請留公有

旨命署廣西提督二年皖賊勢益張江西孔棘毛公疏請

敕公由江西赴皖時廣東高州匪未靖廣督吳公端書又疏請會剿廷議皆報可諸將謀所向公曰陳金剛雖悍然粵中糧餉足他將能辦之江西餉不給賊入境已十萬脫有不虞東南全局瓦解矣吾豈可避難就易貽

朝廷南顧憂且江西吾百戰地父老聞吾且暮且至皆引領望此意可厚負邪乃奏請援江檄道員席君寶田率前部先發會剿陶家渡破賊十餘壁軍勢乃振六月進攻湖口逼賊而營偽堵王黃文金率死黨來爭黃文金者粵中最悍賊眾呼黃老虎者也公出奇兵抄之賊無所得食悉銳突我軍軍植立不動相持數時之久乘其懈猛擊之賊大敗文金受重創氣奪引去江境肅清狀聞

賞穿黃馬褂部曲獎擢有差八月青陽圍急城中食且盡公帥師往援時賊連營二百里公至賊皆有懼色中坂埔之捷逆黨望風崩潰公猛進距城十五里而軍別遣將繇五溪進賊悉銳趨五溪公統師由芳坳

深入龜水渡射行泥淖中爲士卒先又分軍攀懸崖出賊後賊驚潰立  
破百餘壁圍解而太平石埭甯國諸賊皆決計降矣會公病甚還江西  
次鄱陽之石門就醫南昌未至卒於吳城旅邸年三十公身中軀饒膽  
略善調度能預策賊去向先期堵截搃其吭初石逆擾慶遠公策其必  
道楚西入蜀疊請飭東南防兵急西嚮聞者迂之亡何賊果越綏甯而  
西乃服其先見治軍嚴而有恩不惜重賞勵有功而自奉約甚暇輒研  
究書史於生民利病時惓惓於懷嘗言治賊當清其源爲蠹吏必以吏  
治爲本死事

上聞

詔贈尙書銜照總督例議卹廕子如制

子諡誠恪

敕本籍及江西安徽青陽均建專祠江氏自忠烈殉廬州後道員忠濟  
副將忠信總兵忠珀均力戰死綏及公而五戰功節烈之盛永寶聞罕  
與匹焉

贊曰公以記名道擢權黔撫辭不拜引禮請終制後兩權黔粵提督  
朝廷破格用人其不主故常若此楚軍中宮保彭公亦嘗辭皖撫

詔改水師提督又辭漕督改侍郎烏乎古今智略士乘時會答兵走萬里大率志在功名耳二公皆辭督撫視節鉞無關於殿最其諸有國士之風歟

安勇傳

畿輔通志

安勇由行伍拔千總道光二十一年爲泰甯鎮右營守備二十六年擢江西興國州營都司咸豐元年二月粵匪竄南贛突撲龍南之芳竹嶺勇督兵扼剿礮殲賊首數十人餘潰遁擢山東武定營遊擊二年奉檄赴江南防堵三年六月賊由瓜洲犯三汊河營勇率兵截於揚子橋破之賊又於對岸築礮臺結浮橋搶渡勇冒雨奮擊他軍繼進賊潰退七月賊由鈔關門天甯門來犯官軍擊退追至護城河勇先設伏東岸賊至殲之事聞得

旨以參將升用時江甯揚州皆爲賊陷勇隨欽差大臣琦善趨赴三汊河奮擊敗賊以火器焚其營四年分攻揚州勇首先迎擊六月復攻瓜洲賊入土城拒戰勇乘閒馳入殲賊幾盡直隸提督陳金綬上其功賞戴花翎九月剿賊李家廟毀賊壘進攻新橋虹橋皆有功五年賊合鎮江逆黨入儀徵過鹽河踞帶子溝我軍浮橋渡河勇率先奮擊復偕

副都統富呢雅杭阿攻河南賊毀其營二四月賊約鎮江大股竄八里  
鎮欲犯三汊河勇偕副都統德興阿等兩路夾擊賊斷隄築壘我軍馳  
入攻奪之積功擢直隸大沽協副將六年升天津鎮總兵官八年三月  
與都興阿等克復江浦城五月敗皖逆於大劉莊捷聞  
賞烏里達勒巴圖魯名號九月賊由天長犯揚州勇督兵過河堵禦賊  
他竄十年漕運總督袁甲三以防剿出力奏入  
賞加提督銜同治四年卒奉

旨賜卹

陳總兵事略

洪良品

陳國瑞字慶雲湖北應城縣人八歲而孤年十一提督黃開榜養之爲  
子從軍擊賊克復正陽關及懷遠城奮勇首登此爲立功之始咸豐九  
年十二月賊踞鳳陽府縣兩城城甚堅國瑞謂非出奇計不可下會大  
風率壯士七人懷火球攀堞上火起奮殺官軍乘之賊眾驚潰踐踏死  
者無算遂復府縣二城生禽捻酋張元龍等前督師勝保上其功擢守  
備加都司銜

賜技勇巴圖魯名號

十年正月欽差大臣袁甲三奉

命討淮北賊調國瑞隸其軍時壽州危急命率兵往剿中途聞賊犯鳳陽乃黑夜返旗往援連破賊壘立解鳳陽城圍以功擢游擊同治元年賊陷天長國瑞移軍駐高郵寶應與天長界之下五鎮屢戰未克偵知賊有小將陳振邦者多謀勇設計取之遂克其城畜振邦爲義子天長既復而捻逆竄清淮署漕運總督吳棠調國瑞往剿僅率壯勇五百人赴敵而賊眾數十萬踞淮關署劫稅銀去國瑞揮軍追擊賊奔奪回所掠時捻逆逼清河國瑞率五百人往援深入賊陣賊易其少圍之國瑞奮力衝擊自辰至酉斬馘無數賊大敗國瑞勇均服紅比甲賊中稱紅孩兒軍名聞天下事聞

諭旨褒獎升副將加總兵銜國瑞益奮勵進剿桃源宿遷等處殺賊萬餘級拔出難民八千人移軍進邳州累戰皆捷捻酋高圭詣軍門降清淮悉平奉

旨以總兵儘先題奏髮逆逼揚州裏下河危急移剿高郵寶應召伯埭各湖面殲賊數萬人十二月吳棠奏派會剿山東鄒蘭幅匪率所部二千人進攻徐塘圩蘆塘兩匪巢爲士卒先躬冒礮火負土填塹浴血被體蹂升不輟攻堅折銳如摧枯朽匪駭潰進攻長城捻目趙開元合三

岡幅眾馬步二千人來援馬突陣如飛國瑞全軍張兩翼匪三馳不動  
進退漸懈國瑞旗三弊三作洋槍如雨開元墮馬死前隊盡靡全軍夾  
擊匪奔北破援賊李成十萬眾又破岐山斬匪首孫化祥降仲村賊首  
宋三綱等賊砦悉平散遣脅從萬餘人乃進兵攻兗州之白蓮池白蓮  
池者教匪宋維明等所踞中環九大山山峻路險賊砦其上出劫入保  
爲民患有年國瑞兵至逆首劉雙印率黨迎戰國瑞命部將郭寶昌從  
小路領兵出賊後命康錦文潛師伏山徑中俟賊過半橫出擊之國瑞  
自將衝其中堅三路夾攻陣斬悍賊萬餘生禽雙印等二十餘人餘賊  
負嵎死守不敢出國瑞親冒矢石朝夕仰攻一月有餘不下會夜大雨  
國瑞料賊防弛乃冒雨緣崖先登將士繼進破之殲賊萬餘戮逆渠宋  
維鵬劉錦春科爾沁僧親王駐軍淄川聞捷以功入奏

賞穿黃馬褂嗣流賊竄曲阜

聖陵震驚國瑞連夜馳護奮勇力戰復埽平兗曹沂積賊奉

旨賞給頭品頂戴苗沛霖復叛江北震動

上命國瑞幫辦江北軍務八月國瑞率三千人進援蒙城初苗沛霖之  
圍蒙城也城中兵少食盡賊環城築壘城外百里皆附苗民圩與相倚

角他軍援蒙者壁數十里外國瑞至攻紅里圩王家窯等處破之連毀  
附圩賊營數十轉戰而前直擣其巢苗逆率死黨迎敵國瑞驅軍奮擊  
賊敗崩潰整軍再戰又大敗之賊乃拒河固守不出日用大礮向官軍  
營中轟擊子落如雨國瑞方閱文書甫離席礮子擊其坐具糜碎國瑞  
大怒命左右置交椅營門外端坐大呼曰我陳國瑞也任爾施礮無我  
則有爾有我則無爾矣賊礮不中相顧大駭遂止不轟擊以長河高壘  
自固國瑞一日乘黑夜大雨令將士涉河潛入賊船斬守船賊數人奪  
其船爲浮橋進逼賊砦立營五大座背水爲陣奮呼搏戰連破老巢生  
禽苗天慶等斬萬餘級各脅從返正均散遣歸農苗沛霖旋亦爲他軍  
殲斃僧忠親王以國瑞破賊功奏請以提督記名簡放

特賞三代一品封典

賜福字班指荷包人參各珍物同治二年四月授浙江處州鎮總兵時  
官軍圍金陵急賊糾合陝西皖豫各省髮捻數十萬赴援髮酋陳德才  
屯踞麻城縣之白杲鎮五月國瑞奉

命由皖豫入楚剿賊賊築壘數十座樹木柵繇互四十里與皖楚各官  
軍相持月餘不下國瑞始至兵纔八百人不俟大軍齊集卽於是日三



更分五路進兵拔其土壘禽斬大小頭目百餘人餘賊驚潰下竄未抵麻城時有言國瑞逗留異志及國瑞至一戰破賊湖廣總督官文聞捷大喜飛報僧忠親王王至國瑞單騎往見言狀王聞於朝仍命國瑞回營督兵追賊於蘄水蘄州羅田廣濟等處至冶溪河與賊大戰殺賊數千人賊敗奔潰竄至英山霍山之界眾尙數十萬國瑞與楚皖官兵合勢剿殺賊亦糾各黨分隊迎敵正酣鬪間賊目忽見國瑞旗幟驚曰此紅孩兒軍也遂大潰勢如山倒禽偽端王藍成春於陣偽將馬融和等乞降陳得才服毒死遣散脅從難民數十萬人皖北大定十一月河南巡撫張之萬奏調國瑞駐光州堵禦捻匪擒酋張總愚犯鄧州僧忠親王戰不利國瑞督兵赴援卻之四年二月追賊至確山斬馘萬人脅從逃散殆盡賊僅存馬隊由確山竄汝甯歸德至山東濟甯沂州又繞道由江蘇境竄曹州飄忽千里僧忠親王亦以馬軍追及賊回顧國瑞步軍未到率其精銳併力迎戰忠親王遇害迨國瑞至官軍已潰勢不可支次日國瑞收集敗軍泣諭將士曰我軍數年以來戰無不勝今賊如此詭譎喪我親王誓與決一死戰諸軍願從者隨不願者聽言畢策馬前進從者僅數百人大呼搏戰無不以一當百賊敗遁

尋獲僧忠親王遺骸負入曹州城自去頂翎素服治喪嗣以失王各督撫及統兵各帥俱獲嚴譴惟國瑞以力戰貸而言者不已奉旨免幫辦褫黃馬褂國瑞以傷病乞歸就醫固請始允旋因事革職同

治六年十月

特召入都

賞頭等侍衛七年正月捻逆張總愚北犯保定京畿大震

命國瑞統神機營軍二千駐易州防護

西陵賊擾安肅距

陵不遠國瑞遣人語賊曰陳國瑞在此可來拼命也捻懾其威不敢犯

易州境

上命大學士李鴻章督師以國瑞隸其軍又駐軍清化鎮以扼東西要

隘堵守月餘四月間張逆勢熾陳振邦戰沒唐縣郭寶昌受傷荃孫謹案時陳

振邦隸銘軍郭寶昌隸英翰軍與國瑞無涉賊將北犯國瑞星夜馳回直隸繞出賊前拱衛

京師西捻平論功復提督

賞雲騎尉世職請假南歸寓居揚州數年與李世忠構釁經大學士會

國藩奏革世忠職降國瑞為都司光緒元年復以總兵詹啟綸毆斃胡

士禮事牽連削職戍黑龍江八年十二月三十日以傷病卒於戍所年四十六九年七月戶科給事中鄧承修上言敘國瑞功請旨量予褒卹嗣翰林院編修尹琳基等復請在山東建立專祠皆從之尋奉旨復總兵許其歸葬立兄子觀全爲嗣賞還雲騎尉世職



續碑傳集卷五十二

江陰繆荃孫纂錄

武臣五

鮑忠壯公別傳 宋孔彰

鮑公超字春霆四川奉節人也咸豐初入向忠武公榮軍擊粵西賊未  
 幾以病還長沙落魄欲死復入湖南軍後屬塔齊布公稍稍以勇略聞  
 時曾文正公治團練招水軍乃拔為哨官隸楊公載福麾下嘗乘單舸  
 為前鋒樹鮑字幟縣紅綾丈餘以自異曰戰勝令人易辨也從戰洞庭  
 克岳州平沿江賊壘抵金口補千總克武昌漢陽補守備克蘄州田家  
 鎮從攻斷橫江鐵鎖焚賊舟得花翎都司武昌再陷文正已至南昌於  
 是公屬胡公林翼回駐金口胡公為湖北巡撫大治水陸軍拔公為營  
 官水陸會攻漢陽漢鎮獨破宗關石城登岸殺賊獲大礮二尊奪快蟹  
 二艘乘勝出襄河口賊以鐵索貫船作浮橋截河公督七哨官一鼓而  
 進用椎斷索燬浮橋獲三版七輜重三百餘船又攻破晴川關木城二  
 胡公之營高廟黃州德安援賊麇聚圍攻甚急公以單營飛權馳救力  
 戰卻之胡公由是益知公視為布衣交嘗呼為弟公初字春亭因改亭

爲靈狀其勇也再克金口功最升遊擊下樊城武昌克蘄州九江遷參  
將時上游江面肅清胡公令公赴長沙募三千人改統陸師號曰靈軍  
七年攻小池破賊孔壠援黃梅毀億生寺賊壘戰一日夜傷左鄰右臂  
鼓音不衰於是大破賊生禽僞丞相等四百餘名斬首五千級授副將  
加總兵銜又焚黃梅後山賊屯進駐宿松二郎河攻破涼亭河祝家塆  
賊壘僞英王陳玉成率數萬眾踞楓香驛仙田鎮進擊大破之奪賊壘  
十三明年援麻城克黃安會多隆阿公進窺太湖公攻北門燒賊火藥  
局連破雷公埠石牌沿河東岸賊壘十六斬馘萬餘級  
詔補湖南綏靖鎮總兵進逼集賢關直抵安慶省城會江浦浦口六合  
六安三河官軍失營壘百餘座陳玉成合凶逆之眾乘屢勝之勢復糾  
捻渠張浴行龔瞎子眾號六十萬上犯舒桐潛太復失江甯將軍都興  
阿公令公退駐二郎河遏賊衝公身先士卒以寡擊眾大破賊於宿松  
東北斬僞天將成天侯殲賊八千有奇九年十二月進壁小池驛時曾  
公駐宿松胡公駐英山公與多隆阿公爭赴前敵多公欲退公不可曰  
東南半壁安危在此一舉乃下令軍中夜半秣馬厲兵以待師出請所  
向公曰惟吾馬首是瞻於是銜枚疾走十餘里聞四面刁斗聲繚且急

公勒馬顧諸將曰若試看此何地也天將曙共辨切乃在賊壘叢雜中

咸相顧失色公曰勿怖吾與若等同受

國恩當以死報皆感奮涕下爭效死公手先然巨礮聲震若雷賊睡酣忽聞礮聲驚起見公軍共嗾爲自臨絕地圍益堅公望見僞英王黃蓋羽葆立馬指揮直赴之賊陳亂後者繼進呼聲震天莫不以一當百遂破賊七十餘壘克太湖潛山當是時霆軍之名聞天下

天子褒功加提督又憫公勤勞久

賞假三月省親養傷然公所部不過三千人恨未竟其用曾公與胡公書曰春霆近來戰功比多更偉可令統萬人於是增募新軍復出曾公已進祁門以公爲游擊之師時僞堵王黃文金由浙江犯江西僞忠王李秀成由蘇州蕪湖上竄徽甯徧地賊氛以大圍包裹祁門斷景德鎮糧路軍書梗阻公縱橫盪決大破賊於夥之盧邨再破於休甯萬安街左文襄之援景德鎮也待公會戰因大雨遲一日左公先假霆軍旗幟賊見大驚敗走比偵知公尚未至復回踞羊塘謝家灘築壘三十餘公馳至大戰斬首逾萬黃文金負重創遁賊竄建德又敗之復其城旋援安慶大破賊於赤岡嶺下堅壘四礮賊首劉瑋琳十一年六月秀成以

金陵賊眾擾江西連陷二十餘城踞瑞州奉新靖安安義逼省垣公移師援剿大破賊於樟樹斬馘萬餘河中積尸塞流遂解撫州圍時江北賊熾曾公檄公赴援甫及武陵渡而安慶復再抵撫州秀成先竄貴溪雙港湖坊合花旗廣匪號三十萬公馳至大破之斬馘二萬餘進克鉛山廣信江西肅清同治元年補授浙江提督賊麇聚皖南東連蘇杭西濱江上自建德東流下至銅陵蕪湖戰爭紛紛公各路策應倏東倏西風馳電掣精銳莫當旣解銅陵圍進克青陽拔石埭下太平涇縣攻甯國大破賊於寒亭管家橋進軍高阻山僞輔王楊輔清匿城中僞保王洪容海等數十萬眾繞城築壘絡繹三十里公擊破之奪望城岡賊四出襲我軍僞循王魏超成列隊胡廬山楊輔清復由大東門出公奮擊皆大奔斷賊數萬於城中分兵躡追殲賊二萬有奇血流標鹵城下楊輔清以單騎逸洪容海自廣德州以十萬眾降料得精壯三千後容海從公轉戰至嘉應州官至總兵是年秋江南大疫軍中死亡相繼公亦病猶能捍蘇杭強寇不使上犯及公瘡一戰大破黃文金於西河灣平八十餘壘皖南肅清會李秀成竄江北破江浦浦口和州巢含山圍石澗埠官軍四十餘日公自青弋江馳救抵無爲州賊聞風解圍去所向



披靡列城皆復禽斬數萬李秀成遁入金陵公渡江軍於幕府山賊夜襲營敗之移駐紫金山連營至孝陵衛斷賊往來要道適青陽復被圍公馳援至三山賊解圍遁追破僞根王藍仁德於曹塘斬級六千賊目張勝祿等殺藍仁德獻頭降收復建平鼓行至東壩踏平城外三大石壘僞隨王楊柳谷率三萬眾頂香蒲伏出降遂下東壩攻句容大戰塔岡城斬賊七千城賊內亂夜縛僞翰王項大英僞烈王方成宗款營五萬餘眾盡降戮二逆於市引兵趨寶堰破堅壘五進克金壇常州賊由丹陽來犯大破之斬首逾萬時二年四月也蘇杭既克賊眾復竄江西踞許灣欲犯南昌分黨蛾聚金谿窺建昌屬縣皆為賊所有江西告急公馳救抵撫州賊自雙鳳嶺琉璃岡九子嶺苦竹沖洲洋至許灣縣互數十里周築長牆牆內壘纍纍如貫公軍裹岡亦深溝高壘若示賊持久者賊稍懈公令曰破長牆決死戰在今日乃分兵趨四隅親督軍擣中堅越五層鹿角而入有部將一人退者公手刃之士益用命長牆破賊不能遁軍亦不得出人人自為戰血濺征袍如洗鎗鐵皆紅圍殺竟日破賊壘一百餘座斬首四萬級拔出難民八千進克金谿瀘溪南豐新城僞聽王陳炳文甯王張學明獎王陶金曾等率眾七萬降卽令前

降將洪容海約也初偽康王汪海洋自許灣大敗後餘四五萬眾竄瑞金後併丁太陽數千人湖州逃匪數千合偽侍王李世賢三江五湖之眾三萬勢復熾回圍甯都連營四十里公率大軍至連破之圍解斬馘萬餘海洋自瑞金復遣偽主將秦彪詐降公下令步伐止齊備之賊果列陳搖旗鼓譟勢驕甚公驟擊之賊驚潰爭入城門際尸積如山城賊開西門遁追至莖田已達閩界是時江甯已克論功加一等輕車都尉世職

錫封一等子爵戴雙眼花翎先是公於三年春丁母憂乞回籍葬親優詔慰留賞銀五百兩經理葬事

天子曰當念移孝作忠之義勉抑哀思俟金陵克復江皖肅清再行賞假以遂孝思至是再申前請

帝許之四年秋賊由閩擾粵東

朝旨促公出五年正月偽康王汪海洋偕王譚體元佑王李元濟踞廣東嘉應州公率大軍五路合擊大破之會大風雨賊夜遁公先設伏黃沙嶂北溪白沙壩等處起擊之尸滿山谷斬譚體元李元濟並酋目數百名降二萬眾粵匪平加雲騎尉世職部將得

賞黃馬褂者三員於是

命公移軍剿捻久追逐於鄂豫之間捻嘗避公不得一戰六年正月遇於安陸永隆河大戰破之追奔五晝夜斬首二萬餘級然公亦病矣

朝廷催入關剿西捻以病未能赴

詔詰責曾公疏解之旋乞假歸

恩賞人獲公英姿剛猛身才七尺高頰目光如巖下電右臂爲礮所傷不便七箸未嘗讀書軍報口授有意理牘尾用左手施行曳筆勁人能辨之馭軍嚴而有恩進必賞退必誅他事不苛細故得士卒死力而樂爲用其進戰也疾如風善用大眾有排山倒海之勢駐軍若不過爭地形而壁如山立不可撼左文襄嘗視其軍指一壘宜改築公曰得勢文襄亦不解其意然敵竟不能近宿松太湖之戰與多隆阿公齊名壁小池驛賊晝夜環攻手持令不得與四旬餘卒以破賊其堅忍如此陳玉成賊中呼四眼狗公嘗曰狗待我豹來食之蜀音鮑豹相近胡公與曾公亦戲曰與君烹狗賀新年蓋以十年三月破玉成也其明年天津夷

兵犯順

文宗狩熱河

詔公入衛會和議成乃止嘗論夷事切齒如私讐每恨不得當而甘心

故朝廷有海防事即起公自永隆河戰捷病歸家居久至光緒六年復

召授湖南提督朝京師未至官會俄人窺琿春

命統萬五千人駐直隸樂亭時曾公國荃駐山海關李公鴻章駐天津

公虛衷咨訪整軍經武四夷憚之屢詔問舊傷公奏盡平復據鞍如常感

朝廷不次付託之重撫衷憤發又其血誠也和約定即撤軍還蜀其後

法兵爭越南又命統眾向太原未至講和罷兵十四年秋終於家

賜諡忠壯三子祖齡祖恩祖祥祖齡襲爵最公提兵十餘載大小七百

餘戰禽偽王數十名斬首三十餘萬級降二十餘萬眾凡臨陳公與部

將各戴品級翎頂珊瑚水晶焜耀炫目不帕首與他軍殊賊一見即驚

爲霆軍棄械跪馬前即不誅殺以此服其威信奉新許公振禕每與余

談公逸事謂許灣之戰雖沙崩鉅鹿瓦碎長平不是過也其立廟豫章

鄉人至今思之霆軍多驍將如宋國永婁雲慶蘇文彪段福譚勝達孫

開華唐仁廉王衍慶最有名

德音傳

吉林通志

德音字潤堂姓何圖哩氏隸蒙古正藍旗世居吉林城北沙河父尤成額謹厚嗜讀書步趨宋儒爲左翼官學教習垂五十年學生頌之不置事繼母孝妻闕有懿行亦知書德音其長子也咸豐二年以附學生委筆帖式從征粵逆戰江皖之交有功

賞藍翎五年戰江浦縣七年戰淮安徐州府境甚力

賞換花翎歷擢佐領明年隨欽差大臣勝保剿北路捻逆破賊圩十餘以協領卽補九年以病乞回旗同治元年起授協領明年署阿勒楚喀副都統奉天昌圖廳盜犯王五糾眾劫略闖入吉林旣擊走之餘賊據

通溝岡率軍殄除殆盡加副都統銜卽眞四年入覲

命署吉林將軍有頃奉天遼陽州賊起官兵失利賊北走

詔吉林嚴防又以吉林伏莽甚多

詔並爲備當是時吉林各軍悉調東南討賊疏請神機營留演吉林騎兵百爲奉天所截留調回禦賊者再及請徐州軍營所撤官兵馳回原

省

詔並俟尙書文祥至奉天後商辦不得已乃練民團勸闖捐資餉之  
賊渠劉果發尋竄出圍場據一拉溪岔路河擾及旁近而王樂七馬俊  
子周榮暨各黨一時蠶起山中諸匪尋聲響應之佐領保隆參領常德  
等先後戰沒於是伊通長春雙城五常伯都訥拉林阿勒楚喀無慮皆  
賊矣伊巴丹站道爲梗賊逼烏喇街去會城裁七十里會城故土垣德  
音擁市人以守莫不危之而其氣殊厲徒步雜士卒巡徼會劉果發周  
榮相繼斬獲疏調留演出征軍皆回援文祥及署黑龍江將軍寶善奉  
詔遣軍與蒙古郭爾羅斯兵以次至聲威旣壯兼部發餉銀五萬兩士  
飽馬騰羣賊略就殄餘散走諸山中鬍子由是萌枿焉鬍子吉林以稱  
盜厥後邊防宿重兵時肆劫略不敢輒揭竿然有數十人連陷二城易  
勦而撫者日益滋甚民不聊生乃懸之著令獲鬍子五與優保而將領  
以下往往誣良爲盜以期得保有司鞫非實出之則譁爲賄縱於是歲  
誅千數百汔不少衰其放卡之兵首鼠兩端爲德於盜者閒有之而吉  
林地瘠早寒穫少一夫所受什古制猶贏中田而廬無守望之助故鬍  
子易逞爲之策者宜去優保之令仿富俊屯堡其民資無籍者部勒之  
使屯田邊界庶有豸乎明年德音丁父憂百日孝滿回阿勒楚喀本任

部議禡職治陷屬城罪

穆宗以籌兵籌餉卒保會城改革職留任六年調吉林副都統尋署黑龍江將軍明年春疏請緩呼蘭廳所屬巴彥蘇蘇等處被災租賦及齊齊哈爾城黑爾根城旗營屯站歉收請借給籽種口糧以安災民八年夏

詔簡馬隊五百遴員率赴甯夏將軍穆圖善軍疏言治裝銀貸自商人應由部撥款以償

詔如所請秋卽眞十年以黑龍江附近蒙古荒地例禁開墾杜爾伯特協理台吉那遜烏爾吉等擅行招墾止之不聽而副管托蒙阿等復以努毓河北克音河南之荒地擅請撥放分別劾罷之十二年疏陳餉絀

請  
飭部咨會各省協餉依限解清並補歷年積欠及吉林黑龍江山場荒地招墾後或窩藏匪盜現已編查戶口以絕其源呼蘭等處雖禁止開墾仍有奸民土豪承攬地畝轉售漁利等弊請

飭部定章示懲又黑龍江新設理事同知所轄遼闊人雜事繁銓選之員經年始至請以此缺歸奉天揀發人員內遴補庶邊地收得人之益

又奉天旗民近年徙吉林黑龍江者多至千餘戶請  
飭該將軍下所屬旗佐隨時稽察期有限制

詔並從之明年春卒

穆宗悼惜焉

賜祭葬如故事諡曰莊毅

子其子忠清藍翎侍衛

關保傳吉林通志

關保姓烏扎拉氏吉林人隸滿洲正黃旗道光六年及十年再從征回  
疆有功二十三年歷擢三姓佐領咸豐三年隨侍郎恩華剿粵逆戰河  
南懷慶府山西平陽府並捷還屯保定欽差大臣勝保檄充營總率所  
部剿深州靜海餘賊還攻獨流鎮功多擢協領

賞戴花翎明年隨參贊大臣科爾沁郡王僧格林沁自獨流鎮躡賊至  
阜城三里莊賊首林鳳翔反戰額中槍丸裹創進賊不支逐北四十餘  
里

賜號昌阿巴圖魯五年調赴安徽會大軍克廬州加二品銜明年隨江  
南提督和春剿五河據賊以所部分伏道左賊出夾擊之賊驚竄多所



斬賊尋偕副都統麟端以騎兵薄賊壘賊三千餘繞襲我後先諸軍馳  
 陷其陳賊卻黃衣賊目三橫刀立馬陳後復麾之進所部槍殪其二賊  
 乃大潰俘斬千餘夏隨僧格林沁蹙賊山東高唐州之馮官屯殲焉已  
 調湖北尋調河南又調安徽當是時吉林馬隊名天下東南水陸軍恃  
 以相輔故諸帥銳欲得之令甲功上克城騎所長野戰故以數十日奔  
 命三省勞則甚矣關保既赴和春軍道敗邳州援賊解壽州圍毀賊壘  
 二尋擊賊潁上縣高橋及八里河十八里鋪小青龍尾小河沿五戰皆  
 勝秋移隸河南巡撫英桂軍敗賊馬村橋進亳州雙溝遇賊姬橋殲之  
 又連敗賊三丈口舊縣集安徽巡撫福濟疏調赴蒙城英桂疏請留豫  
 詔兩撫和衷商摧俾先所急時方率軍趨懷遠聞捻逆逼徐州越境助  
 擊勝焉漕運總督邵燦又疏請暫留徐州  
 詔如所請七年偕總兵史榮椿馳永城岳家集掩取捻逆李月月先遁  
 焚其巢尋以病歸明年天津警  
 詔起之冬

命率吉林黑龍江察哈爾兵千八百赴太僕寺卿袁甲三徐州軍九年  
 春與宿濰兩營騎兵分路攻滄北捻逆曹金斗金斗據圩死守圍而臨

以火器賊眾亂破之乘勝疾攻張寶全復破之而懷遠逆首張樂行以步騎萬餘陷泗州據草溝民寨北築一圩爲犄角關係合民團進奪圩外礮臺燬其圩寨賊出不意大驚則開東南門分竄自相踐蹋死濠閒纍纍其逸出者躡擊之屍積數十里河水爲不流至五河雙渡口餘賊方奪船爭渡我騎然槍排擊復殪大半斬馘外獲長髮賊渠張起等三百有奇及軍實甚夥

詔以副都統記名時徐州鎮總兵傅振邦督辦三省勦匪事宜

命爲幫辦攻逆首任乾於畢圩未至適捻逆張天福敗鳧澮水擊斬之師進任乾突走不得反入圩乘勢壓攻圩民內應斬乾殲其死黨千餘無脫者夏

文宗罷副都統伊精阿河南防軍

命接統之督辦河南勦匪事宜仍爲傅振邦幫辦尋授黑龍江副都統秋捻逆犯亳州遣將敗之時逆首孫葵心聚黨於永城分起齊出詔江蘇豐碭等處賊勢將蔓延未可更令闖入山東邊境宜督參將承惠等截賊西路逼之歸巢旣而葵心分擾商邱柘城圍睢州且至杞縣開封戒嚴

詔赴援俄承惠挫於亳州賊趨蘭儀分擾通許尉氏益近會城急自鹿  
 邑馳抵陳留令諸軍夾擊偕巡撫瑛棨疏聞

詔責徒事尾追著著落後未幾賊南走許州告警馳援之而賊由臨潁  
 趨舞陽復分緣鄆城之洪河而西期於舞陽復合令副將王鳳翔率騎  
 兵馳扼洪河自以步軍繼進鳳翔擊賊洪河北岸敗之明日賊攻臨潁  
 督諸軍戰城下有劇賊擁燾自其陳呼嘯出賊眾從之勢張甚我軍殊  
 死戰陳禽擁燾者葵心親屬孫套也賊氣奪遂潰逐之並敗其踵至者  
 夜逃精騎劫賊營又大破之拔難民千餘斬馘無算賊遂東奔偵別賊  
 竄扶溝太康要之王隆集復敗而奔於是南路餘捻還巢北路亦三戰  
 三捷河南肅清明年

命勝保督辦河南剿匪事宜關保仍為幫辦賊擾虞城夏邑鹿邑遣將  
 擊走之賊俄又大至逼近會城

詔詰關保駐鹿邑何以未截擊致賊深入令勝保據實以聞勝保疏陳  
 河南鄰賊之處袤延千里無險可扼加兵力單薄防務視他省尤難此  
 次賊近開封關保方歷周家口至項城汝陽扼勦東路聞警即由睢赴  
 援忠誠勇敢眾所共知復言其敗捻逆蔡溝追至槐店斗門斃賊數千

狀

詔獎之尋戰汝甯確山魏橋皆勝秋賊窺鹿邑既設守仍遣將破之劉集並解邱集之圍賊尋復糾眾來攻遣將閒道出賊後與城中軍合擊賊大敗遁於是河南再肅清尋以舊傷發給假調理同治元年之任黑龍江八年卒

德玉傳

吉林通志

德玉琿春人其氏與所隸之旗未詳善火槍暇走一騎獵山中百發百中同治四年吉林所在皆賊賊窺會城有備遂竄甯古塔逼琿春時軍興徵調四出德玉雖以防禦留而守望不具賊至趨東門徑入舉城沸然德玉槍而騎獨馳逆之一槍賊渠殪再槍賊執旗之目殪賊連喪其酋大懼又沸聲四起慮有伏且自來無單騎臨戎者乃疑而遁以功擢協領是役以一人全城在古亦罕曾幾何日他事實乃一無所傳即此傳於誰何亦幸耳惜哉

花哩雅春傳

吉林通志

花哩雅春吉林人其氏與所隸之旗未詳咸豐初從征新疆以戰創回旗調理道出奉天廣甯時馬賊不靖擾及

興京廣甯民懼將他徙謂曰無懼賊眾烏合耳吾戰天山瀚海閒嘗以百人破敵二千今從者四十人雖創殘之餘皆經百戰矧有城可憑何懼哉由是民恃以守賊至擊去之積前新疆功授盛京副都統當是時賊有竄吉林者而敗或獲其礮則

興京守

陵者也署將軍德英以聞

詔下其事奉天奉天覆言

陵礮無恙會德英以憂去繼者亦疏言覆驗非是也

馮軍門傳

陳繼聰

馮公標字雲卿湖南衡陽人生而膂力絕倫兒時嬉戲有物赤而毛與搏物不勝逃去攬得臂上毛長數寸以視其父父頗異之及長不治生產任俠自喜爲衡州協鎮標兵尋補外委咸豐四年隸彭公玉麟爲水師哨官以勇健稱遷至千總明年冬水師中營改陸軍命鮑公超領五百人爲一營號爲霆字營以鮑公字春霆也公實總其營務營務之職不在陷陣攻戰而霆營最號敢深入公每戰必先登戰黃梅中礮丸自左額入出於右頰骨碎血溢公益大呼期必破賊乃還兵眾壯之莫肯

返顧遂破賊四十八壘鮑公驚歎卽上狀幕府擢都司八年戰漢口黃安麻城十一年戰黟縣羊棧嶺廬村援江西追賊豐城赤岡嶺皆有功累遷至記名總兵

給赫勇巴圖魯名號仍領鮑公營務如故同治元年大軍旣克安慶進圖金陵公從鮑公由仙人橋往攻新河莊之賊營二年十月破之尙有東夏四壘爲建平東壩之關鍵鮑公令公屯軍東夏賊恃牆闊濠深堅伏不出公逼其壘手刃悍酋諸將周有勝王衍慶遂率眾進一鼓而登四壘悉平於是東壩守賊黎之新建平守賊張勝祿通書大營請以城降侍郎彭公玉麟與鮑公定議自任東壩而以建平撫事使公往公入其境宣諭利害張勝祿等十三人感極涕零矢志不貳卽於是日斬僞王藍仁得舉城以降而東壩亦克復公仍從鮑公駐守東壩爲金陵游擊之師旋授涼州挂印總兵官三年六月江南平定

天子嘉公功

賞黃馬褂

賜獎武金牌記名以提督簡放加一級明年解營務將赴任涼州而關中回部亂鮑公亦奉

命赴陝甘軍先還夔州別將領其眾從江西沂江入漢公與同行至金口湖廣總督用藩司議約其軍留金口待餉士已怨望餉又不時至眾大譟散走者五營多兩廣降寇結陣而行欲還其鄉所在輒以叛卒待之又不敢逆戰眾益狂恣頗殺官吏然南走如故取閒道行不犯大城州縣望風失守一年乃破散云初亂統將逸出將上變公亦先至漢口自請署己名竝上或曰此當有罪君無爲豫其事公歎曰是何言歟標自領營務十餘年今雖爲客然同行不能約束而使代者一人獨當罪非義也卒署名俱奪官聞者冤之公自若也鮑公益愧負之請與俱行未幾鮑公移軍福建廣東平嘉應州奏公功復原官六年從征擒寇感疫疾舊創亦發卒於軍年四十大帥曾文正公奏敘公忠勇得以提督立功病故例優卹入祀京師昭忠祠公爲將雄猛無敵冠於一時而行軍紀律極嚴自筵營以殺賊稱最由是楚蜀驍桀之徒歸者日眾所過擾民公獨約束如軍法暇輒引悍卒與之談天道禍福冥報不爽語甚剴切軍中頗有所悛感故所至民思之曾文正公尤以是惜公馮氏在靈營者曰定國曰星均以勇烈著定國以干總攻太湖死在咸豐九年星以游擊從征擒寇陷陣死卽公歿之歲也

論曰自寇難起霆營最多驍將馮軍門與宋元戎國永尤著名其左右主帥埽除逆寇二公功亦相同也若馮軍門當金口兵變時以客將而甘與統領均罪尤有國士之風豈僅糾糾武夫以折衝禦侮見長哉

副都統銜哈密辦事大臣兼署烏魯木齊都統保公行狀

劉達善

公諱保恆字艾峰其先爲元裔蒙古博爾濟吉特氏始世垂爾札爾天聰八年以兀魯特貝子部落來歸隸滿洲正藍旗授二等輕車都尉二世巴朗順治初肅親王徇山東豫親王徇陝西江南閩浙與有功晉一等輕車都尉加一雲騎尉

覃恩遞晉二等男三世拉普齋以討平吳世璠敘功晉一等男加一雲騎尉至六世多隆武例改至一等輕車都尉加一雲騎尉罔替是爲公祖多隆武公生尙安泰尙安泰公生公公生八歲而孤嘉慶七年襲世職十八歲引

見以旗員用歷升印務章京副參領道光十七年揀發陝甘以參將用歷署甘肅慶陽營陝西西安城守營參將潼關協副將二十四年補甘肅靈州營參將明年署甘肅提標中軍參將是時候官林文忠公則徐自戍所還攝總督特章薦公擢甘肅中衛協副將檄署陝西西安協副



將文忠旋去後來者益倚公歷署陝西延綏甘肅甯夏兩鎮總兵二十九年調補陝西洮岷協副將尋以堪勝總兵膺薦入都三十年二月文宗顯皇帝召見問陝甘營制利弊悉對稱

旨四月簡放直隸大名鎮總兵數

召見八月調江南徐州鎮十月調直隸通永鎮

陛見明年咸豐改元於是

上謁

東陵通永鎮駐盧臺屬甯河縣故事於通州迎

駕隨之隆福寺復送之通州自通州至隆福寺四

召見數

賜食最後見時適左足爲馬蹠傷跛不能前中官扶掖之入

上問之加勞慰

命郡王僧格林沁與之藥且諭旋鎮毋送遂歸二年署直隸提督先是

長髮賊起粵西殘楚皖破江南分道北犯直隸總督訥爾經額防臨洺

關公奉

命自古北口移駐保定賊犯山西公移故關賊越太行襲臨洺公移正

定所當皆賊衝至是日益迫賊突柏鄉樂城相距數十里公以兵二千  
守滹沱河宣稱二萬多張旗幟日夜望伺躬不解甲所部多客兵新募  
或請入保定公知其意斥之屹不動賊乃徑藁城趣天津識者謂賊  
不北而東使京都得嚴備諸將得躡討公之功為多初公之在保定也  
上以某尙書駐保定公數以兵事要害爭尙書不能難會臨沼關陷訥  
爾經額罷尙書攝總督因京東鹽匪亂疏請公旋通永鎮沿塗捕匪保  
定距盧臺為程十一公且捕且行旬有二日至鎮而尙書遽以遷延奏  
劾部議降二級調用四年正月旋京故事必引見分内外用公稱疾不  
出亦不辯四月

特賞頭等侍衛授塔爾巴哈臺參贊大臣數

召見問足疾愈否及降調之由具以對嗣調烏什辦事大臣九年足疾  
發乞歸明年八月

上幸灤陽京師士大夫或託故去位居者輒遷徙公曰吾年六十六未  
見有死可避者屬家人皆弗去遂起病詣

行在

召見

賞頭等待衛十一年四月加副都統銜授烏魯木齊領隊大臣同治二

年三月署古城領隊大臣四月奉命之哈密查辦稅務積弊得實奏擬如律旋古城三年六月調哈密辦事大臣先是蔥嶺以南漢回叛陷庫車喀拉沙爾嶺北亦煽變犯古城公擊退之會烏魯木齊漢城自陷滿城求援於伊犁遲久不至亦陷嶺遂踞於賊南北路絕伊犁自衛於西東則哈密巴里坤皆倣擾於是公

始奉

命兼署烏魯木齊都統駐古城辦防守事宜疏請以庫爾喀喇烏蘇領隊大臣惠慶署古城領隊大臣未報而賊犯濟木薩古城漢城兵潰遂圍滿城急公在哈密卽發足疾至是益甚策杖登陴揮淚誓眾城中男婦老穉合數百人賊什倍之槍礮矢石不絕聲二十餘日抵死殺賊數百無異志而饑盡援絕慷慨發憤疾轉劇以十一月三十日卒於軍年七十方疾亟時以領隊大臣印授惠慶曰古城北路之吭無古城全局沒矣遺疏陳兵事危險狀不爲子孫乞恩惠慶以聞賜卹如副都統例公元配索綽絡夫人無出繼配伊爾根覺羅夫人生子錫縝女一側室

封張夫人生子錫綸女二長女先卒錫綸咸豐丙辰進士三品卿銜  
戶部銀庫員外郎錫綸以刑部主事隨任古城得視舍殮奉公遺屬不  
發喪權厝於官署後與惠慶守城益力越六十餘日圍不解明年二月  
初九日賊潛以地雷轟破之城陷惠慶死之張夫人率繼媳烏蘇氏暨  
次女幼孫縱火自焚闔城巷戰多死錫綸視火發以百餘人血戰突圍  
東走九十里明日至奇臺縣僅七十人得脫是日賊走烏魯木齊十三  
日錫綸急歸古城求得公柩及張夫人暨其妻妹等之尸又得惠慶尸  
皆移厝奇臺城北且掘取領隊大臣印救官兵婦女傷未死者數十人  
以歸奇臺鎮迪兵備道文麟在奇臺以聞

賜旌卹而

諭留錫綸於軍錫綸奉伊爾根覺羅夫人在京供職以公盡瘁危疆家  
屬殉節上書大農疏請得

優卹如副都統軍營病故例錫綸既留文麟軍營帶勇接仗濟木薩三  
臺等處多失利五月奇臺陷文麟走巴里坤而令錫綸北赴科布多調  
蒙古兵九月差旋文麟已走嘉峪關奇臺克復後又陷賊張甚錫綸乃  
以舊古城滿兵數人自鄂倫布拉克軍臺改裝徒步牽一老駝不鳴者

蹴冰雪數尺潛至奇臺城北往返七百餘里凍餓瀕死竊負其父母妻  
妹及惠慶骸骨以十二月歸科布多明年二月參贊大臣廣鳳以聞且  
請以舊古城兵十人由北路蒙古軍臺送柩旋旗

報可錫綬於是乞假出張家口以四月三十日與錫綸扶柩到京

上遣禮部侍郎宗室縣宜致祭

賜全葬祭銀如例五月二十日葬於東便門外運河南半壁店之新塋  
錫綸以卹典例得引

見蒙

恩擢本部郎中

朝廷所以酬公者厚已公幼有至性事太夫人鈕祜祿氏孝舊例世職  
不得與試遂棄舉子業博觀史書講求經濟及

國朝掌故精騎射自矢爲

國宣力卒以無負其言生平愛友朋重然諾所至遇鄉人死亡無力者  
必資以歸持躬清嚴而同列佐校下逮亭公弩父莫不依戀其恩每遷  
徙多涕泣願留者達善與錫綬同舉順天鄉試於公年家子也獨恨未  
見公願與錫綬游知其學之有自而林文忠一代偉人謫戍新疆過西

安與公一見如舊相識竟日夜談天下利病後皆如所論北平徐松知  
榆林府時輯蒙古源流攷輒商定於公由此觀之公之設施未竟也

宋軍門傳 陳繼聰

宋公國永四川人生而趨健膂力絕人家貧落拓困於風塵無有知其  
爲干城材也咸豐三年湖南在籍侍郎曾文正公奉  
詔督治鄉兵乃駐衡州造戰艦創水師而以鮑公超管領之鮑公與公  
爲同鄉方編立霆營招伙輩之士爲己助公乃應募隸其部下遂從鮑  
公克湘潭取岳州收復武昌皆預其役四年九月大軍攻田家鎮賊據  
半壁山以巨礮轟擊公船當其衝簸盪落水賊圍攻之公猶於洪濤激  
浪中躍立船背死戰會李忠武公兵至賊大敗遂平田鎮鮑公上其戰  
狀巡撫胡文忠公歎爲壯士由把總擢都司是爲公立功之始而威名  
亦漸著矣六年水軍改爲陸師公充營官七年進攻小池口破黃梅等  
處悍賊八年收復麻城黃安迭平雷公埠石牌賊壘循集賢關抵安慶  
是時寇氛正熾僞英王陳玉成方鳴張桐舒開李忠武以楚湘百戰百  
勝之勁旅至敗沒於三河而一遇霆營無不披靡鮑公一軍聞天下得  
公之力爲多云十年克復潛山太湖破賊營百餘里湖廣總督官文恭

公遂與胡文忠公銳志圖皖而曾文正公亦挈鮑公渡江駐師祁門然  
四面皆逆壘勢岌岌鮑公固受知於曾公最深者至是誓解其圍乃由  
漁亭進攻休甯大戰於羊棧嶺卒保祁門轉危爲安惟公實左右之敘  
功擢至記名總兵明年援期江西景德鎮破洋塘等處之賊進復建德  
再援江西解瑞撫二州之圍仍馳回安慶協克省城會布政使曾公國  
荃往取江甯直抵雨花臺首逆洪秀全大懼分黨竄擾於是南岸如甯  
國青陽銅陵涇縣等城北岸如無爲州巢縣含山和州等處各爲王擁  
悍卒蠶屯螳聚彌漫千里內官兵望之失色謂其勢盛不可圖也賴霆  
軍奮勇馳擊使賊首尾不相顧大小百餘戰公爲前鋒無不身先士卒  
陷陣衝突賊見霆營旗幟畏之若虎百萬紅巾至是不啻摧朽拉枯同  
治三年六月大軍遂克江甯省城論者謂曾布政雖能堅忍耐苦然兵  
頓於堅城之下久則必至糧匱士惰若非彭侍郎楊提督水師由上流  
而下與霆軍埽除四出外應金陵老巢未易克也曾文正公疏奏霆營  
諸將功鮑公之下以公爲第一擢記名提督授雲南鶴麗鎮總兵官以  
兵事尙棘仍在軍中未赴任當江甯之將復也賊知不可守冀竄伏江  
西延其殘喘先以逆酋汪海洋李世賢趨入撫建鮑公知之卽移師往

詩之連克金谿南豐新城瑞金四縣追賊至福建境江西全省肅清四  
年二月霆營因關隴亂由閩赴甘暫住江省俄而軍士以索餉鼓噪幾  
至激變公素為眾推服再三開導言於江撫沈文肅公發餉銀十九萬  
餘兵心乃定尋馳援廣東克復嘉應州城五年擒寇大擾河南湖北  
詔命鮑公督軍往剿公遂由鄂入豫追逐襄宛之閃以遏其衝六年三月  
鮑公患病奏請解職回里湖廣總督李公鴻章令在營調治而命公與  
提督唐仁廉統其軍凡三十餘營適賊竄犯雲夢應城天門諸縣李公  
急檄霆軍至鄂分屯要隘五月公自隨州回旆西向大破捻渠任柱賴  
文洗之眾於安陸等處餘賊走南陽楚疆告靖已而曾文正公奏裁霆  
營唐提督奉檄率騎兵北征擒寇而東南已底定公亦息汗馬之勞矣  
後因兩江總督李公宗義之奏駐防鎮江整飭戎伍操練不倦萑苻斂  
戢民皆安之光緒初閩浙總督何公璟以福建巖疆亦需宿將鎮守調  
公至閩四年五月創發疾卒督臣具疏以聞  
命照軍營立功後病故例從優議卹並入祀四川湖北昭忠祠公起田  
閒入戎籍自咸豐三年至同治六年始征粵寇後討捻逆歷十五年之  
久躬擐甲冑衝冒矢石戰必先登金創徧體而勇氣不少挫時霆營驍



將著名者不可勝數公實爲之冠每當軍事顛危主將受創士心惶恐公獨不懟不悚全師而歸秣馬厲兵以圖再戰眾志藉以鎮定至其持身廉正爲人和易可親不以戰功自詡尤爲武臣中所罕有云論曰宋軍門賢將也其時統帥固勇略蓋世而成其名者實賴宋公之助乃能有功不伐謙以自下於是軍心益加輯睦卒佐鮑公協取金陵戡定大難殆與唐阿跌光顏一輩比烈矣嗚呼亦赫濯景鑠也哉

魁玉傳

荆州駐防志

魁玉字時若滿洲鑲紅旗人京口副都統額勒精額次子性忠孝以功業自期童子時卽席賦詩見賞於湯敦甫相國事父母極得歡心受室後奉養愈謹遇督責夫婦長跪聽受父母歿哀毀幾至滅性春秋祭涕泫泫下其孺慕至老不衰由二品廕生歷擢涼州副都統咸豐初會同侍郎會國藩提督塔齊布截剿上竄逆匪經將軍官文奏留楚北辦理軍務歷復武昌沔陽漢陽漢川黃州蘄州蘄水廣濟黃梅麻城螺山新隄洪湖沌口大小軍山等處當克沔陽時腰與左骹受重傷得長子札爾哈蘇左右護持振臂再戰再克

賞戴花翎五年荆州戒嚴

詔署荊州右翼副都統堵剿襄河一帶五月調江甯副都統在金陵小水關攻剿四載餘身經數百戰嗣守丹陽與賊戰刀傷右眉深寸許血溢盈斗是時四子墨德哩隨征割袍裹創手刃數賊賊懼而退八年署江甯將軍十一年幫辦鎮江軍務同治三年四月克復丹陽

賞隆阿巴圖魯名號六月克復金陵

賞雲騎尉世職自軍興以來十餘年玉轉戰湖北江南犯霜露冒鋒鏑瀕於危者屢矣戰功盛著降者給金遣散盜咸爲民其勇而有仁如此十二月調京口副都統四年五月補江甯將軍金陵新復與曾文正李傅相籌辦善後事宜七年入覲

賞紫禁城騎馬九年署兩江總督兼署通商事務大臣十年調成都將軍成都事繁劇夷務民教多棘手悉心籌畫措置得宜駐防丁多額少奏添養育兵百名部議從之光緒三年舊傷發乞骸骨歸出千金以助鄉黨困乏興書院助鄰振凡善舉皆樂爲之喜吟詠有翠筠館詩卒年八十

賜諡果肅

郭武壯公家傳

郭嵩燾

公諱松林字子美湘潭人父縉修有學行名能書畫生平應人之急不爲有無計人稱長者公少跣弛不羈以武健魁奇自喜讀書略觀大意嘗發憤言功名惟意指取度其父世儒不敢開陳己意一日適市聞威毅伯曾公提師出吉安卽走赴之於道見鬻馬者驅馬數十睨其一駿馬也披取樹枝斷而挾之爲箠出不意騰躍馬上急鞭之一日夜馳數百里曾公奇其貌留帳下每戰先登無當其鋒者稍領一軍攻城陷陣功常最肅毅伯李公援上海詣曾公言曰某軍新集願得强悍如郭某者倡勇敢導先士卒曾公慨然資以行公益自奮堅城大敵以身當之不爲前後顧慮而所至亦皆應時奏功其克無錫也方相持搏戰而公閒道率輕騎掩至薄城急緣以上賊噤不得施諸軍亦皆驚顧相咋當是時郭軍剽悍之名聞天下旣克常州定諸城邑遂復蘇州始以參將從李公洵至提督授福山鎮總兵功益高名益顯而未嘗以勳績自多平居恂恂虚心善下於諸將帥皆得其歡心積功敘階聞其超遷咸喜相告以爲宜莫有忌嫉李公所部諸將皆淮人負氣陵上一語不得怒嗔相諍是以李公尤倚重公如左右手焉李公臨事尤持大體方蹙捻匪山東李公駐東昌與山東巡撫丁公分河爲守而劾奏山東守將失

律事丁公大憾公曰臨敵將帥不和於兵法爲大忌且山東主人而我爲客客下主人在禮爲宜乃以李公命詣丁公反復開說二公省悟交歡守河之議始定而事卒以濟公於是時權衡緩急輕重引大局爲喻所保全尤大然則公之功蓋非徒戰勝攻取之爲也初任福建提督未赴改湖北凡再任又改直隸所至兵服其教民懷其德常日夕退坐東堂延納賓友討論古今成敗得失驗知其行事若者可法若者可以爲鑒從容雅歌意量無窮其風尤可尙也公生於道光十三年癸巳歲十一月二十二日卒於光緒八年庚辰歲四月二十一日年四十有一其卒也妾趙氏仰藥殉焉督臣具其事以聞得

旨旌表君子知公所以庇其家者其教又行於女子也

郭嵩燾曰武壯之起於諸將爲晚出其家儒者有士君子之風余自廣東罷官里居武壯亦以憂歸日與往來甚勤未嘗聞其談說戰爭時事也其弟函萬狀其行實求銘亦不詳要其大節表表在人耳目得采掇其大凡揭之墓道其軼事尙多可紀者就余所知缺略多矣然往往有關天下利病大計其語祕非世俗所稱道余竝論次爲武壯公別傳以遺其家藏焉

金順傳 吉林通志

金順字和甫姓伊爾根覺羅氏吉林人隸滿洲鑲藍旗少孤貧事繼母  
孝性忠懿樸勁踰冠從戎崎嶇三十餘年入死出生與軍事相終始非  
偶然也咸豐三年粵逆竄山東隨大軍禦之以功授驍騎校

賞藍翎六年隸副都統多隆阿敗賊湖北麻城蘄州尋破之黃梅縣  
賜號圖爾格齊巴圖魯

賞換花翎九年攻安徽太湖諸賊壘克之明年助楚軍克太湖歷擢揚  
領加副都統銜冬我軍圍安慶逆酋陳玉成擁眾自舒城廬江西上牽  
制我軍勢張甚多隆阿營挂車河嚴陳以待賊徑渡我軍三路迎擊戰  
方酣金順以騎兵出香鋪街貫賊中堅賊卻合軍逐北二十餘里賊壘  
悉平賊渠黃文金渡江規與玉合成逆擊之新安渡蘄甚夥當是時  
多隆阿以荊州將軍將騎提督鮑超將步軍行輒相輔為賊所畏號多  
龍鮑虎東南諸統將無與抗行而金順故多隆阿部將冠擊賊常為軍  
鋒同治元年粵捻合據河南荆子關隨多隆阿攻克之明年多隆阿以  
欽差大臣赴陝西剿逆回率所部從王閣村羌白鎮並賊老巢至立克  
之尋敗賊渭河剗平南岸賊寨

賞頭品頂戴進克高陵縣涇河迤北肅清乘勝破蘇家溝渭城賊巢三年漢南賊東竄鳳翔率騎兵逆擊於灃峪殪之幾盡全陝回務肅清方西安被圍賊眾號十萬晝夜力攻城中危甚所在援軍莫適先發金順所將僅數百騎出賊不意冒圍直入縱橫盪決賊遂土崩巡撫劉蓉盛陳其功稱忠勇有謀不避艱險每戰必先馭軍尤嚴明有法授鑲黃旗漢軍副都統尋調西安副都統粵逆逼會城爲官軍所遏西奔督騎兵追及灃河東岸興隆鎮大敗之而逆酋悍黨麇集蓋屋店子頭田峪口等處進軍南集賢村偪賊而壘直擣店子頭賊三路出禦麾騎蹂之賊陳亂所殪以千計毀其巢賊退據鹿門村各堡爲持久計旣而賊將攻淇水二堡偵知會諸軍截擊多所斬馘明年攻甯夏城南賊壘奪其礮臺固原賊合於逆回蔓延黃河兩岸率軍分三路趨黃渠橋寶豐南擊之斬逆酋孫保義等五年調甯夏副都統尋署甯夏將軍七年勦賊定邊勝之而逆回竄據甯條梁陷懷遠犯甯榆南關

詔趨赴甯條梁秋師進榆林連戰皆捷賊走葭州遣將敗之關山苑及張家坪明年復綏德州擊敗榆林賊尋聞陝賊圍甯夏疾馳抵纏金會提督張曜等軍大破之冬逆回趨五阿渾自陝來援王家疇偕張曜逆

擊斬趙五阿渾進克馬泰納洪兩寨身被數創九年逆回馬化隆誘甯郡降回馬萬選復叛遣將擊走之尋以新渠甯郡防軍無多陝甘各回鱗集疏請濟師

詔提督宋慶率豫軍兼程以赴夏王家曠賊自牛頭山竄河西會諸軍敗之黃渠口斬悍酋梅照喜等明年克王家曠

賞穿黃馬褂進攻通貴堡克之獲馬萬選餘賊窮蹙乞降擢烏里雅蘇臺將軍疏言未能遽之任請暫統全軍進討甘涼鎮番諸賊

允之尋以還甯夏未報起程赴鎮番

詔褫職即日督所部赴肅州道擊鎮番賊勝之會烏魯木齊提督成祿行抵金塔

詔速赴肅州統其軍十二年秋與欽差大臣陝甘總督左宗棠會師肅州攻克之

詔復原官

賞還黃馬褂花翎勇號肅州既復議出關役苦餉艱諸將多內憚金順獨請行宗棠疏陳謂服其力顧大局會

詔以烏魯木齊都統景廉駐古城兵力甚薄

命率所部二十營赴之規復烏魯木齊於是遂發出關數十里軍忽不行問之則曰先鋒營駐有所議知且變疾從數騎馳視有三弁迎陳所以手刃斬之營官偕一哨官至復刃之營官書記在旁曰奈何不令一言又刃之麾其軍曰敢留者視此於是角聲鳴鳴軍以次行駐馬視過盡乃列六屍拜之曰雜賦豆麪不飽佐以野蔬天下無若西軍苦此行度戈壁並乏水草吾非不知但不忍汝六人如全軍何如

國家何又如關內生靈何遂放聲大哭聞者由是知盡瘁事

國苦心矣道授正白旗漢軍都統明年至古城與景廉會師因演礮兩軍外漢回觀者數百千人金順長身積面微鬚額甚闊而銳下材官旁侍大抵及其乳聲若洪鐘見之莫不聳異於是景廉所部指敗堵煙筒爲的擊之再煙筒無恙所部管帶開花礮隊總兵鄧增粵人幫帶參將張玉林江甯人拉礮進且曰許大煙筒何足擊請捲旗卓之爲的玉林測視畢請於金順又測視畢礮響旗飛如剪霞空際旣而增亦爾觀者謹呼聲震遠近逆回聞之氣奪尋

命幫辦新疆軍務光緒元年調烏魯木齊都統先是逆酋白彥虎糾脅賊眾竄瑪爾斯據爲老巢時窺古城勢復熾明年進軍攻之旣拔黃田



賊卡長驅古牧地破其堅壘連下烏魯木齊迪化昌吉呼圖壁各城直逼瑪爾斯陳斬偽元帥馬興南北兩城相繼克

賞戴雙眼花翎

子雲騎尉世職調伊犁將軍四年攻克西四城回疆底定率軍收還伊犁鎮之十一年入

覲道卒

詔給銀千兩治喪靈柩回旗官爲護送

錫祭葬如典禮加太子太保銜

子諡忠介初金順婚瓜爾佳氏逾月屬事繼母撫諸弟遂出而轉戰數十年至新疆乃遣奉一品夫人

誥命迎之氏謂使者曰太夫人老矣甯能涉萬里吾義不得獨行且彼處盛姬侍能多育子姓宗祧不墜吾又何求遂不往時爭賢焉而金順故隸多隆阿其取受頗異又於幕府士不能禮下士以故多去之他軍其會攻王家疇他將幕府豫草奏以待旣克卽發金順功實最徒以入告之後

賞次他將時不以他將爲攘功謂金順失士宜爾此非篤論然旣開幕

府又可使虛無人哉

穆圖善傳

吉林通志

穆圖善姓那哈塔氏黑龍江駐防隸滿洲鑲黃旗咸豐三年以委參領從征河南轉戰直隸山東湖北安徽諸行省所在有功而戰安徽太湖潛山挂車河及桐廬功尤最累擢協領以副都統記名

賜號西林巴圖魯

賞戴花翎同治元年荊州將軍多隆阿督辦陝西軍務隨以行以功加都統銜三年多隆阿攻盩厔卒

命署欽差大臣擢荊州將軍督辦甘肅軍務六年署陝甘總督十三年入覲

予雲騎尉世職光緒元年吉林馬賊由松花江竄巴彥蘇蘇焚毀衙署東走呼蘭復誘挖金開荒等匪出山肆劫調署吉林將軍呼蘭賊竄黑山由三姓走甯古塔之樺林樹官軍先後殄之而東山金匪聚十餘萬烏斯渾卡倫外又聚馬賊數百謀掠阿勒楚喀尋以派軍堵剿無所得食其黨漸散疏言吉林風氣偷弱近來馬賊及徒步之棒子手橫行村落雖數百戶之屯市亦聞而畏避任其飽掠兵至則遠颺入山而山中

金匪十餘萬三姓長春廳亡命博徒久住城市與金匪暗通聲氣時欲竊發三姓甯古塔琿春邊外延袤千百里外患交乘通籌全局非練馬步隊萬二千不敷守禦計通省制兵七千七百餘以二千豫備供差外擬挑選西丹練馬隊七千步隊五千分駐操防三姓甯古塔馬步隊各一千由三姓甯古塔至省城以阿勒楚喀爲適中總路亦撥兵扼紮餘駐省城及各邊隘隨時調派稽查荒佃捕拏金匪冬春圍獵訓練操演不數年卽成勁旅實防邊要策戶部以餉需無措議寢明年坐濫保永不敘用道員留吉差委罷職尋起之五年歷調福州將軍十年法夷內犯

命大學士左宗棠爲欽差大臣穆圖善與漕運總督楊昌濬幫辦軍務以長門爲入閩門戶親駐防守法夷潛駛兵船入泊馬尾擊毀我兵船而我揚武兵船礮殪其酋孤拔夷船外駛穆圖善扼之於長門而夷接濟兵船益自外至礮沈其一相持四晝夜夷亟謀外竄列其船於長門對峙之金牌擊毀我礮臺二守兵潰獨所部屹然不動夷登岸來戰伏兵敗之獲其划船一礮二燬其舢板船二礮沈烏波船一餘船逸去明年

命爲欽差大臣會同東三省將軍辦理練兵事宜十三年卒  
晉贈世職騎都尉

賜祭葬諡曰果勇

書朱軍門克金陵城事

黎庶昌

記名提督朱洪章黎平人也字煥文英豁沈勇爲中興一時名將其克金陵城尤推首功世罕知之者同治三年夏官軍攻城久不拔李臣典建議於龍膊子山麓堅石最多處重開地道日列隊伍環攻積涇蘆沙草填壘欲平接而前與城齊以疑寇使多備六月十五日甲申地道告成議推前鋒未決有營務處朱雲章者楚人也以不得統軍爲恨大言於洪章前曰若輩平日自命天下壯士今趨臨大敵便如鼠子卻縮探頭穴中吾知若無能爲也洪章怒曰孰畏死者而汝爲是言乎攻守未奉帥令若使某爲先登有不蹈萬死以取洪酋生致闕下者如此皎日兩人爭論於營幕中曾公國荃聞之亟召諸將入署名令具軍令狀於是洪章遂署第一武明良第二劉連捷第三其他以次署畢凡得九將李臣典實主地道事雖列名未嘗任頭隊也乙酉日中發火城崩二十餘丈洪章率所部長勝煥字三營千五百人首先登城從倒口衝入是

時煙燄漲天輒石雨下賊復擁大眾謀堵築從城頭擲火藥傾盆下燒士死者四百餘人洪章摧鋒勸進所向披靡仰登龍廣山結爲圍陳外傳與賊排擊諸將畢登乃分軍爲三並馳洪章趨中路直攻僞天府之北大戰一日夜俘禽僞王次兄洪仁達以獻金陵平論功李臣典居首洪章最四三閒或代爲不平說洪章往刺幕府洪章謝曰是何言之鄙也寇亂方平而爲將者爭功相殺害此與賊黨何異不將垂笑萬世乎公止矣吾義不肯爲也友人江甯知府孫海岑昔爲余言如此孫名雲錦桐城人克城時充行營文案故能備述其詳光緒十四年洪章以雲南鶴麗鎮總兵入

覲迂道至金陵謁見曾公憑弔死事諸人立石瘞所曾公爲之識曰同治三年閏六月十有六日龍膊子地道告成火發轟開城垣二十餘丈輒石雨下長勝煥字等營首先登城前隊奮勇死者四百餘人同瘞於此嗚呼慘矣亟誌之以表忠盡云爾知其事者以爲實錄云

周剛敏公別傳

朱孔彰

周公盛波字海舲安徽合肥縣人咸豐初年偕同母弟盛傳在籍辦團練以少擊眾屢殲悍賊保全其鄉兄弟皆以勇聞同治元年李公鴻章

募淮軍援上海公以守備領兵從七月攻克青浦八月解北新涇之圍  
擢游擊九月克嘉定賊眾環攻四江口營壘會諸軍大破之二年二月  
克太倉進駐雙鳳鎮賊以崑山攻急糾悍黨四萬餘眾來援公與鏖戰  
三晝夜賊敗逐遂克崑山五月進軍大河鎮江陰無錫悍賊同時來犯  
公要擊於萬水橋踰賊壘百餘積功擢副將七月攻江陰奪東門外三  
石壘援賊大至又敗之八月遂克江陰擢總兵十一月克無錫屢破賊  
於芙蓉山明年四月克常州

詔記名提督並賞從一品封典七月收復廣德追擊竄賊千餘里蘇浙  
江皖之交遂無賊蹤四年擒匪由鄂竄皖李公鴻章與曾文正公函商  
以爲盛軍可恃調公渡江移勦五月調赴徐州屬曾公適安徽巡撫英  
翰公在雒河集被重圍雒河爲捻逆老巢凶燄方熾諸軍莫敢撻其鋒  
公晝夜疾馳越宿州趨蒙城直擣西洋集大破賊於莊王圩擒賊遞走  
九月移駐歸德十月截擊甯陵竄匪大敗之五年二月進勦山東之賊  
敗之鉅野追至武城荷澤破方阜賊巢又往來游擊徐宿潁壽大破牛  
落紅於亳東追至扶溝鄆陵許州七月曾公調回周家口築隄駐守分  
兵迭解柘城羅山之圍無何追賊入鄂轉戰德安安陵黃州擒蹤飄忽

公日與馳逐賊嘗避盛軍而逸六年李公鴻章接辦軍務公屬李公二月駐防宿松顧皖省門戶三月復入鄂四月追至信陽州殲賊山中生禽賊目汪老魁等五月入豫追擊直抵東境之運河七月迎擊賴文洸賊眾於濟南泰安沂州追入江境東捻平西捻驟至七年正月李公調公軍北上二月追擊賊於臨清景州德州東昌大名三月截擊於內黃乘勝至清豐南樂五月大破賊於毛家莊乘夜追至楊丁莊鎗斃張總愚之姪張三彪生禽賊目李老懷六月遂會各軍滅賊在平

詔補授甘肅涼州鎮總兵

賞穿黃馬褂加法福凌阿巴圖魯於是軍事大定公乞假歸養弟盛傳接統軍事凡戰公匹馬當先盛傳督隊於後以故士卒不敢回顧東伍嚴也十年秋法越肇釁復奉

詔自家起募淮士五千人防津沽於是兄弟復同領軍十月

慈禧太后五旬萬壽嘉公兄弟一體有功以公母栗氏年逾九十

賞御書扁額一方紫檀玉鑲如意一柄他珍物稱是明年李公以命婦

五世同堂奏再

賞御書扁額五月丁母憂公以總統前敵各軍

詔在營守制盛傳以毀卒公獨統天津營光緒十二年醇親王出巡北

洋校閱盛軍嘉其精整奏奉

懿旨交部優敘明年授湖南提督

朝廷雅重公不令之任仍統軍拱衛畿疆又明年從李公鴻章出海徧  
視旅順大連灣威海衛各口指畫形勝以備屯軍皆得其要十四年十  
月卒於軍

優詔賜卹立傳建祠

予諡剛敏剛敏公爲將法令嚴整而善得士心兄弟六人其四死於王  
事惟與弟盛傳積功至專閩每念家難

國恩未嘗不感激流涕也捻匪平與弟盛傳言曰吾二人同乞歸不可  
弟在軍操練舊部備緩急之用以報

君父故剛敏家居養母十餘年同時名卿或勸復出堅辭不行及海上  
有事奉

詔徵投袂而起不遑卹私其深明大義如此

周武壯公神道碑

馮煦

公諱盛傳字薪如合肥周氏淮軍之興劄粵鏖捻轉戰徧十八行省所



向有功今大學士李公鴻章爲之創而周氏昆季實羽翼之聲績爛然  
右諸將則公與海船提督也咸豐三年粵賊始東江北諸郡縣之不逞  
者蠶起公與第三兄盛華暨海船提督籍丁壯自衛時廬州爲賊有公  
居西鄉賊之來攻者日且萬不少動四年盛華戰沒公內撫夷傷外禦  
方張之寇戰守繕完士氣彌厲屢敗陳玉成石達開陳得才之眾合肥  
西鄉團練名天下安徽巡撫福濟翁文勤公同書并欲上其功將軍多  
隆阿書來相招皆婉謝之同治元年李公督師至上海規復江蘇挾公  
俱東七月克青浦九月克嘉定又解四江口之圍二年三月賊目蔡元  
濳僞以太倉降諸軍多爲所乘公有備獨完遂下太倉江陰無錫三城  
獲賊目黃子濳父子積階至總兵十一月攻常州礮中公創甚三年二  
月城賊潛犯楊厘撓我後公逆殲之旣而反攻公登橋橋燬石雨隊聲  
隆隆如奔雷公與俱墮將校披歸營昏不知人者竟日少蘇裏創戰益  
力卒先登克之論者謂廓清蘇常之功常州爲艱而公其最也粵夷而  
擒張曾文正檄公討之旣又隸李公麾下馳驅潁六閒而徐海而曹沂  
而南汝光三年數百戰摧堅刈疆當之者靡雉河一役尤爲世所稱初  
僧邸沒於荷澤擒益肆張總愚任柱賴汶洗牛洛紅并穴宿蒙亳三州

縣而圍果敏公英翰於蒙城之雉河皖帥徵諸路援師先後至者數萬相顧莫敢發公既至度賊已驕且倚其巢可一鼓而破也揮軍進任柱以騎來犯殊死鬪公嚴勒所部數突數卻公以輕騎裹之柱奔河南北賊數千壘同時潰諸軍解嚴益歎爲不可及也以功進提督旋授廣西右江鎮總兵并

賜翎管班指諸物捻之西也公躡之東直豫之交我軍馮運河爲防七年五月賊攻之急公伏礮於吳橋之毛家莊使騎步夾軍其前後迫賊入隘礮作自相蹈藉賊死無算夜半再戰獲張二彪李老懷等三彪總愚從子也而賊鋒用是大挫六月環諸荏平南遂盡殪之捷聞拜黃馬

桂之賜九年公從李公征逆回五月抵潼關六月斃北山賊馬意龍戴得勝廊延綏榆之間羣醜以殄出師不一月也十年李公移督直隸公亦屯青縣之馬廠十二年海上有警李公檄公相形勢修守備具故明新城屏蔽天津而旁控大沽北塘公首議成之凡有興作不主故常始是年三月終明年九月爲內外城各一環城一周礮臺大者三小者七十一既堅既完昔所未有於泰西器械必窮其良楛所在克虜伯礮哈治開

司槍初未異之也公力請於李公多購以爲備手訂操槍章程十二篇陰陽向背風雨晦明之數剖析微芒於是北洋練法恆爲他軍則丙戌醇邸視師天津亦謂公所部第一而公不及見矣初廷議規畿東水利論者持異同公以新城之役往來津靜久其地濱海潮汐日再至一疏瀹之與南中沃野比乃上書李公請開南運減河並陳三利其言曰洩南運盛漲澹畿南十數州縣蕩析之災一也引甜滌鹹變斥鹵爲膏腴二也瀕海數百里谿澗繚曲足以阻車騎蹙敵糧運爲海防一助三也李公聽其議奏以屬公光緒元年調天津鎮總兵移屯潦水套今新農鎮也自乙亥至庚辰役之時凡六年自靳官屯至大沽口役之地凡百四十里又夾南運減河兩岸澹支河橫河六橋塌五十餘所溝洫吠澮之屬不可勝算洩蓄以時繕事大興凡墾六萬畝有奇士飽馬騰緩急有藉然公之精力則少少衰矣壬午遷湖南提督仍留屯田乙酉六月以母憂歸十四日卒毀也春秋五十有三

詔立功所在建專祠

子諡武壯公先世籍江西明正德中有曰福德者辟宸濠之難始遷合肥會祖有成本生曾祖有益祖文彬考方巖并以公兄弟貴累

贈建威將軍曾祖妣衛本生曾祖妣梁祖妣梁妣栗并一品夫人娶於  
袁孝共儉勤稱公爲人後公一月卒子二家駒三品銜分發補用道次  
家澤二品蔭生先公卒女二同縣阮貞瑞張其壻也公之客江甯  
何延慶與煦善道公事甚覈公在軍十餘歲出入吳楚齊秦魯宋之郊  
大小數百戰屢瀕於危嘗解衣示延慶刀彈之痕班班若刻畫而果毅  
不撓卒成大功馭下嚴而甘苦共之有疾苦死喪者矜哀之過其家人  
故士卒憚其威稜而愈樂爲用凡所規畫務遠且大不爲苟且目前計  
假公不死所效豈有量耶公卒之次年家駒葬公合肥之戴大村煦乃  
次公戰績之大者及屯田本末揭諸墓道其他行義更綴以銘銘曰  
凡民有生曰忠與孝繫彼哲人維躬是蹈公之始孩母疾瀕危步禱紫  
蓬右股一刲師干之試公北母南別母十載中心如惓母存公存母死  
公死存爲忠臣死爲孝子畿輔薦饑振之翼之寒被之纊飢哺之糜下  
逮交河全活尤遠五萬餘人蘇槁蠲困嫠者有堂孤者有塾何戚何疏  
義正仁育下燭無竟上光日星後有考者請視斯銘

又周武壯公墓志銘

吳大猷

公諱盛傳字薪如世居合肥縣西鄉咸豐三年粵匪陷廬州公與其兄

今湖南提督盛波結鄉團禦賊以驍勇著名西安將軍多隆阿以書招之謝不往同治元年今大學士肅毅伯李公募鄉里壯健創立淮軍航海赴滬討賊公兄弟并從七月克青浦八月回援上海敗偽慕王譚紹洸於北新涇九月克嘉定復馳解四江口之圍每戰兄弟迭先後所向有功二年二月太倉賊蔡元濳偽降我軍猝中伏賴公嚴兵殿後以免卒克其城七月力戰復江陰十一月攻克無錫獲偽潮王黃子濳父子公兄積功擢提督公擢總兵是月攻常州逼城下受礮子傷甚劇三年二月偽護王陳坤書分股潛出犯楊庫擾我軍後路公抽軍回殲其眾復返攻城毀城外石壘方登橋指揮橋先燬於賊火忽中斷墮公水中石甓隨墜下擊傷徧體昏暈竟日公力疾復戰四月城克公以先登功奉

旨交軍機處記名遇缺題奏并加提督銜旋移壘溧陽又逐賊廣德復州城於是江蘇皖南寇皆平四年春曾文正公率軍渡江剿捻匪時忠親王新戰歿於曹州匪勢大熾圍安徽布政使英翰於雒河集甚急張總愚任柱賴汶洸牛洛紅諸逆首咸萃於渦河兩岸援軍莫敢先進公勒所部擊之大敗悍賊十數萬眾圍立解初公軍在江蘇咸偕諸軍進

止至是獨當大敵以少擊眾稱奇捷諸軍相顧愕然八月進軍歸德十月追賊於甯陵曾公奏報有記名提督局盛傳素善夜戰之語五年三月敗賊於游莊寨曾公奏報有周盛波兄弟竭力苦戰膽智俱優之語由是公兄弟並拜翎管撥指刀鏹荷包之

賜五年大敗牛洛紅於永城又敗任賴等巨匪於太和是年秋李公奉命代曾公督師屬公兄弟往來游擊其時匪踪分合靡常蹂躪齊豫皖鄂之境諸軍疲於奔命奔蹶相續隨公擊賊於柘城羅山又蹙之於信陽譚家河斬獲踰萬復由豫逐賊入山東轉戰於江淮徐海之間兵未嘗稍挫東捻盡平七年正月張總愚等擾河朔逼畿南李公調公軍北援而公兄不及從三月公由德州逐賊至開州四月從李公赴東昌籌濟張秋引黃水入運河爲圍賊計閏月公兄統銘軍馬隊公統盛軍步隊偕擊賊於陵縣敗之五月追賊至吳橋設伏狙擊殲其銳殆盡斬張總愚從子之彪禽逆首李老懷總愚不復能軍遂殲滅公以功賞穿黃馬鞋旋東調赴鄂防江九年從李公赴陝西五月抵潼關六月剿北山馬意龍戴得勝等平之秋李公移督直隸公軍回駐臨汾十年軍青縣之馬廠光緒元年移屯天津之新農鎮公治軍嚴而有恩勤工



俱瘁十一年春款議成而公病已困憊矣是年五月聞母栗太夫人之喪號慟幾絕聞李公爲纈

恩賞假百日治喪六月初五日抵家哀毀甚牽引舊傷十四日嘔血卒春秋五十有三李公具疏入告奉

旨從優議卹

詔立功所在及本籍建專祠

國史館立傳尋

予諡武壯公會祖有成本生曾祖有益祖文彬考方嚴皆以公兄弟貴累贈建威將軍妣皆

贈一品夫人配袁氏有賢德後公一月卒子二長家駒三品銜分發補用道次家澤二品蔭生早卒女二孫一行濬光緒十三年十二月初三日公子家駒合葬公於合肥西鄉之戴村因而請銘於予予於光緒九年秋由甯古塔奉

命統邊兵入衛畿輔駐新城與公時相過從商榷軍事公最先習用西洋槍礮見新製必審其機括務得其命中之法由是北洋軍械爲天下最手訂操槍章程十二篇日課軍士演練而破格以賞能者使爭自勸



勉公嘗語予曰西洋尙機巧火器堅利絕倫我若狃於往者剿匪之常勝恃舊有之軍械思與之敵則言戰固不如言和矣其言雖激其智慮有過人者因爲之銘銘曰

世變罔極憂患隨之昔爲內寇今在外夷公歷兵間爲時最久奮我矛戟屢殲羣醜及防北海壁壘一新金堅火烈電掣雷燬如斤如削曰宋曰魯大匠斲木擇利而取取人之善而不自賢用人宜爾用兵亦然識時務者謂之俊傑詎狃故習昧昧自悅惟公知變變則思通因時制宜日起有功世稱公勇我謂公智以銘昭之永詔後世



續碑傳集卷五十三

江陰繆荃孫纂錄

武臣六

三等男爵長江水師提督黃武靖公神道碑

俞樾

光緒二十年八月甲寅長江水師提督黃公薨於金陵行館遺疏聞天子震悼有忠勇性成勳勞卓著之

諭視提督例

賜卹

予諡武靖當是時倭人渝盟入寇東南江海戒嚴上下方倚公爲長城而公遽逝自

朝廷大臣以逮兒童走卒惜公之歿異口同辭曰噫黃公薨矣公諱翼升字昌歧湖南長沙人曾祖某祖某父某並以公貴

封贈皆一品公狀貌奇偉年十三於長沙遇一道人謂之曰若當以軍功顯三十年後必拜一品官封五等爵幸勉之公聞陰自負入長沙協標充隊長道光末新甯李沅發倡亂大軍討平之公與焉湘撫拔爲材官以公事至廣東總督葉公名琛奇其才堅留之及粵寇起從向忠武

討賊所至有功咸豐三年曾文正公統水師東下妙選將才而駱文忠公以公名薦遂由廣西召之來使充左營幫辦時造戰艦有龍降於其舟長五六寸其色青曾文正亦臨觀之嗣是每戰必見每見則戰必克是年收復湘潭縣及岳州府城

詔以千總用

賜鷓鴣翎自岳州轉戰至金口十餘戰皆捷遷守備易孔雀翎又以功遷都司率水師右營剿賊乘大霧襲賊於都昌燬其舟數百禽賊五十餘又燬雞公湖賊船數百七年升授直隸提標左營游擊未幾有梅家洲之捷水師之攻梅洲也爲營者六而公所率右營獨當其衝洲礮林立銳不可犯餘五營皆攻其對岸公語部下曰五營皆藍幟吾則白幟有敢以白幟混入藍幟者斬無赦一艘犯令公手斫之中桅桅折皆崩角乞免公曰有再犯者視此桅鼓而進之礮子皆逾舟而過船進益近而礮益高不能及然餘五營皆卻走賊爭逐之公待其還縱擊之殺無算賊又來劫營五營皆失舟公逆料其必來滅炬待之又殺賊無算盡奪還所失舟遂攻破梅家洲僞城軍聲大振會合李公續賓陸路之兵克復九江府

詔加總兵銜補授直隸河間協副將九年楚軍圍太湖城僞英王陳玉成以賊十萬來援副都統多公多隆阿等督師迎敵曾文正命公往視之多公議各軍分半進攻留半以守公曰若然則進攻之兵恃其敗之有可歸也戰必不力矣請令各軍整隊次第進攻而留半爲之接濟是賊軍無反顧之心又無軍械火藥不繼之患戰必勝矣如其言克太湖城十年七月戰塘田戰張溪皆捷補授淮揚總兵且

命先赴淮揚督帶戰船蓋

朝廷倚重公自此始矣十一年正月大破賊於黃溢鎮有爲賊所獲之涇勇江百勝自拔來歸公命爲內應又大破賊於方村旋會陸師克安慶省城及池州府城進攻銅陵縣決縣城東北隄堰率水師由決口入據之又進攻無爲州先毀其泥汊口神塘河各石壘遂并運漕東關兩處同時收復

賞剛勇巴圖魯名號加提督銜同治元年會忠襄公攻巢縣公分兵會克銅城牯及雍家鎮遂進薄城下初公之帥水師東下也命具鉏畚或曰非所需也公曰非若所知及追賊巢湖乘勝深入賊眾復聚於巢湖口遏我歸路公周巡隄岸得其窄處鉏畚並舉不日而穿船達外江反

出賊背前後夾擊賊遂大敗城賊宵遁進克含山又克和州奪取西梁山東梁山兩要隘又破賊於清水毀烈山賊壘而進徧大勝關是役也公功爲多

詔以提督遇缺簡放是歲公之太夫人卒於裕溪口營次公治喪甫畢而今相國肅毅伯李公率師至滬請與公俱公念東南事重遂墨經與李公俱東有

詔命公總統淞滬水陸各軍自是以往公之戰蹟在江南矣公旣至滬首破周莊鎮之賊遂克復青浦縣城敗其援賊俄而諸路賊大至公率礮船由洋涇浜過曹家渡毀賊浮橋揮眾登岸會合陸師毀其營賊遁至北岸復率水師由吳淞江進擊夜半又毀北岸賊營於是滬防鞏固始得由滬而籌進取焉戰於蘆墟大捷戰於尤家莊又大捷賊爲氣奪公以旣克嘉定賊必來援命營官張光泰等扼要日以拒之居無何賊果大至張光泰等被圍四江口公督帥將士與賊死戰殺賊數千四江口之圍乃解追至三江口毀石壘四土壘八仍嚴扼青浦泖澱各湖以遏賊蹤時我軍攻江陰未克而常昭被圍日久公督師船抵福山收復福山石城遂解江陰之圍又大破蘇常來援江陰之賊十餘萬僞廣王

偽薰王皆死陣中遂克江陰敘功

賜黃馬褂嗣是自春徂夏月必數戰於太倉於崑山於楊庫於南北澗於麥市於張涇於羊尖湖於謝家橋於嚴家橋於陳市每戰謀勇兼施水陸環擊或襲破其營或堵截其路生禽偽王偽將及義安福燕豫諸有名號之賊數百其餘蘇賊刃而死者數萬賊勢大蹙會其時臨淮有

警

朝命公往援李公曰蘇常之復機在此矣不可坐失疏請緩公之行而蘇賊知不可守爭來乞降惟偽慕王不可爲其下所殺慕黨逸出公截擊於閭門殺五六百人解散數千人於是遂克蘇州時光緒二年八月也李公以捷聞且言蘇城面面皆水水師之力居多公艱難百戰功冠

諸將

詔賞雲騎尉世職乃攻許關賊營平之攻無錫金匱宜興荆溪下之而常州之賊糾合丹陽句容諸賊犯江陰常熟無錫圍常熟尤急公自揚州折回留一營守江陰親督三營自白茅口繞至常熟與部將王東華夾擊賊潰圍解進攻常州賊率死黨立石砦以槍礮拒我兵公馳入生禽其偽王二人賊眾驚怖跪而乞降遂復常州城蘇常既定時公已升

授江南提督統外江水師會合陸師靖平沿江賊壘攻奪中關攔江礮石壘由旱西水西兩門斬關直入遂克復江甯省城江南平

朝廷敘功行賞而公得一等輕車都尉世職並拜獎武銀牌之

賜時新設長江水師

天子以長江扼湘鄂三江之衝責重事繁非宿將元勳莫勝其任曾文

正公力言公樸實果敢愛士耐勞長江之任非公不可

天子俞焉特授公爲長江水師提督蓋長江提督之設自公始也公既

拜

命以宏規初建力求美善添設四版船巡緝支河其分河汎地各有定

所營規嚴肅士卒用命數千里內枹鼓不驚非公之威望奚克至此乎

同治六年捻寇由河南入山東從鄆城梁山撲沈口於戴廟水涸處偷

渡黃河

上命公赴清江徐州會防自馬家塘至射陽湖皆以水師駐守賊酋賴

汶洗以千騎突出公合陸師剿之偪入高郵寶應閉前截後追禽其酋

疏聞

詔賞珍物甚眾七年又率水師自臨清上駛直抵德州賊酋張總愚自



投徒駭河以死其兄及弟及各賊目均斬於陣前於是擒寇悉平  
詔再加公一雲騎尉世職公凡得雲騎尉世職二一等輕車都尉世職  
一以例上請

錫三等男爵而先是道人之言驗矣十一年以傷發請開缺調理  
優詔許焉自是歸鄉里養威重者垂二十年光緒十一年  
詔繪像紫光閣十五年

今上親政

詔從優議敘至十八年又補授長江提督入覲京師

賜紫禁城騎馬二十年恭逢

皇太后萬壽慶典

賞加尙書銜公以戎臣渥承

恩禮始終勿替每念遭際之隆運會之艱撫膺感泣中夜旁皇是年二  
月湖江上巡至於岳州感受風寒舉發傷疾甫擬醫療而倭事起力疾  
東行以鎮江爲防所親駐金山時秋暑甚熾兩江總督劉公屢以函請  
回省就醫不可八月九日病益不支始還金陵則距其薨止一日矣劉  
公問疾公述下游防務甚悉且曰餘生何足惜但能啜粥半甌卽當馳

赴防所而不圖是日大星遽隕也公久歷戎行大小數百戰未嘗小挫咸豐十一年會忠襄公圍皖公駐張家灘而建德防軍潰其時統建防者公故人也徒步往省之賊偵知所在以千騎過歸公佯走誘賊至隘巷當市門而立一騎至拔刀斫之又一騎至又斫之兩騎皆負傷而遁誤以爲有伏不敢進而江上礮聲如雷則公已回舟矣同治元年以水師駐福山數遇大風師船數覆公所乘舟亦覆攀援出水堅坐船背頃之風定潮平始得登岸復整成軍公自此益自信死生有命每戰必身先士卒其將佐有爲賊所圍者親往救出之如貴州古州鎮劉士奇四川阜和協副將況文榜記名提督鄭國魁張光泰皆公所救也其平捻也將自張秋至德州而運河高於黃河舟不能進公露禱三日有神蜿蜒於水面俄頃之間風濤大起方舟並進吳橋東光南皮諸縣同日決口環賊數百里皆成巨浸遂與陸師合擊克成大功公忠義之性感動神明其初起時卽有龍降其舟至此益信矣公薨年七十有七娶陳氏繼娶余氏並

封一品夫人子宗炎候選道宗枬宗錫皆前卒長女適同邑舉人江蘇候補知縣李雋次女許嫁永州王氏早卒三女許嫁寶慶陳錫玖四尙

幼孫恩綬

天子篤念蓋臣命宗炎服闋後以道員卽選恩綬及歲引見蓋慰答前勳卽以獎勵後世意至遠也公前歲至蘇訪余於吳下寓廬余時在杭未得見及公將葬公子請銘其神道之碑誼不敢辭銘曰

咸同之閒楚材大出天佑

聖清埽除蝥賊堂堂文正治師長江舳艫千里高建牙幟兢兢黃公磊落奇氣束髮從戎無戰不利毀其堅壘拉朽摧枯禽其名賊如豕就屠

論功行賞

天子曰都俾之節鉞爵以穀蒲煙閣圖形

禁城策騎戰績崇隆

主恩優異大江上下屹若長城旌麾再蒞桴鼓不驚巨力雖衰臣心猶壯氣懾郁夷目營平壤靈風肅肅宰樹芊芊千載而下式此祁連

太子少保吉林將軍恩特赫恩巴圖魯諡忠靖郭博羅公神道碑銘

雲

中外大勢道光閒強弱判矣咸豐遼光緒數有戰事不競時聞莫甚於甲午之役庚子則所胚胎形見而勢益絀理有固然分別觀之勝彼不

能我亦未至於敗而卒無補賀若弼論將故有戰將大將之殊豈其無見然日本內犯微吉林一軍西出力與屏蔽遼失而瀋不守

陵寢且震驚非如遼左八城營口旅順威海衛可任諸軍以次爲敵資也參錯覆敗中雖固遼全瀋等之無功而遼陽有失唯長順是問之

嚴旨不幸無負哉自欽差大臣以下亦各專其責無所失安所割何蹙國而馴致於後此之出狩然則所係豈微哉吉林將軍諱長順字鶴汀

姓郭博羅氏隸正白旗籍黑龍江之布特哈移隸京旗再世矣曾祖諱某某官祖諱某某官考諱阿那吉善官御前侍衛副都統並

贈如公官公聳軀幹面頰鼻長半其面鬚眉灑然沈默寡言笑起家侍衛咸同之際用知兵善戰累功

錫恩特赫恩巴圖魯勇號擢頭等侍衛加副都統銜統吉林黑龍江馬隊赴甯夏而回燄方張往往以少擊眾成奇功署陝甘總督甯夏將軍

忠勇公穆圖善閒出視地形回大至從者駭而奔公令卓己旗橋上回望見之喏曰小常也趨趨莫敢先則騎翼忠勇橫矛大呼挾其圍而出

無或櫻者忠勇歎曰無敵之名今日始見蓋時年二十許初名常順軍中夙以常遇春相擬後

御改今名戰蘭州城下回眾數萬決死鬪我軍漸不支所部五百騎軍  
鋒也率之緣河進回隔河視之易其少不爲備行里許疾浮以渡自後  
襲擊洞出其前回眾大擾我軍乘之得轉敗爲勝後又悉眾來攻城外  
迭扼以堅壘第一壘驟陷城中軍出戰數接不利回益進總督以下觀  
於城上者大恐見有少軍依第二壘後回至繞出壘前橫截之一再盪  
決回首尾不相顧乃大崩觀者驩曰非是軍城且不守太極寺之戰我  
步軍三營被圍苦戰不解公率二百餘騎分突之約會於中堅三入三  
出圍解而步軍亡其半主者慙敗詰何不俟令初唯唯既而詰不已乃  
曰俟令此步軍半亦亡矣其他克要壘復堅城所在輒捷金積堡之下  
功尤最率恂恂不自多軍中又擬以大樹將軍馮異於是加頭品頂戴  
擢鑲黃旗漢軍副都統尋授科布多參贊大臣署定邊左副將軍治烏  
里雅蘇臺先後設險卻敵而署參贊者顧金錢噤不得肆久矣時公之  
出馳疏劾焉歸而疏辨參贊罷公以不禮使者爲所甚亦罷而臺站困  
供億爲釐定其數焚取繩以法亦取甚之一其臺站則誦之至今未幾  
欽差大臣左文襄公宗棠奏起之

詔署巴里坤領隊大臣巴里坤數經蹂躪子遺不自保爲請巨金於官

勞來安集之遷哈密幫辦大臣俄羅斯以伊犁來歸奉

命定中路分界郭登山縱千里衡八百里同治時分屬於俄至是執甚力從容語其人曰爾謂山爲爾國界山故有我

先朝大皇帝所立碑我

大清之碑何以立於爾界其人嚮怵公威而理又屈分界乃定論者謂一言破的居恆胸次所運量至遠且周非特知兵善戰見推一時云太夫人卒哈密獨騎自吐魯番三晝夜馳回哀動行路而南路分界大臣沙克都林札布爲幫辦軍務張果敏公曜所持欽差大臣劉襄勤公錦棠疏留竟其事公直分界大臣別以疏上

朝旨是焉果敏置不問擢烏魯木齊都統請扶柩回旗遷正白旗漢軍都統兼管神機營事務出爲吉林將軍督辦邊務郡學田在伯都訥董於巨室久人士請清釐巨室富有氣力持如故公具其事以聞朝廷再遣使怵於巨室並辭弗行而謠詠沸騰徧於輦轂或爲之懼請寢焉不爲動會

太后語左右曰長順不要錢我所夙知其以何時何事見知在廷莫測也最後侍郎汪鳴鑾銜

命往卒讞歸其田而所在市肆以穀若貨來者爲議價而籍之其市他物分別以購割其價於所籍之肆曰驀兌罄所捆載無一錢持歸民病甚而肆賈以爲大利旣知其弊方議革市肆徂故習爲言者多且重賄旬仍舊疾疏於

朝請以銀易錢內地分賦所屬剋園法之窮已獲

俞旨回易頻繁運費不貲悉祿入以任久之而鄉所訾議者稱便迨東事起雖肆賈亦以非公力革舊俗闡之害且不可知言及輒額首龍興之地餘二百年紀載闕如奏纂吉林通志禮致通人及籌經費外設館分曹諸務職諸分巡道訥欽春秋佳日公惟延所禮宴遊至爲謙下分巡道亦第勤所務於造述一不相關異夫十羊九牧書成進

御有

旨留覽論者謂志邊徼而不爲各直省名者所掩也亦兼多公能禮賢自餘行政類因時制宜不執滿漢成見至還巨室變園法纂通志尤有造於吉林風節識度俱見焉甲午之役疏言軍多暮氣神機營及練於東三省者尤窳不可用前敵諸將無統帥唐九節度所以潰於相州疏留中而兩江總督劉忠誠公坤一有欽差大臣之

命又請簡精騎由瑋春疾入朝鮮境率敵平曩之師使不遠內犯然後  
與淮豫諸軍夾擊於境上一入我境備多而禦之益難奏入交廷議獨  
兵部侍郎王文錦奇之餘多以為險不報尋

命赴奉天助勦繼又奉遼陽有失唯長順是問之

命當是時統兵關外者吳幫辦大澂宋幫辦慶黑龍江將軍依克唐阿  
盛京將軍裕祿東三省練兵大臣定安以次亡慮十數

朝旨獨被於公蓋遼陽失瀋陽不守而知兵善戰久著於時故耳瀋陽  
卽奉天於是吉林原從軍五千並節制奉天總統所部暨飛虎營又可  
萬五千類敗亡之餘而咫尺陪都非可浪戰致蹉跌黑龍江軍雖屢挫  
視他軍猶彼善於此則會其軍掎角進以攻海城為守遼陽計專務持  
重非復以騎將轉戰西邊時驚勇無前矣然方拜遼陽之

命夙戒往視遲明盛京將軍練兵大臣送於城外告海城已失止其行  
以海城去遼陽百三十里遼陽去瀋陽亦百二十里閱一晝夜事未可  
知公曰若然愈宜速往則從百騎疾馳去嚮夕至遼陽城已閉循城垣  
而西而潰自海城之軍方蟠集趣開城否且攻入城中惴惴不自保軍  
益驚公怒若曹聞敵輒潰何其怯及還攻又何勇也令斬其尤一人疾



迴駐沙河有敢留視此城中人奔角出迓謂至稍緩遼陽先殘於兵而敵且繼焉吾儕請百世祀公其後獲閒謀敵果議尾潰軍以行偵吉林軍至乃止其僅百騎則不知也是夜駐遼陽西關而令遼人安枕臥焉既會軍海城下自冬徂春十數接無大勝負敵知是軍不可挫乃自析木城開道趨吉同峪繞窺遼陽署知州徐數請救有

詔回援敵遂全力踣湘統將魏光燾李光玖之軍所向無與角而吳幫辦目棄其眾疾驅入關公頗惜回援至於敵覆湘軍而敵之能謀我統兵諸將抑非僅勇之不如已軍次遼陽敵窺自閒道者亦退既議款

命回任先是數疏請罷以軍興弗果至是請益力

允焉數年復起吉林將軍辭弗許而吉林一若嬰兒復得慈母喜可知也公亦第拊以安靜庚子之役戰端開京畿而兩江兩湖兩廣總督與各國約互相保護別以和聞且咨東三省公度勢不及內援若外禦兵單而餉又竭姑委蛇其閒而俄人輒恣不如約洎

兩宮遠幸越在海裔不知奔問所由西望神州角聲羸影並助悲號竟事憤詫無已久之薨於位時光緒三十年正月某日也生道光十九年某月日年六十有七配一品夫人某氏繼某氏子一希林布侍衛前卒

女一適察哈爾副都統所謂南路分界大臣沙克都林札布子某孫榮源一品蔭生遺疏聞

詔贈太子少保子一等輕車都尉世職入祀京師賢良祠史館立傳賜銀千兩治喪諡曰忠靖榮源以郎中補用兼襲世職奉遺命以其年歸葬京師某原請舊賓客上元顧雲甄戰功政績以銘隧道之碑銘曰黑龍江外昔薩哈蓮是多名將勳烈輝然或乏政治猗公克全金源弭節銀夏鳴弦犖犖大者陳師奉天興京盛京矢命周旋列聖靈妥微臣責綱方盟城下巖石孰鑄典渥飾終或疑追銓曰相保護賞用世延

帝績嘉矣公心慙焉君辱臣死誼嚴古先寄言百辟齎恨九泉我表忠悃勒之祁連

欽差大臣貴州提督兼署貴州巡撫田公祠版文

繆荃孫

光緒二十二年正月鎮筵田公子應全持其先德前

欽差大臣貴州提督兼署巡撫事田公忠普事略來泣而言曰先人戰功彪炳寰宇嗣因教案遣戍西域

賜環未幾告終家衙應全甫二齡耳幕府星散無人巽述前年走貴州

遇故部曲今貴州提督羅公孝連爲撰事略因先人未復官不敢立碑  
墓道乞吾子次爲文庶事蹟得以傳播或可少慰先人於地下荃孫昔  
聞先君子談公遺事有出於事略之外者其敢以不文辭公諱興恕字  
忠普湖南鎮筵廳人祖宗然父慶和皆以公貴贈建威將軍妣皆一品  
夫人公性果毅驍勇絕人挑入鎮筵標洪逆秀全圍長沙公隸鄧忠  
武公紹良軍救援省城地雷發鎮筵兵拒之不得入公與有勞賊退屯  
湘江西岸連營百數巡撫駱文忠公秉章募人夜驚賊營公應募隻身  
挾一小舟而去以竹筒注火藥其中間三四營薙其一以路之遠近然  
綫之長短同時並發賊營大擾公跳歸賊數百追之公覆舟爲碎泗水  
而渡文忠賞其勇時年甫十六也咸豐五年委充哨官隨湖南候補道  
王葆生克郴州六年獨統五百人名虎威軍隨前四川臬司蕭啟江援  
勦江西克復萬載縣袁州府城七年由上高進攻英岡嶺賊巢石逆達  
開率匪三十餘萬圍公營公部千二百人日夜鏖戰左手受傷戰馬亦  
死徒步轉戰奮不顧身賊退十餘里斃賊千數以少擊衆人服其豪四  
月進攻臨江府城賊死守不出公開掘地道約諸軍會攻地雷發城裂  
數丈公率親兵先登城賊死拒諸軍徘徊不進公身受重傷隨從兵勇

戰歿百數城遂未下八月城賊冒死撲營公亦死戰賊被殲無一脫者自此閉關不敢出九月逆黨合四十萬眾連營數百座來援蕭公畏其眾約公暫退公力主戰慷慨言曰兵在精不在多賊雖多易與耳公力扼城賊與怨願率所部爲先鋒公命章武平江兩軍援之必能爲公破援賊翌日出八成隊公率壯士卷旗直擣中堅賊張兩翼圍之迨章武平江兩軍至公旗已深入賊中圍甚厚見公旗麾東援西賊不能遏因亦夾擊遂燬賊營數百座餘賊遠竄城賊亦潰臨江復八年克崇仁樂安宜黃南豐各城四月克撫州府江西一律肅清敘功浚升副將總兵銜並

賞尙摯勇雙巴圖魯貴州黎平府圍久不解駱文忠公檄公援勦八月統軍抵黎平屬之潭溪司理料軍事次日卽攻破北門賊營入城安撫又次日攻破南門賊營又次日攻破西門賊營經年之圍三日而解闔城文武同聲稱頌謂自被賊以來未見有用兵如是之神且速者羣慶更生至今猶銜感不置再克古州永從等處時石逆竄湖南圍寶慶府又檄公募足四千五百人回援三月進抵寶慶之九拱橋時石逆圍城號稱百萬並分兵圍公營自四月合圍無日不戰初挖濠築牆以自固

後牆倒濠填與賊聲息相聞互攻互拒一夕數起一餐累輟至六月中糧藥將罄公另挑營中敢死士號曰死勇將決勝負於一戰會前安徽巡撫李勇毅公續宜由鄂來自外攻入公率死勇由內應之斃賊萬餘人先燬附城賊營三座東西南之壘亦連日攻下勢如破竹石逆退入廣西改死勇名曰長勝軍移駐靖州旋

命署貴州提督督辦貴州軍務十年取道銅仁分三路進解印江思南石阡等城圍並克貓貓山等賊巢兩旬日內復地數百里四月

授貴州提督十月石逆猝陷荔波獨山定番廣順省城戒嚴前巡撫劉源灝請保省城公率所部馳抵省垣布置城防即親督大軍赴定番迎勦石逆聞公臨陣棄城南竄當公未進省時僅午未時開放南北兩門出入迨公擊退石逆各門如常人心大定十二月

授欽差大臣關防十一年兼署貴州巡撫時年二十有四也時上游猺狝各族下游苗教各匪府無完縣縣無完堡公分路援勦屢挫賊鋒招撫著名逆首唐天佑賈幅保陳大六柳天成等克復歸化荔波定番廣順獨山等城疏通省道聲威大振同治元年西人文乃爾傳教入黔公惡其倔強殺之西人譁於朝

命褫公職交川督查辦隨帶長勝軍一營出省士庶焚香跪送不絕於途者數十里公悉慰去之途次遵義屬之旺超值前雲貴總督勞文毅公崇光爲賊所困勢甚急公聞之驟馬衝入大呼曰田某在此鼠輩敢爾賊驚潰翼勞公出四年發往新疆效力行至甘肅前大學士恪靖侯左文襄公宗棠奏留防秦州甘回不敢犯境十二年釋放回籍鎮筮兵蠶動公出彈壓立靖光緒三年十月十八日卒於家年四十有一公將事以敬待人以誠未嘗讀書用兵輒與古人暗合生平戰績江西湖南爲多而措施之難心力之瘁尤以黔中爲極蓋黔中當承平時常需各省協濟嗣罹大亂公私壁立鄰疆同禍呼籲無靈公挫狂寇於初來保危城於垂破徵兵籌餉於萬難措手之中布置秩如又於前政寬弛之後稍稍繩之以法謗怨沸騰卒不安其位而去羣惜其才而悲其未竟也公身爲疆臣治軍十餘年家貲不及鉅萬偉矣哉爰次其事而系之以銘曰

巖巖鎮筮五谿上游土風僥悍爲國好仇公起疏賤束髮授仗渾瑊石峰功立跳盪出援江西突將無前無捷不奇無摧不堅呂蒙刀盾高昂旗鼓陳如撒星戰如驟雨地險而瘠莫如黔中苗教狃蝨蝨叢叢

詔畀我公總軍開府又我人民固我疆圉公率萬眾先奠會城四門洞  
開民心大盜巨竹須解溼薪須束軍衛民生民輸軍粟方期傳箭大可  
犁庭盤江洗甲黔靈勒銘壽張祆教猙獍彼族無禮於君鷹鷂同逐公  
提督謝恩疏有云各為其主常懷犬馬之誠無禮於君妄僥鷙鷂之逐天下傳誦之  
朝旨詰責伏地引愆置對華陽謫戍祁連迨返田園重安耕鑿霖雨未  
施大星遽落

聖主知公始終保全公績未竟公名已傳海水西流景風東扇世無壯  
士誰堪一戰公魄在原公魂在天再生申甫圖象凌煙

楊忠勤公鼎勳別傳 朱孔彰

楊公鼎勳字少銘華陽人也咸豐二年洪逆擾湖南北應募從軍六年  
十月從湖北按察使李公益羣攻克漢陽力戰受鎗傷拔補把總李公  
殉難廬州公從浙江提督鮑公超管帶親兵攻湖口補千總十年正月  
偽英王陳玉成糾捻匪龔瞎子四十萬眾援太湖城賊官軍圍太湖鮑  
公拒援賊駐小池驛陳玉成圍之數匝鮑公開壁擊賊忽見東南壘外  
玉成立馬指揮公直前搏之玉成駭走賊大潰遂收復太湖潛山兩城  
賞換花翎曾文正公駐祁門霆軍四面擊賊力保祁門老營偽忠王李

秀成糾大眾由蘇杭上犯竄羊棧嶺陷黟縣公從鮑公破賊廬村斬級四千復黟縣城十一年正月從攻洋塘雞口坡謝家灘賊壘踏平三十餘座復建德縣城擢都司又從攻下安慶城外赤岡嶺四堅壘禽悍酋劉瑄琳六月李世賢李秀成合眾犯江西陷二十餘城逼近南昌省垣從鮑公援勦所向皆捷江西肅清擢游擊留四川補用李公鴻章之援江蘇也舊在合肥團練有營官四一曰劉銘傳二曰周盛波三曰張樹聲四曰吳長慶在安慶商於曾文正公復添選各營驍勇知名之將於曾公國荃軍選得程學啟於老湘軍選得郭松林於霆軍選得公於是乘坐輪船統七千人駐上海公一戰解四江口虹橋之圍以次收復川沙南匯奉賢清浦四廳縣擢參將追賊至嘉定收復縣城擢副將仍留四川卽補旋募淮勇千人立勳字正副兩營駐金山張堰禦平湖乍浦與浦東要衝公以洋人鎗隊整齊令所部以洋口令教習來福鎗法淮軍之學洋操自公始同治二年五月與副將覃聯陞攻新昌踞匪聯陞中鎗歿公伏兵敗之李公乃以聯陞所部兩營歸公統領七月攻賊嘉善西蹋平楓涇賊壘斬馘三千又平西塘干窯賊壘滕受鎗傷八月奉旨以總兵簡用並



賞剛勇巴圖魯蘇州逆首偽慕王譚紹洗糾各偽王眾數十萬於城外環築大壘爲犄角之勢公會程學啟劉士奇軍盡攻破之偽八王殺紹洗獻城降加提督銜三年二月偕李公鶴章進攻常州先後克復宜興荆溪溧陽三縣城又會合水陸各營解常熟無錫縣之圍時逆首偽護王陳坤書擁眾數萬死守常州於西南門外當丹陽金壇之路連營二十餘里婁攻不下三月公督軍攻西門外賊營鎗子傷胸嘔血數升暈絕於地將士憤極拚死猛攻一日平二十餘壘會李公鶴章郭公松林夜造浮橋公扶傷攻南門冒礮煙登城遂克之常州以咸豐十年四月初六日加未陷賊凡四年今克城月日時皆不爽奏入

命以提督記名簡放五月創愈助剿浙境克長興六月克湖州追賊至皖境克廣德州城

賞穿黃馬褂時江浙肅清逆首李秀成在金陵禽獲李世賢自杭州逸出糾餘黨竄江西復竄福建窮寇十萬據漳州府四年春公航海往援會合浙江提督高連陞攻烏頭門焚賊壘十餘座漳州平五月詔授蘇松鎮總兵六月調屯鎮江旋以北路捻氛熾移屯宿遷明年六月移軍曲阜未至調回駐台莊曾文正公督師剿捻調赴豫省九月由

朱仙鎮追賊至定陶日行百餘里禽斬無算六年李文忠公督師二月  
擒匪竄湖北公至黃陂孝感截剿俘馘尤多旋調守山東濟甯州運河  
六月授浙江提督八月調湖南提督十月剿賊於濰縣杞城大破之賊  
赴水死者甚眾賊東南奔追至夏灣又破之十一月東擒平奉  
旨賞騎都尉世職時西擒張總愚自陝西來援擾晉豫邊境直犯畿輔  
公方息兵濟甯州調至武邑偵知賊踞安平繞至周村擊破之斬級千  
餘俘五百餘人是夜四鼓偕郭松林等軍追賊至饒陽楊家邨逆目張  
志清等降餘賊南奔追至河南滑縣毛家集復慮賊竄回直隸約諸軍  
經濬縣北一爲攔截之師一爲橫攻之師將次大邳山果見賊紛紛北  
竄縱擊至滑縣西南李村斬馘無數復追及衛輝府境斬悍賊目王建  
瀛降僞天將熊八并騎賊五百名復追至龍王廟生禽悍目何士喜周  
久等四月賊由德州復竄天津界公由東昌購備行糧晝夜冒雨急馳  
繞出賊前津郡之防遂固是時李文忠公議就運河圈賊先扼滄州保  
固津畿門戶而滄州之滅河實爲要地非宿將重兵不足控制遂派公  
中滅河並咨商三口通商大臣崇厚添兵協助借撥福建協餉五萬爲  
減防要需公身負版築爲士卒先修牆浚濠日無停趾南岸賊直撲河

牆屢擊卻之乃以積勞傷發嘔血數升卒年三十有四公卒逾旬西捻  
平惜公未及見也李公鴻章奏公智勇忠勤久歷戎行能輯和將士深  
知大體精習外洋火器於練兵制敵方略別具會心故戰勝攻取積功  
最多實爲一時名將疏入

詔曰該提督從軍十餘載轉戰九省功績卓著著照提督軍營病故例  
從優議卹準於江蘇福建山東等省建立專祠戰功宣付史館立傳伊  
子襲騎都尉世職楊萬凱著俟及歲時由吏部帶領引見候旨施恩用  
示朝廷篤念勳臣至意尋

賜卹如例

子諡忠勤並

贈太子少保滄州士民又請於滅河建祠

上允之公性純孝江南平定後迎養太夫人在蘇州假歸省侍務得歡  
心在軍則紀律嚴而有恩非淮將而領淮勇先與程公學啟郭公松林  
齊名後勦捻匪又有劉楊周張四大將之目劉謂銘傳周謂盛傳張謂  
樹珊也北征苦寒之地他軍寒衣皆用棉公捐廉改用羊皮撫循周至  
號令嚴明世目公所統爲楊家軍公攻克城邑不取賊中之金不收降

人之饑故卒後蜀中僅有田四十畝住宅一所劉壯肅憫其母老子幼

令各軍賻助反其喪云

評曰楊忠勤本霆營良將性行淑均曉暢軍事年未強仕積勞而終惜

哉若天假之年其功業甯有限量吾聞

本朝西蜀出將忠勤其昭勇侯後身邪

李勇愨公成謀別傳 朱孔彰

李公成謀字與吾湘鄉人也家貧以補釜爲業父死不能殯葬舅氏賻之公兄弟三人皆嗜博飲私相謂曰今藉舅氏力僅可舉喪事無以治酒食待鄉里弔客孰若攜資入博局以冀一得足自豪負則吾三人昇父而葬何如皆曰然一夜竟罄其資遂用葦棺葬父於黃牛墩後公兄弟皆貴人以爲得吉兆云咸豐初曾文正公勅水軍公應募隸楊公載福戲下轉戰湘鄂潯陽積功擢副將公軀幹雄偉身長八尺能一手樹大櫓張颿而行胡公林翼歎曰詩所謂有力如虎執轡如組者其李將軍之謂乎七年五月師次官牌追賊至湖口前隊輕進爲賊所乘公衝入賊陳拔出諸將轉敗爲勝公統偏師嘗出不意擊賊日夜颿忽數百里倏東倏西旣克湖口彭澤擊馬當燬華陽鎮賊舟殆盡進拔望江先

登陷陳明日破東流趨安慶破對岸賊壘三又明日衝過安慶破樅陽賊壘燬賊船八十餘又明日破大通賊壘三燬賊船五十又二日克銅陵破土橋賊壘四焚賊船百餘駛至舊縣峽口見江南水軍紅單船紅單船上人以楊公一軍從賊中來何以飛渡至此又言銅陵泥汊賊築堅城二攻七月不下楊公令公往攻不半日破之盡夷賊眾獲大礮數百尊奪大拖罟船一三版船四得米六屋軍械無算悉送紅單船紅單船將大驚媿喜八日回駐湖口自湖口以下七百餘里江面肅清胡公奏是役出奇制勝公功爲最於是天子褒嘉以公有老母在素聞其孝

賞二品封典實異數也後克復九江安慶擢漳州鎮總兵克太平蕪湖金柱關東西梁山各要隘擢福建水師提督同治十一年黃公翼升爲長江提督乞病歸是時公已之福建任用鼓公密保朝廷命公代黃公十餘年長江三千里桴鼓不驚盜賊屏跡皆公之勞也光緒十七年卒於官

贈卹如例子諡勇愨

李提督朝斌別傳

朱孔彰

李公朝斌字資堂湖南善化人咸豐間入水軍隸楊公載福戲下從克  
岳州武昌湖口沿江城邑累敘至總兵同治元年攻拔蕪湖金柱關擢  
浙江處州鎮總兵克九洲擢提督曾文正公勅設太湖淮揚水師令  
公領太湖一軍黃公翼升領淮揚一軍李公鴻章先率陸師八千人援  
上海公與黃公率水師往佐之七月至上海與程公學啟會師夾浦督  
師船百艘攻沿湖賊壘下之九月進澹臺湖破賊壘六月與總兵張  
遇春破盤門外賊壘蘇州省城既復  
詔授江南提督在官十餘年整飭戎行優劣得所屢出海巡緝操練南  
洋兵輪江防鞏固彭剛直每歎其賢後乞病歸光緒十九年卒於家公  
本姓王氏官江南提督時牒請歸宗曾文正批答云來牘具悉貴軍門  
於始生之際卽爲李氏撫養艱難鞠育至於成立王氏本生父母已隔  
絕不相聞問事隔四十三年直至今歲始有呈請歸宗之議披閱所鈔  
李氏族叔傳誡等家信其中所引典故大半本於晉賀喬妻于氏表文  
未必十分中禮所述從前情事稱王氏恩誼已斷尙非過當之論本部  
堂攷核古禮無與此案恰相脗合者惟查古來名臣如吳之朱然本姓  
施氏周逸本姓左氏魏之陳矯本姓劉氏宋之葉夢鼎本姓陳氏卽當

代名族如嘉興錢文端公之先本姓何氏合肥李爵大臣之先本姓許氏其後皆未歸宗必有權衡於至當者乃不爲世所譏本朝言禮之書惟秦文恭公蕙田之五禮通考最博且精其所引金史張詩一案詩本李氏子育於張氏閱三十年始知初議歸宗以張氏無子遂仍其舊秦公稱張爲孝今貴軍門王氏本生之父母尙有眾兄弟承祀而李氏撫養之父母別無主後正與張詩之事相類權度禮意貴軍門應爲李氏後不必歸宗豪無疑義惟於李氏別爲一宗與王氏不通婚姻一以報鞠養之深恩一以明族屬之大義本部堂當奏明立案以爲貴軍門家葉之緣起至王氏二老以垂暮之年目睹貴軍門身躋通顯追念前事羨而兼悔自屬常情禮不忘其所自生貴軍門天性肫摯必宜曲盡敬養之禮恩義周至斯兩全之道也

吳武壯公長慶別傳 朱孔彰

吳公長慶字筱軒安徽廬江人也同治元年以守備從李公鴻章援江蘇駐軍滬上五月僞忠王李秀成僞聽王陳炳文僞納王郅雲官糾數十萬眾犯泗涇逼上海圍程公學啟營李公自督師赴援公爲前鋒與副將滕嗣林參將張遇春大破賊於新橋程公瞭見旗幟開壁門出夾

擊斬級三千餘滬防肅清保游擊領一營駐金山衛屢卻賊後李公令  
回皖增募新軍同知張樹聲募樹字五營公募慶字五營募未齊僅得  
二千人而偽忠王適犯江北由浦口直趨廬州曾文正公留樹字營守  
無爲慶字營守廬江賊來犯敗之李秀成既遁走皖北平二年春始回  
上海其秋從劉公秉璋大破賊於嘉善東擢副將明年二月克嘉興晉  
總兵

賞力勇巴圖魯後從劉公銘傳討捻匪有功補直隸總兵事平調回江  
南防軍駐浦口光緒初直隸總督李公鴻章調防旅順

詔授廣東水師提督八年夏朝鮮亂黨圍攻日本使館並及王宮公率  
師三千東援先日本兵到韓城偵知亂黨在枉尋利泰二里七月十六  
日公督軍往禽亂黨一百七十餘人而事定執李昱應送天津昱應國  
王李熙之父實爲亂階十七日倭提督花房輕騎繞王宮覘我軍動靜  
公部勒嚴整日人不敢校朝鮮與日本和議遂成公因奏明留三營保  
護紀律嚴明韓人德之十年春病卒年五十有一

朝廷軫惜從優  
賜卹子諡武壯准於嘉興府建專祠有子某某公初以朝鮮政敝民窮



兵單地要屢言於李公鴻章爲練兵備患李公不甚措意以爲越國與謀甚非易事又乏將才委任故公歿卽撤駐韓之兵回國韓之君相思公遺愛爲立廟王城至今頌之公喜讀漢書愛文士常悲沒世而名不稱曾文正謂有儒將之風若天假以年其功業甯有限量哉至光緒二十年朝鮮果有日人之釁論者謂得公赴援當不使強鄰日逼辱國若斯詩云人之云亡心之憂矣其斯之謂歟或曰公在營能散財以勵將士淮軍諸將多擁厚資惟公蕭然如故卒時二子幼部曲集萬金以贍其家云

前署湖南提督王公神道碑

郭嵩燾

公諱永章字綬卿姓王氏湖南甯鄉縣人少孤負奇氣不樂就學羅忠節公始治兵長沙往投之每戰先登連克崇陽通城蒲圻爲隊長洎攻湖口轉戰江西旋會師武昌羅忠節公卒從李忠武公戰望江東流銅陵克復舒城廬州比有功李忠武公敗三河君以隊長搏戰傷創甚歸會石達開竄湖南駱文忠公檄君開募章字營是時猶爲參將名未甚顯然在軍往往相與指目以爲能戰駱文忠公召與語奇之公之別領一軍取進止自此始也石達開出沒楚境經年粵東西積匪相踵起君

轉戰郴桂閒蹙賊廣西之賀縣復其城保總兵又截擊石達開永明道  
州降其眾二萬人躡賊寶慶與相持綏靖之交攻克黔陽會同扼之龍  
山之紅巖四日賊死咋不得逞竄入蜀於時君之功尤多保提督先後  
賞戴花翎

賞振勇巴圖魯名號正一品封典並以提督

記名簡放同治六年湖南巡撫劉公大發兵征貴州苗公獨當思南一  
路攻克大地小地逾年苗平而江華猺亂起以公節制諸軍兼籌勦撫  
於時以所部三營駐防常德岳澧當西路之衝二十年有發則馳驅赴  
敵罷卽歸防

天子念其勞屢賜文綺玉柄刀決拾之屬兵部尙書彭公奉  
命辦理廣東海防檄公以所部從遂以勞卒於軍得

旨優敘

賜祭葬加賞卹銀二百廛一子入監讀書先給六品頂戴公性沈鷺寡  
言笑與人無周旋而推誠闊達未嘗有所疑忌自始居卒伍及任爲將  
臨敵必先論功常退處於後遇有調發得檄卽赴一不以疑難自阻與  
強敵相持警報沓至羣疑子子公從容指揮常若有餘兩署永州鎮總

兵一署湖南提督出入無儀仗一循在軍之常身被數十創礮子如豆  
纍纍肌骨閒氣血虧耗夜臥環兵爲守與人言忽若遺忘捕膺赴戰馳  
突無前當者辟易軍中嘗呼之王顛云君生於道光十年庚寅歲十二  
月初八日卒於光緒十一年己酉歲十月二十五日年五十有八曾祖  
修泰祖榮人考定昇並以君貴

誥贈建威將軍妣皆一品夫人夫人周氏

誥贈榮祿大夫振榆之女妾蕭氏劉氏劉氏子八人廷謙廷俊周夫人  
出也長者廷誥藍翎縣丞廷贊廷謀廷楷廷模廷杰將以光緒十二年  
四月卜葬善化一都魯家園之原而屬壽銘其功揭之墓道乃爲銘曰  
時危道昌助哉桓桓盪滌艱屯以厝之安公起自微材官蹶張萬夫俯  
仰橫出莫當一戰之勳羣躋節鉞君經百戰始窺津筏自鄂達皖蓐食  
蹀躞衝城突陣痲痲盈膚稅駕旋湘乃提一旅洧除戶闔以捍疆禦湘  
軍縱橫東南戈鋌獨專其功桑梓周旋東望滔滔海壖狂獠旌麾所向  
星顏雨翳功施里域歌斯哭斯樹碑紀闕以永謳思

尙書銜甘肅提督周公神道第二碑

修葺

聖清中興湘楚人才雲龍風虎後先奔走而有魁倫冠能獨當一面以

誠懇之質建犁庭之功如尙書周公者亦可謂加人一等者矣公諱達武字夢熊號涓臣湖南甯鄉人曾祖□□祖□□父□□均以公貴封建威將軍妣皆一品夫人公年少倜儻有英氣昆弟皆讀書而公獨否咸豐四年入李公續賓營續賓弟續宜見之曰將才也從克湖北省城擢守備戰江西湖口進都司公每戰必酣飲手大旗盪決賊輒驚卻有譖之者李公曰吾見其入陳銳非醉不及此卿等勿言明日令領信字營百人爲先鋒八年夏復麻城克黃安擢游擊花翎忠武征皖公率壯士七十人先登克舒城而左耳受鎗傷甚重因回湖南九年春僞翼王石達開犯湖南邊湖南防軍多出援他省腹地空虛巡撫駱公秉章別募新軍求將才公以左公宗棠劉公典薦令與王永章各領五百人勦寇祁陽邵陽皆捷所謂章武兩軍也石逆犯寶慶公守東關拒戰破賊擢參將十年援廣西克富川平古城復賀縣擢副將石逆中旗賊犯永明後旗竄柘脾再破之論功以總兵用同治元年粵寇別股陷湖北來鳳期與石逆合公與各軍敗之復來鳳詔賞三代一品封典時湖南邊境肅清公以母喪歸無何蜀亂未定駱公秉章爲四川總督調公八月抵蜀境適寇酋周紹勇由大甯竄陝命

公追擊公以城口廳窄子口爲最要開出阨之口當兩山間僅一面可  
上令裨將李輝武何世華踰險入賊抵禦不及遂潰追至大竹安吉場  
禽周紹勇十月蜀賊郭刀刀竄儀隴公敗之茯苓場斬級千餘追至鼎  
山鋪賊三日不食皆降禽郭刀刀郭刀刀與周紹勇爲蜀中劇賊至是  
悉平

詔授公四川建昌鎮總兵官二年夏護理四川提督時粵寇僞扶王陳  
德才陷漢中擁眾數十萬全蜀大震駱公令公增募軍領四千人往來  
游擊蜀中以安三年蜀寇蔡昌齡粵寇僞啟王梁福成由漢中竄陷甘  
肅階州階州與蜀連公議以鞬爲防越境擊之二月與賊十數戰偪城  
爲營斷其出路乃隧地入而階州地多沙石穴十餘處皆爲水石阻最  
後公度將台山斜進直達城根復穴地道實火藥其中雷發城崩十餘  
丈死士四百人從灰土中躍入萬眾隨之克階州斬昌齡禽福成還成  
都駱公上戰狀

詔以提督記名並

賞上方珍物六月公領八千人討松潘叛番平之冬十二月

詔授貴州提督駱公奏留駐軍瀘州防滇邊野夷六年擒匪竄陝西左

公宗棠咨公會勦駱公奏留防蜀邊乃令部將李輝武率三千人入陝  
七年署總督完顏公崇實命公領四千八百人勦越嶲猺夷斬級數千  
諸夷皆降

詔賞穿黃馬褂九年

詔赴貴州提督任先是四川援黔之師萬餘人歷年用餉千餘萬至是  
川督吳勤惠公棠論罷其軍請公在本任總軍旅月由四川發實餉五  
萬八千兩供軍於以重黔權紓蜀力

詔可其奏公乃率六千人行沿途勦平苗寨無算遂抵貴陽與巡撫曾  
公璧光議戰守先後召募逾三萬人當咸同之際

朝廷方亟東征未遑南顧但責四川湖南出師援黔省尺籍久虛無  
曰主之兵省城百里外卽莫能制馭公至由龍里進規凱渡將上下游  
賊截爲二旋復都勻與巡撫合疏言黔省上游自清鎮西達畢節道路  
梗塞盤江以南諸城久經回據苗夷狎黨倚之爲援下游平越甕安爲  
遵義屏蔽接近苗疆不可無重兵扼防而都勻新服前有八寨巨股後  
有獨山麻哈之賊阻截糧運是必打成兩極使不得通聲息相援應然  
後可議勦撫

詔從其議十年正月進師高木塘距麻哈州十里苗營山巔四圍阻水  
進軍克之並下螺絲牛角中山等砦平楓香樹以下二十餘堡八寨酋  
聞國興踞山谷有年上書求撫又懼誅不敢出公以貴東大勢必先收  
八寨收八寨必先得國興遂贖俘者縱使去國興果因是與獨山團首  
唐大烜皆降公責令收回八寨上下江三腳自贖國興等感激立功於  
是盤江以北無賊蹤遂令何世華率四十人守盤江防上游各軍東下  
會楚軍克丹江凱里時麻哈州尙爲苗據五月公遣將曾紀鳳周家祐  
鄧千勝鍾開蘭次第攻克降下四十餘砦州屬悉平與楚軍隔一水哨  
旗相望公數十戰而克清平黃平二城楚軍又破天星臺頭兩要隘於  
是黔楚兩軍始合十一年正月公部克龍家狗頭二砦苗奔平茶牛角  
坡眾尙二十萬公約席部由凱里公由清平會勦一鼓破賊斬級三萬  
百七十餘寨皆降生禽賊酋包大肚金榦榦楊文開于陳及其黨劉開  
甲王鳳開等二十二名李高腳李文采兩酋竄至荆蓬坎公部三路追  
擊盡殄之時張秀眉爲楚軍所禽高禾爲黔軍所禽於是苗疆悉平  
詔賞公騎都尉世職湖南巡撫王公文韶繪圖獻於朝以雍正閒新闢  
苗疆六城古州台拱清江都江丹江八寨爲楚軍所復都勻麻哈清平

黃平爲黔軍所克川黔軍公所部也計席軍征討五年公部征討二年苗疆大定四月上游興義回教各匪蠢動公遣將討平之斬回酋馬斯駿五月遣將會滇軍攻普安新城新城最險賊碉林立旬月之間傷兵士三千人驍將文德勝亦戰死公聞信疾馳至以攻堅非策下令招撫賊遂降上游亦肅清以弟湖北候補道康祿鎮之明年復叛康祿被戕復往討平之黔中自咸豐甲寅遵義楊隆喜倡亂至今十八年苗教號擯各匪如麻加以粵逆來自粵西回逆來自雲南蝨蝨叢叢無從經理公截分上下游之策行勝一仗獲一仗之益得一地收一地之效下游與楚兵共定之上游則黔軍獨定之新城蕞爾愛將難弟喋血併命僅乃克之然後黔疆永靖焉嗚呼可謂功矣十二年公率全隊至蜀散軍乞病歸光緒三年

詔授甘肅提督回酋自白彥虎竄出關外關內番族就撫黎園番例貢馬匹歲出提督派弁點驗入陋規銀數千兩公憫窮番困敝咨請左公宗棠裁去之並請籌撥銀兩貸與各族資牧養番民感焉十年妖民王林倡亂於高臺公討平之斬王林十九年

皇太后萬壽慶典加尙書銜明年正月卒於官年六十八歲



詔建祠立傳夫人戴氏封一品夫人長子家濂以一品廕生襲世職次  
子家純孫聲蕃公幼失學及為將始讀書明大義通鑑中兵事之要者  
多能舉之生平敬禮賢士陶君森甲黃君沛翹均公所識拔者尤篤於  
故舊永固協謝永祐早為營官公為哨弁及公為提督以舊屬禮接見  
永祐待遇有加人尤多公謙厚云先子自黔罷官公招入幕迨克階州  
為先子請開復別二十年書問稠疊不少閒荃孫於同治甲子謁公蒿  
溪營次公詢其學憐其貧助以上進而頻年仗助之惜僅得一官垂老  
不遇不足稱公之期許而知己之感獨深謹次其事而銘之曰  
亞夫盛名子隱氣節龍泉太阿嶢嶢不缺磨盾作字擲戟長吟劍水一  
編得失寸心公之大綱傳之

國史觀縷私情尺幅不止我年弱冠萬里趨庭公禮先子橐筆在營營  
次謁公衣冠了烏萬馬無聲九秋月皎時重九次日即和公重九詩有  
萬馬無聲秋月皎後催詩更補菊  
花箋賞之語一詩契合日我以才告語先子蓄意栽培負笈從師為籌脩

脯上計踐京為籌資斧迨公謁

帝我官蓬瀛顧我而笑自詡非盲愧我疏狂微官落拓負公期望耗  
一鶴公之偉績尤在黔壘奈何記事專美研薌湘定下游黔定夫上進

軍凱渡先扼其吭湘禽秀眉黔禽高禾兩酋授首乃奏凱歌我發憤言  
公真大量萬里馳書戒我躁妄事功具在公論自存方略後出果如公  
言建節甘州屢懲僭竊清河推公目為豪傑張勤果入都言甘肅伏莽可慮幸提督有過人才諒

無大害大星既落

典禮恩榮過於一疏暫緩易名偉績如公常逢齟齬若我落落敢嗟咄  
咄九原可作吾誰與歸公歸兜率知音日稀不敏無文自陳胸臆作第  
二碑庶無慙色

馮少保子材別傳 朱孔彰

馮少保子材字翠亭廣東欽州人咸豐初聚徒於博白縣為眾所推後  
率數千人歸順從向公榮征賊有功擢副將七年從張公國樑攻鎮江  
鏖戰六晝夜克之八年五月金陵城賊出太平神策門犯孝陵衛大營  
公與張玉良等陷陳寨其大旗賊敗走自龍膊子至莫愁湖尸相藉毀  
城東北柵壘略盡十月克溧水擢總兵十年閏三月大營潰賊以全力  
陷蘇常官軍僅保上海一隅江蘇全省淪沒金陵無圍師二年公以三  
千人獨堅守鎮江屢挫賊鋒賊來攻嘗開城門出戰軍士無不以一當  
百幸糧路未斷頗與揚州舟師聯絡而餉項月三萬則仰給於滬關故

能戰能守保全孤城至同治三年四月曾軍已合圍金陵蘇軍已克常州公攻克丹陽以應之

朝廷以守鎮江功

授廣西提督

賞給騎都尉調雲南提督及李揚才之亂越南王來請兵公督師出鎮南關討平之光緒十年法人爭越南與中國肇釁先是廣西巡撫徐延旭調兵防邊敗於越南潘鼎新代之又挫於諒山公暨總兵王孝祺軍自廣西來援先後抵龍州孝祺軍甫出關而諒山防兵已潰公親率一營先至南關廣西巡撫令公統十營回駐關外東路及聞警復西援法兵已入鎮南關統將楊玉科戰歿總兵董履高受重傷諸軍多潰十一年正月十一日法兵焚關退翌日公至南關建議於關內十里之關前隘跨東西兩嶺閒督所部築長牆三里餘外掘深塹爲扼守計營於嶺半令王孝祺軍屯於後半里許爲犄角當是時蘇元春陳嘉軍屯幕府在關前隘後五里蔣宗漢方友掎軍屯憑祥在幕府後三十里潘鼎新軍屯海邨在幕府後六十里魏綱軍屯艾瓦防芄封在關西百里王德榜軍屯油隘防入關旁路在關外東三十里獨公一軍當中路前敵得

越南人密報法兵將出扣波襲芄封攻牧馬繞出南關以北欲斷唐景  
崧馬盛治兩軍歸路公遣五營扼扣波以待法兵至公突出奮擊獲其  
馱軍火大象一禽匪黨二法兵敗退復來爭再擊卻之乃率王孝祺軍  
出關襲敵破其二壘法兵多死敗走二月朔法人悉起諒山之眾并力  
入關直撲關前隘長牆公告諸將曰法兵再入關有何面目見粵民何  
以生爲諸將皆憤甚誓與長牆俱死法以開花礮隊循東西兩嶺進向  
下轟擊以鎗隊撲中路法謂越南人皆公軍內應自以眞法兵居前黑  
兵次之越南散匪又次之礮聲遠聞七八十里山谷皆鳴鎗彈積陳前  
厚者至寸許我軍死戰傷亡殊多王孝祺自率小隊攻東嶺敵稍卻蘇  
元春援軍至合力拒戰諸軍傳餐夜未收隊王德榜自油隘出軍夾擊  
法糧械盡數奪之是月八日清晨復大戰法兵來益眾礮益密公拒中  
路蘇元春助之王孝祺當右陳嘉蔣宗漢當左左路卽東嶺法礮最猛  
公與諸統領約有退者無論何將遇何軍皆誅之復於各路設卡截殺  
逃者公與王孝祺各刃退卒數十人敵勢狂悍致死已薄長牆或已越  
入公年近七旬短衣草履持矛大呼躍出長牆率二子相榮相華搏戰  
將士開柵門湧出諸軍見公如此無不感奮關外游勇客民千餘聞公

親出陳皆來助戰王孝祺部將潘瀛率壯士袒臂裸體衝入敵陳蔣宗漢陳嘉爭東嶺嘉受傷不退王孝祺奪西嶺抄敵後與陳嘉等合擊是日王德榜擊法援兵於甫谷亦自關外夾擊東嶺於是法兵鏖戰兩日彈礮已盡後隊軍火又被截惶懼無措頃刻間礮聲頓息遂大奔我軍追殺法兵翻巖越澗而竄有法國王子在兵隊中習戰亦逃死旬日後有樵人入山見深谷中餓死法人數十此役計殺真法兵千餘法酋數十客匪教匪數百公遂率大軍出關浹辰之閒克文淵州克巴平克驅驢墟克諒山獲法人軍械糧米皆納之官軍無私焉又與諸軍分兵追勦克谷松克觀音橋克屯梅即長克拉木攻郎甲即諒王孝祺進軍貴門關共斬法酋數十斬法兵無算盡復去年官軍所駐邊境又率全軍進規北甯適奉停戰撤兵之旨乃止最公三次出關討平越亂恩威並著越南軍民間公至若得慈父母凡關外越人受法匪游勇之害者關內民人受各軍騷擾之害者咸來赴訴公亦視若子弟惻然矜憫爲之撫卹示禁告戒諸軍越官越民爭爲耳目敵人舉動悉來報知近自北甯遠至西貢皆通消息公軍出關後扶老攜幼簞食壺漿來相犒問願供辦資糧嚮導先驅助官軍

勦除法人長爲

天朝赤子公亦毅然自任致書兩廣總督張公之洞督辦廣東軍務彭公玉麟請奏謂若假以事權期一年肅清全越由此觀之機會誠可惜也法人受大創卽詣北洋大臣議和罷兵

朝廷論功晉太子少保十九年

皇太后萬壽慶典加尙書銜明年中東肇衅官軍挫於平壤

詔公率軍北援駐江南鎮江待調遣和約成仍回廣東欽州防邊二十

九年廣西土匪勢熾

命公往勦甫募練成軍公子相榮相華率以進公病劇秋七月卒於軍年八十有六兩廣總督岑春煊奏聞

賜卹有加公子相榮相華官知府餘子孫十餘人

評曰馮公佐平洪寇保全潤州可與張忠武齊名矣其後三次出鎮南關先平越裳之亂遠人已懷德畏威又破佛郎機之強敵

天威遠揚使遂公之志肅清南裔立銅柱爲界其勳業不當與漢伏波後先輝映哉

宋忠勤公慶別傳 朱孔彰

宋公慶字祝三山東蓬萊縣人公家素寒微咸豐初粵捻孔熾安慶既陷以廬州爲行省公從登州鎮兵至廬州會鄉人宮國勳奉檄知亳州公給事官廨後從軍立戰功官至總兵過亳州謙抑不敢與宮抗禮乃書謁稱門下初帶三百人有勇有謀收撫捻首孫之友等編爲奇勝營大臣袁公甲三河南巡撫英桂公皆稱其能安徽按察使張學醇尤重公以所統得勝營請袁公屬公接帶五年大股捻匪攻亳州力戰解圍擢千總藍翎河南巡撫瑛棨公調赴河南助勦積功保花翎游擊七年袁公督辦安徽全省軍務駐臨淮復調公赴皖八月髮逆陳玉成糾合張落刑龔瞎子捻眾十餘萬圍攻鳳陽府縣二城公會總兵陳國瑞各選精銳數千人夜襲賊營賊驚潰解圍遁十一年苗沛霖叛派公帶隊疏通徐泗後路攻奪卓圩黑劉圩湖溝等處賊圩數十處臨淮大營始得保固先後數百戰積功奉

旨以總兵記名簡放

賞毅勇巴圖魯名號同治元年秋安徽巡撫唐公訓方接辦軍務裁臨淮舊軍以公分統毅字三營是爲毅軍之始唐公初至素聞臨淮乏餉隊伍不整及閱公所部驚曰人言曷足信此隊奚異楚軍營務處吳兵

備大廷兩次夜入公營刁斗森嚴謂公曰吾信君矣由是唐公益重之  
三年苗沛霖復叛眾數十萬圍蒙城十月之久城中糧盡有紳士李  
南華者善戰守苗眾屢次登城皆擊殺之夜遣壯士縋城以繩繫賊尸  
入烹食之明日城外無一尸苗大駭不敢逼攻於是官軍用大圍圍之  
陳總兵國瑞猛攻令公斷其糧道會忠親王僧格林沁由東省馳至督  
戰發開花礮數十賊夜潰苗沛霖死亂軍中蒙城圍解餘黨尚眾僧忠  
親王飭公往撫一日夜馳二百餘里由苗老寨至下蔡其酋率千人出  
迎尚復傲慢立誅之餘均歸順壽州正陽關亦迎刃而解逆酋李萬春  
朱萬隆及逆姪苗景開皆捕送僧邸營伏誅兩淮平維時豫省盜賊充  
斥張公之萬無豫咨調公再入豫是爲豫軍之始髮捻會合盤踞嵩縣  
山中捻首張總愚等黨眾數十萬蔓延數百里張公之萬駐汝州張公  
曜爲翼長率各軍在嵩公喘息未定卽赴嵩晤張公曜詳詢地勢賊情  
張公曜曰諸將來見無詢及此者君來豫之福也訂交極歡爰會勦陶  
灣復迫至馬山口賊勢不支竄入楚畱會粵匪僞扶王陳得才等擁眾  
十餘萬闌入英山僧邸大兵亦至公會合陳總兵國瑞各率壯勇焚燬  
木城數十里禽斬梟將多名賊計窮勢蹙陳得才縊死山谷餘眾悉降



四年補授南陽鎮總兵賊竄山東僧邸檄公及張曜兩軍勿出境以杜回竄會僧邸戰歿曹州賊勢愈熾公被困於鄧州刁河店三日無壘可守無糧可因令裨將馬三元率壯士三百潛出收集尾隊步步前紮以通糧路軍士氣倍無不以一當百賊乃解圍遁張總愚旋復在鄭州挖決黃河三十餘處意圖北竄公追及據隄痛擊忽南風大作水勢北趨河岸乾涸率眾力戰張逆西趨秦任賴各股復入豫連擊之亦南竄楚豫境略平時湘軍將劉松山亦在河南助勦曾文正公喜曰二君以戰事相勉推功讓能得師克在和之道河南巡撫李公鶴年奏賊無宿糧不卽殄滅者賊騎我步以步當騎走不相及滅賊之計非合圍不能勦賊蹤蔓延三百州邑因險合圍固非一省兵力所可辦第爲勦則必勝計豫軍多穎毫人與賊相習其長技亦略同宜若可用因添練兩大軍曰豫軍曰嵩武軍各萬餘人察豫省宿將無如南陽鎮總兵宋慶前布政使改用總兵張曜者請起張曜於家與公各領一軍由是豫軍良將宋張齊名六年會合銘盛嵩武等軍扼守黃河驅任賴等股於東境以次削平蒙

恩賞穿黃馬褂換格洪額巴圖魯勇號西捻張總愚由山西吉州渡冰

橋直犯畿輔公率軍倍道繞出賊前大小百餘戰至七年六月驅賊於齊河玉林鎮會合湘淮各軍聚而殲旃得力處尤在公饒陽一戰擊斃悍目張五黑賊膽遂寒李公鴻章上其功

特賞二等輕車都尉世職補授湖南提督東捻西捻既平西回方熾公奉

命會合張曜軍馳赴秦晉相機防勦八年正月馳抵神木縣當回匪屠城之後屍積如山城空無人煙埋胔掩骼招集流亡撫卹未畢邊寇遽至一戰於紅柳樹再戰於鹽池葛綦店斬馘無算回匪憚公聲威不敢復出擾榆邊始安方各軍之初入晉也時值隆冬代北嚴寒積雪沒脛各營官不恤兵艱以致紛紛譁潰分統毅前營劉提督廷聞報派隊西渡大張旗幟叛軍怵服不敢動會湘軍將劉提督松山馳抵綏德州斬倡亂者十數人而事定九年劉提督松山陳隕金積堡將軍金順與張曜會辦甯夏軍務糧道阻隔岌岌不支公令劉提督廷率隊往援收復河西三縣攻破王家疃納家閘洪岡賊寨又令提督馬三元蔣東才搜勦鄂爾多師餘匪七戰七捷後路疏通甯夏金積堡各軍遂得假手成功十一年西甯肅州均告急左文襄公宗棠調赴甘肅助勦六月奪取

肅州東關晝夜環攻城內饑困八月文襄親臨視師賊懼乞降游移反復因而克之關內肅清  
特賞雙眼花翎欽差會辦哈密剿匪事宜公受寵若驚自籌糧運先派兩營前往哈密屯田旋補四川提督皆在軍遙領十三年冬河狄撫回閔殿臣復叛楚軍失利時公駐軍涼州文襄飛檄徵調三日馳五百餘里時人稱爲飛隊軍抵沙泥站回眾大驚縛獻首逆餘黨悉散光緒元年以中原腹地空虛奉旨振旅東還河南議裁兵節餉酌留馬步九營時值晉豫奇荒道殣相望亂民胡豹子聚眾謀不軌公勦撫兼施地方以安六年奉命會辦奉天防務八年移防旅順適法人構釁窺我有備夷艘無北犯者十餘年來軍容稱盛醇賢親王奉懿旨巡閱歎爲諸軍之冠親解袍服賜之  
皇上二旬萬壽蒙  
特恩賞加太子少保銜入

覲

賞紫禁城騎馬二十年

皇太后六旬萬壽慶典

特恩賞加尙書銜是年秋中日失和先派馬提督三元赴朝鮮助剿公復奉

命幫辦軍務便宜行事

諭飭添募三十營並令先就現有之軍馳赴沿邊辦理軍務維時僅有馬步隊三營及宋提督得勝新招二營倉皇赴敵諸將佐束手無策公到軍心始定敵兵已過義州撲犯九連城公親率馬宋兩分統首先撲過愛河眾勇繼之衣履盡溼猝與敵遇自卯至午鏖戰三時之久三面受敵一無接應猶復激勵將士勉以大義力圖恢復欽奉

朝命南援金旅未至旅順已失陷是時新軍已成數營復收集殘卒一戰於感玉寨再戰於太平山田莊台公立馬督戰奮不顧身馬中礮斃三易馬不稍卻先後殺敵無算嗣皖豫所招之營陸續成軍戰事略有把握忽以議款停戰冬十二月蓋平縣失陷自請從重治罪

詔子薄譴降二級留任明年二月營口田莊台相繼失守復請從重治罪部議再降二級調用

加恩改爲革職留任是年冬日本交還金旅奉

命前往駐守二十四年遵

旨移防山海關公先患風痺九月於錦州途次奏請

予假調理

恩賞人參活絡丹冬十一月入

覲奉

懿旨開復處分

賞西苑門內騎馬乘坐船隻挖牀二十五年夏舊疾復作具摺請假再

賞人參冬八旬

賜壽

皇太后賞耆年偉略匾額

御筆畫屏四幅福壽字無量壽佛如意他珍物稱是

皇上賞樹績維祺匾額餘珍與

太后所賜同二十六年

皇上三旬萬壽恩賞鸞珞集瑞匾額蟒袍料夏五月猝遘拳匪之亂八

國聯軍麇至奉

命幫辦北洋軍務自念年力衰邁恐誤軍機奏准以馬提督三元接統

所部各軍公指授機宜不分畛域馬提督率軍力戰連得大捷敵人死  
亡數千我軍勁卒亦傷亡過半時直隸提督聶士成前山東巡撫李公  
秉衡先後陣亡軍無後繼敵氛進逼京師

聖駕西巡公以兩次督師孤忠力竭抱恨無窮由是疾病纏綿明年和  
議成扶疾至汴恭迎

聖駕還宮未幾病歿年八十有三事聞

朝廷震悼晉封三等男爵詔建祠立傳

予諡忠勤子天傑

賞五品京堂孫裕繼

賞知府公從戎五十年未嘗一日安處每止屯獨坐樹下目驗兵卒皆  
安舍然後入帳中與賓僚議事文報無遺漏而後安煦育士卒如家人  
父子體卹備至然有動民間一草一木者殺無赦故所至兵民感戴眾  
口同聲每戰士卒奪獲騾馬必收買交公直紳耆散與鄉民先後不下  
數萬蓋賊多掠鄉間牲畜恐耕種失時亦防隊內馬多或亂陳也公用  
心精細多如此每日必接見分統營哨官操場校閱必親到士卒最下  
者亦使之盡言嘗曰帶兵以訓爲先時時勉以大義俾知親上死長心

愈固則氣愈壯知乎此則用兵之道思過半矣湘鄉曾文正公湘陰左文襄公合肥李文忠公皆重公無異湘淮名將二十一年與日本款成廷議湘淮豫各留三十營公總統豫軍賜名武衛左軍麾下良將如劉廷蔣東才李承先宋得勝程允和姜桂題郭殿邦皆有名馬提督三元尤為傑出皆公選拔於行陳者公廉俸所入分潤親黨晚年好讀資治通鑑能通其大意尤好呂新吾呻吟語能作擘窠大字氣勢遒勁人皆寶貴云

評曰自

兩宮西狩忠勤即憤鬱成疾津沽聯軍何異以鄒敵楚猶能數戰決勝支持危局可謂難矣甲午之役忠勤猶言朗齋張勤早慶雲陳總兵若公曜字國瑞字若在我必能假手成功豈虛語哉

江南提督楊公事略 王治乾

公名金龍字鏡巖湖南邵陽縣人同治元年投效定武營隨勦出力獎給六品軍功四年肅清全閩案保把總藍翎七年攻克陝西宜川縣堅巢保守備花翎九年肅清全陝案保都司是年改投老湘營十年盪平金積堡賊壘保遊擊十一年攻破西甯小峽等處要隘隨摺保副將並

廣東通志卷五十三

賞強勇巴圖魯名號十二年克復肅州關隴一律肅清案內隨摺保總兵並

賞正二品封典光緒二年管帶老湘中營馬隊出關克復烏魯木齊等處保提督交軍機處

記名三年攻克吐魯番滿漢兩城保

加正一品封典四年克復南路西四城回疆一律肅清

賞給頭品頂戴五年追剿犯邊安集延布魯特各匪

賞換年常阿巴圖魯名號九年前兩江總督左公宗棠奏留管帶恪靖

親軍渡臺駐防要隘十年秋法夷犯臺統領仁綏湘練等營防嘉義彰

化一帶海口後奉調赴滬尾前敵十一年復統領仁綏等營駐紮臺灣

府城一帶海口七月兼統岳字各營並安平礮隊十二年嘉義縣屬辦

理開山撫番事務因受瘴患病內渡仍回江甯十九年署江甯城守協

鎮並統新軍五營二十二年四月補授二十五年升江南福山鎮總兵

二十六年總督劉公坤一電調赴甯委統護軍等營節制新兵等營並

親軍小隊九月總統元字三營衡字四營並節制金陵各礮臺事務二

十八年節制三大營並總統水陸各營事務三十一年授江南提督此



公所歷之官也公天性猛鷲戰必先登身帶重創有進無退由是眾服其勇而左公宗棠目之爲萬人敵在關外烏魯木齊時安集延布魯特犯邊公揣度敵勢冒險以進夜度冰達阪時方隆冬部下健兒有懼色公輒徒步爲之先士卒不敢違尾隨之徑抵寇營果不設備一戰大捷敵敗北歸老巢至今十數年不敢生覬覦心在臺灣時專防嘉彰海口布置周密慎以俟之靜以鎮之汛地晏然而躬辦生番鑿山以成路破釜以進兵撫勦兼施露布報捷在滬上將礮隊時建議創建斜橋至高昌廟之馬路便轉運而廣招徠購石采沙經之營之俾成坦途行者頌焉在金陵時歷年較多惠政尤夥先是勑築馬路自下關入儀鳳門經鼓樓過成賢街從花牌樓東迤至通濟門十有五六里當路之新成也路旁童然無雜蔭劉公語之曰若知昔陶士行鎮武昌有課諸營種柳故事平曷以爲課公召部下諸健兒卽於是年冬就柳取條十餘萬分按尺寸植路兩旁整齊劃一約十柳樹間一冬青今十餘年矣車馬馳驟莫不行綠雲青靄之間游人過客無不感激戍戍省垣米大歉民間持錢無所市米於是街市莠民乘勢糾結行劫米之事通城譁譟劉公飭公彈壓公倉皇上馬左手奉

王命右手握大刀督小隊二三十人疾馳南北米市大呼曰劫者立斬  
若非劫米者空手速散毋玉石俱焚也眾驚各鳥獸散彈壓十餘晝夜  
袍袴不暇易表裏皆汗溼二十七年夏江水大注圩岸多破江甯以沙  
洲圩爲最大墾田三十餘萬潮水泛溢勢甚岌岌公督兵防禦身自入  
水勇丁隨之包土戢椿圩賴以安田俱無恙歌頌至今他如造橋梁以  
惠行人濬名泉以存古蹟掘多井以禦旱災修祠宇以安忠魂大澤如  
春民歌樂只此則公所舉辦之事也尤憶庚子初秋北信日警南中謠  
言徧地亦岌岌不自保劉公調公於福山人省總統諸軍彈壓姦宄旌  
麾入城歡聲雷動一二不逞之徒稍露端倪卽駢誅之不稍寬貸民氣  
大定江南之民受公大德所以豐碑巨碣紀載善政出於民心之安以  
武將而兼能吏尤近今不數見

續碑傳卷五十四

江陰繆荃孫纂錄

忠節一

呂文節公別傳 李元度

呂公賢基字鶴田旌德人贈公某邃於經學拔貢官教諭公生有至性飭倫紀秉正嫉邪惡言不入於耳道光十五年進士選庶吉士授編修十七年分校順天鄉試二十二年授御史疏言南河工料與其購於他處不如取給於葦蕩請飭所司董勸庶險工有恃而經費亦可省又請申禁各直省加派勒捐之弊俱

從之遷給事中疏劾知州鄂雲夤緣投入楊威將軍奕經幕誑騙欺濫支軍餉又廣東劣幕余廷槐盤踞多年贖貨受賄與訓導黃培芳表裏爲奸藉團練乾沒軍餉且招募匪徒充數藐法滋事請飭嚴察究治如所請行二十三年轉掌印給事中丁父憂二十六年起補禮科給事中明年掌吏科印以河南旱災方籌辦振恤疏請將江南捐輸米轉撥豫省振災

允之二十八年巡視東城時江西安徽湖北水災

詔發帑振恤公疏言辦振之弊在造冊稽延定例水旱成災督撫疏報  
卽先給饑民一月口糧再查被災輕重分別給振誠以饑寒待哺若必  
待查取戶口完竣則老弱轉徙已多應請敕下所司遵照定例一面查  
取戶口一面放振無論極貧次貧均令先沾實惠俟冊籍已定卽於限  
內具題加振其加振日期務與初振接續毋許閒斷至戶口或有開除  
續增隨時具報有任意延緩者罪之庶有司不敢貽誤而愷澤得旁流  
其辦振急務數則一曰多設粥廠嚴杜剋扣攬和積弊一曰兼籌放錢  
糶米之法一曰展緩

恩詔宜急宣示一曰招商采買鄰省米穀接濟一曰收恤遺棄幼孩一  
曰收買耕牛疏入皆議行尋

命稽察西倉三十年正月

文宗御極公應

詔陳言一懋

聖學一正人心一育人才一恤民隱並請將江蘇浙江等省捐米例停  
止未幾遷鴻臚寺卿咸豐元年擢工部左侍郎典浙江鄉試二年兼署  
刑部左侍郎時刑部主事闕尚書恆春擬照舊章以京察一等筆帖式

題升侍郎書元欲以候補主事題補意見不同有旨詢各堂官所見與恆春書元孰同孰異公偕尚書周祖培右侍郎陸應穀遵

旨奏覆應如恆春議經定郡王載銓會同吏部議奏

如所請公尋以粵匪河工度支漕運事事可危疏請下

詔求直言略言粵匪滋事已二年命將出師尚無成效甚至圍攻省城大肆猖獗南河豐工未合龍重運之阻滯災民之屯聚在在堪虞河工費四五百萬軍需費一千餘萬部臣束手無措必致掎克朘削邦本愈搖臣愚以爲今日事勢譬之於病元氣血脈枯竭已甚而外邪又熾若再諱疾忌醫愈難爲救惟有開通喉舌廣覓良方庶可補救於萬一應請

特旨令大小臣工悉去忌諱一改泄沓之故習於時政闕失有可補救者各抒所見盡言無隱以期集思廣益疏入得

旨申諭各部院大臣九卿科道有言事之責者於政治得失民生利病有可補救者各據所見直言無隱八月充順天鄉試副考官九月署工部錢法堂事務充覆試閱卷大臣三年正月以粵匪稔亂

特命赴安徽會辦團練防剿事宜公奏請

飭部撥帑備用並請帶員前往幫辦又奏所過地方如查有堪備教習團練之人請咨各疆吏遣赴安徽軍營以資差委均

如所請行二月奏請

飭給事中袁甲三廣東知府趙昉均赴安徽協理防剿

允之尋借署撫周公天爵奏言團練防剿三事當分寄其任併致其力以圖之團練之事各就地方飭屬加意辦理激勸紳民殲除土匪防堵之事於江北沿江一帶擇精幹牧令稍假威權令其練本邑之兵團本鄉之勇因本地之糧以守本境之土各固藩籬永免徵調察其辦理之善者升銜加俸不遷其職俾得盡心固守剿賊之事專責之統兵大帥如大帥駐營去賊百餘里者立即逮問如此則各有責成無所庸其推諉疏入得

旨嘉納時湖北敗匪由英山犯太湖分黨竄出洪家埠奪船意圖東下旋竄踞安慶經官兵截剿復分黨由清涼庵至十里館犯集賢關各路兵勇接戰失利遊擊賡音太伍登庸死之未幾由集賢關犯桐城邑紳馬三俊等率勇迎敵敗潰桐城陷公方駐舒城誓死守或勸曰公無守

土責又未轄一兵今賊鋒銳甚請退守以圖再舉公叱之曰吾奉天子命治鄉兵殺賊事不濟命也退將安之遂納鞞刀率父老登陴力禦未幾城陷公力竭死之僚屬及幕佐皆殉焉十一月巡撫江公忠源疏聞

諭稱公品學兼優年力正強乃以逆匪竄擾舒城捐軀盡節悼惜殊深可追贈尚書銜照尚書例賜卹其子編修呂錦文服闋後以侍讀升用所有隨員幕友盡節姓名均查明請卹又

諭曰贈尚書銜侍郎呂賢基素懷忠義大節無虧可建專祠於舒城以慰忠魂光卹典並

賞內庫銀三千兩交錦文祇領赴安徽扶柩回籍治喪尋

賜祭葬

子諡文節並入祀京師及本籍昭忠祠八年入祀鄉賢祠公力崇正學行身植志不少苟詭隨者見之蹙然無所容在臺垣伉直敢言感時事至涕泣不食每入

對痛切瀝陳聲淚俱下

文宗屢爲動容疏出天下傳誦何文貞桂珍著續理學正宗唐確慎鑑

著學案小識公皆以進呈藉爲正學之助有議其迂者毅然不爲止其出治團防也自知不返別母行痛哭不能起烏虜公之志蓋夙定矣錦文官侍讀兼襲騎都尉

贊曰公恂恂儒者不知兵其出治團練也又無兵無食但提空名殺賊以忠義激勵鄉人欲以邊方張之寇難矣然公所能自主者一死報國耳狂寇旣逼誓死殉城較然不欺其志豈不偉哉太史公曰知死必勇公之死所繇重於泰山也夫

孫文節公傳

葉裕仁

孫銘恩字書常江南通州人道光乙未進士改翰林院庶吉士授編修二十二年遷國子監司業再遷詹事府右春坊右中允右庶子翰林院侍講學士轉侍讀學士咸豐二年授詹事府詹事主試廣東道出九江時寇氛甚熾江防疏略還

朝條陳防江十二策上之有

旨交江西督撫施行三年擢內閣學士兼禮部侍郎銜署工部左侍郎尋授兵部右侍郎四月督學安徽學使署在太平府城去江甯甚近屢經兵燹煙火蕭條兵餉乏絕風聲鶴唳一夕數驚至則激勸紳民並檄



各郡邑舉行團練出千金爲之倡紳民翕然從之是時大營兵勇往往  
逃亡至傍郡劫掠當塗令獲蜀兵鞠之其黨擁眾入縣衙奪之出洵洵  
趨學政署銘恩叱曰汝等欲何爲謂我不能殺汝耶則皆曰劫者非吾  
兵縣令誣吾來求公雪冤耳銘恩曰何故以兵入吾門召其首明正邦  
黃利中窮詰之皆噤不發聲俯首求赦尋散去未幾蜀兵熊鎮武蕭聲  
揚陳玉貴擁眾自大口口詐稱千人叩門求見呼曰吾等願殺賊立功  
爲大人前驅執將軍印文爲證銘恩出見之曰太平無賊舒城有賊何  
不往舒城勿驚吾百姓屬縣令善視之令待之甚恭蜀兵益驕橫銘恩  
怒會丁祭學宮文武官咸在召蜀兵歷數其罪蜀兵懼明日熊鎮武等  
向廬州而去遣衙官巡視江干蜀兵盡渡乃返遂以無事四年二月以  
父病奏請開缺乞

恩歸養使者未至奉

上命協同前任河道總督潘錫恩防堵徽州等處及奏上  
嚴旨切責准其開缺銷假以三四品京堂降補四月城外金柱關火起  
從者請出城暫避銘恩曰吾一日未去官一日不可離此城若亡甯與  
亡奚避爲越數日賊至出坐堂皇罵賊賊執之及其僕范源赴江甯銘

恩勺水不入口以死自誓賊百計說降源屢叱之賊忿甚以熾炭灼源  
窺銘恩終無降意乃殺源以脅之源鑿齒斷舌含糊罵賊而死銘恩亦  
遇害時五月十五日也事聞

贈內閣學士廕襲騎都尉世襲恩騎尉

賜祭葬

敕建專祠入祀京師昭忠祠及江蘇安徽各府城昭忠祠

子諡文節

又孫文節公祠記 俞樾

咸豐五年吾師孫文節公以安徽學政死寇難

顯皇帝憫焉

賜諡

賜祭葬

賜世職悉如典禮於原籍原任地方

敕建專祠春秋致祭所以勸獎忠臣風勵有位意深遠矣太平府為公

駐節之所宜建祠宇當塗縣知縣張君攀桂從士民之請請於大府祠

公於采石磯既得請乃於太白樓後卜地而經始焉鳩工庀材百堵皆

作棟宇既立俎豆以陳而使樾紀其事於石謹按公姓孫氏諱銘恩字蘭檢江蘇通州人也道光十四年中式舉人其明年成進士改庶吉士授編修已而遷司業遷右中允遷右庶子遷翰林院侍講學士轉侍讀學士遷詹事府詹事厯官清要垂二十年入則簪筆出則輶軒光譽令聞溢於朝野道光三十年去人之在閩者欲賃居城中神光寺寺故閩士讀書之所官已諾之士乃大譁公言於

朝其事遂寢咸豐二年公由廣東正考官還

朝時粵賊已由岳州東下陷漢陽府公請於九江以下沿江兩涯多置木簾支帳屯兵蟬聯魚貫縣互數百里東江面而窄之并條陳用簾之法凡十二事

朝廷以公知兵可大用遷內閣學士權工部左侍郎授兵部右侍郎會安徽學政缺員

詔命公往瀕行入辭

諭以安徽寇氛方熾學政無守土之責如途梗可迂道行公叩頭謝曰

蒙天恩體恤臣不敢稍有趨避既至皖皖中大吏皆以安徽學政駐太平

府而賊據金陵爲巢窟太平與之逼近城郭不完兵餉俱乏勸勿遽往  
公不可遂至太平受事召搢紳耆老激以忠義命之擣力以衛鄉里出  
白金千爲之倡名捕其與賊通者置之法部署粗定而蜀兵之亂作其  
時大營餉匱兵勇多逃逃則爲草竊姦宄當塗令王乃晉廉知蜀兵劫  
城外居民捕三人讞之而蜀兵三十餘人入縣署劫之去旋闌入學政  
署皆手白刃勢洶洶公從戈鋌中出坐堂皇問故眾氣懾乃呼冤公詰  
其魁則明正邦黃利中也召而諭之曰有冤固宜雪然白晝擁兵入使  
者畧大不道罪且駢死矣兩人見公神氣嚴凝不敢犯願候察治率其  
眾出越數日又有熊正武三人者亦蜀人也擁眾數百至稱奉蘇將軍  
檄自爲一隊隨地殺賊立功公曰太平甯國見俱無賊至此何爲廬州  
府新被圍汝曹欲立功盍如廬乎命巡捕官爲之具舟舟具皆帖然去  
公之處危城中遇事鎮定如此四年三月有詔  
命公協同前任河道總督潘錫恩守徽甯諸郡而公陳情之請適至先  
是公父光祿公與公同舉於鄉後公十年成進士授知縣不赴里居養  
疴至是年六十有六矣臥病三月不愈公不得已疏請省視而不料前  
二日適有防守徽甯之

命也疏入忤

上意命如所請俟銷假日降補三四品京堂公拜

命未踰月代者未至而太平府陷從者以公已開缺請避之公曰吾一日未去官卽一日不出此城寇至吾死之亦以明吾心也及寇至公衣冠出坐大堂賊擁之去僕范源從既至金陵賊皆稱公爲忠臣勸之降公大罵不屈遂與范源同遇害是歲七月我舟師奪獲賊首秦日綱之船於船中得眾賊奏稿一冊五月二十四日有楊秀清等會奏之稿言公死難本末甚詳五月二十四日實五月十五日賊從天主教無閏月與時憲書不同也欽差大臣向公安徽巡撫福公以聞

璽書褒獎典禮優渥公雖死而公之心白矣采石磯當太平府北公仗義死難實經臨其下靈爽所憑其在茲乎廟食千禩禮亦宜之越以道光三十年會試出公門下受知遇最深追維盛德爲之流涕敬述大略用誌來者俾後之人拜公祠字想其生平頑廉懦立裨益名教於聖世裒忠勸義之意或亦有當與

馮文介公傳

陶文節公恩培

陳繼聰

馮公培元字因伯一字小亭浙江仁和人少孤家貧母何太夫人苦節

撫之稍長讀書義塾朝夕劬學補諸生試必高等文譽日益著性喜畫  
梅嘗自題小詩有晚節自能留歲暮清名久已畏人知之句識者謂可  
規公他日之風骨焉道光二十四年以進士第三人及第授翰林院編  
修連典試湖南北直

南書房旋直

上書房授惇郡王讀咸豐二年擢侍講出爲湖北學政未至官升侍講  
學士時粵寇已犯長沙路多梗阻公慷慨就道比抵鄂援師四集人心  
頗安公方欲迎養母氏會岳州失守公急遣人來浙止母就養猶云鄂  
城終當無恙以慰母而太夫人書則曰如果有變見危授命臨大節不  
可奪也其遵吾教公奉書涕泣自矢已而賊由漢陽進攻武昌城外發  
礮如雨鉛丸墜聽事前階石轟裂公下堂視之太息曰何不遂碎吾軀  
十二月己卯辰刻城陷公與幕客管柱臣訣曰歸報吾母忠孝不兩全  
不敢負慈訓也乃投繯懸絕拔刀自刺家人持之因與柱臣步後園指  
井曰此水清冽可葬我君愛我以德我下急拚之遂躍入井死之柱臣  
泣而掩焉未幾提督向忠武公軍至賊棄城遁有以公之死告者向公  
出而殮之尸如生當武昌被圍時

朝命擢光祿寺卿至是疆吏以公死事聞

贈侍郎

子諡文介給騎都尉世職越三年浙人以大僚殉難楚北者復有陶公恩培公字問雲會稽人明尚書文簡公望齡後道光十五年進士由編修改京畿道御史出爲衡州知府咸豐二年四月寇犯永州衡州戒嚴總督程喬采友驪城中懼而出走公止之不可總督旋以罪罷公與紳士設團局修守備尋洊升湖南按察使五年遷江蘇布政使值武昌再陷擢湖北巡撫賊勢正熾我軍不能剿除公具疏陳時艱卽日束裝行吳人餞於滄浪亭公舉酒曰寇禍披猖甚勞諸君祖道將送我入昭忠祠也二月至鄂三月賊由興國通山突犯省城城中兵勇萬二千人聞報皆散文武將吏在者惟公與武昌知府多山歸昌營游擊陶德壽候補知縣王恩綬五六人耳公頓足搥胸大哭曰諸臣誤國俄而賊入公死之多知府等亦遇害

詔予優卹

諡公文節

論曰馮太夫人最賢文介公卒死於職亦不負母氏之訓矣咸豐十年

寇擾浙中文介子舉人學瀚婦周氏及女之適邵者避地餘杭賊至俱  
殉難閨閣女子咸知大義更足見太夫人之家教也至陶文節公居官  
循謹其撫鄂也軍旅之才雖非儒生所長然能誓死守空城其孤忠不  
可深憫乎

戴文節公行狀

邵懿辰

公諱熙字醇士自號鹿牀本徽州休甯縣雙谿戴氏始祖南唐銀青光  
祿大夫諡忠恭公歷二十四世諱一美者爲浙江都指揮使司經歷值  
明末家於杭子孫遂爲錢塘人曾祖承徵妣朱氏祖佳瓊有隱德歿年  
九十有一妣閩人氏父道峻郡諸生妣王氏皆

贈封如例杭爲都會自歙來徙者有若金汪方氏皆饒於貲而公先世  
亦以鹽筴起家家有園亭池沼居城東羣從豪侈日以歌舞酣燕爲樂  
而公昆弟獨默坐誦讀被服儒素不異單寒士自名其齋曰習苦年十  
九中嘉慶己卯鄉試道光十二年壬辰成進士旣入翰林逾年散館授  
編修不數月大考詞臣以落葉賦稱

旨擢詹事府贊善十六年

召同許乃普等課一詩於內廷書扇以進未幾丁母憂服除擢中允十



八年入直南書房

宣宗諭曰以爾行端而文清故俾居禁近旋

命視廣東學政

諭曰爾校文必能公明不待言粵地繁華非北地涓樸比往以釐弊爲要事必躬親勿受蔽於人也旣而

天顏溫霽曰古人言作畫須行萬里此行徧歷山川畫當益進比歸復命爾作畫矣至則嚴飭士習每漏夜閱卷不假手幕客粵試多倩替公初試輒多錄數卷再試而文義字跡或不符則取易之老吏蘇仲山久於科場作弊公廉知置之法由是夙弊皆革訖任頌聲翕然任內歷升至翰林院侍講學士乞假省親丁父憂服旣除待闕未補復

命督學廣東以先任能舉其職粵人頌之也公更不攜家累事鉅細必親裁奪所在謹飭而待下寬和士民書吏有爲感泣者在任擢光祿寺卿歷內閣學士兼禮部侍郎還

朝轉兵部右侍郎皆在

南書房南書房最清切華要地入政府躋正卿如歷階而升少回翔指顧無不得者公風操介特立朝嚴邪正之辨自顧以文學進身繪事篆

隸尤見

賞數拜書畫名蹟筆墨珍玩之

賜他人望若不可卽而公恬退自若自父喪歸服除遲遲未北行有旨趣之而後出凡

南書房翰林以文史撰述繕錄爲職業自道光二十年後海隅多故不暇修文供奉官卯而趨直巳午閒退食以爲常清坐無事事時

上意方嚮公需大用故擢佐兵部而公遽以勞疾舉發乞假歸田里乃奪一官以三品服致仕時道光二十九年公年未五十也公之上疏乞休不謀師友不告家人京師士大夫高其義爲詩文以送其行公則挈妻孥附漕艘南下半載而後達於杭抵家拈大作會

宣宗升遐

今上登極有

詔薦舉京外官大臣或以公應

特旨徵公以病不能行遂不出越二年而有粵賊破陷金陵之變江浙鄰比戒嚴

詔公及在籍前迪西道周公澍衡永道俞公焜等會大府督辦江浙團

練捐輸事宜公不獲已力疾從事又越二年爲咸豐乙卯會城設協防局前學使九江萬公青藜實總局事而公與前江蘇巡撫許公乃釗周俞二觀察等預焉修城浚濠練民兵演火器建礮臺於錢江之上及北新關外觸暑熱奔走往來不少倦後萬公還

朝繼之者許公不數月許赴江南軍營有

旨以公總其事當是時周觀察老矣臥病旋卒公乃同俞觀察及里居士大夫辦團練者數年一切條教規畫無改萬許二公之舊而加修飭議者謂鄉官宜不與外事官爲之其勢順而易達効治而兼行雖賢者莫能見功效而或憑藉官勢無大益於鄉而反害之故里居士大夫之與官並行近古所未嘗有也公則謂旣已爲之則宜求其實副焉乃就民兵之隸於局者嚴選任必有家居作業視其來歷不明者悉沙汰而勤訓練之一見能呼識其姓名丁巳餘杭胡萬成作亂撥兵會官軍勦平之次年春僞翼王石達開自江西率賊眾數萬人圍攻衢州遂陷處州旁擾金嚴各屬縣公同前浙撫晏公端書籌調兵食日坐宗陽宮道法講堂飛書江南大營及皖帥趣兵會援自春徂夏凡數月而後平以功

還二品服先是局中民兵入百人又選鋒數百漸次由大府議減少半以節費庚申春公年六十而杭難作賊酋李秀成率眾數萬自南陵涇縣破廣德入浙境總兵李定太敗於海溪連陷長興安吉孝豐遂撲湖州竄武康公卽選局兵付按察使段光清等會旗下兵馳防獨松千秋等關二月十日巡撫羅公遵殿率司道各官至局議城守事宜時羅公意色沮喪公以武康至省有閒道直達上陌奉口徑小而捷宜撥兵扼守因繪圖列說以告羅公漫應未及施行賊果由是路晝夜狂奔至十入夜抵北新關十九日黎明直撲武林門羅公以鹽運使繆梓前攝金衢嚴道歷兵事一切倚之而繆梓實無遠謀斂兵盡入城中分陴守十門皆閉公謂自來守城無閉門孤守之理宜撥兵出營城外相犄角而招民夫登陴助守數爭之當事不可得又謂賊初來不多不知我虛實出城迎擊先挫其銳可以遏其後至亦不果行公徙居在城西北弟燾實領西北隅民兵助守武林錢塘二門礮斃黃衣賊一人賊趨保俶塔下將築營飛礮轟之賊遂匿山背次日舉城欣欣謂賊已退公疑有詐親赴吳山巔瞭視果見山後賊幟二十一日賊以北面備禦完繞西湖蘇公隄而至城西南角晝夜環攻是時羅公於協防局外別設城守局

委前平慶涇道戚貞專調度支應與繆梓共任守事公不以分局爲嫌仍悉心計議知無不言援兵稍稍集繆梓盡納諸城中主帥不一號令不行而天大雷雨連旬不止城上兵民跋涉泥淖中番代無法棲食無地積六七晝夜辛苦疲飢賊乃於二十七日黎明自宋錢湖門故址穴地轟裂城遂陷羅公等死之公甥王朝榮領民兵亦戰死城中火光燭天公遂於二十九日薄暮題絕命詩四句整衣冠投池水弟煦聞公薨笑曰吾兒得死所矣亦投井死公幼子婦金氏仰藥死而公所居賊竟未至時外城破而駐防子城尚堅守民兵努力巷戰公先於圍城中募人縋城齎函牘求救於蘇往還纔四日城破公知江南援兵在途復瀝血致書統帥張公玉良趣進兵俾弟燾甥魏樹芝等持書縋城出迎適遇於石門張公詢知軍城猶未破麾兵急進外內應合賊遂於三月三日悉數遁杭城復乃得公從容就義及前衡永道俞公罵賊死事爲尤烈云事聞

贈公尚書銜官一子通判

賜葬

給騎都尉世職

子諡文節建專祠以弟煦等附祀公既高雅絕俗早登科第官顯要志常在湖山泉石閒深識遠見自以爲才難濟世亟引退徵之不起而卒死於忠所著尚書沿革表一卷書三考四卷詩文集若干卷古錢叢話三卷畫絮若干卷尤工繪事名滿天下求乞無虛日晚年書法亦爲人所寶比之趙董二文敏而大節過之掌教崇文書院五年用經術古學造就後進輯共勉錄助之以學行兩督學乙未乙巳會試充分校皆號得人事親至孝在京聞父疾請急歸到家而父卒終身以爲恨歲時祭墓必徒行尤儉於自奉室無姬侍聰悟高一世而接物謙下退然若無有者其天性簡素風神和逸近接談笑使人翛然自遠雖與僕隸語如恐傷之愛二弟煦燾臻至燾精會計家事悉以委之無私財子姓隆隆數百指析居三宅皆芻近不數武朝夕往來無閒立家則以時賓祭弔慶賙卹皆有程度相與翕睦門庭清肅暇則溫誦經書與弟煦羅羣籍課子姪講問爲樂煦字鄂士殉節時年五十六嘗爲名諸生以兄貴不應舉注莊子內篇及陶靖節集研精厯算之學西人見所爲書皆推服冲澹靜默避俗如不及家事世事一不與而與其兄殉國事人尤惜焉公配金夫人前公八年卒子四人有恆增貢生候選訓導

特旨以通判用可恆附貢生國子監典籍銜果恆增生穗孫附生子婦  
長朱氏次朱氏次孫氏次金氏金氏者穗孫之妻也卒於外氏年二十  
一女二人長適王次適吳孫四人兆登兆春兆衡兆年孫女二人其年  
十二月二日葬公西湖三台山祖塋之次穿金夫人之窆而合焉公之  
歿也既邀

卹諡而生平行事之大者及殉難始末宜在史氏懿辰曩在京師獲交  
公已酉秋嘗賦二詩以贈公之行後從公協防局凡六年乃因其子有  
恆可恆之請爲敘次大略如右咸豐十一年七月前刑部湖廣司員外  
郎軍機章京同里邵懿辰謹狀

刑部右侍郎浙江學政丹徒張公權厝志

陸心源

公諱錫庚字星白江蘇丹徒縣人相國文貞公會孫也道光丙申成進  
士以二甲第一授翰林院編修改京畿道監察御史擢順天府府丞晉  
都察院左副都御史旋授刑部左侍郎公博通經史尤工駢體文咸豐  
紀元之元年上疏請開博學鴻詞科以求方聞綴學之士報

聞八年以副都御史視學浙江浙士自道光中元以後務求工於楷書  
試帖爲速化之學不復講求根柢而拔萃一科衡文者尤以是爲去取

公是行適當拔萃之選所取悉反是嘗曰吾所得士爲儒林傳中人則有餘爲科第表中人則不足吾豈不爲公門桃李計邪特不忍文章經濟之才自吾失之也辛酉夏金華不守甯紹繼陷杭城岌岌甚時公已當受代代者吳祭酒保泰尚未至或勸公歸印於中丞而移疾去公不可九月賊圍城大吏分門守禦公亦日夜出巡城衣不解帶未幾城中食盡公亦無所得米煮豆以食豆盡繼之以土食土一日腹大泄不能出戶時糧臺尚餘米數十石公終不言觀察某公知公之困也致米一石於公米未罄而城陷或勸曰公盍微服出城閒道達上海入都自陳卽獲咎非守土責無重譴公曰吾大臣也不可以辱國且吾年逾六十官階二品尚何求乎遂自經於廳事賊入署嘖嘖稱歎曰忠臣也棺斂而出之城外杭人某者竊公及中丞王公總兵文公樞至上海江蘇巡撫薛公爲公易棺成禮時逾二月矣面如生杭城之初陷也公長子死之夫人及季子以匿民間得免賊退公因寄之台州及公殉難道梗不相聞薛公乃命權厝公柩於上海東門之外初公按試浙江余以經術詞賦受公知後知余素負虛聲公益喜每呼余至署相與出宋元書畫碑帖及古印章析疑訂贗談古證今終日不倦自經兵燹所有盡失加



以喪明之戚居常鬱鬱不自得及奉

命勸王撫軍有齡王副都履謙互糾狀特邀余署中諮之語次常頓足歎曰時事如此大臣競修私怨置國是於不問吾恐死亡之無日也子將大有爲於時毋使吾輩姓名爲狐貉噉盡也遂相對歎歎余聞十一月廿八之報知公必死莫能得其詳既遇公之舊僕於申江述公狀甚悉語罷噉然而哭余亦不知涕泗之何從也余受公知最深思次公事迹爲行狀以副公治命而見聞寥落十不得一因取平日所聞於公以及僕人所述者著之公生於嘉慶某年卒於咸豐某年享年六十一歲

曾祖玉書

華蓋殿大學士祖某父某皆達官妻某氏

封夫人子二長某候選知縣先公兩年殉難

贈卹如例次尚幼公之葬也司其事者爲歸安趙茂才樹椿

都察院左副都御史前江西巡撫文毅張公神道碑銘 孫衣言

公張氏諱芾黼侯其字也亦曰小浦涇陽之張同居十一世

高宗時嘗以義門旌之至公十三世矣曾祖懋基考授州同知祖挺福建臺灣道兼學政父五緘湖北安陸縣知縣曾祖妣某氏祖妣某氏妣

晁氏王氏公之貴曾祖以下皆

贈光祿大夫吏部左侍郎妣皆一品夫人公少而穎異絕人甫成童卽補縣學生舉道光辛卯陝西鄉試乙未成進士

殿試二甲第一改翰林院庶吉士明年散館授編修擢詹事府中允翰林院侍講轉侍讀右春坊右庶子轉左庶子遂直

南書房又以大考一等擢少詹事出爲安徽學政改江蘇

宣宗成皇帝時尤重侍從之選兩書房翰林往往望爲宰相而公以方

峻端潔

宣宗尤賢之視學江蘇也王太夫人將就養

上語公汝宜馳驛汝母宜舟行因敕道上官護視蓋異數也在江蘇未一年擢內閣學士兼禮部侍郎銜公疏謝

上手批其奏曰吏治民風武備諸宜留心上以備采詢下以充識見及使還卽擢工部侍郎兼管錢法堂直

書房如故旣而出爲江西學政其明年

成皇帝崩

文宗登極詔書令中外大臣皆陳言且各舉所知公疏極言君子小人

之辨薦舉何紹基朱琦邱建猷沈衍慶四人沈方爲鄱陽令有異政而病聾公以謂聾匪病也而人材難得薦尤力戶部請開捐輸例公獨論其不可調吏部右侍郎轉左侍郎使事畢將還朝矣而有署江西巡撫之

命時咸豐二年也富是時粵賊洪秀全方圍攻長沙

上以江西當其衝

命在籍刑部尚書陳孚恩與公同備賊而賊已越長沙陷岳州公卽馳守九江賊陷武昌前鋒掠黃州十二月

朝廷授公巡撫兩江總督陸建瀛至九江公卽馳守瑞昌賊果犯瑞昌公擊走之賊東犯九江公卽馳援九江而總督先走公未至而九江陷

有

旨革職留任公卽還守南昌於是賊已分兵破安慶且據金陵矣後數月官軍敗於兔兒磯賊乘勝泝江上公度賊必犯南昌乃奏請湖北按察使江忠源來援江公聞馳抵南昌而賊船已湊城下城中守單甚公先爲礮臺於城外空其中令上下三面皆可以擊賊江公至復於城中築月牆掘裏濠設甕聽守具粗備公卽奏以江公統諸軍賊屢穴地道

然藥以墮城城屢壞官軍輒復完之賊攻益力城中守亦益堅公方督戰坐城上親兵哈玉恩在公後僕鄭貴侍右賊破洞鄭貴腹以碎玉恩首血滿公衣而公屹坐無恙益督戰江公復屢出擊賊援兵亦四集賊知不可攻乃悉眾東走出鄱陽湖於是南昌圍三月矣圍既解朝廷還公職而公獨歸功江公悉敘諸援將最後爲陳尚書子某乞恩奉

詔切責公亦疏力辨

上大怒竟褫公職咸豐三年八月也公既罷巡撫則謀奉太夫人北歸而道梗不得行閒關至錢塘復渡江居太夫人紹興而賊窺徽甯安徽巡撫駐廬州皖南北殊不相聞

朝廷用浙江巡撫何桂清言以公治皖南軍而浙江資之食是時徽甯三面皆逼賊獨東南逼浙幸無事浙軍戍徽四千人不足以自守餽餉又絀公則開誠布公進見士民俾人人得盡言集練以益兵勸捐以益餉分遣提督鄧紹良總兵江長貴等爲守險計而自以千餘人駐郡城徽州六縣皆有賊公至軍卽復休甯驅賊出嶺六年冬周天受克涇縣徽甯事少紓

朝廷乃予公六品頂戴加五品先是江西賊由樂平廣信先後逼郡城公皆擊卻之廣信賊敗而南陷休甯公督諸軍躡之而聞太夫人卒公慟甚乃墨經督兵進遂復休甯請奔喪弗許其明年請歸葬亦不許既而鄧紹良敗死灣沚婺源祁門皆告急廣豐賊自衢州陷金華處州南及延建公輒分兵往救而周天受往來戰賊聞浙閒尤力及官軍克金華浙江巡撫晏端書言援浙功公第一

賞戴花翎公力辭弗許

詔以三品京堂候補尋授通政使擢左副都御史於是胡興仁撫浙江謀畫疆以自固遂不資公餉咸豐十年銅陵賊陷甯國太平由四安以犯杭州別賊由績溪逼祁城公雖擊卻之而賊旋陷廣德由武康分犯杭州公所遣援兵知府陳炳元戰死總兵米興朝亦敗走公疏待罪且請更命重臣弗許既而廣德甯國皆再陷周天受戰死公再疏請罪且請以今大學士兩江總督曾公國藩領徽軍遂奪公副都御史以軍事畀曾公而

召公還於是公在徽五年矣公既去徽州在道請歸補持服而粵賊餘孽挾皖寇軼入關

上命公卽家居爲團練以辦賊事既平復得副都御史而漢回闕於臨潼大吏選愞不能決漢民憤殺回民過當回民任老五遂以其黨叛連破數州縣攻西安甚急巡撫某計無所出謂公國大臣且素有鄉望諭之宜可解而公亦謂回雖狡固有良民望誤者或情理諭之可以全會城遂與數人行公旣至譬喻百端而賊無降意由臨潼之油坊擁公去至渭南之倉頭鎮公猶力爲言順逆賊酋恐惑眾輒反折辱公公不屈據地大罵不絕口賊怒遂支解公以死同治元年五月十三日也年甫四十九公爲人美風儀神清而氣峻其在

朝廷務引大體不隨眾爲可否爲戶部侍郎時宰相兼管部務者公會試座主也夙喜公而公與論事輒弗合其在江西人有言知府副將貪污狀又有言巡撫事者

上皆以屬公公據實劾奏無所迴避大臣滋不悅耆英督兩江上書言用違其才卽君子亦誤事用當其才卽小人亦濟事意蓋有所左右公曰此道人主以親小人之漸也卽疏力詆其謬大臣益不悅及治兵徽甯再疏劾失律將數人置之法周天受雖公愛將援浙敗於桃花嶺浙撫上其功而公獨劾其治軍不嚴天受不以爲憾而不悅者滋益多

今天子初元公疏陳時務四事曰崇聖學開言路明賞罰專委任又密舉宜爲師傅者數人皆一時老臣重望蓋公之議論多類此可謂大臣矣公自少年登高第爲

成皇帝所識拔由翰詹驟至卿貳年甫三十

上方思有以盡其才然竟以不能附比大臣不得久居中自江蘇學政

還

朝未幾卽以視學江西出遂留爲巡撫接以徽甯軍事比自徽州

內召又令歸治陝西團練自

成皇帝季洎

今上登極垂二十年未得一日再與朝廷謨議卒使橫罹凶暴爲國糜軀嗚呼豈徒公之不幸也哉公之治軍在江西功最偉而在徽州最久且難雖皆以譴去然江西之民至今猶思公不已公去徽州甫五日而城陷故徽州之人亦彌思公然則公非獨立朝大節凜凜卽將略亦有過人者而予獨惜公之才可大用卽

主上非不思有以用之顧弗獲盡其用以死而年又未及中壽是殆所謂命也歟公生平持己甚峻而與人特寬大務爲不欺自幼卽善事太

夫人太夫人既卒公在軍中常蔬食冬夏寢處一席而已公女弟之夫  
通政使王拯嘗爲予言公詒拯書卽自咎不忠不孝詞意淒惻拯每爲  
之流涕也公既死事

朝廷乃命以侍郎例予卹廕一子舉人建專祠陝西江西省城

賜諡曰文毅其後陝西巡撫又有言乃復

命祠公倉頭鎮凡從公倉頭死者五人臨潼知縣繆樹本候補知縣蔣  
若訥及公從孫張濤僕金榜王雙而張氏族屬死涇陽者又五十二人  
皆卹如故事公初娶向夫人生一子舉人師劬也繼娶孔夫人生一子  
師勵殤孔夫人亦先卒師劬今爲工部員外郎以通政之狀來乞銘銘  
曰

海鯨波山子丑之閒有臣一个奮回其瀾彼童宣驕以國爲戲朋奸啄  
忠徹我藩蔽並浙海吳棊樹其徒昏臣三五陰爲之樞頡頏蒲城深曠  
太息閉閣草奏忠奸別白疏成在懷遂纒以絕或匿不聞聞以暴疾蒲  
城之死至今猶疑嗟秦多良而公繼之公死堂堂如懸皎日人孰不知  
而孰知惜有臣如公宜居

帝傍儒書滿腹挈維提綱一出十年弗相而將卒隕於兇埋忠屋壤蒲



城作燭公屏即戎所遇雖異勿究則同哲人無年彼庸壽考鏡辭於石

以訊蒼昊

沈文節公傳

吾元圻附

陳繼聰

沈公炳垣字紫卿一字曉滄浙江海鹽人善詩文尤精校讎之學道光

二十五年成進士選庶吉士授編修

上命詞臣之工書者繕朱子全書公與焉咸豐二年大考翰詹列高等

擢中允充四川副典試尋充

日講起居注官例得言事疊陳時務皆中肯綮四年

案海鹽縣志乙卯督學廣西乙卯

咸豐四年與浙錄作七年異

詔命視學廣西同官祖饒彰義門外臨別公慷慨言曰際此寇氛充斥

使者搜巖采幹務獲干城之選非徒取華國才也

案海鹽志時寇氛方熾臨行祖饒有告以

見機引避者炳元出佩刀示眾曰身受國恩誓必殺賊聞者壯之與嘉興府志語異

輕騎滅從至衡山縣聞永

明失守全州戒嚴從者請緩公不許遂抵桂林與巡撫勞文毅公籌戰

守策山川險要瞭如指掌文毅自歎以為弗如既而按試各屬弊絕風

清士林翕服六年代巡撫監臨鄉試七年校士南甯時值寇警捐俸濟

餉登陣助守歷三晝夜賊聞之遁是年秋梧州請試

案浙錄

公毅然就

道日軍書旁午猶知投戈講藝此正人心振起之機也省會士人遮道

留之公不允既之梧郡按試甫二日粵逆合土寇數萬突至圍攻公率

知府陳瑞芝等嬰城固守案海鹽志城南甯武官皆以病垣無守土責勸

其速由開道赴省炳垣日學政為士林表率富茲有警之時倉皇就道

人心必搖誓以死守即入與知府陳瑞芝籌商防剿與浙錄府志所載

事拊循士卒勉以忠義有殺賊者公即傾囊犒賞復以餉絀親勸各紳

輸助迨後米價日昂道殣相望又悉取行篋衣服買米施粥振饑士民

莫不感泣凡艱難措拄者九十有五曰糧盡援絕城遂危有諸生某絕

入城見給公曰請禱城南神祠為民請命意將擁匿為脫禍計公堅弗

許城陷公仰藥自盡有識公者劫至僧舍案浙錄作公求死不得與賊

救治使蘇且戒其黨慎勿傷沈學使公嗔目唾罵數求死不得久之賊

防漸疏公乃乘閒為書致巡撫劉公長佑案府志無巡撫請出兵襲城

密約城內民夾擊事洩賊酋大怒命斃割之公屹立不為動酋益怒熱

炭置大爐烤其背焦爛徧體公至死不少屈年三十有八案海鹽志城

被賊救治得生擁赴賊船隆以禮貌不敢加害炳時有老卒混跡城中

垣大罵不屈城燼而火之與浙錄府志事微異

備見公慘死狀竊藏燼骸埋之復走省城告巡撫聞於

朝

天子軫悼

贈內閣學士兼禮部侍郎銜

賜諡文節世襲騎都尉紫海鹽志子三人守廉以主事用守諡以廣西

省城建立專祠當公之殉難也凶耗至家遺孤髫齡謀收骸骨咸憚遠

行有諸生吾元圻者慨然自任借公舊僕袁咸跋涉數千里至粵西得

遇老卒知遺骨藏梧州荒寺竟負以歸人皆稱為義士元圻字硯尹亦

海鹽人公著有斲硯山房詩鈔八卷祥止室詩鈔十四卷讀漁洋詩隨

筆一卷

論曰浙江忠義錄嘉興府志海鹽縣志皆有沈文節公傳各有異同然

浙錄設采訪局文節事蹟必由其家人所請府志本錢蔭砥樞部所撰

行狀縣志亦其鄉人修輯何以事多不同豈傳聞異詞耶余故合三書

為公傳而附以吾文學其異同處皆注明之俟閱者考訂云

江西委用道前翰林院編修帥君傳李元度

君諱遠嶧字仲謙一字逸齋湖北黃梅人曾祖某邑諸生祖承瀛嘉慶

丙辰進士及第第三人累官浙江巡撫父敬時以任子觀政戶部君生

負奇才讀書慕古人奇節偉行視時俗尠當意者然內行敦飭無子弟

之過充道光丁酉拔貢未

廷試以父憂歸辛丑巡撫公卒

成皇帝篤念蓋臣

特賜君舉人丁未成進士選庶吉士假歸值邑水災道殣相望君請大吏發帑振力肩其事家故貧配石恭人媵嫁田百畝急斥之輸其值爲眾倡所全活無算己酉授編修

御試列二等與文綺之

賜明年廣西巨寇起越二年自岳鄂踞金陵東南列郡魚爛不可支朝命大帥專征多失律守土吏輒棄職逃一二秉政者號稱鉅人長德又皆持祿養交泄沓不任事君憤甚居嘗拊髀歎曰時事至此吾世受國恩職侍從不益掣一言其曷以稱

上明旨卽死何以見祖考地下癸丑正月上封事二約萬言大指在一兵權申國法求人才籌國用而指斥當軸尤切至謂宜避賢路滌肺腸至論軍事則請先正失律者誅疏入

上留中時蒙采錄而所謂鉅人者則固世所交推初未有訟言攻之者也是年分校禮部試稱得士以修墓請告歸會家鄉淪賊僑浙中忽忽

踰三年君既痛其言不盡行思欲一見諸實用以自考證援例以道員候選初君在京師懷奇負氣不妄交所與游皆當代名人以經世學相切劘而於湘鄉曾侍郎尤篤歲丁巳侍郎督師江西君走謁戲下至則侍郎奉諱歸矣當事欲侍郎墨絰再起趨君勸駕君徒步抵湘居而月返江西大吏疏留君然止任以勸輸軍餉戰陣非所責也會僞翼王石達開自皖南至江軍屢敗贛水以東無完土君奮請自領一軍與賊遇募卒千人偕副將周鳳山進時總兵李定太扼賊撫州路君以十月六日抵東鄉越日賊大至迎擊十里外賊卻別賊從閒道趨君壁留守者僅十之三驟不能禦親卒請潰圍出以轡進君怒叱曰此何時尚顧身邪手劍直前搏戰力竭死之屍被殘從兄壽九以布政司理問效力軍中同遇害大吏入告

詔優卹君爲人倜儻俠靡斥千金不屑意赴人之急蹈水火不辭寓嚴州倡建千人塔爲掩骼計友人來京邸暴卒君質貂裘營葬塾師戚某其父客吳門臥病君逆以歸終於家醫藥喪葬皆任之詩古文超邁有奇氣遺集若干卷年四十有一子四長峻殤次晚襲騎都尉次甸畬均幼女子三

論曰自公孫宏匡衡張禹孔光之徒持祿保位被依阿之議其宗派至今未墜彼皆號稱儒者考其行若無可非刺而陰探人主之隱爲從違不敢一言自異遂足禍天下而有餘善夫宋尹源曰人臣不忠孰大無過爲大嗟乎世之但求無過者何多也君規切政府有以哉有以哉君以憤世故慨然一出自試遂以亡其軀可哀也已彼容容者且謂君偏

朱主事傳

方宗誠

君名麟祺字臥雲江甯六合人父京昌國子監生君中道光丁未進士用刑部主事咸豐三年正月逆賊入安慶據江甯先是二年冬賊出湖

南  
上特命侍郎呂公賢基歸安徽團練鄉兵爲守禦呂公奏請給事中袁公甲三荆宜施道趙公昀前工部主事徐君啟山及君襄焉是時賊甫東下廬鳳潁亳閒捻匪乘機四起聚黨多者至數千人與逆賊遙相應和勢洶洶成巨寇侍郎周公天爵疏請身任其事君先駐宿州團練旋奉檄剿捕於潁州盱眙天長來安懷遠臨淮諸集鎮湖山閒所殺獲甚多江以北捻匪之不遽成巨禍者推周公首功而君與袁公及太守金

公亦與有力焉金公者名光筭時為壽州知州也先是襄辦團練諸員  
 呂公奏以袁公與君等防北數府而安慶六屬邑則委於趙公然六邑  
 團練徒虛名實無一能備賊者八月賊復入安慶呂公聞移節桐城徐  
 君從時團練粉飾已久而賊又逼近民心渙散呂公名團練大臣實無  
 一兵相隨居月餘終亦不能振作而去十月十四日桐城陷是時君來  
 廬聞之即馳赴舒城呂公因委君與漢中鎮總兵恆興進駐桐城北峽  
 關防勦君日夜營謀製備攻城具將設伏運奇刻期為收復桐城計未  
 數日而賊已至君見賊遽督勇前賊少卻恆興者前與按察使張熙宇  
 守集賢關退居桐城之逃將也至是望賊而退賊見君勢孤遂大進君  
 率武生侯昭勇目袁光佳侯紹宗拒戰死之十月二十八日也君死之  
 次日賊入舒城呂公與徐君從容投池水死而恆興張熙宇旋以逃故  
 伏辜

論曰吾聞之張勳云君喜談禪寡世俗之好行篋中時備一冊記當世  
 忠節事及其詩文諷誦之每有戰必奮勇爭先乃年未四十未得展其  
 才志以沒悲夫彼世之望賊而逃者無他畏死耳然如恆興張熙宇輩  
 終亦不免於天誅死同而視君之死何如哉

徐主事別傳

陸心源

主事名曾庚字裕齋順天宛平人君青中丞之族弟也沈靜寡言好讀宋五子之書被服造次必於儒者道光閒舉於鄉納貲爲郎分工部己未秋客遊江南館君青中丞署中與余一見相得甚時相與論古今學問源流當代利弊至夜分始息尤好余所作古文手錄數十篇置行篋曰吾乃君之桓君山也余謝不敢當庚申夏賊陷常州姑蘇纂嚴君建議請兵居城外民守城內中丞是其言而不能後卒以此敗及城陷中丞促君出避君曰兄能死忠弟獨不能死義耶況弟亦曾忝一官者乎遂自縊

陸子曰城存與存城亡與亡此守土者之責寓公不與焉自兵興以來聖恩寬大州縣失守地方往往待以不死況客遊如君者乎明知義不必死而不忍草間求活者此君之所以不可及也悲夫

刑部員外郎追贈四品卿銜壽州孫君傳

方濬師

濬師嘗讀韓退之何蕃傳述歐陽詹生之言曰朱泚之亂太學諸生舉將從之來請起蕃蕃正色叱之六館之士不從亂目蕃爲仁勇人烏虜若壽州孫君者其眞仁勇人哉君諱家泰字引恬其曾大父懷六先生



借弟石舟先生弁以善人稱當世大父朝議君亦有善行嘉慶閒

賜盛世醇良額君生有異稟少時嬉戲輒與羣兒異每出語長老驚若成人未冠補博士弟子員名聲藉藉振庠序屢困秋舉道光己酉援例以員外郎分刑部廣西司行走先後長秋官者多稱其賢咸豐癸丑春粵逆竄擾江皖旌德呂文節被

命回籍督辦團練奏請以君隨往當是時皖南北郡縣相繼失守守土吏望風逃避淮北民素強悍惡少乘閒思竊發而定遠陸遐齡父子先倡亂土寇紛起肆劫掠道路以梗

朝廷再起周文忠爲皖撫文忠知君名遇事諮商之所論恆與文忠合數旬之閒生禽巨寇餘黨悉誅戮解散脅從四境稍安君與有力焉壽春鎮兵向以驍勇聞天下自徵調四出留鎮者無幾又值餉糈缺乏君奉大帥檄勸捐募勇富家大賈多守財虜視一錢如性命君憤甚盡出其資產佐軍旅所募皆敢死士明賞罰嚴號令士樂爲用於是廬鳳穎六各境匪徒聞孫員外名咸斂迹不敢逞未幾文忠薨於潁州途次舒城再陷文節復殉難君勢遂孤廬鳳道某州牧某均不滿於君思有以中傷之而撫皖者亦爲人所愚奏褫君職聞者歎息君獨怡然不爲意

嘗語人曰時事糜爛貪官污吏畏賊如虎轉視百姓爲仇敵仍復魚肉之無怪乎良民少而暴民多耳由是杜門卻掃口不言兵事而君自毀家紓難乏無僭石之儲菽水養親晏如也戊午己未閒賊氛愈熾鄉之充團練者名助官兵實從賊而苗練爲尤甚苗練者鳳臺北鄉人苗沛霖所練之勇也初沛霖爲諸生土匪初起時請於知州金光筭欲投營充練總光筭忽之不許沛霖怏怏返萌逆志揭竿聚眾鄉中桀驁者多歸之大帥擁兵莫敢撓其鋒旋遣人招撫厯加保薦作羈縻計不三四年官至川北道加布政使銜而沛霖不知感從未衣冠見大帥南據正陽關北據下蔡自稱先生奪懷遠城勢張甚屢窺伺壽壽人恐謀戰守謂非君莫屬君不得已勉起視事請於大帥力主剿適苗逆遣謀數人入壽城君殺之苗逆怒愈發其黨與攻壽當事者乃謀獻君與蒙時中以取悅苗逆謂城圍可立解收令至團練局逼君行刻不容緩局中洵洵將匿君而與牧令爲難君笑曰我曾募健兒走正陽關刺苗逆僞將於馬上茲復誅其閒謀以斷賊綫事之不濟天也若救我徒益我過不如使之甘心焉或可暫保危城乎因慨然就獄屬家人善護老親他無所及次夕仰藥自盡蓋咸豐十一年六月初十日也君死臬司張學醇

復縛時中付賊寨時中罵不絕口遂遇害是年九月苗逆卒破壽城殺傷頗眾當事者始悔撫而不勦之非而賊事愈不可問同治二年秋科爾沁親王督師至三戰皆捷總兵王萬清殺苗逆於蒙城城外深溝中復壽州賊黨悉平壽之紳耆上其狀事於王王據以入告

詔飭節相曾公查明覆奏君得

旨追贈四品卿照陣亡例從優賜卹弁於壽城建立專祠君之父

封朝議大夫諱贈祖弟國子監典簿家德堂弟分發甘肅府經歷家彥子從九品傳洙城破後賊搜得之弁被害而封公之死尤慘烈至是均邀

褒卹忠貞孝友萃於一門君雖亡猶如生矣濬師特撮其大凡而傳述之如此昔朱泚爲唐節度使甘爲叛逆苗沛霖晉階二品不可爲不顯也事雖不同而梟獍之心亦何其如出一轍若君者一言決策百死莫回又豈何蕃之所能比擬耶嗚呼君眞仁勇人哉

贊曰君叔父季雲先生濬師之外舅也當君督團在籍時濬師適寓居外舅宅去君居近經旬不相見君怪之目爲狂一日日將夕州獄犯鼓譟反獄君聞信整練將往濬師告之曰署外遇犯可捕也勿入官署君

不信謂濬師怯厥後皖撫劾君卽以擅入公堂爲詞君乃服歲丁巳先  
大夫棄養濬師奔喪復至壽君時亦丁母憂葬事畢過從頗勤談及軍  
務每相對抑鬱閒發議論君輒許可別後在京師知君再起辦軍事蒙  
恩給六品頂戴旋以守城功復員外郎銜期君甚大孰意竟至於斯耶  
君精子平學謂行某運當有禍至是果及於難奇矣哉君三子傳洙及  
幼子皆被害惟傳溶存恂恂有禮法行將襲職君得此目瞑矣又君堂  
弟家彥濬師從母陳太恭人子事從母以孝聞性剛介勇於任事家彥  
兄家喆歿十餘年賊發其棺家彥縋城出負兄尸行數十里卒得安葬  
鄉里推重君歿後數月城破被執罵賊死今與君同奉

恩旨附祀君祠可以不朽矣故附著之

侍讀銜內閣中書鍾君傳

方宗誠

君名淮字小亭江都縣人父大志道銜候選知府叔父大念候選州同  
知父命君爲之後節母周氏姑適王氏者亦少寡君事之以孝聞嗜學  
好義道光丁酉科中順天鄉試援例爲內閣中書加侍讀銜補漢票籤  
中書舍人充

國史館校對

王牒館膳錄以本生父病乞養歸遂不仕所居佛感洲瀕江恃隄爲障  
君竭貲保固人賴以安己酉江水大漲數百年未有君奉母避居揚州  
賃舟楫齋餅餌餼糧約同志沿江上下濟災民無算遂上書當道請設  
粥廠十別男女第老弱招同人分任其事自晨至夕盛暑烈日無少暇  
不足則於古道院自設一廠振之又念世族子弟不忍其雜處也設局  
於安定書院勞來安集冬水涸乃遣歸多所全活倡之者君也君因謂  
防患貴於未然遂興修江都儀徵圩岸親督率之工實且堅洲迄今無  
水患咸豐三年粵賊竄據金陵揚城將不守君歸洲謀曰洲地居瓜洲  
東爲賊衝要賊至當保聚以拒之不克死之無覩顏偷生爲也未幾賊  
入揚州據瓜洲君禦賊之意益奮都統琦善率軍至聞稱名乃以江都  
鄉團統於君君不辭募勇二千人乘賊不備營虹橋虹橋去瓜洲八里  
爲東路門戶自是東路得安枕無恐軍糧器械皆傾家以濟之君少習  
武事膽識過人臨陣爲士卒先迭攻瓜洲皆出奇制勝斬馘禽生焚賊  
巨艦賊來偏輒戰卻之賊甚畏憚然慮經費不貲非亟破瓜洲不能與  
賊持久也遂約艇師水陸夾擊以五月二十九日進攻其時賊營羅列  
江岸君攻其北艇師乘風直上攻其南賊死甚眾將不支忽反風艇師

下退賊由南面出兜我軍後眾不敵促君行且俟後圖君曰我退賊必  
追虹橋將不守我當以身禦之勿戰而死家丁徐嘉明以身蔽君格鬪  
甚力同死之殉難之夕有素受恩者潛入瓜洲尋得君面如生而腸腹  
無完膚事聞

詔加知府銜賜卹後又奉

旨依禮部議入祀京師昭忠祠並入祀陣亡地方府城昭忠祠六年奉  
上諭附祀提督雙來瞿騰龍揚州城外雙忠祠君殉節時年三十九一  
子毓麟

論曰吾聞揚州未破時郡人江壽民出款賊以爲賊必不至卽至亦不  
害民也闇者信之不設備而賊遽至江壽民無地自容以死等死也與  
禦賊以死者何如哉君矢志捍衛鄉里及死而東路實賴以全嗟乎使  
君早有專城之寄或寄專城者皆如君天下事豈至是邪

邵位西墓志銘

曾國藩

位西仁和邵氏諱懿辰與國藩交二十餘年矣咸豐十年二月賊入杭  
州五日而復七月位西訪余祁門軍次語余以城破時盡室陷賊中賊  
退乃挈家東徙紹興老母考終粗得盡禮欲乞師以援兩浙遂別去明

年十一月杭州再陷位西之妻余恭人子順年順國轉徙滬上余聞而  
迎致之安慶順年語余以城破時盡室飢困其父麾家人避出圖延宗  
祀遂絕不復相問國藩心知位西烈士也必不苟免其家固知之以無  
定問不敢發喪同治三年二月杭州克復順年奔哭周詢具得三日不  
食罵賊遇害狀實以十一年十二月朔日殉難於是始除次執喪赴告  
遠近浙江巡撫上其事

天子下詔褒卹然後知賢者遭難親在則出避親沒則死之義之至衷  
者也位西之學初以安溪李文貞公桐城方侍郎爲則爲文章務先義  
理不事縟色繁聲以追時好厥後以舉人仕京師爲內閣中書刑部員  
外郎入直軍機處與上元梅曾亮伯言臨桂朱琦伯韓數輩游處博覽  
朝章國故其文益奧美盤折亦頗采異己之說以自廣詢訪高才秀士  
折節造請酣恣而不厭久暱而彌虔然位西性故戇直往往面折人短  
以謂書籍所無公何得漫爾不應再糾焉猶不獲三諫焉無問新故疏  
戚貴賤時否一切蹙額相繩人不能堪終以此取戾於世大學士琦善  
在獄嘗發十九事難之大學士養尚阿視師廣西手疏七不可諍之諸  
公貴人病其峭直由是齟齬焉不得安其位咸豐四年坐濟甯防河無效

吏議鐫職位西既罷歸則大覃思經籍纂著尚書通義孝經通義詩古文若干卷飢餓圍城之中猶著禮經通論誦聲鏗然徹於巷外亂後僅得禮經通論一卷文三十餘首刻之淮安蓋不能什之一二餘則散佚矣位西之王父又曾父宗贄本生父鳳儀世著清德有兄某早喪無子以順年後之有女二人順年歸自杭州未得父尸大痛遘疾同治四年六月十三日歿於金陵余恭人少而割股療親晚而事姑有聲既痛其夫又悲其子七月十三日亦卒嗚呼傷已於是國藩命順國與其壻鄭興儀具位西衣冠葬之杭州某鄉某山以余恭人及順年耐銘曰  
城有時而爲湖海有時而成田物固有非常之變烏可以常理測彼昊天善不必福久矣曾不自夫子而始然愍東南之塗炭仁聖與螻蟻而同捐著述盡其傷盡僅弔灰裏之殘編文之精者不復存存者又未必果傳獨其耿耿不磨之志與日星而長懸魂無遠而不之魄則依妻子以全席上爲神祇所許而下爲百世學者之所憐

馬中書傳

馮桂芬

吾吳古多文學士而羽林期門伏飛之選或代不一人文武才尤罕雖范文正胸有甲兵而西事未盡愜於論者越在有明惟韓襄毅號知兵



餘無聞焉今所見以經生知兵者中書馬君一人而已君諱釗字遠林號燕郊世爲江蘇長洲縣人十世祖鏗明贈太僕少卿始自合塘里遷入城崇禎間有全永巡撫名光者有政績著兩粵夢遊記彙刻荆駝逸史中君之七世從祖也曾祖元宰祖成龍父培著有吳門徵信錄母某宜人生子三君其長也幼慧四歲入塾讀書倍常童九歲識星象年二十二始入泮問經於同縣陳徵君與爲高足弟子壽陽相國祁公來視學奇君文面試之詢所用書出處講論經義移時遂食餼大興李侍郎嘉端視閩學聘校試卷逾年航海歸入闈以孟藝用訓詁爲主司所賞登甲辰秋榜丁未取宗學教習出今協揆湘鄉曾公門公夙重樸學尤器君厥後公督師東征招君往封君以道遠難之遂辭焉道光二十八年江北災饑民行乞入吳次年吳中大水君皆與振卹之役君究心水利撫部沔陽陸公屬君視江陰壽興沙築圩資蓄洩逾年工成至今無水患又監修東壩尋陸公督兩江行淮南票法欲廉察商情而無其路謂君通達正直遂愆君運鹽揚州君赴之越二年粵寇東下公奏調君募勇桐城濟師行至樅陽安慶陷無何金陵陷大城向忠武公代爲督師錢塘許公乃釗副之君還至金陵許公奏君留營君以難民多死

倡議撫卹公然之全活無算會自營歸曰川楚兵所帶餘丁率健兒而  
吾鄉空虛甚盍捐資募爲一軍進可助勦退可回援余與程副憲庭桂  
蹙其議爲請於許公募千餘人以榮縣劉刑部存厚領之號曰撫勇甫  
集而粵匪劉麗川反嘉定匪周立春繼之不數日連陷上海青浦等六  
縣勢張甚向公令君與刑部卷甲趨之至青浦夜漏三下銜枚薄城遲  
明克之越十餘日後隊始至敘功得內閣中書是役也脫無刑部一軍  
賊蔓延且不可問君有功桑梓甚大而曲突徙薪知其事者絕少逾年  
復上海君駐滬支應與之終始而不再敘八年夏許公復招赴金陵營  
十年春浙江告急君偕總兵湖南熊公天喜赴援復四安鎮廣德州奉  
調馳回遇賊丹陽戰於寶塔灣中彈死焉時三月二十九日也年四十  
有八事聞

賜卹如功令娶某氏某女子又藻國子監典籍銜家居後君一月殉難  
君性孝友接平人以謙遇達官貴人往往以氣陵之故人或以爲狂膽  
氣絕人單舸浮江海若丙夜孤行盜賊藪惘然無所畏喜談兵金陵陷  
上書大帥造戰船橫絕江流上下斷賊首尾綜列條目凡數千言不能  
用君於武事頗土苴儕輩高自標置雖於向忠武張忠武亦多所不滿

卒皆如其言博覽羣籍先嘗為疇人之術三年演弧三角三邊求角一術心動得怔忡疾願性所喜不能廢也治經尤深手輯經義叢鈔三十卷於一切經音義法苑珠林並有校本細入毫芒多所心得皆於軍幕失之惟集韻校勘記若干卷以友人錄副得存仲弟銘乞陳徵君為之序俟事平而刊之

舊史氏曰君少時朝野歡娛江表無事獨喜閱兵書儼然懷積薪厝火之憂人或哂之無何軍興而君以知兵名稍稍聞於諸將帥故多訪君者君亦未嘗不與委蛇俯仰先後十年不得售一策統一旅徒以身殉之何邪論者謂君耿介剛敖直道不容致然願曾公幕府以能得人重海內所薦達文武士致大官者以數十計君早出曾門能容君必矣乃歷游諸公閒而獨辭其招又何邪太史公於李將軍傳曰數奇曰不遇時曰相不當侯一篇中三致意焉有以夫有以夫

內閣中書銜教諭趙君傳

方宗誠

趙君名起武進人道光庚子舉人揀選知縣以圍防功加內閣中書銜即選教諭祖翼乾隆辛巳一甲三名進士貴州貴西兵備道有詩名君為人清正咸豐十年三月金陵大營潰四月二日賊竄攻常州先是總

督何桂清駐常州聞金陵潰卽退走士民乞留守城不可由是文武吏俱先期散君以世受

國恩義憤激發不肯去去遂約前廣東澄海知縣李彤勳兄子浙江候補知縣祿保與紳耆籌議激勵鄉團登陴固守以待援凡四晝夜殺賊無算外援不至而賊來日益多初六日城陷君歸命妾蔣氏率合室婦女自沈於園池遂整衣冠端坐廳事羣賊至有識君者以君居鄉稱盛德勸令自全君大聲叱賊引刀自剄子縣學生曾寅以身衛父刃賊數人遂被害祿保以拔貢生中道光己亥舉人是日城陷後赴保衛局罵賊被禍尤烈云其沈於池中者蔣氏外日劉氏君長子前福建候補同知達保妻也日汪氏三子附監生曾愷妻也日劉氏五子曾寅妻也日湯氏六子候選通判曾錫妻也又君從子從九品銜曾乾之妻呂氏縣學生曾晉之妻呂氏孫從九品銜承銓之妻余氏達保女五姑曾愷女登姑次子湖北候補知州曾裕之女三姑細姑曾裕妾顧氏凡死十三人君孫承銓者亦曾愷子也從九品銜見祖父叔父被害母赴水亦不忍獨生沈於池

吳柳塘傳

蔡壽祺

君氏吳諱可讀柳堂其字也先世居浙江麗水始祖庸明洪武中翰林學士再傳至敬工部郎中永樂時隨肅藩至甘以國戚分支泉蘭遂家焉數傳至效賢康雍閒軍功候選縣丞君高祖也曾祖朝佐妣匡祖士相恩貢生候選教諭妣李父延福妣宣祖父兩世

封贈如君官封公子三君最長年十九游庠序道光十五年領鄉薦大挑官伏羌訓導三十年成進士改主事籤分刑部江西司行走秩滿擢員外推吏部驗封司郎中京官類循故事君獨舉其職咸豐九年分校京兆試拔識多知名士

穆宗朝截取知府銓有日矣補諫垣提督成祿恣睢暴戾爲害高臺君抗疏劾不法狀情詞愴惻

朝廷動容飭查得實

嚴旨下司寇逮問罪大辟有司請緩決

詔報可君恚甚再疏力爭略謂請立斬某以謝甘肅民斬臣以謝某先帝不之忤而以措詞失體鐫級係某囹圄

今上卽位徵君起以主事謁選復得吏部君再入都趨公外至近寺危坐輒竟日輦下衣冠罕覩面者惟余及馬司業壽金張學士佩綸數過

從語及

先帝未嘗不歎

盛世易爲直臣嗚咽流涕五年

惠陵永安

上奉

兩宮詣

陵君請於寶相國與扈

蹕僕被獨往儼薊州郭外寺居焉先是

穆宗升遐無儲副

遺詔以

今上嗣

文宗入承大統俟皇子生爲

帝後而不及承統至是禮成君慨然曰吾有以報

先帝矣又三月返寓所閉門具疏請爲

先帝立後預定大統之歸函囑劉牧枝彥詳府達部代奏朝服仰藥卒

年六十有八時光緒五年閏三月初五日也明日廟祝怪君晡不起

門入得遺札二封事一鳴之官荃孫謹案傳敘此段與劉記異然劉牧目觀死事親詢廟祝所言較爲得實

感君志具狀合遺疏上京兆達部上聞

詔廷臣集議

諭藏毓慶宮又憫君孤忠視五品官  
賜卹君其可瞑目耶初君之獲譴也都人士多不平君榜門云春色藹  
南臺愧今生衰朽殘年難言封事烽煙靖西極念此去優游故里總屬  
天恩見者服其養到歸里後恪靖伯左相國宗棠督秦隴雅重君延主  
蘭山講逾年秦隴分試院生安維峻領解邦人稱之君善書法歿前一  
夕猶爲羽士周某書楹帖夜即自裁蓋矢志定而從容出之如此其絕  
命詩云云君歿不五日都中傳鈔殆徧性廉介服官三十年身後無長  
物閉莫日識與不識爭致賻君嗣乃購地瘞君使與

惠陵相望君之遺囑也配袁氏子之桓兵部主事君久出不歸之桓日  
尋近畿最後途遇君所乘輿始蹤迹於馬伸橋之三義廟成喪禮女二  
長適前山西應州知州隴西王麟祥次適戶部副郎改浙江道隴西邢  
兆燧孫三幼

論曰自余乙丑犯難獲譴臺諫以言爲戒越十年而君亦以言事去職

當時論余者競舉君以相方爾時頗不謂然緣君疏僅及桑梓也願君獨契余季春望後猶招余及馬司業飲旬餘遂泣鼎攀髯獨成千古故余既哭以詩又流涕而爲之傳噫余不能深知君生前至是始欲以文傳君實則君之傳何待文哉迴憶輿評心滋愧已

又吳柳堂先生紀略

劉枝彥

光緒己卯三月二十六日恭逢

惠陵禮成越九日州東馬仲橋鄉地報稱三義廟有隨差京員仰藥身死身無僕從遺刺吳姓可讀名詰且往視則衣冠整肅正身瞑目前御史吳柳堂先生也先生皋蘭人由進士官御史尋以言事失官復起吏部主事閏三月初五日正命遺有密摺由京兆尹達吏部疏入下廷議以五品例

賜卹廕其一子其由京來東也以天官屬自請隨員差遣隻身赴薊僦屋於廟畫則踞步山麓夜則據案作書如是旬餘疏成而先生之命畢矣先生初擬自經恐被救獲免遂仰藥盡一器毒發大聲呼廟祝手授遺囑令毋恐以身後事託州主數語後卽含糊不可辨就榻而隕嗚呼悲已覽其遺書語詳且悉尤惓惓於埋骨薊土謂出薊州一步卽非死



所其遺句云欲問孤臣戀恩所五更風雨薊門東道其志也余既理其  
殯事卽函告先主家人促之來是月十三日先生子西白始至蓋先生  
出京時誑家人以差竣遊盤山西白以先生久未歸往盤山諸峰迓之  
致遲數日是又先生恐家人早來將誤大事嗚呼尤可悲已其聞信先  
至者鍾楚卿爲先生門下士子持張幼樵直講秦春帆農部輩公函囑  
勸西白謹遵先志遂卜吉於三義廟東北之高原以十月初三日下窆  
葬之日歛獻道左不期而送者數百人於是薦紳李觀瀾駕部李晉溪  
王竹舫孝廉等諗於眾曰忠孝大節也爲子盡孝爲臣盡忠如先生者  
本朝二百餘年所僅見不可無祠宇以安忠靈眾曰然敬如議枝彥謹  
陳大吏聞諸

朝

朝命報可百世馨香於是乎在後之人過其墓仰其廟者莫不慨然曰  
嗚呼是先生也墓廟相去咫尺望

惠陵僅數十里先生之靈實式憑焉而

國朝容納忠言褒賜優渥不惟其身且及其子更幸先生生逢盛世雖  
死得遂其志爲足不朽也先生爲進士文名噪甚居諫垣直聲震天下

枝彥一官匏繫未獲從先生遊然先生爲  
國捐軀首建大議臨命從容志慮深遠而又處身以儉訓子以孝皆所  
親見而深知者足爲古今表式且以歎薊人之感慨奮發非無自也至  
家傳年表以及詩文奏議自有名公巨卿纂而述之非余之所敢任是  
爲記

續碑傳集卷五十五

江陰繆荃孫纂錄

忠節二

書裕靖節公死節事略

傳一 同

道光二十三年四月朔晨起發篋得吳人陳時上誠勇公書論裕靖節公死節事陳故靖節客親見公死狀甚覈獨恨其文弱又不載舟山戰事公既死頗有異論故謹次其事明公非智窮數極倉黃於一決而處心積慮成於死者蓋久公起家兩司巡撫江南所至有威東南事起公駐節寶山夷不敢犯屬伊相以罪廢

天子命公督兩江充欽差大臣屬以東事公聞

命赴嘉興調度而廣東和議屢敗最後以銀大萬千餘爲城下之盟飽而去公知不足恃守益嚴二十一年七月廈門失守得報集兵鎮海躬率文武僚屬刑牲醢酒誓於眾曰逆虜悖天寒盟得氣於廣閩爲不備懼茲瘡毒今聞其乃揚颿起棹捲眾北趨鎮軍葛鎮軍王鎮軍鄭先帥偏師急趨定海幕府總統大眾相機援應且虜數和以要我今日之事有死靡貳幕府四世上公勳烈不沫受

命專討義在必克文武將佐敢有受夷一紙書去鎮海一步者明正典刑幽遭神殛音詞慷慨聞者震奮當是時鎮海守兵數千隸麾下者惟親兵及徐州兵而提標兵隸提督提督者余步雲也公與步雲約分險而駐軍公遣知府黃冕守金雞山而步雲守招寶自夷入中國戰則懸紅旗和則白旗變易耳目以猜我師至是公巡師登城見招寶山之旗有異懷而未發而步雲果稱疾不行禮怏怏懷兩端步雲者用鄉勇起家勦川楚等賊積功爲大將趙金龍之叛步雲功最自以久歷行陣頗易公公治軍嚴夷在廣東時謔言公得虜必剝其皮公聞之日虜謂我不能爾邪遂捉兩夷目剝其皮以故夷人怨公次骨而誑步雲以牽制公公之誓師也道經學宮頽池旁石刻巨字甚偉而心動私念脫不測尸我於此矣歸則不語左右已而夷分兵寇盛舉石浦遣將擊走之八月十二日夷犯定海先登自竹山門總兵葛雲飛禦之於半塘土城破其巨艦明日復進竹山門明日攻曉峯嶺處州鎮總兵鄭國鴻卻之是晚虜據五奎山十六日入吉祥門夜戰火其舟十七日夷三道並進壽春鎮總兵王錫朋首當其鋒眾皆殊死戰頗有所摧敗而大鯨掩至我軍連戰六晝夜士卒饑疲虜持皮梯登岸越嶺勢如風雨於是海風大

作濤奔山湧文報斷絕三帥同時畢命軍中奪氣公以定海既陷虜必揚鯨深入益激厲將士憑城固守而鎮海單弱援兵未集公知不濟歎曰昔先義烈公乾隆二十一年八月死於難今二十一年八月謙在此命也夫謂其客曰明日將戰戰則不及言今欲有言凡軍中

諭旨奏疏及他文簿置行館中又曰余無子妻弱一女在襁褓可以德峻承祧喪葬之費取給而已又曰吾所草諸疏藏之家祠

朝廷有所推問以此進將戰又曰公等皆去西城數里外觀吾破賊急草露布不者與家人會於餘姚勿顧我我死提督必以我說於夷夷雖得鎮海不能有也

朝廷復命大將斷曹娥江而西東南尚可爲勉之二十六日夷凌晨而軍公登城督戰親援枹鼓戰方交而步雲單騎上城有所謁公不答去旋復來曰我死固當如百口何且步雲有息女今日嫁何如哉公曰兒女情君故不免然忠義事大既語步雲而急戰自辰至未所殺傷過當而招寶山兵遽潰散威遠城失守金雞之卒擾亂公所遣黃冕不能軍麾而退夷乘勝盪午礮火雨下延燒民屋守兵皆散公徒步下城西北面叩頭奮身入頻池有呼救公者聲未絕而逃千總馬瑞鵬曰公之奴

凌喜之聲也泗水而出公公昏頓縛一小肩輿健卒負之步而從於是夷人以十萬金購公尸甚急薄暮奔甯波明日易舟奔餘姚而息尚屬僕余升者追及舟登而號少頃目微眴猶述城上語一二不可辨舟行五里而公死矣後五日渡江貌如生劉中丞斂之而瞑見者莫不悲異而余步雲以二十六日晡退保甯波果以公死說於夷夷繇是益輕中國明年五月遂寇寶山掠上海據京口以犯金陵

朝廷始歸咎步雲逮捕至京師斬於西市

論曰公可謂從容就義者矣或曰公爲大言多易駐瀾經年不能止鴟張之寇窮賊而死耳烏乎心跡未易明明者亦不易當兇斂豕突沿海七八千里壁壘相望也老謀宿將起家而推轂重臣懿親擁節而臨戎虜以鳥翔蛇竄貪亂數千之眾橫行溟渤之表擇利而食曾無門關之限中朝自一二武夫免胄喪元僅乃不辱其他奔息唾涕望影驚風或乃交通談讌坐翹颺於堂皇揖狹狹於壇坫公常誚事夷如父母其亦有所憤而然也廣州之盟未寒廈門之師旋辱齧舌齧指剝膚擢筋少存顧畏義不出於此觀其忼慨誓神從容遺命此豈匹夫臧獲激烈一時者哉而成敗之論引繩批根成人之美固如是乎方之朝衣就市身

首異門又爽然失矣

安徽巡撫蔣公神道碑

魯一何

咸豐三年正月十七日賊陷安慶大中丞蔣公既授命事聞天子以公遺疏自裁而前漕督周天爵疏論遺摺與呈報不符又以十七日尚在安慶發報何以一日遽被攻陷疑有先期退避推問反復於是欽差大臣向榮具奏城陷本末及先自裁後被害狀甚晰

天子乃始加

恩賜卹尋

賜祭葬給騎都尉世職入祀京師昭忠祠皆如禮其年九月六日葬公於定福莊之原後三年一同來京師親至公家求公遺事公子常綬常紱乃出所爲狀及史館列傳乞爲公墓道之文蓋公之死出於倉卒其所以牽制錯迕俾公不得盡心力以畢一日之志而蒼黃於一死既死又不能遂引決之初心至於慘毒備至心跡幾於相違廔乃得白而猶不盡者則非獨

朝廷及中外大臣不能盡明其隱天下萬世之人有不能爲公諒者公自本藩開府經營戰守累年而不能嬰城爲一日之拒雖今起公於九

原亦不足以塞眾口而公之隱則固可得而論也竊嘗讀公遺疏推見當日陷敗之故由於壽春鎮之去自古以孤城當賊衝未有不爲犄角之勢而能禦敵者壽春鎮固公之手足而皖省之肢體也制府旣奪公之手足而斷皖省之支體矣易之以江南新兵二千駐之城外二千人皆客兵王鵬飛又客將也以客將馭客兵其心與撫標固不能以一矣彼見制府統大眾趨上游耳目聲息皆視上游爲進退制府走則二千人之心去二千人去則守城數千之兵與城中數萬之眾之心皆去雖有孫武之法墨翟之守不能善其後矣藉令制府奏調之日上疏力爭以本鎮之不可調新兵客將之不足爲援萬一見從賊雖乘勝大至而內有扼江之嚴城外有本標之策應猶可一戰坐挫賊鋒縱不百全萬不至一日之閒遽被攻陷昭昭也公之明豈不及此哉公舊爲制府屬吏而制府矜而福人也而

朝廷新向用制府知恩鎮之能便於自助而不恤其它恩鎮有治軍之長用違其方而卒見枉害公有深遠之慮抑於統帥孤立無援而全局去矣按狀公名文慶字蔚亭姓蔣氏始祖坤以從龍功隸正白旗漢軍高祖元勳陝西河州等處都督僉事祖成章上江



協副將世有武功父煥獨好文學由乙科歷官廣西興安懷集二縣以剛見忌采銅滇南道死公八歲隨母楊還京師母課之嚴年十八領鄉薦嘉慶甲戌成進士觀政吏部升員外郎那文毅公爲冢宰有所請屬公侃侃執法事竟不行簡雲南曲靖府署永昌調雲南府所歷稱治道光十二年分巡甘肅甯夏道在邊十年渠利大興遷浙江按察使值英夷內犯公常總糧臺二十四年

召見稱

旨明年擢安徽布政使於是王侍郎植巡撫安徽凡振裁清查皆倚公以辦

今上登極侍郎首以公薦逾年遂代其位時論美焉時粵賊蔓延上盛意保甲公言保甲宜與團練並行而江岸灘洲遷徙靡定難與城鄉一體因條上巡江四事當是時賊已入湖南趨長沙湖北巡撫常大澗奏調安徽精兵一千赴楚而總督陸建瀛又以江西單弱恐賊從蓮花廳窺吉安請改所調赴江西二年八月公上言前調各兵大半起程折回轉需時日當飭已起程之安慶潛山等營七百名仍赴湖北未出境之徽甯二營兵三百名改赴江西再於安慶池蕪采壽中右等九

營續調一千分赴兩省各足一千之數俾資應援惟賊情詭譎一經  
勦未必不順流下竄計安徽兵不滿萬見存僅溢六千各有分防汛地  
省垣實慮單危臣思頴鳳二府民風強勁不乏精壯驍勇之人今先募  
二千以五百人調省操防五百人留於廬州操演餘一千人分駐界連  
楚西各要隘以資防守如湖北江西賊氛益熾請再調江蘇兵三千名  
分布防勦以免竄越又言安省庫帑撥解甘肅四十三萬兩河工二萬  
餘兩本省兵餉十餘萬兩近又解湖南十餘萬兩庫藏已無餘存加以  
雇募壯勇添備器械製造船隻需款實多而宿州鳳陽靈璧五河又以  
災告矣請敕部將司庫續收地丁契雜蕪鳳兩關征存一並存留以備  
接濟事下戶兵二部而督臣以爲跡涉張皇漸生異議十月請修望江  
東流二城十一月賊至岳州復申募勇留餉前議始

命總理安徽防勦會同壽春鎮恩長計議公遣按察使張熙宇游擊賡  
音布守小孤山而自與恩長調度出則並騎察形勢修城壕按營壘十  
二月奏調江蘇兵三千名浙江山東各二千名徽州兵一千五百名督  
臣以蘇州重地靳不與有

旨陸建瀛撥兵二千而是時賊已陷漢陽燒漢口攻武昌

朝廷命建瀛爲大將統兵迎赴上游合勦建瀛意氣甚盛每對將佐陳說慷慨以爲羣盜指日就禽獨前漕督周天爵憂其不濟

朝議卽命天爵助守安慶而鳳穎徐宿盜四起天爵請留討諸陽不時進建瀛猶豫未發初建瀛奉

命撥兵二千卽日奏調恩長爲行營翼長易以福山鎮王鵬飛帥二千人而西至則駐兵安慶北門之外所謂城北之兵也恩長旣去公益孤公母楊年八十餘久病瀉公外總戎政內侍湯藥已而歎曰人臣許國而以老親累乎公則夜起焚香叩天病少閒卽日送登舟已而建瀛師至於皖城公戎服出見因乞海防之三板船陽許之已又不與遂行尋劾公三年正月賊陷武昌而東出與官軍遇於九江賊踪蔽江數十里建瀛望見而大懼舟師前後失次壽春鎮恩長獨遇戰敗沒或告建瀛急斂兵入九江縱賊過而尾其後可燒也建瀛惶惑不知爲計遽登輕舟東走順流倏息達皖城遣人報曰賊眾不可當制府歸守江東已過矣公遣飛騎邀建瀛入城計事及江不見舟沿江守兵皆散明日天爵以書來盛陳退守廬州之計公太息曰旦夕望若來同死守乃教我走乎退將安往公卽奏上天爵書而賊大至公登城督戰立持箭促王鵬

飛自北門進兵鵬飛遜去而本標右營守堞兵猶力戰城中人先聞制  
府敗走已驚擾及見城北兵散以爲退守廬州果信已行矣紛紛縋城  
下斬之不止公知事不可爲急草遺疏草甫屬而城已破閒使馳詣天  
爵奏上公起向

闕叩頭吞金不死家人進藥飲悶絕而息尚屬縛入肩輿遇賊於門遂  
被害陳貴者閒以席覆公尸賊去殯諸關神武之廟而身赴桐城呈報  
報中漏言自裁事至煩

朝廷推問烏乎自裁之與被害死均耳而公之所遺恨者在於不戰而  
城破一夫輕退而兩藩相隨陷沒則固有任其責者矣於公何尤哉公  
之子常綬聞變兼程行羣盜中數百里至安慶而賊已東下常綬乃始  
邀同在城文武僚屬薦紳耆老集視然後敢殮嗚乎此尤可痛也公天  
性篤孝雖居官未嘗離剌下出入必稟命當公致命時太夫人在途莫  
敢白及審聞狀歎曰有子如此吾可告無罪於祖宗矣卒不哭公生於  
乾隆五十八年正月二十日歿於咸豐三年正月十七日

諡封光祿大夫配彭氏

諡封一品夫人先公卒子六人存者三人常綬辛亥

恩科舉人廕工部主事龔騎都尉世職常紱議敘同知銜彭夫人出常繼妾楊氏出孫三人春愷霖愷旭愷皆常綬出一同與公之子有一日之素故敢推論公之心跡以告世之臨敵變易將佐其有關於成敗之局甚鉅如此

常文節公別傳

李元度

常公諱大溇字蘭陔衡陽人父英瑚嘉慶十四年進士以學行聞公以道光三年成進士選庶吉士授編修改山東道御史晉工科給事中掌吏科疏言天下州縣倉穀空虛或折價抵交非慎重積貯之道又言畿輔河東奸民斂錢聚眾官不能捕又五嶺南北會匪勾結督撫諱盜以無事爲福實爲隱憂又言旗營不習騎射綠旗營糧額多虛伍通衢孔道劫盜縱橫江海疏防盜艇恣出沒又牧令無兵所謂民壯復以卑隸用之甚非所以遏亂萌緝奸宄也會湖南鎮軍兵變戕營官鎮道莫敢窮治公疏劾之兼上善後五則以救積弊曰兵勇當用土民餉米毋許勒折屯穀買補當有定價巡道出巡當報日期同知升擢毋得徑遷本道疏下所司並議行尋授福建糧道署按察使晉江令報獲洋盜三百八十餘人解行省總督欲駢誅之公謂中多脅從所全活近三百司獄

積囚滿公曰囚不皆死罪而獄滿無隙地疫作且死是罪不至死而我  
悉殺之也乃分別定擬遣釋月餘囹圄一空遷兩浙鹽運使母憂歸起  
湖北按察使遷陝西布政使調湖北咸豐元年擢濟江巡撫海寇布興  
等自閩粵登萊擾江浙沿海焚掠公檄黃巖温州乍浦三鎮出海捕擊  
而水師積罷數月不報起行公疏劾三總兵令帶罪緝拏尋親赴甯波  
與提督會剿降其渠凡五旬事定二年調撫湖北當是時粵賊棘公赴  
岳州設水陸防未幾調山西仍留湖北任兼署學政以助軍餉  
賞戴孔雀翎會賊犯長沙各屬土匪蠭起有議停文武鄉試者公不可  
終事無譁疏請調兵嚴守岳州時兩湖重兵均調赴長沙分防岳州者  
僅千餘人公再請調陝甘兵三千未至而岳州土匪王萬里等糾眾千  
餘踞桃林肆掠公檄防兵剿之萬里逃而粵賊已繇甯鄉益陽出臨資  
口矣先是公檄巴陵吳士邁防水路士邁以土星港最扼要乃柵其河  
僅容一船魚貫通出入練漁勇守之時貨船雲集皆阻於柵不得行及  
賊出臨資口漁勇潰船悉爲賊有水陸並下而公所奏派守岳之提督  
博勒恭武亦不戰走賊遂陷岳趨武昌武昌兵裁二千餘人提督雙福  
公急調防隘各兵入城守合之不盈五千又分兵五百守漢陽亡何漢

陽陷賊作浮橋渡江攻城公率官民嬰守提督向公榮自湖南來援距城十餘里爲賊所隔不能前公前後告急十餘次皆不報十二月四日地雷發城陷公縊而死年六十夫人劉氏長子都司銜集松長子婦馬氏孫女淑英並死之居民瘞公屍爲暗識焉明年正月四日賊遁得屍殮之面如生

詔贈總督

子諡文節

賜祭葬入祀昭忠祠尋

敕湖北建專祠以殉難家屬耐祀

賞騎都尉兼一雲騎尉世職次子豫已酉拔貢官部郎

贊曰武昌之失或尤公部署未周或云羅文僖守長沙日必以賊狀報公言賊趨絕地必不能下竄公恃之過深耳是皆不盡然天方降割俾虎兕出柙橫噬十數行省彼氣方盛鄂雖欲圖存得乎然旣與城存亡則公之力竭矣宋人弔張魏公詩云平生一段不平氣化作祝融峰頂雲烏虜其公之謂歟

又常文節公小傳

周壽昌

常公名大瀄號南陔湖南衡陽人癸未翰林補御史出爲福建糧道擢陝西臬司乙巳予告假歸省謁座主穆相國相國問曰子識常某乎曰固同鄉然未識也相國曰此君被服儒素自爲翰林御史及監司廉訪皆勤於其官所在稱治不骫骳以隨俗不矯激以干譽廉謹士也今以憂歸里子歸其識之子與公居距三百里歸仍未得識君也丁未子官京師公亦以服闋至京眾中卒卒與語未竟別去旋擢福建藩司升浙江巡撫調湖北咸豐二年廣西賊圍長沙或謂公賊且近宜急爲守禦計公狃承平積習云賊且旦夕滅豈能渡洞庭而北耶已賊竄岳州警報踵至迺募兵勇繕城郭顧公不嫻軍旅藩臬以下無一應變才以部署責諸僚吏諸僚吏謬爲大言以復公公信之恃以無恐賊圍城久日與幕中客談制舉藝口講手畫津津不疲或怵公曰此何時迺談藝耶則拚書長歎徬徨行室中且起且坐默默不一語已復攤書閱未竟琅琅然誦聲大作若忘有兵事也性仁懦城中捕奸細多衡州人見公卽搏頰長號公縱之或告公是未可信公曰吾鄉人也我識之不我害也公故遴出納僚吏承意指務爲刻膏自錢幣以至鹽米醢醬薪炭將士求者輒不與與亦不以時賊攻急公上城拊循士卒煦煦好語皆陽



諾之終莫得其死力十二月初四日雨雪雜下寒甚守埤者起立輒倒或告公聞賊今夜悉力攻城宜優犒將士預策之激以死守某吏曰此誑辭以求犒耳烏有攻月餘不悉力獨今夜乎至夜互凍寒愈甚微聞城西隅聲轟然有頃羣和之波騰潮沸賊已攀垣上時營中無燭不及舉火暗中自相蹂躪無一禦者賊開城納眾賊入先之登城者不過數十賊耳公聞變衣冠懷印投井死藩臬以下皆死之事聞

上悼念

賜卹蔭

子諡文節

敕建專祠

史臣曰妖徒構煽盜兵潢池

國家全盛兵力折捶笞之足矣迺豕突數千里隳名城戕大吏若摧枯拉腐之易此豈但公意量所不及料哉公文學吏硜硜小廉曲謹應變無術所謂爲趙魏老者非耶繼公任者兵敗棄城走長沙卒以見法若公之死庶乎其賢於死者已

前廣西巡撫兵部侍郎兼都察院右副都御史鄒公行狀

侯棖

曾祖顯臣國子監生

祖士起縣學生皆 贈中憲大夫江西督糧道

父麟書乾隆甲午科舉人直隸故城縣知縣改授江甯府學教授

贈中憲大夫江西督糧道再 贈資政大夫廣西巡撫

公姓鄒氏諱鳴鶴字鍾泉江蘇無錫縣人以進士起家歷知河南新鄭羅山光山祥符等縣擢蘭儀同知加知府銜累護開歸陳許兵備道著有勞績升補開封以中河漫口革畱旋與開復以道員卽用授江西督糧道

今上登極之元年

詔京外大臣疏舉人材於是侍郎趙光侯桐漕運總督楊殿邦江西巡撫費開綬咸奏公堪任督撫

詔允其請擢順天府府尹旋授廣西巡撫當是時粵匪方熾奔永安由荔浦縋山過馬嶺直趨桂林公力保危城以不及援全州落職家居半年會

上命兩江總督陸建瀛爲欽差大臣駐九江以遏賊衝公以六品頂戴襄軍務赴江甯旋因陸建瀛兵潰九江犇江甯賊乘勢南下城破殉節

時咸豐三年二月初十日也年六十一公少負經世才嘗學王文成以第一流自待晚更以道自任故自縣令至巡撫始終不變其操而遇事疏簡不肯投眾人耳目故雖貴授節鉞

朝廷倚以辦賊有功矣而卒不諧於俗以擠死其知新鄭也教民種樹積穀立鄉校辟地晦蓋新鄭民困地瘠穀恆不繼西南多山麓大隗風后諸山起伏環拱而東北多沙溝不可田公荒度土宜引溱洧濙役龍淵白雁諸水溉田歲慶豐碩隄植桑柳山樹棗栗無弃地焉城故有義學曰養正公又分設鄉塾西曰景歐者在旌賢鄉歐陽文忠公遺墓所在於是教養大備其初政可觀已如此其同知蘭儀也公素習河防於隄埽減洩防守之法動中要最爲河員第一上游咸倚賴之

上諭讀書人做河工官事事一歸於實公直能無負

主知矣其知開封府也大溜下注城隄並圯巡撫牛鑑檄公捍築公露宿七十晝夜民賴以蘇蓋自河決張灣祥符上汎漫水齧隄而省垣形如舖底隄高於城黃水勢如建瓴又如數十萬甲兵左右馳盪卒得水退城完公於此心力瘁矣方水灌城時有議遷省城於洛陽者詔可公作六不可遷論巡撫據以入奏

上嘉其識議乃罷居民安土重遷咸頌巡撫德而不知實公爲之也其  
巡撫廣西也

上御養心殿

賜克食密授機宜公辭臣不知兵以練勇籌餉恤民爲巡撫責

上賜詩褒其忠蓋異數也二年四月賊起永安攻省城城中兵僅數百  
壯勇不滿千公集紳民激大義矢城亡與亡之志登陴固守分營甘棠  
渡扼賊北路以通糧道又於六塘並象鼻山得月樓諸路斬獲無算然  
賊攻益急而城益危如是者六晝夜城幾陷幸提督向榮由閒道統援  
兵至賊稍卻而總兵秦定三副總兵馬龍常祿參將瞿騰龍侍衛開隆  
阿亦引援兵至軍聲大振然經略大軍隔陽朔諸將皆隸都統烏蘭泰  
軍都統戰將軍橋傷不克赴援提督不相統制公奏請自統援兵殺賊  
違令者斬因與提督守城分遣諸將逆賊賊據古牛山擊退之又大戰  
於獅子崖相持三十日賊乃遁去經略全軍駐陽朔與桂林相去百  
數十里及桂林圍解賊已破全州出廣西公被劾罷官而經略亦以是  
獲罪其殉難江甯也罷職閒居思得當以滅賊鬱結成疾會陸建瀛奏  
公協守江甯公矍然起曰此吾報

國補過之日也力疾馳赴與將軍祥厚籌戰守策未定而建瀛兵潰賊乃渡九江襲安慶沿蕪湖直薄省城公與將軍嬰城守禦然城大難守二月初十日儀鳳門陷公聞馳援遇賊三山街賊識公曰此廣西巡撫殺吾兄弟之鄒鳴鶴也亟擊勿失公亦大聲馳突手刃一賊力屈罵賊死賊膊公被害尤慘烏乎公之死志早決其赴江甯時嘗與人言大丈夫當馬革裹屍豈能齷齪死兒女子手卒成其志其絕命詞曰臣力難圖報復臣心仰答

九重三次守城盡節庶幾全始全終又曰太倉半粒粟滄海一微塵人生百年耳忠盡仁乃純公於是爲不死矣事聞

卹蔭如例公居官居鄉多可紀者如開濬蔡河革除現年皆興利除弊之一端然在公爲小節不足錄公之大節得力於理學爲多故官江西修白鹿書院鄉居興復東林書院皆增課廣額延經師主講席白鹿書院在廬山白鹿洞爲朱陸二夫子講學地東林始於龜山先生吾邑顧涇陽高景逸兩先生繼之名垂天下公篤於問學謹初要終無愧前哲公之爲人可知矣所著有世忠堂詩古文集粵西奏稿共若干卷中河漫口紀略修復城垣略汴梁守城日記桂林守城日記各一卷續道南

錄四卷道齊正軌八十卷祖考妣皆受

誥贈生妣李氏

封太恭人

晉贈太夫人妻蔡氏夫人子男四覲賜國子生候選州同知覲儀國子  
生覲展覲顏皆幼女子六所適皆名族四年秋子將北上公諸子以公  
歷官行事來屬子撰述將上之史館子於公為年家子其何敢辭因采  
公文集參以聞見謹論次如右謹狀

又贈資政大夫前兵部侍郎廣西巡撫壯節鄒公行狀

薛福成

曾祖顯臣國子監生 皇贈中憲大夫江西督糧道

祖士起縣學生 皇贈資政大夫廣西巡撫

父麟書乾隆三十六年舉人淮安府學教授 皇贈資政大夫廣西

巡撫

公諱鳴鶴字鍾泉號松友其先由錢塘徙武進復徙無錫世居賓雁里  
嘉慶二十一年舉於鄉二十五年會試中式越二年

殿試以知縣發河南歷知新鄭羅山光山祥符縣事所至勸積穀興水  
利課藝植建義塾未幾民譽翕然政聲上聞連獲鄰境劇盜送部引

見以知州用擢蘭儀廳同知究心河防凡鳩材慮工畚築宣洩之宜無不精大府倚如左右手課績常最累權衛輝陳州開封府事三護開歸陳許道

天子數優詔嘉勞旋開蘭儀同知闕以知府候補公爲人忠果任事苟職所當舉與民生休戚所繫毅然以身先之嫌疑禍福無少顧望臨危蹈艱累奮奇績亦卒以此取嫉於世道光二十一年夏六月戊戌河決祥符之張灣冒隄頂而入破護城大隄已亥至開封城下居民號譁奔徙咸謂非鄒公不能活我巡撫牛公鑑亟檄公權開封府事從民望也開封城在河隄下久不治益隕大漚洶洶殷殷激盪震奔自南門而東而西而北環城四齧天大雨平地水深二丈去堞不盈咫公以謂自古治水之法詳於隄禦而略於城守今河薄城下當以守隄法守城乃明賞罰同甘苦審地勢請於大府徵財與粟於下縣檄召南北岸守河兵吏斂其材入城視水所嚮積土爲阜或縛薪偃木以殺水勢尤當衝者墮磚爲壩絕磬石壓之城有關培之有竇塞之民之溺者跖者寒且饑者拯之濟之煦而哺之守城八十餘日城崩於水者積六百餘丈輒復繕完而崩不止材益殫勢益危眾兇懼將潰矣公啟牛公率僚屬拜且

禱願隕身救民辭旨甚哀繼以痛哭水爲卻退旁趨公益百方捍禦之  
每至智力並窮亦時有天幸常轉危爲安其後水勢稍衰防復百餘日  
而決口合龍方事之急也

天子授公知開封府出重臣攜帑金數百萬塞河又發振撫金數百萬  
水旣退議遷行臺省於洛陽公力止之選廉能吏分勸郡邑士民蠲財  
紓患未數月集資二百餘萬緡迺修崇墉翼然更新濬城濠築礮臺開  
渠達惠濟舊河以渫積潦復護城大隄七十餘里城中百廢具舉悉規  
舊制是役也公以素習河事爲上下所推服所請於大府無不從卒捍  
大患而河南士民思公如再造焉二十三年河決中牟公以疏防奪職  
畱工效力旋丁生母憂而中牟大工告竣得

旨以道員用服除除江西督糧道

文宗顯皇帝卽位詔求賢才內外大臣交章薦公可大用擢順天府府  
尹俄而羣盜洪秀全等橫於廣西

上命大學士賽尙阿公爲經略督兵往剿超授公廣西巡撫咸豐元年  
夏五月公馳抵桂林疏陳粵中積弊致盜賊縱橫狀非假以歲月不能  
疏抉而廓清之又言創行團練稽覈糧臺事繁巨請調左江道嚴正基



等自輔許之二年二月戊戌賊自永安突出經略使諸將追之遇伏亡  
總兵官四人賊北趨桂林勢張甚提督向忠武公榮聞警率師由閒道  
疾馳三百里先一日入城公亦先期庀守具號召鄉團分布要隘部署  
文武官紳分門分地而守北扼甘棠渡以通餉道庚戌賊至城下連日  
攻城公以向公老將知賊虛實凡戰守事悉以諮之向公亦傾心爲公  
謀相得驩甚皆露宿城上督率將士捕奸民內應者斬之詞城外空房  
被賊踞者火之賊豎雲梯傅城縱燎飛石摧之又以東面對河上關得  
形勢遣將移營據之以瞰賊巢賊以呂公車宵突我城公命擊以大礮  
火箭木石齊發盡焚其車車中賊皆燬焉當是時援兵數道集城外諸  
將故等夷不相統攝經略大軍在陽朔隔賊不能進公曰賊勢方彊城  
之存亡決於呼吸指揮諸將經略之責今經略聲息不相達軍令紛歧  
此危道也乃具疏自請總統援軍違令者以軍法論召諸將示以疏橐  
諸將皆受命維謹經略聞之頗不懌公分遣諸將擣古牛山等處賊巢  
連戰皆捷賊乘閒來襲皆敗去圍城三十日竟不能窮公方略夏四  
月辛巳朔賊棄營夜遁向公赴援桂林也經略初不知及聞賊將退急  
檄向公追賊而是時謀者皆言賊將出我不意還攻桂林粵民一日數

驚咸顛畱向公向公亦病不能行公乃遣諸將分道追賊經略聞之滋不憚會賊北攻全州將入湖南境時議頗責經略不能遏賊經略乃連疏劾公稽畱勁兵閉城自守不能出師躡賊助聲援公遂落職歸而全州陷賊益彊不可復制經略亦獲譴去矣是年冬賊陷武昌兩江總督陸公建瀛奏請起公籌辦緣江防堵事宜公力疾至金陵陸公已赴九江公與將軍忠勇公祥厚布政使祁公宿藻等籌守備甚具公於是三守危城矣明年正月九江兵潰陸公退入金陵賊驅脇益眾舳艫十萬中江而下公日夜憂勞病益劇陸公謂公無守土責將奏令還家養疾公怒曰吾豈臨難苟免者哉拂衣起賊攻城十日公知事不可爲賦絕命辭二章聞儀鳳門陷率鄉兵馳至三山街與賊遇從者皆散賊刃之公大罵格傷二賊以死賊殘其尸時咸豐三年二月己酉春秋六十有一公生有摯性少孤事母至孝父資政公易簣時貧無以葬遺命俟子成立後營葬乃刻苦嚮學環宵旦不輟既成進士始卜吉營窆窆初釋褐時卽哀集古今循吏事蹟听夕玩覽故公於治民治河最精尤善述儒先之書所至必訪其賢士折節下交表章先哲不遺餘力當世名公卿如王文恪公鼎林文忠公則徐栗恭勤公毓美皆一見傾倒待爲國

士然公自負其能見世之陋庸闕茸不事事者無貴賤壹以氣陵之不為禮世亦以此望之其在鄉居官所規畫以薰士民者甚眾茲不著著其大者所著有世忠堂詩古文集撫粵奏議桂林守城日記道齊正軌其若干卷藏於家配蔡氏夫人子四觀颺浙江温州府同知觀儀候選通判觀展國子監生觀皋刑部額外郎中女子六皆適士族孫若干人曾孫若干人公既殉節之明年大吏奏聞

詔贈道銜賜卹如例同治七年大學士總督兩江曾文正公疏請以巡撫例優卹並予諡

報可御史朱鎮撫浮言詆公

詔收前旨翰林院編修朱福基等赴都察院白其誣  
詔下兩江總督廉得實左遷鎮主事仍

賜卹如例

子諡壯節

賞騎都尉兼雲騎尉世職公死事餘二十年議諡立傳已久然竊觀史館甄采

諭旨奏疏雖備而公平生志節與歷官事實或闕而未詳謹論次如右

以備史氏之采擇焉謹狀

鄒撫軍所藏林文忠公遺詩書後

朱琦

道光二十一年河決汴直趨省垣勢危甚中丞鄒公方館郡符健石投掃日夜立雨中與水爭吏議欲遷民於洛以避公設六難持不可卒保危城事後公自爲記而林文忠公爲詩美之是時撫軍爲牛公鏡堂既堅任公又率僚吏坐臥城上不去閱兩月水稍殺蒲城王文愨公持節往塞河卽奏以林某堪任茲役林方以夷事謫戍至是留河上以公總兩壩踰年工竣林公被

旨往戍所未幾復起權陝西巡撫同將軍布彥泰屯田西邊旋擢督雲貴爲漢回解紛然至是公累疏乞休矣而士大夫慕之者益衆天下知與不知皆曰林公而亦頗有以前事相訾警者公於林公不敢阿然獨以爲其使粵不附和議爲制夷長策乃生平犖犖者雖獲罪而天下終亮其忠以故復用林公名則徐侯官人性鯁亮嗜善嘗言生平所服膺爲礪堂蔣公蔣公好薦士布滿中外多爲名臣而以微譴未蒙易名之典士論弗慊欲伺聞疏論之今已矣其卒能償此志乎比歸又以爲言

今

天子嗣位用宰臣薦屢召會粵亂起爲欽差大臣輿疾至普甯而卒自  
林公卒粵盜稍熾李石梧宮保相繼卒前撫鄭公註嚴議代者周制軍  
天爵亦罷去賊由象郡竄入潯之金田

天子念南荒久罹寇擾更

命大學士賽視師而以公撫粵至則與帥相協謀爲進勦計而尤措意  
團練謂多一民卽少一盜懇疏請行而以龍侍講及琦司其事分遣吏  
紳巡歷州郡始公

陸辭

上嘗嘉公能荷艱鉅旣履任蘇疲振廢精疆一如捍汴時每諭人吏反  
覆開譬至數百言不厭琦以故人子謁公嘗言若翁守濬有功汝與董  
丞子似穀分冠南北聞可謂有天道自後燕見數稱近代疆吏之賢者  
自蔣公後首推林公爲愴然道林公前語於是始出公在南昌贈詩長  
卷屬爲之記距防河時九年矣詩用柏梁體首尾凡五十韻卷末署曰  
娛村公晚年所自號也公又言過南昌時師第一再見重以姻好且曰  
毋以恆儀聘昔歐陽子居穎於門下士篤愛蘇長公以女妻其子邁今  
豈異是耶故於納采不以他物而儷以兩文忠公集林公顧而笑樂其

後

子諡適與之符事若前定亦異矣琦幸獲聞長者餘論又親覩手跡私謂文忠公高名大節海內瞻仰過於長白相國其嗜士則同勤吏職亦同而又敏於詞翰與古人頡頏以之追匹歐蘇信非濫美獨恨不憇一老而夙志有未盡償邊民喁喁未知何時脫水火而重以遺憂於我公也迺撫卷太息而書之咸豐元年十月桂林朱琦

江忠烈公神道碑銘

曾國藩

公諱忠源號岷樵新甯江氏曾祖某祖某父某母陳太夫人生子四公其長也少而豁朗英峙以縣學生選爲道光十七年丁酉科拔貢生旋中是科鄉試久客京師以大挑得教職與曾國藩陳源充郭嵩燾馮卓懷數輩友善嘗從容語國藩新甯有青蓮教匪亂端兆矣既歸二年而復至京余戲詰公青蓮教匪竟何如何久無驗也公具道家居時陰戒所親無得染彼教團結丁壯密繕兵仗事發有以禦之逮再歸而果有雷再浩之變公部署夙定一戰破焚其巢誘賊黨縛再浩磔之湖廣總督上其功以知縣用公入都謁選又語國藩前事雖定而大吏姑息不肯痛誅餘黨難猶未已踰年復有李沅發之變又踰年而廣西羣盜蓬

起洪楊之徒出大亂作矣公爲縣令浙江歲餘咸豐元年丁艱歸大學士賽尙阿公督師廣西馳疏調公赴粵既至則大爲副都統烏蘭泰公所寶敬事無巨細必諮而後行人無疏戚貴賤必察公意嚮而厚薄之敘公之勞請擢同知直隸州公亦竭誠贊畫募楚勇五百人助戰湖南鄉勇出境討賊自此始也烏公慷慨負氣與提督向公榮積有違言公以書曉譬烏公禮下之已甚冀以感動向公卒不能得逮圍賊於永安復代爲一書抵向公力諫圍師缺隅之說請合圍而盡殲之又不能得因引疾歸歸而永安賊出大敗官軍遂攻桂林公聞警募勇倍道赴援將終佐烏公以平嶺表未至而烏公陣沒自是獨領一隊賊中往往指目江家軍矣既解廣西之圍旋大捷於蓑衣渡賊不得掠舟而北衡永以安賊攻長沙公與力爭南門天心閣築壘據要害長沙以完賊之渡洞庭而東也實惟咸豐二年十月之杪旌旆帆檣蔽江而下公痛時事之益壞怨吾謀之不見納悵然不復欲東巡撫張公亮基亦奏公留守湖南是冬破賊目晏仲武於巴陵剿平徵義堂會匪於瀏陽明年春署湖北按察使翦叛民劉立簡於通城賻陳北斗於崇陽皆以疲卒千餘盪寇數萬

天子褒歎由是有幫辦江南軍務之

命公拜疏將赴金陵中途聞廣濟宋關佑爲亂移師討之事甫定而朝廷命公速抹鳳陽不數日而江西巡撫檄公抹南昌公曰金陵鳳陽雖有

朝命然殘破之區效遲而事易江西雖無

朝命然完善之士禍急而事難吾當先其難者遂挈師由九江踔四百里焱入南昌翼日賊至則設施略備上下恃以無恐賊晝夜環攻闕地十道分擾旁郡以眩我謀終不得窮公方略凡九十餘日而圍解

上嘉公功

賞二品頂戴厥後田家鎮失利上疏自劾

詔旨雖許鑄四級然旋有安徽巡撫之

命又

詔公楚皖一體當相緩急爲去留不必拘於成命蓋

聖主倚公辦賊不復中制而海內企踵喁喁亦咸知非公莫屬也公以爲武昌差足自保廬州新立行省危在旦夕法宜經營淮南以分吳楚賊勢遂拜疏自鄂之皖曠雨而行將卒終歲奔命道病公亦病至六安



病甚六安吏民遮道請留不許昇疾竟達廬州部分未定而賊大至公設策應敵一如守長沙南昌時而城無見糧藥鉛罄竭元從之士不滿千人諸軍屯四十里外觀望莫救公弟忠濬自楚來援爲賊所梗咫尺不得通問公病益困不食數日矣城陷發憤投水死咸豐三年十二月十七日也年四十有二越八日募人入賊中負公尸以出事聞天子震悼追

贈總督

賜祭葬

命廬州及湖南江西皆立專祠

褒公三代如其官

子諡忠烈咸豐五年劉公長佑閒關歸公喪新甯六年某月葬於某里某山公弟三人仲卽忠濬以兵事積功至道員歷官安徽四川布政使次忠濟戰功最偉殉難岳州

子諡壯節次忠淑縣學附生保敘知府夫人陳氏無子以弟子孝椿爲嗣妾楊氏公旣歿而生子孝棠國藩言與公以學行相切磋文宗御極薦公以應求賢之

詔公嘗疏請三省造舟練習水師又嘗寓書國藩堅屬廣置礮船肅清江面以弭巨禍其後國藩專力水師幸而有成從公謀也自公之薨忠濟等數乞余文表之墓道大義相許神人共鑒余其敢讓軍興以來死事者多矣或邂逅及難倖廁忠義之林何可勝道當公赴江西之急有詔令至金陵及赴廬州之急有

詔且留楚中宜可少安以惜有用之身而公必蹈危地甘死如飴但求無疚於神明豈所謂皎然不欺者耶嗚呼忠已余旣揭其用兵始末乃并述他行義聲之銘詩用告異世治國聞者銘曰

儒文俠武道不並張命世英哲乃兼厥長惟公之興頹俗實匡明明如月肝膽芬芳有師鄧君有友鄒子臥病長安朝夕在視亦有曾生燕南旅死謀歸三喪反葬萬里兩以躬致義泣鬼神近古之俠孰與比倫作宰吳越風教露養秀水振飢翼民以長蘇其枯茵衣以文襁儒吏之風並峙無兩蘊此兩美風雷入懷砰然變化陰闔陽開宜哉大難重奠九垓半駕而稅天平人哉楚師東征倏逾十秋三十萬人金甲貔貅死者半之白骨嵩邱人懷忠憤如報私仇千磨百折有進無休終殫元惡盡復名城天河盪穢海宇再清公創其始不觀其成九原可作慰以茲銘

又江忠烈公傳略

楊彝珍

公諱忠源湖南之新甯人字岷樵性忼爽英邁見義勇爲道光丁酉充縣學拔貢生旋中是科鄉舉客都下以三致歸其師若友之喪義聲動一時甲辰大挑二等歸念亂將起以兵法部伍其鄉人適黃背崗賊雷再浩句粵西莠民爲亂公以所練勇合官軍擊平之

賞戴藍翎揀發浙江知縣奉檄振秀水饑多所全活遂權秀水事未幾補麗水令咸豐改元禮部侍郎曾國藩疏薦公可大用適丁父憂歸時粵賊洪秀全數敗官軍節相賽尙阿調公軍前公率所練勇五百往都統烏蘭泰一見深引重請以同知直隸州升用

賞換花翎公卽大創賊永安城下又督所部出侍衛開隆阿重圍中時賊聚永安城不及萬官軍圍之數重提督向榮議缺一角縱之出乃擊之公爭不得至二年四月賊果奪北路竄大敗官軍太沖口直趨桂林烏公以刀刺血灑孟水中飲士誓同死賊未幾中礮殞公倍道援解桂林圍敘功擢知府旋扼賊全州下流蓑衣渡礮斃僞軍師馮雲山統帥不從公策扼東岸賊遂走湖南陷道州而江華甯遠嘉禾土賊俱響應勢益張由郴州徑襲長沙屢穴火轟南城再圯鄧紹良率軍卒先後抵

擊之城獲全公營東城外近逼賊壘其一井汲時選健卒撓之日騎過  
叢冢閒伏賊攢矛刺中公腓步卒擁之歸縋入城商方略云賊奪民舟  
爲浮橋渡江掠食盡將他竄宜遣一軍扼龍迴潭而城中三巡撫二提  
督城外十總兵令不一新授督帥徐廣縉憚賊鋒駐湘潭向公與賊戰  
水陸洲中伏敗賊果由龍迴潭竄陷岳州武昌而東矣於是巡撫留公  
討巴陵賊平之又檄赴瀏陽討徵義堂賊公先以數騎誘賊前伏突起  
夾擊賊大敗而總兵經文岱亦由平江趨盧洞十八盤襲破賊巢瀏陽  
平三年春督師檄公赴鄂公前已擢兵備道至是授湖北按察使時通  
城崇陽嘉魚蒲圻賊鋒起公及弟忠濟李輔朝連破賊有

旨飭公理江南軍務公上疏陳兵事八條

上嘉納之公於是馳赴江南道廣濟值宋關祐作亂討平之甫抵九江  
聞金陵賊上犯彭澤將攻南昌公不待命往援疾馳四日至立斬謀縋  
出城者數卒巡撫張芾入公幄勞公礮碎侍者首大驚令製牛革爲障  
蔽公公笑撤之數督戰卻賊又募卒燒得勝門外民舍窟賊者有頃賊  
轟城城圯公弟忠濟亟督兵刃先登賊隨囊土矗圯處如是者再城卒  
全公命鑿濠引水注賊隧盡絕時曾公調楚師兩路俱會南昌公令一

援吉安一駐樟樹鎮議者以賊圍久師分城守單公不聽已而均破賊  
南昌圍解

賞公二品頂戴賊旋據九江趨武穴襲破富池口陷興國公所率楚軍  
以餉不時給散歸惟率鶴麗鎮兵瀘溪勇二千行顛屈瑞昌山谷閉日  
掘芋藟爲糧中道饑疲亡走比至興國麾下僅五百人耳急率以渡江  
賊揚帆上駛先據半壁山同知勞光泰以水師迎戰敗走明日賊沿羊  
角山抄水營而上公率兵拒之賊來益眾遂大敗上疏自劾  
詔鑄四級臬司唐樹義以所部盡隸公移屯黃陂馳討德安賊破走之  
而巡撫安徽

命至公拜疏卽行廬州守胡元燁謬言兵力厚餉亦充公至廬城守軍  
資皆絀乃募能助守者得萬人水西門枕高阜面山公度賊必據山俯  
攻自守之而分文武吏守各門部署稍定賊架雲梯薄城擊卻之又穴  
東城威武門公募死士迎隊出刃賊之據隧下窺者賊驚譟城上擲火  
彈燔賊走公時病久賊矢注幄眾堅請公宿城下俄水西門城圯數丈  
公躍而起手大旗登城擊賊退疏陳守禦狀乞援師

上特賞霍龍武巴圖魯勇號而壽春鎮總兵玉山以東關卒援拱辰門

戰死陝督舒興阿率萬五千人敗駐岡子集鶴麗鎮兵又敗於棗林公  
弟忠濬同知劉長佑率師至營城外五里墩阻於賊不得前外援絕水  
西門城復圯公麾眾拒之賊尋分薄四城胡元煒所任縣役徐淮守拱  
辰門夙與賊通先逸賊緣陴上搏戰竟夕至旦霧蔽蔽如雨公掣劍自  
勿未殊或負之馳至水關橋公齧其背因墮地投古塘死時咸豐三年  
十二月十七日也年四十有二同死者布政劉裕鈔池州知府陳源充  
候選同知鄒漢勳胡子雖副將松安都司馬良勳戴文瀾縣丞艾延煒  
福興數人越八日忠濬募人出公屍部卒周昌發迹得之負歸面如生  
事聞

上震悼

予謚忠烈

贈總督

賜祭葬

命廬州及湖南江西所在建祠並

賞給騎都尉兼一雲騎尉世襲

襄公三代如其官自寇事興吾楚南英傑奮起以驍勇稱天下然實自

公開其先公善撫士卒或巡軍輒下馬取箸嘗其食曰適腹饑與君輩一其此味耳其規畫天下大勢如指諸掌富敵輒橫槊馬上舉鞭指示營將曰若伏此吾轉戰至某所當出爲應及與賊相持急往往以伏起得全勝故其亡也知與不知皆痛惜之初公以東南澤國多阻水疏請川湖造戰船曾公因創立水師扼截江路賊遂不得逞以訖於亡公之識略其偉矣哉

又江忠烈公別傳

李元度

公諱忠源字岷樵湖南新甯人爲諸生究心經世學不屑屑章句充道光丁酉拔貢是科舉於鄉甲辰大挑得教職新甯地接廣西民獠雜處多盜公倡行團練法以兵法部勒子弟是爲湖南治鄉兵之始丁未秋獠匪雷再浩勾廣西賊爲亂鹽法道楊君炳堃總兵英君俊來縣會勦議徵兵公力止之自率鄉兵擣其巢再浩禽是爲團練殺賊之始事定賞藍翎以知縣用戊申謁選發浙江權知秀水邑被水災公勸分設振收棄孩蠲正賦民忘其災計禽劇盜十數邑大治巡撫吳文節公待以國士補麗水會

上登極

詔中外各舉所知侍郎曾公具疏薦有

旨召見吳公疏留辦海塘工閱四月工訖以父憂歸時廣西賊首洪秀全楊秀清等稔亂

朝命大學士賽公出視師聞公知兵疏調軍前副都統烏蘭泰公忠勇負氣與他將多齟齬一見公深相倚重公募故所用鄉兵五百人使弟忠濬帥以來號楚勇是爲湖南鄉兵出境殺賊之始始至敝衣槁項諸軍皆匿笑時賊氛惡甚官軍數萬莫敢撓公築壘逼賊營賊以其少且新集易與也急犯之公堅壁如不敢戰賊近塹始開壁馳之斬首數百烏公拊掌語人曰君等蔑視楚勇今何如侍衛開隆阿者善射奇中嘗射虎十數軍中號打虎將者也公長揖過之意嗛公一日戰被圍矢且盡公登高阜望之曰必開公也怒馬馳救之並轡歸開公拜曰活開隆阿者君也遂握手飲極歡累功擢同知直隸州

賞花翎時賊萃永安官軍環之闕城北一面公與烏公請掘長濠聚殲之弗聽明年春以病歸賊果由北路犯桂林四總兵陣歿公偵知事急出私財增募千人與劉公長佑赴援至則都統已中礮卒城圍逾月公進扼東岸之鸕鷀洲三戰皆捷四月朔桂林圍解擢知府賊趨全州公



間道敗之唐家司全州既陷賊銳意趨湖南公先諸軍扼富塘埔賊度不能越則悉載輜重舟中期水陸並下公伐樹塞河截賊蓑衣渡鏖戰兩晝夜逆舟挂樹不得前僞南王馮雲山中礮死盡獲其輜重賊遂東走道州初公慮東岸虛空白當事請分兵扼截弗許請躬率所部往又弗許至是賊果由東岸竄湖南矣賊之踞道州也眾不滿萬公慮日久裹脇眾乃建議分防不如合剿遠堵不如近攻七月賊自藍山嘉禾犯桂陽旋陷郴州公上言後路追剿愈急前路攻陷愈多請仍申合剿議當事皆漫不省賊益張公在郴州約總兵和春公由石子嶺潛師出賊前未至賊竄永興以萬眾留郴相牽制公策永興賊必繇茶陵醴陵犯長沙乃倍道繇衡州援省會賊已踞城南及小西門窟穴於民廛攻甚急南門外天心閣地勢高賊方柵其上公望見驚曰賊據此長沙危矣急帥所部爭之死傷二十人督戰益力賊敗退趨移壘去賊數十武其汲一井擊柝聲相聞白是長沙止南門受敵賊巢背水面城當絕地雖後隊踵至無能爲矣會僞西王蕭朝貴中礮死賊數穿地道先後爲副將鄧君紹良瞿君騰龍所拒氣少阻逾旬洪楊大隊至勢燄復張公弟忠濟自郴尾之約公夾擊方戰賊伏叢冢閒挺矛刺公傷腓墜馬遇

救免時新撫張公至前巡撫駱公與幫辦軍務前湖北巡撫羅公均夙  
器公就詢方略公以官軍四面集惟河西一路虛請調重兵駐龍迴塘  
扼賊竄路期盡殲張公尤避之而河西諸將逡巡莫敢前當是時賽公  
罷免新帥徐公久不至城內外巡撫三提督二總兵十莫相統攝謀用  
不成公憤甚躬赴湘潭力請於徐帥不省賊卒由龍迴塘竄出掠舟西  
渡而東南大局墜矣十一月公追賊至臨資口屬巴陵土寇起檄公留  
勦事平而瀏陽匪渠周國虞等故與粵西賊共為邪會眾萬餘人粵賊  
至卽起應之已復止當事姑掩覆之至是將乘官軍之下為亂湖南公  
出不意進討張示散脅從許自首免誅賊來犯設伏敗之斬首七百首  
免者萬人瀏陽平公時以援湖南功擢巡守道矣三年正月張公權湖  
廣總督疏調公旋授湖北按察使時賊棄武昌東下公私掃地一切倚  
公辦又平民之起為賊者通城劉立簡崇陽陳百斗嘉魚熊開宇等有  
眾數千皆討平之遂奉幫辦江南軍務之

命公拜疏言軍事請嚴軍法撤提鎮汰弁兵明賞罰戒浪戰察地勢嚴  
約束寬脅從凡五千餘言

上嘉納之是為公通籌天下大局之始四月公帥軍東下廣濟賊朱關

祐等抗糧爲亂戕守令聚眾數萬公就便征之戰三捷斬首五百有奇生禽百人釋其半令轉相解散詰旦賊大至又敗之訊俘多卽釋歸者乃駢誅之五月至九江賊自皖江泝流上距城四十里憚公威名不敢近改由彭蠡犯南昌時公奉

命援鳳潁卽抗疏改道援江西軍士方患暑疫汰之得人千三百以五月十六夜抵南昌凡三晝夜行五百里賊不意公乍至驚曰來何速也章江門最受敵公自當之宿譙樓燹城外民舍十八日賊舟蔽江至薄城礮擊之稍卻趨德勝門以門外民居阻雨未盡焚也方賊至營兵四人將絕城走公立斬以徇曉夜躬巡礮碎從者首不爲動賊穴地轟城公鑿隧道迎之三次藥發陷城各十餘丈公及弟忠濟力拒之賊死傷山積不能入

上頒賜玉翎管及挾拾各二時湖南北援師先後集賊氣阻圖竄吉安臨江而安福泰和萬安寇復起公乃分軍樟樹鎮扼賊衝檄羅君澤南等勦泰和各屬平之時羅君方以訓導援江西也八月二十二日圍解天子加公二品服當是時公義聲震天下師及德安聞賊上犯公急往助守田家鎮以二千人渡江而令後至者閒道趨武昌備緩急時司防

者武昌道徐君豐玉漢黃道張君汝瀛用戰艦扼江而南岸半壁山不  
設備公至訝之急揮兵據險賊已先我至水陸交訌師遂潰公至甫一  
日也徐張二公死之黃州漢陽陷惟武昌以公援應得全賊愬公躡其  
後尋引去初公以田鎮之失鑄四級至是奉

命巡撫安徽公疏請增兵萬人富一路又念行省新改廬州爲南北樞  
紐去稍遲賊且北竄遂以二千人先發而湖北巡撫某強留公所遣援  
軍公於是益孤矣抵六安適舒桐告陷士民遮道留公公病入城繕守  
備人心稍定廬州警報日夕至知府某具言城中軍實裕團丁可萬人  
請速往公乃留千人守六安自率數百人入城知府來謁公詢守具糗  
糧軍火一無有公審其有異志擬誅之未果越二日賊大至團丁烏獸  
散公力疾登陴誓死守城周十數里合主客兵裁三千賊仍用地雷轟  
大西門月城繼轟文昌門公親督楚勇殊死鬪殪賊數百人疏陳守禦  
狀

上特賞公霍隆武巴圖魯名號賊自十一月十二日合圍公堅守逾月  
賊奪氣將遁矣有內奸以城中食乏軍火且盡告遂增闕隧道以十二  
月十七日昧爽併力攻逾時水西門城塌十餘丈公且戰且修築忽傳

賊自南門緣梯入人聲鼎沸公知事不濟掣佩刀自刎左右持之一僕負公行公不可則齧其肩及耳血淋漓僕創甚委公於地賊逼公轉戰至水關橋被七創墮橋下死之同殉者同知鄒君漢勳參將馬君良勳自六安從公入城者也參將戴君文瀾縣丞艾君延暉自湖北來援乘閒入者也布政使劉君裕鈐池州知府陳君源充同知胡君子雖副將松安縣丞興福二君皆死而知府竟降賊前以城中虛實告及置梯南門皆其勇目所爲也公困孤城時援師十餘壁皆不能前十二月十二日公弟忠濬自湖南募楚師來援與劉君長佑殊死戰不利及再戰而城陷矣後八日舊卒周昌發冒死入城負屍出面如生事聞

上震悼追

贈總督

予諡忠烈

賜祭葬

命廬州及湖南江西各建專祠公性英烈見義必爲成敗死生無所惑治軍推赤心待人得其死力所過無秋豪犯每戰親陷陣踔厲風發誓不與賊俱生尤料敵如神能以至少擊至眾所向有功公薨海內識與

不識下及婦人孺子皆爲流涕祠祀徧江以北五年援賊屯大蜀山上  
有公祠夜見列炬熒熒劍槊聲相摩賊驚遁祠得全喪歸柩尙在城別  
賊自東安犯新甯攻七晝夜敗去訊賊黨具言酣戰時見藍旗軍突出  
遂不支藍旗者公部尙所用旗時實無此軍也世或謂公靈不昧雖死  
猶殛賊云公年四十有二父上景歲貢生母陳夫人昆弟四公長次忠  
濬累官廣西布政使次忠濟記名道陣歿通城次忠淑累擢知府子二  
孝椿以忠濬子嗣孝棠遺腹生同治癸酉拔貢  
贊曰盜起嶺西尙蠻耳王師且十萬環視莫敢先公以書生倡勇敢軍  
氣爲一變其後楚軍輩出功在東南皆公風聲所起也公薨後二年

上猶下其疏軍中

上之知公深矣公嘗建三省會勘議請治舟師扼上游侍郎曾公卒用  
此肅清江面烏虜公存亡實關天下安危豈僅以一死激頑懦哉江西  
危於公無責聞警拔舍行臥病六安以數百人入廬州皆智巧士所目  
笑者而汔以是死悲夫公試禮部時同年生武岡曾如龍暨湘鄉鄧鶴  
齡陝西鄒興愚先後客死京師貧不能反葬公皆身護其櫬歸嘻此其  
一節耳然赴義若渴已可見其概云

天記江忠烈公軼事 方宗誠

余讀湘陰左季高制軍郭筠仙中丞所為江忠烈公行狀備載公濟世大略惟公巡撫安徽時守廬州月餘殉節雖狀具戰守甚悉而所以經畫安徽之深心善策備見於與旌德呂文節公一書而行狀顧未之詳及讀公遺集亦未載問之公弟達川方伯始知未見公此書也初咸豐二年賊至湖南巡撫安徽者為蔣文慶籌防安慶幾一年三年春賊至不守城立陷賊旋去安慶東下陷金陵揚州鎮江又北竄歸德平陽進逼畿輔繼撫安徽者為李嘉端駐節廬州五月賊復上竄江西以安慶為傳舍時忠烈公援南昌固守數月擊敗賊賊始退三江大吏知守城自公始賊見江西不得破回據安慶十月入桐城是時李嘉端駐廬州幾一年安慶桐城不設防而廬州城守亦無備至是以病去初六日公奉巡撫安徽之

命帶病即行至六安病益甚聞桐城已失呂文節公以團練大臣駐舒城然無餉無兵團練僅具文不足恃廬州前後千里虛無人焉公念廬州失賊必全軍北竄乃急趨廬州先致書文節曰妖氛構禍逆燄滔天自粵而楚而江淮而豫晉餘賊且竄入近輔普天率土罔不痛心忠源

一介書生三載戎行寸功未建遂以臬司襄辦軍務茲復奉

命巡撫安徽封圻寄重彌懼隕越况淮南自古號爲重鎮今賊以金陵爲窟穴而出沒長江進踞皖城則合肥實北出之要路非獲大君子教言指畫恐滋罪戾以負重任竊以爲今日情形求人練兵措餉爲三急務安徽一省之中豈無志節超越誠足以化頑感物智足以洞機知變廉足以理財激俗勇足以治軍殺賊之四者人而一有焉無論其科第爵位之高卑歷試而任之事則殄寇安民之責不恃一人區區之見以自封而士大夫樂見其長者或駢集而與我共濟時艱矣若夫尋常趨承員弁擗闔幕紳舉世以爲才而致人才敗壞者抑豈無人先生物望所歸其於桑梓人士當早已鑒別於胸中忠源雖不才竊願以得人爲理政卽戎拯民報

國之要斷不至見而不舉舉而不先惟望大君子一一密指其良楛則忠源進退有所依循庶乎旬月之間能與不能判若黑白矣此急欲請誨者一也忠源自奉襄辦軍務之

命所帶楚勇不滿二千人五月中旬忠源入洪都兵勇僅三千陸續檄至大營及湖貴之兵勇始逾一萬洪都圍解經張小浦中丞截留之外



而所帶又止數千賊竄至田家鎮忠源以九月十二日抵其處兵勇濟江而北者僅數百人田家鎮潰防後至廣濟收集張徐兩觀察之潰勇而與唐子方方伯合軍亦止四千餘人十月六日賊自漢口退出忠源已焚奉赴廬之

命急進武昌與吳珏甫制軍崇荷卿中丞商議欲將原統兵勇帶赴廬州以賊去武昌僅百餘里風順湖口頃刻卽至斷無可撤之理於十一日僅以親兵滿千前進安徽見在之兵除調在他省外諒所存亦不多江南之地爲賊所阻隔其防兵尙恐難自固藩籬而江北岸之防鞫通籌其要隘之處如安慶可克復卽須於裕溪柵港東梁山三處置防古人於東關濡須口爭之不已者此也守安慶約須二三千人三處之守約須六七千人守合肥約須三四千人又必得有精兵健將往來馳擊於陸路則自滁和而北竄鳳壽之道自太湖廬江而北趨潁毫之道庶可迎截又非五六千人不給也合計在二萬人內外安慶江北岸見在之兵必不足也兵不足非招勇不濟竊聞廬州北境及鳳潁多健士此時如以招勇之法部署之擇其明知道理者爲之首領獎以大義激其固有之矢良俾器悍化爲勁旅以爲家國用夫豈不善特患貪生畏死

不知兵機者爲之將則坐廢而無成效矣第安省招勇舊日之章程豪傑之名姓人才之能否非新至之人所能口知先生以濟時艱爲己任諒已久與廬州士大夫經營措置胥有成竹是所急欲請誨者二也安徽一省正雜錢糧及漕米尙能催徵八九否釐茶諸務尙有可與之利否外此祇能取給於捐輸捐輸之有名無實及觀望不前總由於董勸者之不得人不得法而乾沒侵吞者比比也十室之內必有忠信苟比州比縣咸舉樸誠公正廉明之士君子董而理之俾捐輸之人曉然於董理者之不欺爲之上者保舉議敘亦據實不欺必無觀望之患矣其富紳猾商甘心輸賊而不肯助義者雖懲之可也斷不得一切苟且爲煦煦之仁取說於民蠹而不顧事之有濟與否大君子於地方豐瘠民情向背紳商愿狡必有把握在心何以俾大義克明浮謗不生必有處之適平適允者是所急欲請誨者三也公先以此書寄周公天爵後復寄呂公呂公得此書寄示桐城戴存莊未數日賊陷舒呂公殉節公力疾趨至廬州越日賊至公固守月餘殺賊數千城先旣無備外援至復不前城遂陷然賊氛亦因是大挫山東河南始有備次年春賊北竄盡敗死由是不敢窺中原公之功也存莊嘗以此書示余山中余謹藏之

嗟乎使公早得巡撫安徽數月必進守安慶扼蕪湖決不使賊得復上  
竄江楚粵蜀數千里之間盡受荼毒使公於廬州陷後始巡撫安徽則  
廬州必早復復亦不至再陷而廬鳳潁亳健士得公以招勇之法部署  
之獎以大義俾嚚悍化爲勁旅則後來捻匪之禍可以不作乃不自我  
先不自我後以積勞重病之軀繼情帥疲兵之後守寬大無備之城當  
兇悍猝至之賊致公所以籌畫者不得一展繼公巡撫者如福濟翁同  
書亦皆無幹濟才皖省糜爛遂爲天下最而捻匪之害且徧及於豫鄂  
齊魯燕秦之郊烏呼豈非天哉豈非天哉余爲公部民傷公之死因記  
公此書以寄達川方伯藏之所以補行狀遺集之未備也

又書江西被圍事

楊象濟

江西被圍非江中丞城之不保夫人知之矣時有首府黃冕與公同鄉  
故有才中丞亦倚之後事稍定冕忌中丞功出己上因日夜伺隙計中  
傷之賊第三次轟城爲楚勇堵殺得不破張中丞以萬金賞之江中丞  
弟忠濟以勇得多金易耗散因爲遣弁持歸楚中分給其家冕知之因  
謂楚勇江三爺乾沒爾金者勇信之故田鎮之役楚勇不力戰嗟乎以  
一己之私而置天下大局于此極彼讒人者可勝誅哉

又江忠烈公殉廬州記

楊峴

咸豐三年賊破安慶屠桐城入舒城部議移巡撫於廬州公被

命馳上事越翼日賊前鋒抵派河趨閉城蓋十一月壬子夜也癸丑賊四薄塵埃障天廬州城周二十六里而公部開化鎮軍勇不滿千按陴而守勢不給城中民猶四五萬公下令曰父老大苦平時未嘗一見賊今與約各歛鍤登城觀無禁頃刻得數萬人立陴下噪賊少卻甲寅夜半賊潛梯西平門緣郭上我兵奮擊賊牆進比登矣我兵殪其魁奪黃旗以呼賊舍梯遁乙卯天大霧賊犯拱辰門哨而馳聲訇啣如鬼霧益大炬不見光知縣張文斌亟率眾迎擊把總尹孝忠中礮死外委張得勝礮傷脰灼指指斷卒卻之丁巳賊道東大橋捆載趨一黃巾賊騎而後守陴者故木工也戲賊近然槍陴隙中賊人騎驚颺久乃仆有小校紅帕腰刀從陴上躍斫賊賊奔獲賊盃車二驢一馬一戊午賊潛穴陴道數丈公覺購死士迎隧出有賊黃襦禿髮俯陴口下窺外委馮貴刀斫其面賊驚城上擲火罐燒賊皆反奔是役也徵公因事出奇城幾殆已未壽春鎮總兵玉山以東關戍卒援拱辰門戰死方玉山之道北鄉也團長遮道請駐營先閒報公會諸援兵合擊玉山不能用勇目某以

八百人進賊偽走徑入括賊財廣兵進馬兵繼之賊潛出馬兵後故潰  
庚申同知劉長佑干總江忠信與鶴麗鎮總兵音德布會師西平門距  
城十里未成列賊至長佑忠信前搏賊賊敗遂進攻賊營麇社稷壇下  
我兵小卻六品銜石安邦外委林世弼死之是日辰刻遙見西方紅藍  
旗簇簇趨城上譁曰援師來公亟令都司馬良勳把總尙得勝各率勇  
百餘人出助擊遇賊戰連斃數十賊守城民益歡呼欲出效死久之偵  
者報紅旗趨徑西去矣先是公檄徵各路兵赴援音德布隨檄至遷延  
不速進既會師前鋒見賊音德布先潰徑奔棗林岡賊窮追則益棄其  
輜重奔官亭丙寅少少傍蜀山而營距城二十里所謂西大營也東大  
營者已革布政使張印塘以東關卒屯店埠者也店埠距威武門四十  
里戊辰都司戴文蘭干總江忠信經歷艾延暉以楚勇百五十人人懷  
白鏹二巨定夜叩城入城中帑久闕有浮言藉是麤安十二月壬申守  
德勝門都司楊煥章率兵勇數百踰城出守城民繼之拔賊營二毀其  
巢殲其魁從獲牛馬無算癸酉夜川勇被劫潰川勇者所謂英聚堂之  
兵也眾千餘無統率舊隸提督向榮爭功斥逐以眾至有知府銜李登  
洲者方藉兵募焉是日營拱辰門外之三十里堆比暮呼酒歌嘯賊突

至登洲先遁眾裸走幾全軍覆之亥西平門地雷發守者宿戒賊不敢  
進我兵奮擊有黃衣賊出護軍城上大礮忽自鳴飛子碎賊首賊創退  
丁丑陝甘總督舒興阿以萬五千人營岡子集己卯進扞水西門先會  
團長集練丁萬餘人殿而以川勇數百人嘗賊賊出扞川勇殊死鬪馬  
兵突驚賊橫衝馬逸不能止騎步相蹂陳亂賊空壁逐諸團謀而起賊  
始卻卒已水西門地雷發崩城角數丈轟聲震天地賊肉薄城下時公  
病劇臥帳中遽躍起手纛旗馮崩所大呼殺賊都司戴文蘭馬良勳從  
揮刃連斃賊火猛甄石迸反中賊賊創走守備龍天保督工進火灼髯  
髯焦脫益前城卒完壬午六品銜江忠濬以楚勇千五百人至兩戰進  
營西平門外之五里墩公三弟仲忠濬叔忠濟季忠淑皆善用兵賊中  
聞江家兵威卻癸未干總李得勝以楚勇八十人油燭白鏹各若干夜  
入城勞師且告援集甲申已革布政使張印塘六品銜黃元吉與舒興  
阿會兵岡子集將援水西門又益以新募鳳陽勇五百人前鋒抵四里  
河遇賊戰酣舒興阿遣總兵某部馬兵陳隄上有黃旗從東北來偵者  
一賊援也遽潰舍騎而徒或匿松林中駢坐雨泣賊至引頸受刃無敢  
聲先是公召四鄉練丁會官兵同赴援自玉山敗死圍益弛附城民驚

恐遠竄賊時出遊騎焚殺民之應官兵者又出金錢重與民媾故屢增  
且橫而舒興阿之眾又屢敗丁亥夜城遂破公死之公諱忠源字岷樵  
籍湖南新甯縣道光丁酉科舉人由校官積功至今官事聞

贈總督

諡忠烈郡舉人徐子苓曰勇目徐懷義者縣役也晝飲博夜昏昏臥巡  
城官阿不顧所募勇嘗與賊營槍手同犯法亡命諗熟互招呼手語方  
水西門破地雷裂外郭垣塌矣我兵死戰賊愕願公亟令各門勒兵守  
城兵奮前願效死而拱辰門樓火突起有數人自東北來遠城呼曰賊  
入矣盜亟去方是時實未見一賊也拱辰門者郡北門霍邱勇目周恩  
與徐懷義畫段分守地也懷義守北西恩守北東空陴而走賊逼登公  
縱兵擊連斃賊賊奔都司馬良勳以眾逐賊金斗圩轉戰城北夜冥星  
晦賊合圍我兵盪賊頭格磔迎刃墮久之良勳中槍死賊大隊略西平  
門迤折下將夾攻水西門西平門者湖南舉人鄒漢勳分守地也方夜  
飲拔所佩刀前殺賊賊怒刃中項血淋浪項偏折兩賊翼之前才數武  
死都司戴文蘭身重創率死士十餘人冒圍赴西營乞師復與賊遇死  
之天比明霧欬欬如雨諸大弁血刃擁公請去公曰城陷矣何以謝百

姓自刎不殊賊攢矛刺公被七創赴水死子苓又曰公軒眉長目髭黑  
漆顧盼磊然御下刑賞信尤能均甘苦守城民嘗晨粥葶食適公過顧  
曰吾飢若粥既乎曰未徑下馬索箸就蓐上啖復索蔬民以野藿進糝  
糕未熟公大嚼徐欠伸曰吾久病多謝父老爲吾守顧城罄矣槁不以  
時至重累君等日淡食因撫進藿者背泣然長歎久乃去有市人從守  
城民偶語中礮死公出錢市棺驅騎將出視斂所或尼之曰吾前令民  
助城上斃賊或爲賊斃吾賞卹與吾兵勇同奈何吝數十金負死者卒  
如令巽與徐君誌甫諱江忠烈公殉城事屬爲文之或益甫出日記此  
今封凡日月地名人名皆詳細添注笑謂余曰此當入吾集余日記  
日觀苦狀失傳故檢出錄之乙酉春翁翁并記



續碑傳集卷五十六

江陰繆荃孫纂錄

忠節三

湖廣總督吳公神道碑

吳昆田

咸豐四年正月十五日兩湖總督吳公擊賊於堵城致命事

聞而巡撫崇綸誣罔入告下其事受代者推問得台湧奏狀

上悼憫下所司議卹

賜祭葬

予諡文節而公之所以死尙未明也九月曾文正公國藩疏陳崇綸前

後傾陷狀有

旨逮問崇綸仰藥死於是公死節事昭然明白著於天下先一年八月

上以公總督兩湖至則粵寇由江西回竄田家鎮省城戒嚴崇綸懼將

出城爲營公策馬至其署約與死守巡撫不可公怒拔佩刀寘几上曰

城存與存城亡與亡敢言出城者血此刃會賊已逼城公卽登保安門

激勵將士嬰城固守衣不解帶者數十日蟻蝨出領輿圍解巡撫媿百

計欲死公劾公閉城固守有

旨趣公復黃州而以城守責巡撫時公方檄召胡文忠公林翼帥黔勇來會勦書約曾文正公帥水軍夾擊而崇綸齧公趣戰急公不自安遂以十一月遵

旨帶兵出省進薄黃州壁堵城公受事方三月楚素無訓練之師巡撫又事事沮掣軍械輜糧不時至會大雪公日行泥淖中拊循士卒賊每來犯輒擊退至是賊大至正決死戰後營火起眾驚潰公下馬於泥中北向稽首大呼曰無以仰對

聖朝遂投塘水死之公子養原官刑部主事聞訃奔喪昆田哭而送之越四年昆田入都亦官刑部養原泣而言曰先文節公行狀未紀負疚於心子當時在中書省日見軍報知崖略敢以爲請昆田以此事憤恨填胸臆久不得發抒顧才荏弱不能任亦不敢辭會皖捻亂鄉里乞假歸又八年養原卒京邸至是與公家遂不通音問今年赴邗上公季子丙湘奉養原所次年譜乞爲公墓道之文追念宿諾重滋慚悚謹案年譜公諱文鎔字甄甫號雲巢儀徵人世居安徽歙縣之巖鎮始祖鍾整候選主事

國初由歙遷居揚州府城捐資贖江右難婦二萬人事載兩淮鹽法外

志高祖景游候選運副會祖廷掄考授直隸州州同本生祖煥位候選  
布政司經歷祖煥仕太學生力學工詩考昌圻候選州同公幼能文十  
八入縣庠第一試題爲臨大節文出一時傳誦其後與易名之典適相  
符合人咸以爲預定云嘉慶十八年舉於鄉二十四年成進士選庶吉  
士二十五年授編修道光二年充山西副考官八年典試湖北尋督河  
南學政以敦品勵行讀書績學爲訓試衛輝時地震一日方扁試忽大  
譁公知有倡言作奸者親入號舍坐鎮之果得其人治如法十二年分  
校順天鄉試十三年分校會試遷左右贊善侍講大考遷侍讀累遷侍  
講學士十四年遷侍讀學士督學順天以選拔屆期疏請通飭嚴禁招  
搖革卷費冊費諸色日十六年擢詹事內閣學士充武會試副考官除  
禮部侍郎典武會試充會試副考官調刑部奉  
命偕蕭山湯文端公按事浙江安徽江南諸行省十九年補福建巡撫  
偕總督桂良公奏籌海口查禁鴉片章程四則下部議行二十年署閩  
浙總督時英吉利夷船駛入內洋  
朝命祁文端公駕藻黃侍郎爵滋會同公及總督鄧公廷楨籌備海防  
及揀選水師將領各事宜先是公與鄧公會奏請給海防經費至是得

旨俞行故事琉球國間歲一貢自十九年廷議改每四年遣使朝貢是  
歲中山王國王尙育咨稱琉球濱海最患多風惟朝貢以時則風雨和  
順每遇貢年歲必大熟又貢船出入閩臺歲頒時憲書得以因時趨事  
庶務合宜又琉球不產藥材賴貢船載回應用至航海鍼法全賴隨時  
學習番休更替若四年一朝則豐歉不齊人時莫授藥品缺乏鍼法荒  
疏請奏復舊制公疏聞

手敕報曰據奏情詞真摯如所請行並允令陪臣子弟四人隨貢入監  
讀書尋調湖北巡撫未赴二十一年正月密陳廈門情形略言商民紛  
傳廣東有許與廈門通市之說查廈門周圍環海地方五十里北達會  
垣東爲臺澎唇齒西爲漳泉門戶係通省咽喉若令外夷闖入必益肆  
其占踞之謀防之則無險可扼聽之則將爲所欲爲害有不可勝言者  
上韙其言五月調江西巡撫凡英夷所擾福建之廈門浙江之定海江  
蘇之鎮江公必籌舟師饜需軍火爲助治江西弭盜則捕青蓮教匪戴  
理劍古魁達及會匪謝詞封等九十三人並弋獲湖北崇陽縣據城匪  
黨汪金燦等四人撫民則疏請緩征者七借籽種口糧者再舉才則奏  
保知府倪良耀麟桂吳式芬知州周玉衡同知程燦策知縣曹士桂又

以文信國文章節義足爲萬世法疏請從祀

文廟凡在江西八年百廢興舉調浙江巡撫浙江吏治積疲公至禁絕苞苴下今日敢以一花卉一食物餽者劾衢州游擊薛思齊貪劣成新置劾罷歸安令等五人又以浙省實缺州縣多調署有一員遞署他缺二三處久不回本任者有卽署任後不回本缺聞住省垣者致交代之案愈積愈多莫能算結官無定所政難考成疏革其弊浙東濱海之漁山島盜窟也公牒總督會師捕得百餘人堵除巢穴沈燬賊船行旅以安浙鹽之弊偕侍郎季公芝昌清查奏籌變通章程七則又奏籌裁漕船幫費均下部議行歲已酉杭嘉湖嚴紹五郡大水漂沒田廬亡算公以奉職無狀上疏自劾並請振卹蠲豁平糶捐輸均奉

俞行江忠烈公忠源時令秀水公委以振裁捕盜並留辦塘工江以憂歸縣人賻之不受公歎曰賢如江令可令其無以歸葬乎支養廉銀五百兩畀之固令勿辭三十年正月

文宗登極求賢公奏保藩司汪本銓臬司黃宗漢知府余士堧同知畢存昭知縣段光清楊裕深特疏薦忠源五月西防廳北岸海決公念海塘爲杭嘉湖蘇松常鎮七郡保障設海水下注億萬生靈俱歸巨浸而

潮勢洶甚工力難施憤激投水以救免疏請從重治罪部議奪職留任  
八月塘工竣開復覆奏通籌海防大局請帑修理西塘要隘處所添設  
中塘同知一員其被裁各屬分別蠲緩賞卹口糧

許之十一月擢雲貴總督咸豐元年入覲  
召見十二次

賜紫禁城騎馬四月抵任甄劾不職知縣許文綬等四人禁革注祀華  
光寺某天子廟數十處斫其土木偶像毀其廬時廣西寇氛日熾雲南  
之廣南甯甯毘連之地每被竄擾而永昌邊外回匪亦乘閒爲亂練兵  
選將修戰守扼嶮岨全境清謐又奏請飭廣西行堅壁清野之法胡文  
忠公時守黎平公知其能保擢監司而致書江忠烈公言永安賊不滅  
若竄湖南將不可制憂慮至廢寢食十月調閩浙總督以勦辦東川回  
匪未赴任而廣西賊豕突自長沙渡洞庭陷武昌蹂江西躪安徽據金  
陵中原大震

天子知公威望移公總督兩湖功烈未就卒爲崇綸忮害遽及於難公  
受

宣廟特達之知由七品官至開府不及三載歷任封疆

朝廷大事無不與在福建在江西在浙江於夷事備極經營粵寇初起  
日夜焦縈江忠烈公胡文忠公曾文正公皆公在雲南貴州時所相與  
痛憤上下其議者也會公者公戊戌典試所得士江湖公之屬吏粵賊  
之平先後成於三人而曾公功尤偉然則公雖未竟厥志其精忠大節  
要不得泯滅於青史堵城之役天也崇綸焉能厄哉公至性過人事親  
孝處兄弟友愛起自單寒家風儉樸及貴不改其素衣裳或至補綴屏  
聲樂卻玩好居恆以書籍自娛生產一無所問而輕財好施有鄉人爲  
逋累所迫謀之蔣夫人出金條脫付質庫周之族戚故人子或貧乏無  
不資助者性剛直與人交坦白無城府每面折人過然不爲深刻少恩  
遇事委曲盡情不參成見故人始畏威而終感其德初官翰林未嘗親  
刑律及任刑部始研窮律例極精熟吏莫能欺奏事必以實情無標榜  
揣摩之見幼癯弱中年充寶豐偉聲音宏亮每日治事至夜分始就枕  
十餘刻卽起未嘗有倦容屢任封圻無餘財  
國家多難不惜罄所有以紓之官江西浙江雲貴捐銀不下五萬兩自  
調閩浙總督時閩中方用兵不欲以家累自隨寄眷屬於弟文錫四川  
官所隻身前往中道改赴楚中奔命益急手諭寄子養原曰我一身惟

筮蹇之六二鞠躬盡瘁而已嗚呼公之立行卓卓固早自決矣豈待致命遂志而後知哉養原走湖湘奉公喪歸葬浙中感公舊德爲位於西湖哭奠者數千人先是公撫浙時有鹽關津貼銀四千兩存藩庫中至是浙人欲以爲賄養原悚然曰先公不取而已取之是動於利而敗先公之節也不受公生於乾隆五十七年閏四月二十六日歿於咸豐四年正月十五日配蔣氏一品夫人先公卒子四人存者二養原蔣夫人出副貢生補刑部雲南司主事承襲世職卒於京師丙湘王安人出廩生以兄卒無子承襲世職公薨後養原奉櫃與蔣夫人合葬於揚州郡城西鄉三道山之原哀公遺集得奏議公牘尺牘傳記序書後祭文贊銘詩詞賦試律共八十卷板藏於家昆田既次其事更爲銘曰  
偉人奮發遭時艱晚氣作山河志明日月此哲而萎彼頑弗逃同茲一死泰山鴻毛生障其衝倉卒一仆後死功成公願斯副惟忠惟清合以成仁光於祀典血食千春

又吳文節公別傳

李元度

公諱文鎔字甄甫號雲巢儀徵人少能文爲吳穀人祭酒所賞拔嘉慶二十四年進士選庶吉士授編修道光二年充山西副考官八年典試



湖北尋督河南學政十二年分校順天鄉試明年分校會試遷贊善大  
考遷侍講累遷侍講學士十四年督學順天以選拔屆期疏請通飭嚴  
禁招搖革卷費冊費諸名目所得皆知名士累擢詹事內閣學士除禮  
部侍郎署

經筵講官典武會試十八年充會試副考官調刑部奉

命偕蕭山湯文端按事浙江江甯安徽諸行省覆奏皆稱

旨十九年授福建巡撫偕署總督魏公元烺奏籌海口查禁鴉片章程

四則下部議行明年署閩浙總督時英吉利夷船駛入內洋

詔遣那侍郎嚮藻黃侍郎爵滋會同公及鄧督部廷楨籌備海防及揀

選水師將領各事宜先是公與鄧公會奏請給海防經費至是得

旨俞行故事琉球國間歲一貢自十九年

詔改每四年遣使朝貢是歲中山國王尙育咨稱琉球地濱海最患多  
風惟朝貢以時則風雨和順每遇貢年歲必大熟又貢舶出入閩疆歲  
頒時憲書得以因時趨事庶務合宜又琉球不產藥材賴貢舶載回應  
用至航海鍼法全賴隨時學習番休更替若四年一朝則豐歉不齊人  
時莫授藥品缺乏鍼盤荒疏請奏復舊制公疏聞

手敕報曰據奏情辭真摯如所請行並

允令陪臣子弟四人隨同貢使入監讀書公尋調湖北巡撫未赴二十一年正月以英人反覆肆擾疏請添撥海防經費又密陳廈門情形略言商民紛傳廣東有許與廈門通市之說查廈門周圍環海地方五十里北達會垣東爲臺澎唇齒西爲漳泉門戶係通省咽喉若令外夷闖入必益肆其占據之謀防之則已無險可扼聽之則將爲所欲爲害有不可勝言者

上韙其言又以上年英夷駛擾廈門經官軍擊退保薦總兵寶振彪吳建勛等在事出力皆

報聞五月入

覲調江西巡撫汲汲以誠民弊吏爲心遇災祲畢力撫卹凡疏請緩征者七借給籽糧者再民甚德之又以文信國公學術文章節義足爲萬世法疏請從祀文廟

詔如其議又遵

旨奏保知府倪良耀麟桂吳式芬知州周玉衡同知程燦策知縣曹士桂等前後七獲青蓮教匪戴理劍古魁連及南贛會匪謝詞封等九十

三人皆論如律在江西八年百廢具舉有

旨調浙江浙中吏治久窳公訪悉衢州游擊薛思齊貪劣狀劾戍新疆  
又劾罷縣令五人下教各屬地方大利害許條上施行簠簋不飭者罪  
無赦又時時巡行閭巷問民疾苦察長吏賢否千里外纖悉周知土豪  
猾胥皆斂迹屬吏莫敢詭隨風尙一變又以浙屬牧令多署事者疏陳  
調署之弊謂有遞署他缺二三處久不回本任者有卸印後不回本缺  
閒住省垣者至交代之案愈壓愈多莫能算結且官無定所卽政難考  
成見飭司分別勒回本任或不堪回任者卽令揭參其實係虛缺或要  
地需才亦止許專員署理不得紛紛更調以專責成得

旨嘉勉漁山島者浙東濱海地盜窟也公牒總督會師剿捕獲積盜百  
餘人寘諸法沈燬賊船並將巢穴門戶堵除行旅大安尋偕欽差侍郎  
季公芝昌清查兩浙鹽務奏籌變通章程七則

從之道光己酉杭嘉湖嚴紹五郡大水漂沒田廬無算公自以奉職無  
狀致召天災上疏自劾并力請行振卹蠲豁招商平糶勸輸諸政親赴  
嘉湖等屬察振全活甚眾江公忠源時權秀水令公委以振災捕盜事  
並留辦海塘工江以憂歸縣人賻之卻弗受公歎曰賢如江令可令其

貧無以歸歸無以葬邪遂支養廉銀五百兩畀之且令勿辭明年正月  
文宗登極下

詔求賢公奏保藩司汪本銓臬司黃宗漢知府余士堧同知畢承昭知  
縣段光清楊裕深等江公忠源亦以振務出力特疏薦均得

旨錄用五月西防廳北岸海決公聞報即往勘時風雨暴至公立泥淖  
中失足落水幾危以救免隨以先事失防自請治罪部議奪職留任八

月塘工竣  
詔予開復復查明各屬災歉情形分別蠲緩並給口糧

許之十一月擢雲貴總督咸豐元年正月入覲  
召對十二次

賜紫禁城騎馬四月抵任甄刻不職知縣四人雲南有淫祠曰華光寺  
俗稱某天子廟凡數十處土人奉之唯謹事涉不經公毀其廬尸其木

偶於市淫祀遂革初永昌邊外夷匪乘虛入邊焚掠經官軍堵剿至是  
迭殲匪犯七百餘名俘獲五十餘名餘匪竄雪山以外事平而廣西賊

洪秀全等復稔亂地與黔滇接烽火相聞回匪亦乘閒蠢動公徵兵選  
將繕守備扼形勢終公任境內晏然胡公林翼時方守黎平公才之使

練兵除土寇得便宜行事保擢監司待之以國士三年以捐備餉金萬  
賞花翎居無何粵賊自長沙渡洞庭陷武昌蹂江西據江甯爲窟穴中  
原震動

上知公威望移公總督兩湖至則賊自下游上犯田鎮水陸營皆失利  
省會戒嚴城晝閉居民一夕數驚巡撫某思移營城外爲自脫計與僚  
屬密議公知之立策馬至巡撫署約與死守巡撫不可公憤甚拔佩刀  
置案上曰城存與存城亡與亡自司道以下敢言出城者齒吾刃巡撫  
默然議乃定會賊已逼城公卽登保安門城樓激厲將士誓死守衣不  
解帶者數旬圍解巡撫慮公不相容謀先發制之疏劾公閉城坐守狀  
有

詔趣公進復黃州而以城守責巡撫當是時公方調胡文忠帥黔勇七  
百人來楚會勦而曾文正國藩公典會試所得士也時在衡陽治水軍  
公馳書約夾攻黃州文正許之擬俟會胡二軍至大舉滅賊而巡撫屢  
齟之趣戰益急公歎曰吾年逾六十受

國恩厚豈猶惜死邪所以遲進者以麾下將卒宜選練且俟黔勇及水  
軍夾擊耳今若此不及待矣遂以咸豐三年臘月下旬自帥七千人進

堵城之撫陰掣其肘械糧不時至賊來犯營公督將弁力戰都司劉富成手刃數賊兵勇繼之殪賊數十後兩次來犯均擊退未幾賊大至正決戰閒忽後營火起眾驚潰公下馬於雪泥中北向叩首痛哭大呼曰無以仰對

聖朝遂自投塘水死之時四年正月十五日也年六十有三事聞上悼憫下所司議卹

賜祭葬

予諡文節入祀昭忠祠是年六月武昌復陷巡撫先已受代去九月曾文正復武昌疏陳公死事情形并追論同官傾陷狀而公之孤忠愈白矣賊之自粵竄楚也公在滇聞報方食投箸歎曰虎兕出柙矣竟夕歛獻不能寐及拜楚督之

命置二子一妾於蜀倍道疾馳誓滅此朝食使得如公議待曾胡二軍戮力並進不過兩閱月耳爲同官所螫卒齎志以終悲夫公臨行復遺書曾文正曰天下大局繫于一軍宜加意訓練勿造次且勿遽以援鄂爲念公之塵懷大局而不以己與若此其視死直如歸耳彼齷公者果何爲哉公性方嚴遇事能持正鬚眉凜然寮屬憚其丰采與林文忠並

負天下望論者謂公正直林公聰明林公聰明而能正直公正直而復聰明是可以得其概矣初公撫浙時例得鹽課羨餘銀八千兩卻之及殉難家無餘資商人感公清德欲以此爲賻公子養原曰若義也先公早受之矣先公卻而某受之是隳先公之德也敢辭強之卒不受養原以已未副貢授主事襲騎都尉

贊曰曾文正克武昌後躬赴堵城設壇祭公哭以文甚哀元度時從行求觀公所自沈處未嘗不悲憤填膺也烏虜逆燄方揚生民之禍未極重以同舟相齟驅不教之卒以擣堅城欲亡死得乎向時唐提刑樹義亦以掣肘故後公一月投江死悲夫

湖北巡撫文節陶公家傳

鄧嘉編

公諱恩培字益之一字問雲姓陶氏會稽人詩人篁村先生孫也以公貴三世皆

贈如其官妣皆夫人公幼敏慧七歲爲文驚其長老道光乙未進士改庶吉士散館授編修纂修國史視學福建未拜聞父憂歸典試四川充順天鄉試會試同考官所取多文章氣節之士貴筑黃彭年桃源尹耕雲最爲稱首官御史不主抨擊言漁山盜事關民生利弊大者三十年

冬出爲湖南衡州府知府下車雪清泉蔣歐氏冤獄蔣歐氏者李朝貴之妹受聘未行處子也李組青婦蔣氏私於歐開受組青與其兄組得殺開受尸諸朝貴之池而誣其妹與開受通故朝貴賊之妹與朝貴皆畏刑引服公廉知之拘組青弟婦鄧氏隔別審訊遂吐其實一時稱神明咸豐元年廣西賊大起衡當楚粵之衝聞謀偵伺浮言相煽衡陽奸民左家發嘯聚徒黨謀應粵賊李丹公陰得其主名按捕誅之境以安堵二年春粵賊犯衡時湖廣總督程霽采方駐郡防邊聞警皇擾思遁公說之曰衡楚門戶也棄之全楚震矣弗聽乃假其兵符得以便宜從事而請糧台勿撤於是閉門大索誅鋤內奸撫循戰士人知自奮守禦以固賊爲奪氣別由他道陷道州犯長沙澆猖獗不可制所至摧破而衡郡獨完其後曾文正公國藩得據以創練湘軍規復東南由公全城之力也御史黎吉雲具以事聞超擢湖南按察使以次討平衡山安仁瀏陽醴陵諸土匪四年遷山西布政使調江蘇冬授湖北巡撫當是時武漢再收復城池殘破旁近皆賊蹤總督楊需擁兵屯廣濟文武爭屬焉曾文正公乘勝東下胡文忠公林翼方爲臬司督師於外城中虛無人或曰省垣必不可守宜遷治他郡公斥其非兼程而進以十二月二



十六日視事自布政使以下員弁不滿三十兵不盈千餉不逾萬公規畫籌布五日粗具馳書會公乞援檄胡公歸保省城會公銳意剿賊循江南下不復備險且恃有楊需廣濟之軍以防北路而胡公持重不肯輕進賊乘虛焚我舟師南軍挫衄需以除夕退走蘄州公急發黃岡義勇萬人赴蘄助需勸勿沮怯而需師大奔不能止五年正月五日至於漢口明日又次德安漢口漢陽遂爲賊據武昌勢益孤一夕火數起公鎮以靜躬親撫諭人心稍定先已潛燒沿江木植又盡驅諸船故賊不得渡初七日以後李武愍公孟羣彭剛直公玉麐率艇船先後駛至十七日守備石清臣及胡文忠公回援之師亦至水陸分屯聲勢稍壯俄而賊城沙坡堆公曰彼將襲我宜先發制之十九日命胡公統諸軍冒風雪持三日糧出不意分三路薄賊壘師人多寒不欲戰二十五日甫渡江營沌口師期頗洩賊陰得爲備胡公慮兵分力弱不用三路之命二十六日登黃鶴樓望見艇船攻小龜山礮箭轟發陸軍鼓譟氣勢方盛漢口忽出賊馬步數千突我又出漢陽抄我軍後我軍併爲一路無應援者遂敗退六十里至大軍山乃止自此賊舟大集曉夜攻城公隨方守禦算無遺策日盼外救二月初三日楊需書來約三路攻漢口襄

河口漢陽而躬自策應公檄李公胡公尋食以待初五日小龜山後火起初六日又見火光日昃漢陽西門外火大起水師候望馳赴屢爲所給而德安卒無一人來者城圍愈急九江賊復躡興國通山大股犯省城總兵王國才奉遣赴援兩日行六十里公知無可恃登陴誓眾嬰城固守令都司海隆阿屯青山令副將景輝參將文彬文全劉攀桂等分門守禦十七日九江賊陷青山襄河口賊舟紛撲塘角公督游擊陶得壽遏之望江樓得壽戰沒漢陽草埠諸門賊礮雨注青山賊直逼大東小東二門公以西北屬武昌府多山而自當青山賊抵禦閒飛報漢陽門破多山自盡賊已虜至士各殊死戰薄暮左右皆被創不支至蛇山下赴紫陽塘水死焉年五十有四事聞照陣亡例從優

賜卹

予諡文節

賞騎都尉兼一雲騎尉世職公長身偉貌美鬚毅有威重見者莫不敬憚然兄子守廉年二十餘患痘瘡甚險兄以一子心悸不敢視公營護月餘至廢寢食患平乃已其仁愛又如此在圍城中艱難危苦以死自誓五旬之久與子姪書辭嚴義正其語絕痛同治四年給事中高廷

祐錄以上

聞得

旨湖北及原籍紹興府建立專祠

賜子守怡鹽運司運判守恆七品小京官而公之死節本末曉然大白於天下矣

論曰欲盪吳寇當固武漢公本謀也會胡二公皆見及之卒收恢復之效公死以督師之非才而曾公失在銳胡公失在避就此可盡諉之時數哉悲夫操柄不專公至以軀命殉

國事會既集二公以五等策勳見幾之明授命之正公視二公獨無媿色公之言曰此城斷不能守然萬無賊至而委棄逃走之理舍生取義趣死若飴懷懷乎純臣之節也嗟乎非惟知之亦允蹈之者歟

湖北巡撫陶文節公行狀

尹耕雲

公姓陶氏名恩培字益芝號問雲先世居會稽陶家堰明末遷於蕭爲蕭山陶氏曾祖篁村公世所稱詩人篁村先生者也祖南園公生一子爲兄嗣卽公父春田公也公生而英敏七歲能屬文得題就矮几奮筆疾書頃刻成一藝家故貧南園公歿貧益甚愈自刻厲從春田公讀朝

夕不少輟道光癸未歲與兄恩耀俱入學乙酉中副榜壬辰中順天榜舉人乙未會試成進士改庶吉士丙申授編修纂修

國史丁酉典試四川庚子視學福建未行而聞春田公之訃星奔旋里喪葬盡禮癸卯服闋由編修補山東道御史乙巳丁母憂歸丁未服闋戊申補山西道御史協理京畿道事京察記名以道府用庚戌分校禮闈卽於是冬

簡放衡州府知府是時粵賊初起句結徧天下衡當楚粵之衝勢尤岌岌元年辛亥公入闈監試甫出而左家發之事起左家發者衡陽人聚徒謀爲粵賊李丹內應公廉得其狀獲左家發並黨與悉寘諸法壬子春粵賊犯衡陽湖廣總督程喬采方駐節郡城聞賊勢張甚欲保省垣而以門戶要隘專責諸公公以藩籬之說力爭不見聽乃與喬采約毋徹糧臺而假我以兵符喬采一切聽公便宜行事公開門大索盡鋤內奸賊摩牙落距從他道逸事聞擢臬司督所部勦衡山安仁瀏陽醴陵諸邑土匪事平甲寅升山西藩司請由便道還家上冢抵錫山驛調江蘇藩司未五月而奉撫鄂之命武昌兵燹之餘人無固志且以漢陽爲唇齒漢陽失則武昌孤立故

有謂省城必不可守不如遷治他郡者公力斥其非兼程進遂於咸豐四年十二月二十六日視事是時總督楊需出防黃梅廣濟一時文武爭屬焉省中惟藩司夏廷樾鹽道常恩武昌府知府多山二十餘人耳逆氛逼近土匪竊發公至從容如平時次第布置不五日而井然矣田家鎮者蘄黃之衝要潯皖之上游兩山鈐江關鍵全楚自來經營江表皆駐正兵於此而以奇兵要賊下游當侍郎曾國藩提督塔齊布收復武漢乘勝東下慮以持重失幾不復屯兵顧險且恃有黃梅廣濟之軍所謂北路之兵也未幾舟師被焚諸營驚潰北路之兵除夕退師延坪鎮公聞敗申軍令治守具報書延坪勸以整軍前進發黃岡義勇未傅者萬人悉詣延坪以期復振書發而延坪之師退漢口矣時則咸豐五年正月初五日也次日賊上竄師退至於德安賊遂入漢口據漢陽省城火夜起男女驚撲呼號振天公意氣自如撫諭巡緝辨色而危城復安先是公嘗遣人燒沿江木植驅船盡入遠港故賊至不得渡是時援鄂之兵艇師則有道員李孟羣知府彭玉麐陸路則有總兵王國才臬司胡林翼然皆未卽至惟艇船百餘於初七八九日先後至省城倚爲重然以客兵自居少不如意輒欲開駛公多方慰留分屯望山門外鮎

魚套以扼漢陽鷓鴣洲諸賊之衝而令多山將募勇分紮漢陽門之塘角益以先期調集之宜昌游擊陶得壽兵千人防漢口襄河諸衝要頃之陝西守備石清臣兵二千人至胡林翼援省之兵三千人於十七日亦至水陸兵勇萬數千人沿江上下旗密檣連軍容甚壯然公每視師憂形於色左右怪之曰驚弓之鳥不足以固危巢兵雖多率皆潰喪之餘又無統轄之人膽不壯而心不一緩則來急則去且賊城沙坡堆慮其潛襲我也於是公出視諸軍慷慨誓師剋期一戰十九日夜命士卒各持三日糧黎明三路進出賊不意時雨雪諸軍不欲出雪霽五日乃渡江營沌口又不用公言併爲一路二十六日乃戰師期洩而賊備嚴矣公登黃鶴樓望師遙見我軍直取小龜山塵埃漲天艇船礮箭轟發岸上觀者無不鼓譟以助其勢良久漢口出賊數千綴我軍漢陽賊悉出抄我軍後方回旋閒艇船已鳴金我軍遂北退六十里至大軍山乃止自此賊船日集攻城無虛日矣二月初三日德安始以書來言派郎中銜李玉田爲前隊紮黃花坳攻漢口總兵楊昌泗爲二隊相地分紮攻襄河副將劉富成爲三隊紮蔡店攻漢陽自統大軍策應視火起約我軍並進公語李孟羣胡林翼整兵以待初五日西岸小龜山後煙起

初六日煙又起日晡漢陽西門外火又起而德安二萬之眾終無一人至者省城之圍愈急矣於是九江大股復出與國州焚掠而南望之不見首尾總兵王國才以兵赴援兩日行六十里公度不足恃乃令都司海隆阿以勇六百名屯北門外青山令副將景輝參將文彬文全劉攀桂等登城固守十七日興國賊陷青山距城三十里斯時也李孟羣屯鮎魚套胡林翼營沌口自卯及辰公以令箭三出促之不得達漢口賊見北路賊過青山遂出襄河口撲塘角公至望江樓督陶得壽等力遏之營篷遽爲流火延燒得壽陣亡兵勇潰散漢陽草埠各門礮大雨城中而青山之賊亦逼大東小東二門公乃以西北一帶付多山而自揮兵抵青山賊戰未決忽報賊由漢陽諸門入知府多山投井死矣言未已賊旗已滿睥睨間公裂背一呼士猶舞盾力鬪薄暮賊至愈眾左右悉被創公拊膺大呼曰臣力竭矣乃奔蛇山下紫陽塘整衣冠投水以殉年五十四歲咸豐五年二月十七日也事聞照巡撫陣亡例從優賜卹

子諡文節公精於治獄守衡時清泉縣民李榮茂有四子長組得次組青組青婦蔣氏與歐開受通組得覺之與組青謀殺開受裂其尸棄諸

李朝貴之汪而誣朝貴繼妹蔣歐氏與開受私故朝貴殺之鞠朝貴妹  
誣服獄成有日矣公疑其枉且蔣歐氏實處子也聞殺人實榮茂子而  
狀不可得乃拘其家人明年正月釋其幼媳鄧氏令省親而使人偵其  
後至父家坐未安榮茂使人迫之歸鄧氏父府吏也呼吏至問女歸作  
何狀曰惟哭耳平日孝否曰甚孝且以母早亡甚愛其弟公呼鄧氏至  
諭之曰此汝家事不吐實吾將斃汝父其父對之泣且哀之曰汝祕不  
言汝父斃杖下汝弟無依鄧氏一門斬矣言已大慟鄧氏亦慟曰翁姑  
有言苟洩此刀鋸鼎鑊必備嘗公曰言之我在孰敢旤汝鄧氏乃以實  
告呼組得質之俯伏無辭獄乃定公至性過人兄子守廉年二十餘患  
痘甚危兄以一子故心悸不敢近公親治醫藥寢食月餘患平後已長  
身修髯疑重有威官京師時諸老輩大人皆已憚之矣曾祖篁村公名  
元藻廩監生會祖妣孫氏祖午莊公名廷珍乾隆乙酉拔貢辛卯舉人  
甘肅州同知祖妣何氏本生祖南園公名廷琚乾隆己亥舉人辛丑進  
士歷貴州江西知縣本生祖妣來氏父春田公名軒廩貢生候選訓導  
妣王氏以公貴三代  
贈如其官配潘氏



封夫人子守怡襲騎都尉世職守恬尙幼女適陳適陸公主講鍾吾書院耕雲嘗受業庚戌會試又出公門下懼公以死勤事之大節久而弗著也因就守廉所錄及其所爲武昌殉難紀略詳加論次俾後世知公當日經營城守未嘗不備而卒不能捍危患而挫巨寇者則公之不幸也而未嘗非公之明所逆料也悲夫

勇烈公吉爾杭阿傳

陳繼聰

吉爾杭阿公姓奇特拉氏字雨山滿洲鑲黃旗人由工部主事遷郎中爲戶部坐糧廳總理漕務尋以道員需次江蘇署按察使咸豐三年粵東奸民劉麗川亂上海嘉定土寇周立春附之連陷浦東西六廳縣公奉督府檄率師復其五補授常鎮通海道旋升布政使會上海賊陰與佛蘭西通購買火藥糧食致官軍久圍不能下四年六月

上擢公爲巡撫統兵討之公旣受任移文英國領事曉以通商大義西人聽命禁止番舶接應明年正月朔日公遂激勵將士一戰克之斬劉麗川

天子賞一品服

命幫辦江甯大營軍務移勦鎮江時鎮江逆吳汝孝最桀黠遣賊屯寶

蓋山爲犄角公同大帥向忠武公使總兵虎嵩林攻寶蓋山前提督余  
萬清薄其城自夏至秋佐領額哲赫都司黃天偉守備陳紹蘭千總周  
大全等相繼陣亡而公責戰益急未幾虎總兵克寶蓋山公乃親自駐  
守復以高資爲賊運糧要道使江甯知府劉存厚結三營於高資煙墩  
山以扼之六年冬金陵逆陳玉成李秀成率賊數萬來援至倉頭鎮爲  
總兵張國樑所拒倉頭左山右水地形狹隘中有小港通江陳玉成乘  
漁舫潛下與吳汝孝由內突出李秀成登高望知外救至夜挑驍悍游  
河而過醜徒四合官兵遂爲所敗賊驅大隊赴鎮江屯金雞嶺漸逼寶  
蓋山見公防堵嚴密不敢驟犯渡江攻儀徵破托帥明阿雷帥以誠之  
軍於虹橋揚州再陷四月賊乘勝犯高資知縣松壽鹽知事張翊國戰  
死存厚告急於公公在寶蓋山所統不及萬人或說公曰賊眾且鋒銳  
不可敵姑棄高資撤軍暫退賊喜餉道得通必不我迫公憮然曰我以  
一部郎不數載位開府受

國恩厚矣今一戰而勝賊糧必斷鎮江可平上解

聖主之憂下甦生民之困詎可避難趨易遂率兵救高資力戰而入爲  
賊所圍公磨親軍擊之賊陣堅終不動公執旗遠瞭中飛礮而隕列營

皆潰存厚亦戰歿鎮江副都統綑閣已馳馬出哭曰吾與吉公偕入吉公亡吾何忍生亦自投江死事聞

詔贈公總督銜

子諡勇烈

賞給一等輕車都尉世職公狀貌魁梧氣蓋一時御下嚴整號令肅然

自膺

簡命建節江南適值洪逆鴟張金陵倚京口爲屏蔽公誓取之以孤其勢部署軍事夜常不寐每戰親自臨陣功雖不成而報

國之勇實冠於同列談者至今猶嘖嘖稱之云

論曰吉中丞因鎮江賊負嵎難下謂攻堅不如斷糧野戰不如扼要而結營高資可謂得兵家之算矣惜乎賊以詭計誤我致失倉頭之險而揚州之師復望風披靡遂至逆氛大熾竟喪先軫之元雖然若中丞之志吞醜虜爲

國捐軀固錚錚乎烈丈夫也

李忠武公神道碑銘

曾國藩

公諱續賓字迪菴湘鄉李氏湘軍之興威震海內創之者羅忠節公澤

南大之者公也咸豐三年賊圍江西省城國藩募湘勇三千往援公隨忠節公以行初至失利右營主者戰歿公代領其眾自是忠節公將中營公將右營所向有功在江西克復太和安福歸至湖南克復永興明年粵賊犯岳州忠武公塔齊布率師禦之余檄忠節公與公禦之所部僅千人耳賊眾數十倍塔公控其東湘軍扼其西盛暑鏖兵出奇制勝凡兩旬而岳州平轉戰而北連下三城八月進攻武昌漢陽克之十月大戰於田家鎮破之田家鎮江流盤折逼隘之處其南岸爲半壁山峭壁斗絕賊以鐵鎖橫江萬舟翔集氣銳甚公手刃怯卒三人士皆殊死戰連破賊壘而水師亦乘機斷鐵鎖焚賊舟好事者至磨崖以紀績公前以累功保至直隸州知州至是記名以知府用

賞給摯勇巴圖魯名號旋有安慶府之

命矣先是湖南水師中江而下陸師趨江之南岸湖北陸師趨江之北岸南軍屢捷羣寇蜂屯北岸於是公輩引兵北渡掃蕩廣濟黃梅之賊既又南渡會攻九江之賊郡城堅不可遽下又議分兵先勦湖口梅家洲之賊無何累攻不克水師失利北軍撓敗金陵逆渠益縱羣凶西上武昌漢陽再陷南軍孤立潯陽國藩以爲大戚公亦深憂之痛世亂之

靡有屆也五年二月信州告警公與忠節公自潯陽馳援迭克廣信府城及弋陽等四縣東路甫定遂建西援武昌之議大捷於義甯小挫於通山下崇陽略通城毗羊樓崗擣蒲圻掇咸甯次第戡定乃以十一月杪師次武昌巡撫胡文忠公林翼大喜事無鉅細惟忠節公與公言是聽忠節挈持大綱其戰守機宜胥公主之公含宏淵默大讓無形稠人廣坐終日不發一言遇賊則以人當其脆而已當其堅糧仗則予人以善者而已取其贏者士卒歸心遠近慕悅咸豐六年三月忠節公中鎗不起公接統全軍眾志愈厲鏖平城外悍賊之壘卻劇寇石達開來援之眾周城掘塹引江水入湖困以長圍十一月再克武昌漢陽天子偉其功

賞加布政使銜記名以按察使用未幾提兵而東再薄九江九江賊首林啟榮者堅忍得眾內與小池口湖口梅家洲諸城首尾相救外與皖廬之賊互爲聲援公旣掘長塹以圍潯又分軍援勦江北舟載奇兵夜襲湖口之背遲明水師至而陸軍伏發立克兩城事

閩拜浙江布政使明年四月卒克九江殄滅無遺天下快之賞穿黃馬褂加巡撫銜公每建一功晉一秩數省官民歡忭稱道若寵

榮之在躬或歌誦戰狀以爲樂傳播中外浙人仕京朝者疏請

敕公東兵以救浙難而胡文忠以皖中糜爛請留公軍圖皖而固鄂

天子許之公乃整旅入皖踰月連下潛山太湖桐城舒城四縣師次三

河毀賊九壘而逆酋陳玉成等四面來援截我糧路我軍銳氣日渫師

少而半潰公力戰終日自度事不可爲夜半怒馬陷陣死之咸豐八年

十月初十日也諸將堅守營壘又三日而俱敗又六日而桐城守兵亦

敗前後死者殆六千人無苟活者疏入

文宗震悼手詔曰惜我良將不克令終尙冀其忠靈不昧他年生申甫

以佐予也追

贈總督湖北江西安徽湖南立祠

予諡忠武

賞騎都尉兼雲騎尉世職公之先人世有令德曾祖本桂祖詩白皆以

公貴

贈榮祿大夫父登勝公歿復

特恩加封光祿大夫曾祖妣張氏賀氏王氏祖妣戴氏母蕭氏皆

封一品夫人公端凝敦篤愛人不尙美言而意溢於色色溢於辭雖他

軍之將士逃難之流民皆歸之若父兄聞其死哭之皆痛至不忍聞同

治二年

朝廷遣官賜祭三年克復金陵

推恩有功之臣

賞二等輕車都尉世職配謝夫人子三其二殤光久

欽賜舉人引見

賞六部員外郎又以兼襲二世職併爲男爵孫二人某某咸豐九年葬公於湘鄉四十三都黃牯冲星子山之陽同治八年月日改葬某鄉某山可余文其墓道之碑余既粗敘戰績乃兼述其懿德而系以銘銘曰器有洪纖因材而就次者學成大者天授嶽嶽李公表裏完好匪琢匪追動合大道羅公講學遠紹洛閩公分其緒握衣恂恂出而禦寇戎馬艱辛入而問道克己求仁誰悔誰尤責躬獨厚胸劈眾流曾不出口負重含污浩如山藪險趨人先利居眾後豈無贏財不阜我私不忍已飽而人獨飢分餉諸軍蘇檣嘘訛反自潯陽少憩武昌將請於朝覲親還湘王事有嚴離局匪遑斯願不遂茹涕聞傷遣將分兵助我東征擇良而予出以至誠四分五剖精銳星散自攜部曲疲羸居半損

已濟物近古無倫終焉師燿以仁隕身行類大愚乃動鬼神公功久著  
爛若三辰德或不顯考此銘文

又李忠武公別傳

李元度

公諱續實字迪庵湖南湘鄉人沈毅寡言笑身長七尺膂力過人習騎  
射能挽三石弓羅忠節公講學里中公折節受學咸豐三年忠節募勇  
殺賊公秉父命往佐之所練鄉兵號湘勇從平桂東土匪未幾從忠節  
往援江西公佐謝君邦翰將右營邦翰邑諸生故忠節弟子抵江西戰  
死公代將其營所稱湘右營者也會上寇陷泰和安福圍吉安遂同解  
吉安圍泰和安福賊皆敗潰復馳勦永新事平敘從九品師旋假歸甫  
三日趨衡州尋勦賊油榨墟進復永興次郴州敘功晉縣丞初公所部  
僅三百六十人至是巡撫駱公命增爲五百人明年駐衡州平常甯土  
匪時湘潭賊敗竄曾公統水陸軍東下檄湘勇從六月抵岳州壁大橋  
時湘軍兩營才千人分防八路賊日夜來犯提督塔忠武約會攻賊巢  
兵始交我軍小卻賊追騎大至公左右止數人戒曰毋走徐行陟山岡  
賊不敢逼已而我軍漸集公親搏戰斬大旗賊數人餘賊爭登山公曰  
是可取也手劍策馬大呼而進斬賊目一人奪其旗追北十餘里明日



塔公至營指所部贊曰壯士壯士與公語良久歎曰名將也公自隨羅忠節從軍循循弟子列至是始以知兵聞時官軍日與賊戰斬馘數千公語塔公曰連旬戰賊不得擄掠食且盡可乘機薄其壘明日遂進兵風雨驟至眾欲退公曰天助我也與塔公並轡督戰頃刻破數十壘岳州平擢知縣

賞戴藍翎八月同羅公克崇陽咸甯進規武昌二十一日破花園堅壘及鮎魚套賊營明日克武漢公擢直隸州知州

賞花翎九月同克興國州禽偽進士胡萬智斬之十月進攻半壁山時南北兩岸賊無慮十萬鐵鎖橫江賊舟麤聚數十里塔公師抵富池口阻浮橋不克濟湘勇及寶勇才二千六百人軍士多失色逃者三人公飛騎追還揮淚斬之軍心乃固逾日大戰殺賊數千赭其巢遂破田家鎮擢知府

賞摯勇巴圖魯名號授安慶知府當是時公知兵之名震天下初陸師分南北進勦楊制軍需勦北岸公隨塔公羅公勦南岸曾公督水師循江下偽丞相羅大綱守廣濟黃梅設卡壘數十田鎮破後偽燕王秦曰綱檢點陳玉成皆往附之勢張甚總督不能前塔羅兩公乃渡江北勦

公率爲軍鋒每攻壘與塔公逼賊壘十數丈席地坐礮彈雨下談笑自  
若忽躍起曰進則橫厲無前當者輒糜碎遂復廣濟及黃梅敗賊翟港  
再敗賊孔壠驛抵湖口敗賊梅家洲知九江未可驟下從羅公移營盜  
山十二月水師陷入彭蠡湖外江失利小池口賊勢復張湘軍退屯九  
江公憤甚請於曾公自率千餘人以歲除前一日渡江攻小池口僞城  
塔公率二十人偕往因眾寡懸殊戰不克比暮始收隊而塔公獨未返  
公涕泣不食誓渡江再決死戰明日塔公竟覓舟返無恙時除夕三鼓  
矣明年二月武昌復陷賊之從江北上竄也公知北岸官軍不能敵建  
議分南北兩軍夾江而勦令塔公益募勇三千合潯軍五千專勦南岸  
別令羅公率軍三千益募勇五千勦北岸南北各自爲戰一圖安慶一  
圖金陵庶大局克有濟曾公聽其言以餉絀不果亡何曾公入江西饒  
廣告急檄湘軍援饒三月偕羅公進勦敗賊大水橋復弋陽城賊趨陷  
廣信追擊之三日而城復移軍景德鎮會義甯州陷江省大震七月進  
攻義甯奪鼇嶺要隘賊棄州城遁得  
旨記名以守巡道用八月同羅公回援武漢克通城崇陽而岳州警報  
忽至公分兵趨蒲圻之羊樓崗會李君杏春彭君三元戰死崇陽之濠

頭堡眾議馳救公曰死者無及矣生者必來歸賊乘勝遠鬪利速戰宜  
堅守以持之俟其疲乃可擊也明日賊至我軍憑壘固守比暮賊將休  
公揮眾突之賊大潰追北至蒲圻復其城並復咸甯  
詔加公鹽運使銜帥師趨武昌壁洪山十二月破塘角賊壘分壁小龜  
山六年二月與劉公騰鴻扼窰灣斬賊數千屢戰皆捷亡何羅公中礮  
卒當是時軍中新失大帥人情洶洶賊乘機築壘保安門外礮子及五  
里墩大營湖北巡撫胡公奏以公總統諸軍公涕泣受命遂掃平保安  
門賊壘而江西瑞臨撫建等郡賊蔓延北及崇通蒲咸西及瑞昌皆陷  
賊乃分湘勇四千屬會公國華劉公騰鴻等由咸甯進剿賊訶知之屢  
出城來犯公敗之賽湖隄又敗之小龜山雙鳳山秋七月僞翼王石達  
開率援賊大至城賊將應之公分兵駐魯家港防援賊遣壯士數百人  
執所奪黃旗誘城賊賊信爲援至出城夾擊伏起殲賊過半及援賊旣  
至禦之魯家港鏖戰三日城賊鑑前失疑懼不敢出援賊遂敗奔追至  
小龜山斬首八百別將與城賊鏖鬪賽湖隄公帥師援之賊望其旗幟  
走入城自是堅閉不出公募民夫開濠掘江水入湖爲長圍斷賊接濟  
賊益困十一月二十一日克武昌得

旨以按察使用尋分兵復武昌縣渡江克黃州旋克大冶興國遂直擣  
九江林啟榮者賊中最悍酋也前歲塔公圍攻時堅守弗下至是仍率  
眾死守夜無更柝望火城以內人聲寂然官軍潛薄之鎗礮應聲下七  
年正月公用攻武昌法掘濠困之閱數月濠成四月皖賊上犯號十萬  
犯蘄州及黃梅羅田公分兵援蘄州賊稍退六月賊傾巢上犯蘄黃告  
急賊於廣濟董司牌築壘伺我軍公渡江鞫平之八月破小池口僞城  
仍回九江先是四年秋賊奪江西戰艦沈塞湖口築壘石鐘山爲浮梁  
鐵鎖阻官軍隔岸梅家洲轟僞城環巨礮我軍仰攻不利其年十二月  
水師陷入內湖會公益治水軍章門檄彭公玉麟統之水軍復振至是  
袁吉瑞臨以次復眾議會鞫九江公謂不拔湖口九江不可得也乃定  
計水陸夾攻湖口九月八日公遣其弟續宜率馬步軍攻梅家洲僞城  
躬率師揚言鞫宿松漏四下迂道入里江伏湖口後山士卒皆捫蘿上  
犁旦彭公率戰舟攻湖口東游擊黃君翼升率戰舟攻梅家洲提督楊  
公岳斌夾擊下鐘山賊方悉銳拒公率師從山椒破空下賊大驚遂  
殲其眾湖口復梅家洲賊棄城遁於是內外水師始會合乘勝復彭澤  
夷小姑湫僞城得

旨除浙江布政使返九江適臨江逸賊竄興國冒雪遣兵往援擊走之  
八年水陸晝夜攻九江穴城崩爲礮石所壅至稍遲賊旋堵禦公令  
壯士數百人擁盾自蔽先夕伏城濠四月七日地雷復發勇自濠內奮  
呼登城城拔殄賊數萬無脫者啟榮死亂軍中磔其屍九江平加巡撫

銜

賞穿黃馬褂許專摺奏事方九江之破也公請假歸省甫抵鄂而悍酋  
陳玉成由安慶糾潛太英霍賊分擾蘄黃警報日數至未幾賊閉道犯  
黃安公弟續宜分兵馳援不利公聞警取道黃陂約夾擊敗賊黃安門  
外賊遁麻城賊亦不戰走乃還鄂時皖中糜爛奉

命越境剿皖

詔將軍都興阿總兵鮑超率馬步軍由宿松趨安慶公由英山趨太湖  
乃令續宜駐軍鄂渚自帥八千人啟行議者謂出境剿賊宜益兵爲四  
翼各三四千人而自帥中軍五路並進公以餽餉難之會曾公奉

詔墨經起視師與公會於蘄州公遣將朱品隆唐義訓分千人爲會公  
衛議者又謂宜調鄂中守礮勇以換留防九江彭澤之湘軍六千人隨  
同剿皖公以更調需時日卽率守礮勇以行抵太湖適署皖撫李公孟

羣師潰廬州

詔公及都公改道援廬公與諸將議曰由太湖救廬凡數百里廬已陷師至援不能濟急且太湖圍撤賊由豫北竄是腹背受敵也遂決計取太湖掃蕩桐舒等縣直趨廬州時咸豐八年八月也是月克楓香驛小池驛賊巢從太湖乘勝復潛山遂進擣三河集三河集者廬州要害也賊築城傅以九壘守以悍賊數萬三河破然後可進規廬州自克桐城後公令總兵趙克彰率六營守之又命副將謝永祐守舒於是所部僅五千人九月二十八日抵三河十月二日破賊九壘斬馘數千計忽僞英王陳玉成自江浦六合率大隊來援僞侍王李世賢自廬州糾捻匪來援眾十萬連營金牛鎮白石山等處烽火互數十里諸將議退守桐城公曰軍事有進無退當死戰遂飛檄各防軍來援未至初九日援賊蝟集明日迎擊至黎家渡突遇大隊賊天大霧賊用眾抄擊我軍相繼潰副將劉神山參將彭友勝游擊胡廷槐鄒玉堂杜廷光等先後戰死公傳令軍中嚴守牆壘無何各壘皆破運同丁銳義馳入湘右營誓同公死守或勸突圍出圖再振公曰軍興十年皆以退走損國威吾當縱橫血戰多殺一賊卽爲國多除一害且吾前後數百戰每

出隊卽不望生還今日固必死有不願從死者各爲計諸將士皆曰某等願從公死日暮賊攻益急公上馬開壁馳擊殺賊數百人夜二鼓總兵李續燾副將彭祥瑞等越壘衝出賊遂踞其壘決河隄斷我軍去路公知事不可爲具衣冠望

闕叩首取所奉

廷旨及

批摺焚之曰不可使

宸翰辱賊手乃躍馬入賊陣身被重創見黃旗知爲賊渠曰此吾畢命處也馳入死之同知曾君國華知府何君忠駿知州王君揆一同知董君容方知縣楊君德閻從九品李君續藝張君溥萬皆殉焉道員孫君守信與丁君銳義猶激厲士卒死守中右營至十二日水火俱盡營陷皆死之是役也文武官弁死者數百人而中右一營爲尤多云事聞

上震悼

手敕曰詳覽奏牘不覺隕涕惜我良將不克令終尙冀忠靈不昧再生申甫以佐予也又

詔贈總督照總督陣亡例

賜卹入祀昭忠祠其父登勝

賞一品封典並銀五百兩子光久光令

賞舉人

敕湖北江西安徽湖南湘鄉各建專祠事蹟宣付史館

賜祭葬

子諡忠武公崛起田閒以平賊自任選士以知恥敢戰爲上每臨陣安閒靜鎮不苟接刃尤能以少擊眾大小數百戰未嘗挫衄在軍號令嚴明所至百姓懽迎耕市不擾轉戰江鄂閒所過州縣不見客不索供張廣坐中言不輕發他將多以氣節相高公默然深藏恆曰事由心定毋張皇性至孝克九江後乞假省親既不果乃爲迎養計其父以書報之曰軍事方殷兒當壹意報

國勿以我二人爲念公省書掩涕及拔營握胡公手痛哭曰吾無繇復見父母也左右皆感泣公與諸帥共事和衷商榷胡公撥撫標兵萬人隸公戲下皆心服樂爲之用其臨陣專以救敗爲務全大局爲先遇賊則讓人禦其弱者而已當其悍者分軍則以強者與人而留弱者以自



隸江楚兩軍每言肯接帶弱兵臨陣救人者塔忠武後公一人而已公卒年四十一舒城難民覓其遺骸送霍山大營同治元年

詔湖南巡撫遣官卽家

賜祭三年克復江甯

賞二等輕車都尉

贊曰太史公云余睹李將軍悛悛如鄙人口不能道辭及死之日天下知與不知皆爲盡哀彼其忠實心誠信於士大夫也烏虜殆忠武之謂歟公性廉軍中所餘俸餉纖毫不自私嘗寄助彭侍郎水師餉曾撫部吉安軍餉各萬金而元度駐軍貴溪公亦飲之五千金且侑以書曰茆者不足道聊分灼艾之痛耳烏虜卽一端不已得公之大凡哉

又記湘鄉李公死事

方宗誠

公名續賓字迪庵湖南湘鄉人咸豐二年會侍郎國藩奉

旨團練公以布衣領鄉兵隸羅觀察澤南麾下屢立戰功先後以會侍郎及湖北巡撫胡公疏薦官至浙江布政使加巡撫銜咸豐五年羅觀察陣亡於湖北之洪山公代領其眾羅公治師有紀律與同甘苦每戰以身先智仁勇廉故所至克捷而民無擾及公爲將亦然會公胡公俱

倚重之八年以賊據九江久不下命公圍之殲焉復回軍武漢進克麻  
城黃安太湖潛山九月三日至桐城時楊提軍載福都統多隆阿鮑鎮  
軍超分帥水陸之師圍安慶公攻桐以分賊勢初六日桐城復殺賊千  
餘人先是七月李方伯孟羣圍舒城敗走廬州復陷  
朝命公進取廬州公遂急進兵攻舒城三日克之追賊至廬江之三河  
三河地勢阻水多溝澗不利馬戰賊堅拒死守公攻之十餘日破賊數  
千惟一石營未下初公之舒畱總兵趙克彰守桐使知府張家駒督辦  
團練賊陳玉成者最慄悍軍中號爲四眼狗八月陷江浦九月陷六合  
十月率眾救三河沿途掠人民數萬公與戰屢敗之初十日公統大兵  
追擊三十里遇伏兵潰公回營固守力戰死之時舒城守兵千餘聞之  
棄城走賊至桐趙克彰張家駒皆潰兵及團勇死者數百人安慶官軍  
聞桐潰左次宿松以遇賊上竄之鋒於是公所克潛山太湖俱復陷往  
年秦鄭二帥之圍桐也兵勇數萬閱五月不能破其城外三營而焚掠  
居民數十里士民助餉者以巨萬計卒以大潰民受其害公至桐不取  
民間一錢一粟持大體寬脅從軍中皆用長夫不役使平民兵至三日  
卽破營克城閭閻無擾不矜不伐見士民用客主禮其兵與民亦相親

如兄弟以故公死而民感泣思之如父母焉  
論曰公固賢將也然復桐舒後當以重兵守之與攻安慶之兵爲犄角  
聲援俟安慶克然後合兵前進大功可成矣當是時淮南諸軍不能南  
下會期獨屢請公提孤軍疾進以致功敗於垂成悲夫



續碑傳集卷五十七

江陰繆荃孫纂錄

忠節四

浙江巡撫贈右都御史羅壯節神道碑銘

莊受祺

咸豐十年二月粵賊由皖南狂竄入浙二十八日省城陷巡撫羅公殉焉先是賊據金陵

天子命重臣圍之賊復四出大江南北並設將帥而浙江重兵悉寄於皖南羅公至知會城空虛則亟調湖湘各軍來援未至而皖兵已敗距公之至未三月也事聞

詔從優議卹會有撫浮言聞公者得

旨寢前命

今上卽位東南蕩平巨憝授首相國曾侯奏浙事之敗非公之過且陳公平日歷官廉正狀奉

詔如前議卹

贈右都御史銜

賜祭葬

予謚壯節中外臣民咸歎

朝廷之褒忠無已而公之學問節概終能不泯於沒世也公諱遵殿字澹邨安徽宿松縣人曾祖某祖某父某俱以公貴

封資政大夫母某氏

封夫人公生時夜忽光明如晝故小字有光幼孤篤學嗜宋五子書心究而力行之其學以不欺爲本以大節爲體以窮理致知爲用世俗浮好絕無所動其心也舉道光十一年鄉試十五年成進士以知縣發直隸署南樂補唐山治行稱最調清苑擢冀州遷浙江湖州府公爲治以強恕親民以析理綜劇湖州漕弊甲於浙省公輒親詣開誠曉喻莫不化梗爲良以與民習故得用其機牙禽劇盜百餘大府異之卓薦調杭州未數月擢湖北安襄鄖荆道襄俗素稱狡悍公治以鎮靜兩權臬司制府裕公薦治行第一咸豐二年粵寇蔓延兩湖檄公籌餉事襄匪郭大安乘公出將糾黨應粵逆爲亂公聞亟返親至賊所諭散其徒數千百人郭逆跪迎曉以禍福計稍緩會大兵至禽首逆事遂定公知民尙可用乃選其豪得勁卒數旅而編各鄉保甲爲團楚之團練自此始五歲中湖北省城三陷他郡粵賊蹂踐殆遍卒未一犯襄境六年擢兩淮

鹽運使大府奏留會省城克復遣撤川勇西歸有黠者誘襄匪爲亂蔓延荆鄖宜昌公以五百人偕城民守陴召集各團練從官軍剿匪閱八月而悉平七年擢湖北按察使次年擢湖北布政使時楚事再造巡撫胡公銳意圖治尤倚重公胡公統兵在外公在內用人行政如聲響之合湖北號稱大治九年擢福建巡撫奏對稱

旨調撫浙江公稔浙江以徽甯各軍爲屏藩尤以江南大營爲根本會賊勢日盛公以大營恃浙餉爲食則專壹理財去其侵蝕者又逆知皖軍不可恃而湖湘援軍不得卽至城守兵甫二千又皆不能戰浙民素脆弱不得如襄陽之率以登城輒拊几太息深惜事之不可爲而一死之不足塞責也未幾賊薄城公悉力守禦又七日賊穴地實硝燄火發裂城數十丈賊入公被刀還署仰藥未死與配徐夫人暨長女適陳者環縊而絕公年六十有三洪惟我

朝敦尙樸學儒術大昌若李文貞湯文正誦法聖賢遭時隆盛或罹兵革卽返亨衢能專以學行表見於後至由外吏漸躋臺寄則有如于清端張清恪本德行爲政事身名並安垂光方來若公之以循吏始以偉烈終爲前此所僅有乃知爲學之貴乎躬行躬行之極於忠孝以之取

人則正士起以之涉世則大節完理有各足義無所偏要非空譚學術之可比附者也公服官數十年首嚴義利之辨無纖芥取於屬吏守湖州時烏程某令以治漕闕萬金公爲揭債昇之某令旋歿公徐以廉俸償之絕不介意家止茅屋十數楹其喪歸幾無以爲葬胡公集同人賻之得營墳焉與人交壹以誠相示不欲面斥人過能示意使人自悟所拔才以節操爲重如多山金雲門李棟皆殉

王事浙之趙景賢捍守孤城死事尤烈其他亦多循吏其所否者後雖名位顯赫卒自顯其詐諼云當杭城之未陷也與夫人訣曰予必與城存亡子盍自爲計夫人作色曰作君家婦四十年尙不我知邪適陳女早寡跪請從死從子婦周暨僕婦二人僕二人皆隨殉側室懷氏有子三人長忠祐候選員外郎善讀書能繼家次忠忠祥皆穎慧異人受祺識公自襄陽在楚宦迹輒相隨每聆公言反覆曲盡事理語畢卽默坐僚寮中言不及政者輒弗聽聽亦不置一語因就公以心性相切礪則大悅締深交并以少女歸弱子忠祐以公狀請銘其曷敢辭銘曰大經垂天宏義懸日槃園孟方其理則一文質遞嬗乃分儒術原厥要歸若鍾有律惟公守學在濂雒閒孰馴非暴孰革非頑昔之治杭化梟



爲鸞比閭靜晏謠俗改觀公今再來寇從外軼如絲已勢如沐未櫛昔  
之治襄婦子一家傾身赴險瘡不敢譁今之撫浙垣藩已徹引距失牙  
欲奮無翼謂予不信公豈無武熊羆千億選材部伍厥將感誠亦委塵  
土窮黎環泣公豈無慈午夜披章危迫陳辭及終不守視死如節比城  
已隳內郭可寄公如就之六日援至乃視貌躬固等浮雲但夷寸土願  
熨元纁志士順義豈期稱後誼感關門同此稟受公昔登第出倭相門  
旌德之呂通州之孫會稽有陶四傑並論倭素績學互發其源迨後四  
公位各通顯臨難授命如驂隨輦是知爲學貴得其本時遇其通人益  
已損狂挽桂流靡從草偃時當違塞盡瘁弗遑論颯拯溺崑炎遏光苟  
其勿濟枕席鑊湯求仁得仁夫又奚傷俎粢孔修樵蘇永護金石弗渝  
千載且莫我銘斯阡庶迓來祚

又浙江巡撫羅公傳

方宗誠

公名遵殿字有光號澹邨宿松人少孤天性孝友有兄賈遷於外歲暮  
母憐之公卽奔馳百餘里偕度歲除道光辛未舉於鄉乙未成進士以  
知縣分發直隸署南樂肥鄉補唐山調清苑皆有治績擢知冀州未受  
篆擢浙江湖州府時海氛甫熄湖屬漕務棘手公日詣倉市開誠布公

愷切宣諭事卒以辦又捐建書院於歸安以正士習捕獲巨寇百餘名數月湖州治凡四載移守杭州未數月擢湖北安襄鄖荆道襄陽古重鎮爲南北要害習俗强悍好鬪是時海內無事人不知兵公見世事日非憂危時形於色無何粵匪起流毒東南撫循士民簡練武備以故武昌三陷漢陽四失而襄境獨不被兵其後恢復武漢亦以此爲之基也咸豐六年擢兩淮鹽運使巡撫胡文忠公以武漢未復乞於朝留之是歲大饑冬閒散遣川豫皖南之卒黠者遂煽土匪作亂蔓延荆襄鄖宜四府公率五百人固守旬餘以待援軍次年五月平之七年春擢湖北按察使八年遷布政使時楚境肅清皖豫多警文忠常率師東征駐行閒籌度軍儲整飭吏事多倚公以辦九年夏奉

命撫閩入

覲文忠疏請代撫鄂滇帥乞往滇黔皆不允

召對六次備蒙

溫旨陸辭後中途奉撫浙之

命九年十月履任自粵賊踞金陵浙省供給甯國一軍藉以堵禦門戶前巡撫胡興仁不願餉鄰省又與甯鎮將鄭魁士不和劾之易以他將

魁士武人闔大體然善戰守得士卒心實遏賊不得入浙魁士去而賊時有窺浙心公至見吏治軍事頽墮深以爲憂嚴舉劾察營伍籌畫布置昕夕焦勞匪懈然將吏泄沓久病公所爲多毀之十年春賊由甯國境竄入浙杭州城大兵單飛章乞援皆不至二月二十七日賊以地雷裂城三十餘丈城遂陷方賊之始至也公知城不可守集家人諭之曰吾與城存亡義也汝等其各自爲謀妻徐氏憤然曰作君家婦四十餘年尚不我知邪愧未能助君殺賊耳何用生爲次女陳穎秀之妻及族子宗傑妻周氏皆故孀居亦感泣誓同死自是日夜登陴守禦城陷俱仰藥未發復同趨西院自經以殉公清節過人兵事非其所習又適承前人頽墮之後受事未及三月狂寇突來於是浙人皆咎公事聞上以公素有官聲實心任事旣

優卹矣而御史高延祐奏請收回成命其後節相曾公白其冤得

賜卹典如初公自守令至巡撫不名一錢俸所餘卽以助族人未嘗購半畝之田徐夫人亦儉素恆著布衣殉節後家屬幾無以爲生子二人

長忠祐候選員外郎次某

又羅壯節公別傳

李元度

公羅氏諱遵殿字澹村宿松人生八歲而孤篤志力學道光十五年進士以知縣發直隸權肥鄉南樂雄縣事補唐山調清苑擢冀州知州遷湖州知府調杭州擢安襄鄖荆道調湖南鹽法道大府疏留權湖北按察布政二司使遷兩淮鹽運使大府再疏留遂除湖北按察使晉布政使擢福建巡撫調浙江此公歷官階級也公在清苑卓薦引見

宣宗皇帝有本色書生之諭  
賞加同知銜在湖州襄陽各薦治行第一以克復安陸及京山  
賞戴孔雀翎明年加按察使銜及撫閩湖北巡撫胡文忠林翼舉公自代雲貴總督張公亮基疏請調公撫黔  
文宗皇帝皆弗許

陛見

召對六次公具陳民困及軍事得失

上霽顏納之歸途調撫浙江尋死寇難

文宗溫旨賜卹

予諡忠愍江督曾文正國藩及胡文忠會疏上公妻徐氏孀女陳羅氏族孀姪婦周氏同時殉難狀請

旨旌表並請於浙江宿松各建公專祠以其妻女姪婦配食同殉之雇婦金梅氏家丁顧斌均附祀

詔曰可亡何御史高延祐摭浮議劾公有

旨罷卹典其殉難妻女應得旌表仍照例辦理明年曾文正訟公清忠大節

穆宗皇帝特諭仍遵

文宗初次

諭旨照巡撫例從優賜卹其妻女姪婦及雇婦家丁一併旌卹乃贈公

右都御史銜

予諡壯節

賜祭葬

賞騎都尉世職入祀京師昭忠祠暨本籍府城昭忠祠既而浙撫請建

專祠於杭州皖撫請建專祠於宿松湖北督撫疏請祀公名宦並得

旨允行此公歷承

恩眷及死事

卹典也公為治務約己而厚於民去南樂任民建生祠祀之守湖州值

漕政抗弊民抗納大吏將威以兵公單騎往諭悉解散輸賦如期爰建  
書院於南高橋以正士習烏程馬令以治漕故須假萬金集事公稱貸  
速其成亡何馬令物故公節衣縮食代償之初不屑意也涖湖四載禽  
劇盜百餘郡大治在襄陽行保伍法簡壯丁置左右有劫斂者捕治之  
增置義學十餘所益鹿門書院餐錢會粵寇起公手定章程檄所屬一  
律治團練楚北團練自公始咸豐二年賊陷武昌土匪郭大安糾黨行  
劫謀應賊公獲大安誅之殲其黨三百餘人三年權按察使躬歷蘄黃  
下游勘水陸形勢擇地駐兵扼賊會捻匪窺襄樊公回襄督治團防建  
礮臺十餘浚城濠數千丈治戰艦數十艘賊知有備不敢至明年武昌  
再陷皖賊陷德安安陸荆門諸州郡公帥五千人出屯王家河石灰窰  
歐家廟等處搃賊衝尋克復安陸京山二城八月曾文正克武昌賊遁  
明年春武昌復陷賊卒不敢躡襄境六年大旱饑僞翼王石達開上犯  
楚大震時方罷遣川豫勇過襄煽亂土匪高二先鹽梟馮二典應之大  
掠襄樊公帥民兵乘城守援兵至夾擊大破之禽二先賊平方事之殷  
姦民劉朝義等爭響應號八大頭目公密檄鄉團縛斬之是年大兵克  
武漢全楚肅清公以盜賊多起飢寒勸置社倉七十餘所立法擇人司

之瀕行猶以稅餘飭修老龍隄捍水患洎任兩司選良吏蠲漕費表節  
 義侍東征糗糧時胡文忠進規皖豫養兵勇六萬月餉四十萬緡公力  
 籌濟無闕乏用人不拘資格嘗曰用例一刀筆吏耳況今有事時乎會  
 文忠銜恤歸公代行巡撫事仍兼署提刑庶政畢舉李忠武續賓師覆  
 三河各軍議退保楚亶公持不可令扼宿松太湖而檄李勇毅續宜一  
 軍駐蘄水英山相犄角大局以振未幾文忠起復帥師屯黃州用人行  
 政倚公如右臂當是時楚北吏治軍政甲天下蓋公力為多其撫浙也  
 以浙中吏習奔競痛除積習舉劾十餘人又以浙兵向不足恃資皖南  
 兵為屏蔽驕不受節制乃疏請以張文毅芾總防務蓋孫護案張文毅  
清嘉浙時所奏請已歷其地漕捐輸別遣官督理又乞師胡文忠曾文  
吳端書胡興仁兩撫矣  
 正請選將徵兵為自強計部署未定而難作此公歷官治蹟也公學以  
 不欺為本好宋五子書及名臣言行錄儒先語錄嘗手寫其要為一冊  
 曰正學指歸在官嚴義利之界屬吏莫敢以筐篚進所至革州縣供張  
 服食如寒素嘗言世治亂視吏貪廉吏貪廉視身奢儉欲反亂為治非  
 廉儉無以立節以此自勵亦時以此勉人所識拔人才必先操守氣節  
 若端愍公多山李剛介橐金果毅雲門其最也在吳興識趙忠節景賢

後卒以勳烈顯人

覲時有權貴人枋政置吏不造謁輒中傷之公不往遇諸朝一揖而退尤好扶植善類於君子小人進退消長每有見聞其憂樂必深至在官不爲子弟營仕進第令讀有用書近正人而已此公生平學行也僞忠王李秀成之閒道犯浙也在咸豐十年二月或勸公出營城外疏請以將軍守城公叱之曰是棄城出走計也吾受

國恩重肯苟活爲萬世羞十九日賊薄城公與將軍忠壯公瑞昌調民團及駐防二三千人使分堞守杭城周四十里兵少力不支適陰雨連旬公日夜行泥淖中撫慰疲卒守陴者皆泣數乞援軍不至公知事不可爲諭家人各爲計徐夫人愴慨言曰君死妾何忍獨生爲君家婦四十年尚不我知邪長女適陳穎秀早寡歸侍父母嘗割股療母疾至是踰且泣曰未亡人忍死八年以父母在耳今願相從地下公族子忠傑婦周氏嫠而貧公挈之任所亦誓從公夫婦死先是公生時夜忽光明如晝因小字有光是月二十五日夜有大星隕節署前之鳳凰山公指且歎曰事可知矣二十七日賊穴地實火藥轟清波門城裂二十餘丈賊入公被刃傷額墜馬親卒掖回署中途仰藥至則夫人及女皆先仰



藥未卽死同趨署之西院聯纜就縊賊至周氏及雇婦金梅氏家僮顧  
斌皆死焉公年六十有三時將軍瑞忠壯固守駐防城越六日江南兵  
至賊遁杭州復將軍入撫署見公貌如生公女猶兩手抱持母僵立六  
日不仆此公死事及闕門殉節狀也烏虜公之死烈矣而其尤關天下  
安危者則在備兵襄陽力固上游厥功爲尤偉何者荆襄天下根本而  
襄尤當南北之衝全楚必爭地賊陷武漢時儻急趨荆襄乘虛擣中原  
擾畿輔事有不可知者其走吳會直爲子女玉帛計識者知其無能爲  
也然荆襄非宿重兵爲之備禍仍不知所底惟公首以團練法部勒襄  
民使不從賊且殺賊同時官文恭以荆州將軍遷總督厲兵上游得建  
領之勢公與同心戮力前後十年雖武昌三陷漢陽四失捻匪復時伺  
隙而公所轄三郡一州汜不被兵其後胡文忠官文恭再造鄂疆率以  
荆襄爲根本此尤功在天下尚論者或未盡知歟公舉會試與會稽陶  
文節恩培通州孫文介銘恩旌德呂文節賢基同出長白文端公倭仁  
之門時稱倭門四節公子三忠祐襲騎都尉湖北候補知府加三品銜

忠誨忠訓

贊曰元度生未識公辱公疏調先以書有知己之雅聞浙警方臥病山

中急募援軍戒塗匪耗至已無及矣悲夫喪歸宿松胡文忠曾文正偕  
今相國合肥李公湘陰左公往弔哭元度從造其廬土室十數開耳爲  
外吏三十年田止四十晦家屬至無以自存卽一端已足不朽況一門  
以內臣死職婦死夫死父母僕死主固宜與星月爭光也哉公事在  
國史文士例不當爲達官立傳然攷太平御覽引漢唐別傳至百一十  
家故援茲例以應忠祐之請云

清故兵部侍郎兼都察院右副都御史江蘇巡撫徐公行狀 戴望

曾祖士標貢生 誥贈奉政大夫 贈贈資政大夫妣戴氏 誥贈

宜人 贈贈夫人

祖文心增廣生 贈贈中憲大夫 誥贈資政大夫妣閔氏柴氏

贈贈燕人 誥贈夫人

父聚奎邑庠生 敕贈承德郎 誥贈資政大夫妣閔氏 敕贈安

人 誥贈夫人 繼妣張氏 敕封太安人 誥封太夫人

公諱有壬字鈞卿徐氏其先有澤鴻者唐懿宗時官兵部尚書居浙東  
蕭山二十七世祖雍夏始遷湖州盛林鎮累傳至資政公生子六人公  
其叔也公生而敦敏八歲解句股術初就傅勤讀不倦嘗攬族譜得宋

太學生贈祕閣修撰應鑣闕門死節事歎曰吾它日當如此聞者駭之  
資政公早卒太安人命公依叔父儀部公居京師凡十六年師事刑部  
郎中姚君學塏欽天監博士陳君杰年二十二占宛平籍補博士弟子  
員道光八年舉順天鄉試九年成進士榜發江都汪君喜孫夜走三十  
里告正文簡爲科舉得人慶

廷試三甲以主事用分籤戶部補四川司主事二十年升山西司員外  
郎充則例館提調隨和碩鄭親王尚書賽尚阿公往福建天津察辦事  
案二十二年轉陝西司郎中京察一等記名以御史用二十三年授四  
川成縣龍茂兵備道歷充四川文武鄉試外監試官二十七年署四川  
按察使時囑匪滋事公誅其渠魁倡亂者而貸其餘二十八年擢兩廣  
鹽運使署廣東按察使廣東俗惡犯大辟者率以貨鬻人代死曰頂凶  
甘自誣伏斷脰不悔公素知之每鞠獄肫肫然與囚對語使自覺悟開  
釋數十百人是年冬授四川按察使假道歸省以太安人年高將乞終  
養太安人不許馳至京師值

成皇帝升遐

今上御極公扶服闕門面求叩謁

梓宮蒙

召見垂問經過各省情形歷陳所自

陛辭赴任由陝而蜀蜀人聞公至喜曰賢使者也是年應

詔求直言密上封事旋擢雲南布政使雲南運銅經費軍興以後他省無復津貼京銅不起運廠丁坐困謀作亂公請大府就廠制錢以蘇民困亂始息咸豐元年以曾孫生大吏奏五世同堂

御書篤慶延齡匾額以賜

賞銀緞有加三年調湖南布政使於是賊氛大熾烽火達湖湘公與督撫謀使鄉大夫各力輸餉子弟皆登陣守賊既陷武昌湖北巡撫趙至湖南賊尾而至公下教關吏不聽入賊攻長沙四旬不克退走五年夏丁太安人憂歸里六年甯國告警浙之大吏奏請命公理湖州防務公見城惡亟出財修葺又疏通南湖濬城濠飭長興縣竟與廣德建平毘連為最衝至是與太湖諸漢皆為守禦備賊犯高資公帥民兵往援甯國告陷又移書提督鄧紹良責堅守廣德毋縱賊入八年春二月服闋引見

上命公往江南理糧餉

陸辭

賜御書福字十二月授公江蘇巡撫下車後虛中納言禁絕私謁革除關稅陋規江南自江甯陷罷鄉試者三科及公至縉紳先生皆請假浙

闡舉行公不謂然而大學士彭公已言於上前不得已據實上聞九年己未遂有假浙闡舉行江南鄉試之舉又慮都中糧匱海運或不濟請先撥藩庫銀買米三十萬石由海舶達京師請於次年新漕扣抵奉

旨俞允先是江蘇糧稅有加成完納之例甚至正供一石完四五石不能清積逋公奏飭地方官遵定例勿苛索於是民困稍紓十年二月廣德陷於賊遂下長興徑趨湖州公聞報亟命兵往援及杭州陷總兵張玉良從太湖進攻公促速往資以軍糧器械比至杭州賊見其幟以為張公國樑至遂遁事

聞時總督何桂清奏克復杭州由布政司王有齡密授機宜於是王擢浙江巡撫而公交部議敘未逾月東壩溧陽相繼失守公命張玉良移師駐宜興總督留之常州閏三月十七日江南大營復潰欽差大臣和春公率諸將退守丹陽未幾丹陽又陷張公國樑死之和春退保常州

常州兵多且團練可用公謂足恃方令并力守禦以圖再振而總督何桂清先棄城走至澣墅關外總督之走也常州士民遮道乞留至不得行發火鎗斃數人而後出和春公關外自經死總督聞道出常熟公聞卽據實奏陳張玉良兵潰至無錫入見公請助守蘇州公與諸紳謀令屯郭外而前巡撫許公乃劍力爲公言杭州陷時爲不信援兵所致可蹈其覆轍乎公聽其言使屯葑門時四月十二日也是夜張玉良潛遁明日公方巡城客軍已開門納賊急馳至營務處集民兵巷戰而賊突至公厲聲叱之賊刺公刃出於背而卒子震翼赴池中死妾施氏及女姪姑皆自經死報至嗣子震耀匍匐赴杭州乞巡撫王公奏上有旨加恩照巡撫例賜卹先是丹陽陷常州危甚公有兩弟前至蘇州見公問以事俱不答但抗聲曰吾終繼武修撰公矣請攜子女出皆不從遂及於難公生嘉慶庚申正月十八日卒年六十一配陳氏刑部郎中時熏女繼配黃氏先公卒公爲學宗尚程朱尤好李文貞公書於陸王顏季之說皆非所取然不尚空譚宦游所至必訪求風土民情及山川險要命人繪爲巨冊以便觀覽生平於算術最精嘗自言子幼而好此乃天性所近任郎中時蒙

成皇帝召見垂詢諸法一一具答

諭旨褒獎高麗使臣及英吉利人聞而仰慕齋書求教公爲刊正其紕繆皆說服而去所著有弧矢細草割圓密率堆垛求積術冬至權度攷日食九服里差校正四畢術等書凡若干卷於文字必求有用不輕作撫江蘇時嘗自爲策問地方利弊元和縣學生祖喆具對數千言公讀而善之徧示坐客予以鄉後進見公公每寬予禮數予論學多與公相迕而向人輒推許不去口又嘗論先正行事至湯文正張清恪予因進曰以是期公公曰二公何可當也若林文忠則不敢不勉公之素志如此而遇非其時卒以見危授命而昧者乃猶在疑信之間爲可哀也公沒後其故東烏程張君私於遺燼中拾公骨市薄棺以葬遂逃歸鄉人士聞之多爲位以哭者予自愧材薄惟是文章之事猶可以報公乃不俟其子孫之請略舉所聞敘述如右鄉後學戴望謹具狀

又徐莊愍公別傳

陸心源

公徐氏諱有壬字鈞卿一字君青烏程人寄籍宛平道光八年舉人明年成進士試戶部主事授四川司洊升山西司員外陝西司郎中以精核爲上官所重京察一等入對

宣廟夙知公精算術垂詢甚久奏對稱

旨二十三年擢分巡四川成縣龍茂道明年署四川按察使時囑匪滋事公馳至近賊地方用紳耆爲耳目懸賞購賊不數日渠魁就禽擢廣東鹽運使明年兼權按察使清遠縣土匪戕官坐死者七百人公廉知有冤反復研詰釋無辜百餘人二十九年擢四川按察使

文廟登極詔求直言自道光以來司道恐爲督撫所忌不敢復有陳奏公密封奏事言人所不敢言遷雲南布政使滇省運銅經費自軍興以來他省不能津貼京銅遂不能起運廠丁坐困將謀不軌公請就廠鑄錢以甦民困上下便之咸豐三年調湖南布政使時長沙新被兵公私交困公撫綏擘畫處之裕如旋丁內艱歸六年賊陷甯國府城湖州戒嚴浙江巡撫何桂清奏起公督辦湖郡團防屢辭不獲乃修濬城濠募勇敢守要衝誅土豪數人賊知有備不敢近七年服闋奉

命督辦江南軍營糧臺旋擢江蘇巡撫時何桂清總督兩江與江蘇布政使比公遇事持正吏治稍清鎮江鈔關例由巡撫委巡道監收月餽白金千大府生日及歲時伏臘州縣各有餽遺相習百餘年公皆卻之漕米浮收之弊甚至正米一石加耗至四五石民不聊生公奏明通飭



州縣照例徵收力除苛索十年三月和春圍攻金陵之師潰退保丹陽  
輜重盡失公飛運軍資器械以濟之既而丹陽亦潰何桂清棄常州遁  
賊長驅犯蘇州公激厲軍民嬰城固守移檄責詰桂清並劾其聞警倡  
逃誤國殃民狀未幾常州亦陷賊眾大至族弟某詢以進止叱曰存亡  
視城何問爲復請以家屬出亦不許城破衣冠坐堂上遂被害子震翼  
亦死之事聞照例

賜卹予諡莊愍公耿介端方言笑不苟少就業於鄉先生姚學璠之門  
務爲有用之學尤精算法雖西人亦歎爲不及授成縣道時入對  
宣廟詢於圓明園水高於京城幾十丈又出西洋進貢奇器令指陳用  
法公一一奏明

面諭褒美著有務民義齋算學行於世

又徐莊愍公祠記

俞越

咸豐十年夏四月十有二日賊陷江蘇省城巡撫徐公死之於是兩江  
總督何公桂清浙江巡撫王公有齡先後以聞

詔下禮部兵部視巡撫例議卹

賜諡莊愍其同時死難之妾施氏子候選郎中徐震翼女徐氏及族弟

工部主事徐留庾幕友候選布政司理問鮑鄂銜及男僕楊安女僕劉氏裴氏均分別

旌卹如例蓋致身授命臣子之大節而褒忠勸義

國家之鉅典當是時羣盜爲封狐雄虺蔓延江浙金陵大營先已潰散蘇州雖號省會而內無廝輿白徒之兵外無蚍蜉蟻子之援人心冰釋大局瓦解雖有智勇困無所施公坐守危城效死弗去及城已陷猶率小隊躬與鏖戰賊或以刀斫之冠將墜矣公手自整攝揚聲大罵遂遇戕害嗚呼仲路結纓溫序銜須方之古人曾無愧焉忠義所感闔門抗節子女捐軀賓僚并命有死無竇下及輿臺洵可謂忠孝節義萃於一門者矣用是

璽書褒嘉

恩禮優渥賞延昆裔榮逮泉壤

今皇帝御極宇內廓清吳會休養生息稍復其舊而士民懷思公德謳吟弗衰大中丞合肥張公及方伯永康應公順民之心議建專祠婁門中吉由巷有官房一區先時曾爲正誼書院今書院改建乃卽其屋曠而大之中爲享堂三間奉公粟主同時殉難文武諸官附焉其後爲樓

屋五間祀公家屬同時殉難諸官之婦女附焉又其後舊有屋十間今益爲一十六間賃於民而歲入其租以備葺治之需由是疏房槩貌可以依神前堂後室可以行禮吳中縉紳先生及吾浙之宦游於吳者瞻拜祠宇莫不慨然太息想見公之爲人乃屬憾以文記之槩於公爲鄉人誼不得而辭而亂後公之行狀墓志均散佚不可見乃粗敘大略以告後世公諱有壬字鈞卿別字君青湖州歸安人道光八年以順天籍中式舉人明年成進士官戶部主事累遷至郎中授四川成縣兵備道累遷至江蘇巡撫署兩江總督生平精於隸首之學著有務民義齋算學行於世當軍書旁午時仍能布算如常時蓋其動心忍性之功如此卒成大節非偶然也至其他政績則有

國史列傳在不備書

王壯愍公傳

葉繼聰

王公有齡字雪軒福建侯官人道光閒入貲爲浙江鹽大使升知縣歷宰慈谿鎮海鄞縣皆有政聲洊升杭州知府益自磨勵捕治姦猾境內肅然時值軍興巡撫何桂清知公吏幹專以捐輸委之公愈氣豪得展其能以

朝廷武功爵鼓動部民每一牒下咸願踴躍出貲卽有強宗悍族敢抗  
令甲公親至以大義責之罔不貼然心折顧天性峭岸尤不喜甲科士  
或有旁掣之者輒嫚罵曰豎儒豈識時務何必以帖括餘技溷乃公大  
事以故同列目懾之然軍需實賴以濟巡撫疏奏公才遷雲南糧道未  
去而桂清總督江南調公赴上海清理洋稅不一載擢至江蘇布政使  
吳下爲財賦地實係金陵大營糧臺羽書旁午任最繁劇督撫事無大  
小一以咨公尤以籌餉爲急賴公長於理財富紳豪民其家貲高下無  
不燭照於胸復心計絕人船隻出入要口以次設局徵稅商賈互市馬  
頭遣員加捐抽利以桑孔榷貨之術爲夷吾救時之政居劉晏兩淮之  
任供李郭大軍之餉其功甚鉅而事則不得已也咸豐十年二月逆酋  
李秀成率賊由甯國入浙境突陷杭州旋卽竄去

天子以公著有勞績授爲浙江巡撫公感

上恩誓以身報三月抵任諸路兵亦悉至於濬長濠築堅壘增設礮  
臺城上環列營房創置轉運車以上下縉軍士戰守之具大備會城警  
勢乃壯四月賊因蘇常失守陷嘉興六月  
上命廣西提督張玉良統諸將勦嘉興賊僚屬咸以軍費浩大爲慮公

乃倍捐浙中民商乞借鄰省帑銀行營所需自糧餉外凡鎗刀弩鎧火藥礮子鍋帳之屬製造悉備無何師屯南湖一戰而崩賊氛大熾石門嘉善平湖桐鄉次第失陷公接敗書乃知武夫之暮氣難振戎伍之積孱已極一腔熱血灑於何地爲歎恨者屢日俄而賊且進逼省垣公與杭嘉湖道麟趾統兵三千啟武林門迎勦麟趾驅馬而出躬爲士先敗賊於賣魚橋軍聲大振一晝夜賊遁去十月賊復竄至公督軍士擊以大礮始走明年三月處州金華相繼淪陷浙東告急公檄諸將往禦無應者處州總兵文瑞江西援將也所部三千人食江西餉公待之素厚乃自請行五月朔日軍次諸暨破土寇何文慶之眾遂與游擊曾得勝貴順軍千人進駐金華之孝順街會張提督在蘭溪縱其下與民團鬪賊遂乘之以破蘭溪而孝順街軍聞之潰文瑞退守浦江賊從五麓嶺以入圍其城七月公令浙江提督饒廷選統軍六千援浦江以周壁潤潮勇五百爲前鋒半途而潰逾數日道員張啟焯率雲霄勇二千來會廷選整隊同進八月二日至鄭義門又潰文瑞知無援於初四日衝圍走桐廬山中浦江遂陷公得報憤甚致書於廷選略云省中庫無銀倉無粟出陣之兵不見一賊而奔新置軍裝又被拋棄度日如年度夜比

年更長可查首先潰退之人廷選乃殺其不悅者二人以解未幾嚴州亦失賊竄富陽總兵劉季三副將劉芳貴禦之皆死賊遂扼杭州之要道案平定粵匪紀略劉季三湖南人從征金陵隨提督張國樑克鎮江取溧水奪秣陵關破七橋壘賊累官總兵劉芳貴湖南寶慶人從道員李續宜破賊於蕪黃又同官軍克復撫州敗金溪竄匪官至浙江候補副將至是兩人俱陣亡浙撫王有齡設奠於仙林寺哭之極哀芳忠壯諸將節節退縮惟知要索軍食公在省垣左支右絀日以痛哭流涕之言檄催浙東守令速繳捐款而富民樂輸已倦有司持之頗急噴噴多煩言於是浙東團練大臣副都御史王履謙首劾公虐捐浙民事多與之齟齬公調歸安令廖宗元攝守紹興副憲請緩之又欲使甯紹台道張景渠修越郡守備以鹽運使莊煥文所部閩勇入城而副憲信羣言謂兵適擾民不如團練自為守力阻其議遂止上疏互許識者無不危之九月賊由諸暨蕭山進犯紹興團練民皆驚散布政使林福祥及饒廷選來援越者亦率軍走二十九日賊陷紹城行省之餉源遂絕而列郡又多淪沒祇西存困守之湖州東留一彈丸之海甯諸將無地可居以次退歸省垣十月逆酋李秀成李世賢陳炳文等盡驅其眾而至副將楊金榜營於饅頭山為賊所敗而死既而張玉良攻羅木營賊壘破之旋亦戰歿城中奪氣自海潮寺至鳳凰山環以木柵實土其中

爲堅壁醜徒百萬聯營至數十里四面聚攻公日坐鳳山門督諸軍分守各城門夜則枕戈少憩聞刁斗聲輒起而慰勉之杭民感公之忠亦多奮激用命老幼荷挺雜立雉堞間以助軍勢久之外圍益嚴杭紳胡光墉湖紳趙炳麟由上海運米至皆阻而不得入而城中糧且盡斗米值十千錢公與士卒均甘苦至於糠粃攬米煮粥對之流涕民餓斃者甚眾時皖南道李元度率安越軍八千駐衢州城公以帛書告急元度欲道壽昌來援然沿途皆賊壘終弗能前公見人輒瞠目問曰次青來未次青者李觀察之字也迨十一月二十八日守城軍已數日不食乃各潰散賊於巳刻梯城而入公聞報卽服毒不死回署縊於閤後李秀成見之歎爲忠臣命其下具棺殮焉公長身頰面爲人好聲色僮僕不拘小節自縣令至開府以膽量智略稱及膺浙撫之任適當金陵大營破後賊勢正熾浙中旣無重兵勁旅專任客將士卒又係蘇常奔潰之餘驕囂不可復制諸將亦偃蹇不用命浙紳更多不合勢如水火公雖一腔忠義而左右無襄理之人所轄之境日朘月削會城遂以孤立而終至於陷矣當公之死草有遺表言絕痛憤蘇撫薛煥以聞天子覽之震悼優加

贈賜

予諡壯愍

論曰昔漢書良吏推尹韓趙張不聞以忠貞顯而史冊所記已聲施爛如錚錚王公起自簿書更能疾風勁草標大節於歲寒洵樹立過前賢矣夫公本長於吏才若使浙帥中有馬燧渾瑊其人專委公以司農之任浙事何至決裂如是然而公始爲吏有強項名終且力持巖疆殉之以軀觀其梗概要可爲近代之豪也

潘忠毅公傳

陳繼聰

潘公鐸字振之一字木君江蘇江甯人道光十二年進士選翰林院庶吉士旋改部曹升御史出知荊州府遷江西糧儲道累官至布政使二十九年擢河南巡撫濬賈魯河躬行履勘四十五日而工竣尋以事降山西按察使咸豐二年升湖南布政使會粵賊犯長沙前巡撫駱文忠公被

召入京代者未至公兼程進莅任後卽晝夜巡防並預造擋牌以防攻擊繼而新撫張公亮基至公與協心同守時城中惟副將鄧紹良所部鎮守兵三百人能戰賊以地雷轟城城塌數十丈賊蠡擁而登公急謂



鄧副將曰有能堵缺者賞銀萬兩兵士爭奮礮斃逆渠蕭朝貴賊乃解圍走事平公以積勞乞病歸十一年滇亂已極

上命張公亮基督辦雲南軍務而以公夙著賢望

命署雲貴總督當是時杜文秀踞大理三迤郡縣多陷回眾皆與之合卽就撫受職者握兵省城專權自恣識者皆知滇事實不可爲

旨下之日無不爲公危之公乃別其家人曰責任綦重時事孔亟我受國恩成敗利鈍當死生以之束裝而行從者僅僕周升等八人抵四川總督駱文忠公留居成都會張公至渝州有總兵林自清練眾之擾亦不能前進而公急於赴任慨然由蜀入滇道過曲靖回目馬連陞進謁卽言有人令其設謀陷害督部毋輕入虎穴公知其恫喝也置之不問叱馭前行至板橋離會城數里署布政使岑毓英總兵馬如龍擁兵來迎公接篆後極思整頓軍政安輯漢回雖肘掖皆狼虎略無瞻徇久之頽類感其誠頗有悔而歸順者由是陰爲巡撫徐之銘所忌巡撫在滇多年嘗力主撫議者也而布政總兵以公事多持正不遂其請亦各懷怨望公遂勢成孤立適值回酋馬復初示意欲封平南王公卽嚴詞拒絕回首大怒乃決意害公矣同治二年正月署武定營參將馬榮率回

眾數千人突進省垣屯踞五華書院居民驚惶公屢次檄令出城竟偃蹇不行十五日公至馬榮處力為開導不從公呵斥之其下洶洶拔刃而前中軍副將楊振鵬在側絕不救護公身受七傷遂死雲南知府黃培林昆明知縣翟怡曾直前罵賊同時被害而巡撫竟在署無恙公尸暴露三日僕周升等哀求於賊始得棺殮二月朔日總兵某由臨安勦寇歸馬榮乃率眾去

案同治三年冬楊盛宗禽獲馬榮及事聞馬連陞等皆伏誅見繁文忠奏疏

天子震悼有旨照總督陣亡例

賜卹

贈太子少保諡忠毅子敦儼世襲騎都尉兼一雲騎尉並

命雲南建立專祠公生平操守廉潔而性輕財好施濟其居官屬吏有以墨餽者乃金也知其詐卻之江南水災捐五千金以卹窮黎親友族黨待舉火者十餘家所至能得人心在湖南時嘗因登城傷髀骨民間送方藥者踵至有老嫗持一草候門不去其輿情愛戴如此最喜讀宋儒性理書及古名臣經濟有用之文著有上蔡語錄闡義方輿紀要簡覽評輯戰功考同治九年奉

旨入祀鄉賢祠

論曰潘忠毅公之總制滇黔也置身狼虎之窟事無可為及乎叛弁變

起身攫鋒刃凜凜正氣何異

國初范忠貞之死於耿逆乎當公由蜀入滇駱文忠公謂公此行身入

險地主撫則仍為所制主勦則力不足以振撻伐而川中又多寇不能

分兵以予公益亦知公之必罹於禍也然使公如巡撫依阿曲從事事

苟且亦可不為賊害而公終不肯出此者其剛正忠烈雖百世下猶令

聞者興起矣

潘鐸字木君號振之江甯人少貧不能讀父母互教之鐸事親孝倜儻

有大志道光五年舉於鄉十二年成進士選庶吉士散館改主事擢御

史居京師見饗齋忽痛失聲或叩之答曰幼見吾母恆以齋汁佐餐今

適觸於懷耳其至性如此俄除湖北荊州知府屬吏有以墨餽者知其

詐卻之江南水災捐五千金以助振轉江西糧道升四川按察使獲幅

匪蔣帽頂誅之累擢至河南巡撫濬賈魯河躬自履勘四十五日而工

竣調山西巡撫以事降按察使咸豐二年轉湖南布政使時粵賊犯湘

境鐸聞命倍道抵長沙城已閉縋而入泣事後晝夜巡防坐臥皆在城上信賞必罰傾府庫犒戰士不足以私財佐之眾感奮賊兩穴城最後城崩數十丈磚石飛滿天當者輒糜萬賊蝻附而上總兵鄧紹良率鎮軍兵三百人遏其衝血戰竟日賊乃退因以棺實土塞缺口又礮斃偽西王蕭朝貴賊氣奪夜遁凡守八十一日城卒完鐸急馳書大帥謂當邀諸隘殲之毋貽下游患大帥遂東下明年鐸乞病去吏民爭舁鐸行街衢且徧送者塞道拜者跪者踵相錯日夜走數百里至於舟臨崖猶不返啼呼擾攘萬口一聲曰公行矣如吾民何則皆哭鐸亦哭尋以四品京秩

召入都門庭闈寂日典質爲生讀書圍棋悠然忘歲月要人或納交焉不答獨慨念時事憂形於色謂家人曰

朝廷儻再用我當以身許

國耳同治初

詔以二品銜署雲貴總督當是時滇亂已極被命者輒相弔鐸旣受任同鄉餞於都門相對皆悵悵或欷歔不能仰視鐸慨然曰吾年七十受累朝恩厚愧無尺寸報茲役得死所矣諸君當賀我毋戚戚也飲啖談

笑如平時瀕行從者僅八人過西安問滇事於方俊俊陳八策一宜先  
赴黔與提督田興恕統勝兵南下二查失守地方具奏三查官員下落  
四早除曲靖叛將何有保即手賊鄧五解散野練六大理回首杜文秀  
罪在不赦宜勤迤東回眾在澂江者本由避難聚集曾經投誠宜撫而  
用之七收利權於上八清查絕產試辦屯田鐸皆嘉納之人川總督駱  
秉章素重鐸欲留辦防務鐸笑曰是規避也又欲以兵從鐸亦不許兼  
程抵滇總兵馬如龍懾鐸威望具橐韃出迎諸營肅然鐸又訪獲賊酋  
劉達武等寘諸法回民畏服有歸順者由是積為巡撫徐之銘所忌二  
年正月十五日練總馬榮以赴臨安為名突至省踞五華書院城中賊  
應之鐸知事變親往撫諭責以忠義賊黨相顧動色榮語益悖鐸怒斥  
之遂遇害身受二十七創而沒事聞

贈太子少保諡忠毅

賞騎都尉兼雲騎尉世職

敕建專祠並入祀鄉賢光緒十五年

今上親政復

賜祭一壇

鄧文愨公傳

陳繼聰

鄧公爾恆字子久江甯人兩廣總督廷楨之長子也道光十三年進士由翰林編修出爲雲南曲靖府知府咸豐初尋甸州回民馬二花聚徒剽掠官不敢詰大吏檄公權池東道廉得其情狀乃諭曰漢民回民皆朝廷赤子回民黠悍甚於漢民然皆工賈爲生其賄屬胥吏交通官長亦不能如漢民之便易夫剽劫大奸也抗官重科也馬二花暨某某者始禍之魁不可赦餘悉予自新其有負枉甚深者但有指名皆爲伸理有能縛馬二花及某某獻者依軍功論令下本道且以兵往兵臨自新之路絕矣回眾感泣遂散去公以健卒數十人馳捕馬二花等寘諸法尋甸平五年彌勒縣姦民米某作亂六年海口回民戕官據城皆討平之七年大理回民杜文秀等揭竿起不逾月圍省城先是滇中漢回民爭訟有司能持平皆帖然公歷任三池視回漢如一體所至感服至是請依林文忠公治永昌盜故事勦撫兼施而武人欲專兵柄謂可盡殲卒無功而勢寢驕不可制比巡撫徐之銘至知公清正屈意傾接公終不少委蛇十年由雲南按察使擢布政使時巡撫方以招撫回首自詡爲功日事荒淫嘗欲使其弄兒爲知縣公不許又欲得一人妻爲妾不

可夜招其夫至忽爲賊殺詰旦巡撫召昆明令入語以荒城暮夜劫殺時有不須研治恐生事端令以告公公曰撫署森嚴非掠竊之地死者冠帶非行路之倫今日不具獄狀將來不免列彈章耳巡撫聞之銜公益甚而滇省武弁多草竊之悍徒巡撫遂陰以意授之矣十年公升陝西巡撫旣受代由東路赴秦將盡發滇撫諸罪狀疏已具行至曲靖寓居府署是日副將何有保率其黨劉達武等百餘人突入請謁公遂被害身受二十七創事聞

賜祭一壇

予諡文愨建專祠廕子騎都尉世職而戮有保尸磔達武於市曲靖文武降革各有差其後巡撫終爲布政使某欲代其位逼令自縊死人以爲有天道焉

論曰鄧文愨公名臣之子出守滇中政績最爲可紀及爲方伯以持正與中丞齟齬薰蕕不同器而怨隙日深方以公之驟升秦撫恐揭其姦忍而爲先發制人之謀公遂橫尸旅邸矣嗟乎

聖明之世乃有此沈冤乎卒也兇弁雖伏誅而淫人竟漏網何牙冠諸公問狐狸而不問豺狼也

祁文節公傳 陳繼聰

祁公宿藻字幼章一字子儒山西壽陽人太學士文端公寯藻之弟也

道光十八年進士選庶吉士是秋與同館生葉聲揚乞假歸途次雄縣

聲揚歿於旅舍棺殮皆公任之人高其誼明年授檢討二十四年為廣

西副主試尋授黃州知府洊升廣東按察使擢湖南布政使咸豐二年

調江甯值粵寇陷武昌警報迭至總督陸建瀛率軍防堵九江公以會

城空虛設籌防局招募壯勇命諸生張繼庚李翼棠王金洛統之三年

正月官軍潰於小孤山總督遁歸閉閣託疾公與鹽巡道涂文鈞督糧

道陳克讓知府魏亨達等謁之皆不得見案上元志忠義譜涂文鈞湖

六魏亨達直隸昌黎人乃歎息而出急偕屬僚內撫居民外籌軍食經

營防禦竭盡心力未幾賊薄城下公令諸生翁鯤增募勇丁以助城守

案上元志忠義譜翁鯤廩生奉檄募勇四百人巡西非城及城陷退至

雞鳴山之麓與從兄模博兄弟大椿大純巷戰死從孫長恩年十四聞

之賦絕命詞四章自經復遣張繼庚等率敢死士千餘人與賊戰反為

城礮擊散公遂發憤嘔血賊攻南門守者日晡尚未得食有民人汪松

厓炊秬飯並寒菜自擔餉之案忠義譜汪松厓業畫工性伉直有古風

食之如節城陷積薪樓下驅其妻王氏妾樂氏公方登陴巡視見之泣

子師子於樓上焚之自投大水瓮中倒淹死



曰好百姓我曹負之矣病益劇家人請回署不從正月晦日卒於城上  
王金洛經紀其喪越十二日而金陵城陷事聞

上憫公之積勞死事

予諡文節建立專祠

論曰自武昌失守方伯祁公卽籌防金陵而制府置不省迨九江師潰  
賊長驅而至金陵之登陴以守者駐防軍外大都市人爲多烏能敵方  
張之寇哉然公盡瘁

王事可謂忠已上江志贊公曰文節儒臣志阻身殲嘔血化碧殉城最  
先讀之洵令人太息也

湖北按察司使棟鄂公神道碑

顧壽楨

皇上御極之二年武昌不戒於守疆臣死節

皇上惻然傷悼贈卹有加焉湖北按察司使棟鄂公帥其家死難尤烈  
公長子延楨匍匐迎公喪求公遺骸終不可得遂奉衣冠歸葬先塋謹  
按公姓棟鄂氏名瑞元字容堂隸滿洲正黃旗故吏部尚書鐵保公長  
子也幼端毅以任爲刑部主事掌提牢廳囚自殺吏議當得罪故事滿  
漢官各五日直囚之死當漢員直中長官欲申免之公不可曰事同一

體奈何求獨免遂落職未幾以敘得員外郎仍留刑部又舉京兆試遭  
父母憂服闋補直隸司員外郎任事切直屢奉使鞫獄號平反庫丁戴  
雲峰之獄先後司庫者多以賄黜惟邵侍郎正笏無所私忌者欲波及  
之公力辨得雪邵未之知也從征湖南叛獠與帥語不少阿帥轉益重  
公役還

賞戴花翎授嘉興知府漕丁久擾苦民公招其魁喻以義悉就約束漕  
以四月始行公鈎其濡滯故請於大府振叔之漕遂通民以爲快擢福  
建督糧道知沿驛甚苦供億一切不以擾屏絕規例以清苦自律制府  
鍾祥甚重公歎曰福建牧令累甚使大吏悉如此何至以怨聞九閱月  
超擢山西按察司使既至山西餽遺悉絕不受曰吾不敢負鍾公也決  
讞務平允獨受賕者持之不少借吏治肅然擢福建布政司使去屬僚  
感公清節贖萬金贖行峻卻之至福建英夷方擾海防甚亟餉餉無缺  
旋以副都統充烏什辦事大臣道出山西贖行者復斂萬金仍卻之尋  
坐吏議降五品頂戴復起爲哈密辦事大臣入見

上知其有守嘉獎甚至改駐藏幫辦大臣公念近歲唐古忒微弱逼近  
披楞廓爾喀諸部慮啟戎心兵備殆不可恃建議鑄銅礮數十門以重

防衛又屏絕喇嘛餽獻蠻眾畏服移科布多參贊大臣過乍了乍大  
小喇嘛爭放頭人互相仇殺道路梗塞往來烏拉無所出換防兵弁羈  
滯不行遇達官輒求奏理率引嫌不肯公多方開諭具疏代奏果悔禍  
息兵入都

上數召見以撫綏蒙古爲言知

上意重西北卽馳抵科布多嚴斥卡倫安撫部落人心感說頃之

召還赴藏聽經喇嘛懷舊德多所餽贈終不受復

命仍授科布多參贊大臣改授湖北按察使時粵匪方熾征民過境供  
支苛急又憤辦賊者不足副

上意日夜焦思眠食俱廢賊圍長沙公與巡撫常公議防守多不合賊  
進圍武昌公與諸大吏分門守禦越二十餘日賊陷文昌門猝入城公  
方在平湖門急趨迎賊接戰火星堂巷手刃數賊力不支馳歸官廨視  
尙書公侍人查氏及公二妾一女皆就縊公子延本在公側曰不可污  
賊子手亦刃之遂自剄僕人梁壽殉事聞

天子震悼有詔諸臣等嬰城固守臨難捐軀大節凜然垂型不朽其於  
各地方建立專祠殉難家屬均祔祀焉

賜諡端節

御製碑文祭文遣官致祭廕騎都尉世職禮也公律身嚴整斬然不苟霜操雪性常人以為難奔走萬里為

國家守邊者十有餘年可謂勞臣矣臨難烈烈大節完具從容殉職舉家赴義斯忠正之圭堦清白之楷范也法應銘銘曰

疑疑我公厥惟清直冰雪在志彊毅不忒出入郎署動中軌則典司封守政無頗側跋涉險遠綏撫蠻楚恩感頑獷義服羣慝終焉允臧克死厥職授命慷慨飾終悲惻有松巖巖勁風表德千春萬秋式此貞石

又湖北按察使署布政司事棟鄂君家傳

宗稷辰

君姓棟鄂氏為正黃旗滿洲貴族諱瑞元號容堂別號少梅梅庵先生諱鐵保之長子也生三齡為二品廕生幼受母如亭夫人教言動有法少長師吾越顧先生廷綸學三年即能詩將冠以廕授主事分刑部書律兼讀學益不遑會梅庵先生坐事謫戍吉林自甲戌至丙子三年中歲乞假一省於塞上趨庭問業文字外兼習

國書迨君考

賜環復官侍從以晨昏得聞訓為樂時任提牢為同官分過罷職捐復

留本部稍暇得練舉業遂中式道光元年辛巳鄉科亡何連遭親喪卜地治兆皆殫力躬率成之服闋專事法家言補直隸司員外郎掌廣東司印部中要案多委鞠清直自矢人莫干以私一時有白面包公之目昇勤直公寅尤倚重之勤直承修八旗營房選君爲監督商人不敢以利動後勤直按事甘肅卽以君偕並屬舉漢員其信任如此嗣是從諸星使讞獄於閩於滇黔楚豫近畿無虛日在部究妖民王法中尹老須等案總理盧文肅於

宣廟前稱其無枉縱復特命從征湖南廣西逆徭事平

賞花翎加隨帶四級旋以京察授浙江嘉興知府彈壓漕船水手甚嚴肅船爲速開三年擢福建督糧道才九月進山西按察使又三年遷福建布政使是徭以副都統銜爲烏什辦事大臣明年以山西寶小雞子案呈誤被議降五品未幾起爲三等侍衛哈密辦事大臣抵任而月升二等侍衛調駐藏幫辦大臣兩年調科布多參贊兩年

召還補頭等侍衛宣廟升遐派赴藏聽經又拜科布多參贊咸豐元年入

覲改除湖北按察使署布政使明年壬子十一月粵寇圍武昌君登陴  
分守平湖門十二月初四日聞文昌門爲地雷轟陷下城杖戈殺數賊  
亟馳歸廨請庶母查氏率第五女與劉梁二妾皆自盡幼子延本不忍  
去渾泪手刃之然後自刎僕梁壽等從死事聞

上震悼加等予卹

贈太常寺卿諡以端節收復後建專祠以家人祔三子皆授部曹馬君  
廉靜寡欲在秋曹至出使砥厲刻苦及督閩糧供億多弗受楊督部鍾  
祥稱其自律之嚴及秉晉臬更絕饋遺曰豈敢易轍以負楊公耶在晉  
將移閩藩同官知其貧釀金俟行堅卻之在西塞回部餉遺無所受在  
藏斥諾們罕積弊平乍了爭訟除商上陋規迨再至未受喇嘛銅象諸  
香之饋在科布多惟撫恤部落辦公外一無所取昔屢承

先帝召對以上官多稱其操守深爲嘉獎其遇墨吏不少假借亦不苛  
刻以繩人當承審銀庫鉅案時獨白邵正笏爲稽庫御史無纖芥之染  
蓋與邵初不相知云君與弟雪舫極相愛嘗見乎詩辭待姊妹十人恩  
誼周洽內行厚矣與人交上不阿下不慢灑然真氣不設城府生平嗜  
書好吟詠皆本家學多可傳者子四延楨舉人兼襲騎都尉工部員外

即延幹刑部員外郎延楷舉人兵部主事延本附祀昭忠祠孫一人紹忠同年生會稽宗稷辰知君深爰為之傳以紀家乘

論曰余昔訂容堂詩其自西藏還京有句云平生不好貨到老心能閒君所謂閒蓋即顏子所為屢空惟能中虛其心不為俗塵所染乃從容自得如此也以君之澹泊靜定若使與鹽法漢黃兩王君勦力禦寇必能保完江漢惜主兵者闇於用人昧於聽言使二三正人徒以一死報國能不悲哉

天津謝公廟碑 侯楨

咸豐三年秋粵匪犯天津窺京畿天津縣知縣謝公逆賊葡萄窪大破之旋調赴欽差勝保公大營都統佟鑑戰敗公救之以無援兵死

詔贈布政司使

恩襲騎都尉

予諡

賜祠津民先度地城隍廟西建廟祀公白衣冠哭奠者以萬計蓋公功在社稷德在生民固非僅以一死報

國者所可比也公姓謝氏諱子澄字雲航四川新都縣人道光甲午科

舉人大挑知縣除直隸無極縣知縣調補天津天津上應析木地濱海  
居民獷悍難治故市人語曰東市相斫此混混西市相斫此混混  
猶南人言棍也健武善鬪爲閭閻害公至見前令繫諸混混歎曰是健  
武善鬪者奚不可化籍其名悉縱之未幾而所縱者鬪於市公按名捕  
罔或逃亟其魁眾乃大服咸豐二年粵匪出興安擾湘漢順流而東遣  
僞將軍林鳳翔李開方分兵渡河莫測所向去天津二千里人方謂南  
北道隔歲在析木賊不敢犯公深以爲憂首倡團練召所縱諸混混喻  
之曰昔周處與蛟虎爲三害卒斬蛟射虎折節讀書爲名臣女其效之  
眾皆感泣乃授器械習騎射教以戰陣之法其孺人亦撤簪珥以助鹽  
帥文公歸財與糧協濟諸勇無虞不繼乃未數月而賊圍懷慶矣幸公  
練兵已成踰月賊渡臨洛關總督訥爾經額帥師遁遂出順河鞞柏鄉  
尋犯欒城入深州主鬪者務持重戒輕進雖數奉  
明詔夾勦而習於潰逃數避賊其奮勇者尾追數千里至是氣亦餒而  
賊勢益橫遂枯獻縣列交河薄滄洲滄洲素設備錮城守卒爲賊誘拔  
其城知州沈君死節津地日警九月二十四日賊至王家墳市人走相  
告曰賊至矣大吏震駭不知所爲議嬰城守公爭曰民不教而戰是弃



民也教而不戰是豢寇也鍵城而守是示弱也鑿池不守是失險也且負郭居民數十萬又何忍弃之戰便乃出令曰莫爾室家保爾田土以固衛京畿宜肅軍政爰嚴賞罰縱獄囚令自贖皆曰願從公戰先是郡人張錦雯輸家財濬濠濠成而運河之水大至環城數里地窪下皆成巨浸而葡萄窪尤甚公得濠守渡濠擊賊斬馘二千餘級賊自河北徑山西所至席捲無堅城至是出不意我軍驍趨跳盪勇氣百倍呼聲震天殪黃衣賊酋一人眾乃大恐其從賊下流渡漁船百餘艘奉公教渡賊中流潛匿牌鎗擊之斬溺無算血流染波賊不識牌鎗呼爲水雷日晡我軍皆餒適張錦雯齎糗糧至戰士益奮勇勇目余鵬龍獄囚劉繼德相繼陷陣復斬級數千賊乃遁公知賊遠至無備將窮追盡剿而諸將皆退乃還其僞將林鳳翔退據獨流

上方命惠親王爲奉命大將軍駐京師遙制各帥蒙古郡王僧格林沁出師剿賊勝保慶祺副之公以升授知府旋調赴勝保公大營公銳進與帥迕然遇賊戰皆克冬十月勝保公統師過慶公營賊乘虛疾擊都統佟公禦之敗公馳騎救之敵洞馬腹傷余鵬龍負之趨公曰憊矣爾亟行毋顧我賊酋高剛頭薄公公恐爲所辱沈於河余鵬龍率從子棟

梁及諸勇士皆戰死時某年月日也天寒獨流皆冰公負冰逆流勝保  
公還舟觸其屍始悉公死狀厚殮之輿還天津喪車所至自薦紳至負  
販匍匐往弔皆哭如喪其私親烏乎公之德於民者可知矣事聞

天子震悼贈襲如禮

命天津建專祠津民卽公生祠建今廟逾月落成蠡縣李君生致傷公  
逆酋高剛頭剖其心以祭公是役也不折一兵斬馘八千餘級齊志壹  
力賊不足平乃弃險違利巨魁幸逃林鳳翔據連鎮李開方據高唐復  
戕馮官屯交兵踰年始就殄滅俾淪胥於水火塗炭之民莫之救以免  
於死微公神捷天津幾陷而京倉危矣公之功何如哉設公不死鼓行  
南下其偉績豐功必更彪炳於無窮而卒中於所忌悲夫公豐頤博顙  
藝勇過人好爲小詩工駢體文字嘗過邯鄲題壁有黃梁夢徵詩序行  
於世從兄桓公幕下士也作公傳以廟碑屬余乃爲文使鐫諸碑其辭  
曰  
倚析木兮天之津汨中流兮擊桂舫曠飛廉兮下降馳傳說兮上征  
夔夔兮伐鼓烏蛇合陣兮血如雨殪貪狼兮搃封狐斲層冰兮河之涘願  
從兮彭咸下招兮巫陽奠

神京兮既安過邯鄲兮彷徨彷徨兮太息臣力竭兮死報

國羣飛刺天兮獨湮鬱洞杳冥兮何極津門遙望兮神來格挈牲醴兮  
報靈德伐石鐫辭兮名不滅

書津門二公事

莊棧

粵賊之由懷慶略山而出臨洛關也鋒不可遏時畿輔中不見兵革者  
二百年矣蜀人謝公子澄在直隸屢年時權天津令又事將畢候代然  
則謝卽引退亦何足責哉乃卒出萬死不顧一生之計摧強寇不得逞  
而爲當事者所忌致沒於獨流嗚呼如子澄者一人而已矣賊將至城  
中文武罔有計子澄曰臨事而謀之曷若先事而察之天津沿河有棹  
小舟以火器取野鷺者可用之其火器也鐵爲二管而長短有差鎗  
出一鎗繼之無失也又有火會逾數萬人合則水陸俱無恐矣遂密伏  
小舟於岸側而向防火會中之海張五曰余徒手又無資且天津都門  
障也子盍爲我籌之海張五許諾子澄遂辭其母曰余不能歸矣出謂  
眾余家在城內不去一步爾等若遇敵有退志歸時卽罪爾等家也眾  
遂奮出城與賊遇大破之賊退走鎗船突起殲其餘無一生者而勝保  
亦由懷慶七日夜馳至津門賊眾於是不能進然勝保姪公甚謂公曰

子能摧五千眾於頃刻子盍爲我擊其餘軍公曰向之克捷者以諸人自衛其鄉耳今徒手能搏乎勝不聽公遂趨至獨流歿於陣喪歸日城中士民縞素三日以祭公

天子聞之賞布政使銜後八年庚申又有石公之事

石襄臣名贊清貴州人庚申西人人天津石爲天津府知府朝服坐堂上不去西人至叱石走石曰死可死走何可走乎且勿傷吾城中百姓也西人不聽其言卒擁之去至舟中石以死自矢西人知終不可奪以輿舁歸後西人至京師謂人曰吾入津門以後見強項不屈惟石贊清一人而已後卒內用爲刑部侍郎石爲人和易無事時嘗彈琵琶以自遣如石公者能移西人之心而使西人生敬嗚呼石亦人傑也哉

二品頂戴湖北按察使前湖北布政使唐公神道碑銘

莫友芝

當粵賊踰嶺漏湘湖輜鄂皖而東中原震動遵義唐公方引疾家居

天子以公弭甘涼亂有威名始湖北知縣歷布政使更生數百萬人咸豐二年春

詔起勦督撫者軍夏五月抵武昌羣議壁田家鎮公策扼彭澤湖口不可北路賊還陷黃安公迎敗之鵝公頸追及馬鞍山殲幾盡尋以江公

忠源防剿江西

命公權按察使事公仍慮田鎮孤請出陸倚之九月及廣濟而田鎮潰江公單騎來投遂偕馳救德安卻賊及陽邏大斬獲江漢乃通已而江公巡撫安徽公二品頂戴真授按察使撥精銳授江公以餘眾再戰復黃州分截巴河大小十餘捷黃無險賊水陸薄城公忍飢禦一晝夜計燒南門突圍還復馳兵六安援江公忌者數齟齬

上疊責禡職

命仍事而巡撫靳與兵十二月總督吳公文鎔聚師發陸檄公以千人當水衝巡撫少與小船輕礮請增益並井油不應江夏諸生彭汝琮募戰艦水勇乃粗成軍四年正月乙卯總督兵潰堵城公馳救不支退泊鮎魚套戊午夜賊進檣漢口公流涕誓師則咸跪言巡撫已改此軍隸楊鎮矣又不受楊節制各棹舟散公馳追平明至金口激厲稍集侍江陵諸生林天直襲漢陽廿三日癸亥大東北風賊帆蔽江公督數十人迎拒又盡逸從容賦詩封遺疏付子舉人炯行北向頓首曰臣力竭矣遂赴江死年六十有二公忠智負膽勇機神明速任事颯發所交備當世豪傑顧虛己好善布衣士引之如不及至當官議政守大體不阿

人自以受

先帝知遇昇疾枕戈三帥師不踰二千糗糧器械率自括募所當賊或  
數萬十數萬比有功入黃州食盡全師堵城之敗在陸乃悉以咎公又  
乘危奪其軍蓋巡撫故媚江公善戰又曠公寮舊不附己益欲致公死  
地公死而賊愈橫矣公諱樹義字子方先世自涪州徙遵義多用乙科  
著聲令牧康熙閒知陽曲縣曰廉祠其縣復祀於鄉嘉慶閒知陽山縣  
諱源準者以元孫紹其循卽公父也公舉丙子鄉試道光丙戌大挑一  
等籤發湖北一歲讞下州縣積案千五百件蠲補咸豐知縣權天門改  
監利江隄再決急振嚴法以安流剽計隄互縣境五百餘里積窳缺宜  
大治當江衝尺入口多沙善頰宜退徙二千七百丈費浩侈帑給十二  
萬金不供半力募貧盈之工垂竣江驟漲不沒隄者數寸西南風撼浪  
急役驚散公捧土負薪立水中天反風水南減二尺適虛舟浮至實土  
沈之隄遂完調江夏遷漢陽同知擢甘肅鞏昌知府署鞏秦階道十八  
年固原提督股餉蓄歌伶軍士譟劫州倉將爲亂檄公兼平慶涇道往  
治提督郊迎公不顧獨引得軍心參將某溫語獎勞且曰官誤耳若屬  
好男子豈有他乎某退則大言曰我固謂唐公必活若屬今果然軍遂

戢調知蘭州府晉蘭州道二十三年與勦西陵野番功

賞戴花翎遷陝西按察使二十七年晉湖北布政使水災連四十州縣

衛計撫振修防八十萬金大府難之公曰

堯舜在上忍令吾民失所乎爭以去就四五反始拜疏比奉

詔允諸政皆舉楚人比之富青州明年仍災公且護巡撫印爭請振免

合疏尤難於前發憤太息曰鄉爲州縣苟利民行吾志無復牽制今奈

何動掣肘欲覘人顏色乎遂拂衣歸當公令牧時事林文忠裕忠靖諸

公能張人才裨治本有異同無噎媢不二十年競於模稜取容一二開

濟偉略率遭抑擯而天下自此多故矣屢奉

召對垂問家世歷官行政甚悉擢同知

上顧樞臣曰丞倅中幾見有此人擢按察請西陲無用兵擢布政陳理

財在用人

上皆首肯慰勞久之

今上再起公湖北密疏根本大計

優詔褒答公能以實政契

聖心若此願益於小夫惟一死報

國豈非命邪公少隨侍嶺南市明死事陳忠烈公邦彥遺硯感陽山公  
異夢蓋授之矣殉難時洄流躍其軀於岸賊詫復攢槊刺之土人已淺  
瘞巡撫猶奏有異詞尋有言公死狀者曾侍郎國藩亦爲上遺疏乃  
賜卹如按察使炯遵遺命葬衣冠有日乃知公骸骨在閒關走金口徵  
不爽號泣奉歸咸豐五年四月廿有八日耐葬貴陽府東北五十里成  
山考墓之左以友芝嘗辱公文字知請銘墓道之石不可辭爲撮舉大  
者銘曰

平時顚顚然桴粥百姓以宣

主恩危疑跋扈而不彘豕洪忍苟身之存公之建樹本末奠乎古人矣  
撻寇六七年益張以繁世有負宏濟才如公爬抉亂根與之改弦洗瘡  
瘕而又安則雖公之齋志亦庶幾破涕九原也夫

又唐子方先生哀辭

吳敬樹

嗚呼自粵賊亂徧天下

朝廷患兵不足用餉不足供而有識之議獨以謂得能平賊之人則兵  
與餉猶可無憂蓋天下數十年來一切因習頹壞人材遂靡然不可振  
發事急而求人無可倚恃者余竊疑夫古今才能之人亦何世無之或



棄置不用用矣又或顛倒錯亂使之卒困於無所能爲以死則將誰咎哉今自兵事數年一時殉難之君子余多未能悉知其人與其行事若貴陽唐公子方之死所竊悲焉公往以名舉人爲縣令湖北以才能發聞游陟藩翰

先皇帝末年公被知遇最隆未久卽引疾以去蓋以與制府意未合云於時天下之人皆知公之賢望其大用有爲公意獨以爲難故家居數年將終以不出及寇陷武昌東下官軍旋入之

朝命起公湖北與督撫共辦軍務公乃聞

命馳赴以咸豐三年五月抵武昌以二品銜授湖北按察使明年正月兵潰公遂以死公之初抵武昌也賊方在江西而聚兵田鎮以禦公策欲倚之湖口督撫不可又自請募練襄陽亦弗許而賊之在北路者數千人自河南敗走楚境公帥兵迎勦之麻城殲之幾盡未幾田鎮潰公往來戰賊江上復黃州以便宜退軍遂被

旨落職仍委勦賊當是時

朝廷所倚辦賊實惟寶慶江忠烈公而侍郎曾公方募勇長沙以賊盡據長江奪舟艦我兵止陸路未能制勝乃多造礮船盛水軍東下約總

督吳文節公及江公俟軍集同勦賊俄而江公以安徽巡撫敗死於廬  
州吳公與公分道出擊黃州而敗公又獨以水軍纜數十艘所請給皆  
爲撫臣靳不與余又聞吳公之出撫臣崇綸學臣青麀實交劾促迫之  
則公之不得展其才用何足怪也此余所以歎夫有人而用之未竟或  
顛倒錯亂以死而非盡無人之患也原公之始方被任而決於退身其  
時天下未有變徒以事多沮撓不如意不肯自摧辱及是以賊亂之亟  
感憤復起卒又困於人以死豈非其命也耶初公少時以夢獲硯於廣  
州蓋明陳忠愍公邦彥之故物敏樹嘗承公命作夢硯齋銘文大意謂  
公文學政事爲一時偉鉅人前世忠賢當藉以發揚於世而孰知夫昔  
之夢者乃授公以其死也嗚呼豈偶然哉公之子舉人炯旣獲歸公喪  
以書請爲之哀辭敏樹固嘗以文字辱公知又在京師與公子游久乃  
爲其辭曰

公不出兮人愁公旣死兮增憂事難爲兮才竭人實不足兮又重之以  
敗謀氛江漢兮血流我舊治兮邦州騁皋澣兮余馬

主恩厚兮氓命我投忽摧沮以死兮天也誰尤旗波靡兮鷓散鼓不集  
兮孤舟公昔侍父兮南海父有夢兮硯實公收蓋忠靈之授死兮固有

異世而相酬開天門兮鞭駟虬望黔陽兮下鄂渚以來游

SECRET

TOP SECRET

續碑傳集卷五十八

江陰繆荃孫纂錄

忠節五

徐觀察傳 方宗誠

公名豐玉字子逢號石民桐城人也父鏞嘉慶己巳進士官順天府尹山西布政使終太僕寺卿公少負經世才初任貴州平遠州知州歷威甯黃平二州擢安順府郎岱同知署思州府升湖北黃州府復擢授湖北糧道公智勇兼人洞達當世之務執大義不爲上官屈所任盜賊斂迹獄訟希少去則士民泣送數十里外其治黃平有劇盜保禾聚黨據險日肆掠大府慮激亂不敢捕公至詳陳利害不聽其後盜劫公車巡撫懼事聞乃奏令候補知府胡公林翼統兵勦之未幾胡公去遂以委公當是時廣西姦民李世德凌十八洪秀全楊秀清輩各以邪教惑眾作亂巡撫鄭祖琛故文儒畏懦賊勢將蔓延貴州省治極邊苗夷獷悍難治公懼因循久盜勢積重亦必大爲民患乃練民兵親帥入山勦捕以計盡得盜首誅之事竟巡撫抑公功士庶多不平公曰吾爲地方除害豈以人命博升階邪時張公亮基撫雲南署雲貴總督入

觀過黃平得實密疏薦之故公一歲游升至黃州府蒞任未數月而粵賊數萬犯長沙先是道光三十年

上初臨政盛怒鄭祖琛釀禍褫職起林公則徐於家任之林公道薨復使李公星沅周公天爵鄒公鳴鶴皆無效

持命大學士賽尚阿公節制諸軍

賜邊必隆刀期殄賊久之賊益肆而兩湖總督程喬采防堵衡州復退縮賊遂由全州犯湖南境全州知州曹燮培都司武昌顯固守提督余萬清劉長清頓兵不救賊由是連陷州縣直至長沙是為咸豐二年八月也時

上已罷賽尚阿程喬采

命兩廣總督徐廣縉督辦兩廣兩湖軍務張公亮基撫湖南既深知公才奏調公公至分守西門晝夜巡察不懈九月三十日南城圯公仍督守西城不動徐廣縉奉

命後逗遛不前十月賊始解圍至岳州提督博勒恭武棄兵走賊遂直下攻武昌公隨廣縉至岳州力請統大兵進援不聽十二月武昌失公復謁廣縉曰事急矣武昌失守賊必順流直下江西江南將不保公盍

移節黃州截賊下流無使猖獗大臣任事當爲

國家計利害不當計一身生死亦不聽三年春賊果東下兩江總督陸建瀛防堵九江復敗走安慶江甯俱陷而廣縉亦卒以逗遛得罪時奉特旨擢公湖北督糧道張公署湖廣總督奏請以公權漢黃德道賊甫東下城中無官吏土匪肆行公至誅其魁數人民始安賊之東下也沿江焚掠

上命分別緩征廣濟知縣蔡閏琛不奉令且加賦姦民宋關佑等因率眾譁於縣庭黃州知府邵綸至縣彈壓調黃梅知縣鮑開運兼理廣濟事殺數人民遂變戕鮑與邵聚眾數千張公檄公及按察使江公忠源提督阿公統兵勦之公聞變白張公曰小民爲吏迫非作亂也方今粵賊披猖急持之反與賊合成巨禍某請往誅其首戕官者數人足矣至則曉諭使解散被寇者免征未被寇者納賦爲首戕官者縛獻宋關佑等懼罪煽惑愚民謂兵至無老少皆屠之不如抗拒糾眾數萬不從者焚其廬公與江公率兵勇先遂禽數十人誅其酋餘給示使歸諭鄉民無恐無助賊一夜賊圍營公命營中燭盡滅謹守無譁而營外炬火光如晝賊不見我軍虛實而我兵洞見賊俟賊逼營兵勇出擊殺數百人

賊大驚潰首逆多就禽餘始解散居民俱復業自二月粵賊據江甯復陷揚州鎮江據之提督向榮奉

命勦賊江甯提督鄧紹良勦賊鎮江爵帥琦善提督陳金綬勦賊揚州夏揚州賊分竄鳳陽歸德攻開封不克遂渡河北竄餘賊擾河南鎮江賊突出襲燒大營而江甯之賊亦分竄江西將復擾兩湖江公奉

命援江西張公遂特疏遣公駐兵田家鎮總理湖北防務使漢黃德道

張公汝瀛副之田家鎮者坵賊竄兩湖之要害也岷江至荊州始闊至

武昌會漢水始大至田家鎮江面極仄鎮在江之北後有大山曰黃金

塔鎮之上小山曰老鼠山再上曰磨盤山鎮之下大山曰葦子山有沙

紀長入江中與南岸半壁山對半壁山陡絕其下水勢迅疾上無緯路

船至必順旋流過北岸沙紀乃得上公列營諸山又於沙紀紮木筏夾

棉絮竹片中作城其上礮不能穿而沿城鑿穴列礮位賊船至沙紀礮

轟擊無不碎者半壁山後爲湖通興國州其入湖曰富池口公欲營於

半壁山而兵單不可分乃遣都司某駐兵瞭望公治兵有紀律恩威並

行大將皆凜凜日削木牌千百方書告諭江流中脅從來歸者給路

資於是投誠四散無算始江公赴援江西與巡撫張公芾爲固守計傷



賊甚眾賊百計攻之不能破遂分擾府縣州數十掠糧數百艘接濟江甯自九江以下賊船上下無敢過問者公常慨兵興以來各省防而不勦非善策又以賊之得上竄者一失於梁山不守一失於安徽巡撫棄安慶退駐廬州擬疏極言其非乞張公代奏其所設施慨然欲以滅賊自任而張公亦深心倚之八月賊知江西終難破燬壘解圍復踞安慶其渠魁統眾西上九江不守白帆蔽江遂至富池口攻田家鎮公遣兵戰連獲勝賊泊小池口不敢上九月朔賊分路登岸公督戰急都司董某兵適至賊大奔追殺數百人次日公出木筏攻戰賊退駐富池口是時公所統兵勇僅二千餘餉不繼又水戰礮船不足屢請於督撫時張公已改撫山東欲督兵來援而巡撫崇公欲棄田家鎮留張公城守張公爭之乃使署按察使唐公樹義統兵二千同知勞光泰統礮船二十四接應由家鎮唐公旋奉檄防江北遂屯廣濟先是賊分船入湖破興國州又由小池口擾黃梅境以分我兵勢至是皆聚富池口專力攻田家鎮荆門州知州李公櫛者忠勇士也時奉檄從戎以爲不直擣賊營終難破賊追賊至富池口力戰死之而賊遂乘隙據半壁山之險越二日江公至自江西謂兵單賊眾宜退回省城公不可時大風賊船乘隙

過木筏公以礮擊沈之餘船據半壁山上游公遣千總周鵬舉迎擊次日復大風賊船乘勢蠶湧上公與張公督戰木筏上而船之越半壁山者掠小舟渡北岸奪礮船周鵬舉棄船走賊遂燒營及田家鎮公回大營督戰而木筏起火起兵勇潰張公死之公躍馬出營手刃賊賊來愈眾僕某曳公行公怒叱之遂自到墜馬賊眾戕之沒九月十三日也自賊起廣西大吏皆以防堵爲名不會勦及賊至又以退守爲辭無敢與賊力戰者逮賊據江甯長江險要棄不守大吏第擁兵自衛而已公獨以書生統孤軍遏賊全鋒力戰十餘日銳意欲爲上游保障乃竟齎志以沒悲夫公年甫四十有一沒後賊遂復攻武昌濱江州縣多被害其據安慶者復入桐舒破廬州安慶不守退駐廬州之不善卒如公言公神寒骨重辭氣樸誠暇則吟古人詩從容有儒將風每述殉節諸臣及大吏逃遁失機事慨然流涕曰臣事君以義顧名計子孫死節已非純臣况忍辱偷生者邪其調守長沙謂妻子曰汝輩各自礪吾此身不爲家有矣公之受知於張公也或謂公宜以世俗門生禮見公曰張公爲天下求人某豈得爲張公私哉卒不可張公汝瀛字仙舟山東樂陵人以舉人由教習揀發廣西知縣用軍功累擢至漢黃德道樸直好問遇事

眞寶雖與公同官自知才不逮計聽言從虛心以圖共濟殉節時年五十六亦張公亮基所識拔者江公李公皆然故時僂張公知人云公殉節後

賜諡勇烈一子曰宗亮

論曰吾每讀邸鈔竊歎史臣之頌堯也曰其仁如天今吾聖主之仁則又包乎天地之外也

國家承平久文武恬嬉而粵賊之興

聖主之所簡用者皆必其素有名譽事功之可紀及其無效重不過罷職遣戍以爲懲儆或仍使之戴罪以立功自博勒恭武王鵬飛而外未忍遽置重典也其死難者不特如烏都統曹刺史武都司輩之眞能盡忠效死爲之哀悼不已厚予卹廕卽蔣文慶陸建瀛亦猶以其死也沛殊恩焉嗚呼寬仁如此有人心者忍負之哉然則公之殺身報國固其所也

張仙洲瘞衣冠冢志銘

宗稷辰

先執樂陵張易堂先生筦湖南藩庫時教子力學書聲常出庭宇聞越數年其仲子仙洲名汝瀛舉於順天辛巳榜與余爲南北同年都下待

試益相親密以余有十年之長恆兄事余及余官內閣仙洲充官學教習聚處良久道光戊戌春試更與之同號舍是年以分發廣西別去而其人之文章志行言論風采猶在余心目之際也仙洲爲人伉爽有氣岸每述其遠祖侍御諱潑擊大奄者凜然思繼其先烈生平內行修飭事百齡大母尤孝謹居兩親憂哀禮交盡人謂有其曾祖張孝子風其官廣西歷署平南桂平荔浦甯明州象州貴縣皆巖邑邊陲亂萌初動君所至能以威克政聲卓然當在荔浦調赴西延捕湖南亂民李沅發擢同知在貴縣鋤治艇寇升知府

賞花翎時徐仲紳宮保督楚師奏調隨營駱額門撫部在湖南張石卿總制在湖北交章薦舉咸豐二年正月以收復岳州功命加道銜三月由署漢陽守

特擢漢黃德道懲餘醜招流亡心力幾瘁未幾粵寇由九江回竄君與徐督糧豐玉率舟師禦之於田家鎮連戰皆捷九月十二日寇大至據半壁山以巨礮俯擊我軍眾驚潰力支五日無救援遂約徐君同死各正衣冠冒矢石血路中手刃數賊力竭遇害粵寇素畏君勇毅憾尤甚旣殞復焚其骸餘燼投江中事聞被

旨憫卹優典視二品

予騎都尉世職人祀昭忠祠昔勞公崇光為提刑持節

冊封越南君為之副往返三萬里遇颶風覆舟瀕死得全無懼色天蓋

先以危險之境練其心膽乃能出入於豺虎之林猝投驚烽烈燄而不

為退縮也君生於某年月日年僅十沒後子聯貴孫多祿尚隨

其母羈湖南不得歸其遺著與政績詢其兄子多不能詳是至可痛者

已念其魂歸青土當有瘞衣冠之域故敘其大略以記之君有從父舅

弟汝沅字湘颿者以壬辰舉人教習知縣從事安徽糧臺廬州初陷時

巷戰死亦奉

褒卹一門之中雙忠並爍可謂難得矣是宜附書系之辭曰

初宰桂平制寇有聲惜不久任使斬其萌踰嶺披猖用之從征鼓行而

前黃州備兵屢挫賊鋒志在廓清詎寇負嵎礮飛我營君與石民徐簡

誓不獨生體化神昇感動

帝廷浩氣常存衣冠式憑歸來自天壯挾風霆故人寫哀以妥君靈

江西按察使周貞恪公墓志銘 彭蘊章

公諱玉衡字器之號潤山本鍾祥王氏年十三失怙恃旋遭祖母喪與

弟三人依其外祖周君晴宇遂從外家姓爲周嘉慶十年補庠生丁卯  
舉於鄉道光丙戌大挑以知縣分發江西署會昌龍泉大庾補龍南調  
贛縣署甯都新建補義甯州保升知府補南康府調贛州府升贛南道  
賞戴花翎升江西按察使加布政使銜咸豐五年十月總理吉安軍務  
率其子恩慶帶兵勇三千餘人迎勦賊匪克復吉安又克分宜遂攻萬  
載賊以二萬眾衝突公身先士卒奮勇鏖戰恩慶繼之斬馘無數克復  
萬載軍威大振擬卽進攻袁州賊又由閒道竄入吉安公率兵馳救賊  
眾圍城一月城中食糧旣盡公猶開城拒敵與將士誓以死守屢戰殺  
賊不下萬餘援不至賊以地雷轟城而入公猶巷戰手刃數賊遂被戕  
恩慶亦以身殉吉安再陷時咸豐六年正月二十五日也大吏入告奉  
旨照布政使賜卹子恩慶江甯布政司理問奉  
旨照知州議卹於吉南贛三府各建專祠並給世職

賜諡貞恪

予祭葬生於乾隆四十六年十二月十九日歿時年六十有六公以縣  
令起家循聲卓著長於聽斷勤於緝捕民不敢爲非畏公如神明愛公  
如父母爲歷任上官所重遇艱鉅必以相授雖糾眾叛逆之案靡不開

誠解散其膽識有過人者及其身在戎行與士卒同甘苦故人思效命古之名將不是過也雖未竟其才竟以援絕與城俱亡朝士大夫聞之惋惜然與睢陽常山千秋爭烈豈不偉歟配氏饒

誥封恭人

例晉淑人子厚基同知銜山西大同府通判次煥監生次卽恩慶次炎候選知府次瀚道光己酉拔貢同知銜分發四川知縣俱饒淑人出次灑監生側室劉出女四長適蕭節次適向春次適李譽价次幼俱劉出孫貽元等十四人曾孫一人厚基等奉公柩卜葬有期乞余爲文以志其墓自公爲州牧時余卽慕公名相識於京師傾蓋如故公嘗命子瀚受業於余不敢以不文辭系之銘曰

惟楚多才兼資文武赫赫周公備嘗險阻百里磬鴻三軍哮虎恤其饑寒齊其步伍性米情田禮干義櫓單騎折衝危城禦侮取義一朝成仁千古閱此幽宮流馨抔土

羅忠節公神道碑銘

曾國藩

公諱澤南字仲嶽號羅山湘鄉羅氏咸豐四五年間公以諸生提兵破賊屢建大勳

朝野歎仰以爲名將而不知其平生志事裕於學者久矣公之學其大者以爲天地萬物本吾一體量不周於六合澤不被於匹夫虧辱莫大焉凜降衷之大原思主靜以研幾於是乎宗張子而著西銘講義一卷宗周子而著人極衍義一卷幼儀不慎則居敬無基異說不辨則謬以千里於是乎宗朱子而著小學韻語一卷姚江學辨二卷嚴義利之閑窮陰陽之變旁及州域形勢百家述作靡不研討於是乎有讀孟子劄記二卷周易本義衍言若干卷

皇輿要覽若干卷詩文集八卷其爲說雖多而其本躬修以保四海未嘗不同歸也始公家世貧甚曾祖王父曰阮王父拱詩皆以公貴贈通奉大夫父嘉旦公沒後

賞加頭品頂戴曾祖王母蕭氏王母賀氏母蕭氏皆

贈夫人公少就學王父屢典衣市米節縮於家專餉於塾年十九卽藉課徒取貲自給喪其母又喪其兄旋喪王父十年之中連遭期功之戚十一嘗以試罷徒步夜歸家人以歲饑不能具食妻以連哭三子喪明公益自刻厲不憂門庭多故而憂所學不能拔俗而入聖不恥生事之艱而恥無術以濟天下其後年逾三十乃補學官附生逾四十乃以廩



生舉孝廉方正假館四方窮年汲汲與其徒講論濂洛關閩之緒痞口  
焦思大暢厥旨未幾兵事起湘中書生多拯大難立勳名大率公弟子  
也咸豐二年粵賊攻圍長沙縣令召公練鄉勇以備不虞省城解圍明  
年春巡撫張公亮基檄公帶勇至長沙維時國藩奉

命督治團練因與公講求束伍技擊之法晨夕訓練擊土寇於桂東禽  
逆黨於衡山其夏賊圍江西省城乃益募湘勇三千輔以新甯之勇鎮  
箠之兵檄公赴援南昌湘軍越境討賊自此始矣旣解南昌之圍復破  
賊於安福歸及衡州戮土匪於永興四年春湖北之賊大舉南侵官軍  
失利於岳陽克捷於湘潭提督塔齊布公追賊至岳州余檄公與李公  
續賓佐之公扼大橋以遏其衝凡七戰而羣賊潰岳州平乘勝逐北連  
復三縣將攻武昌公手一圖就余決策師出兩路以塔公進洪山而自  
請攻花園當其堅者如其策果克武昌漢陽兩城賊旣東奔追及於興  
國大膊於田家鎮公提卒二千禦數十倍之寇蹙之江濱望石墜崖死  
者萬計而水師亦斷橫江鐵鎖燔賊舟數千當是時公名震天下前此  
累功保至道員花翎至是有甯紹台道之  
命加按察使銜旣而引兵北渡克廣濟黃每

賞葉普鏗額巴圖魯名號又引兵南渡攻圍九江進規湖口賊堅守不可遽下適會水師分兵入宮亭湖江上之軍不利而湖北諸軍屢敗賊自黃梅長驅西上武昌再陷公太息深憂歎世變之未已也益討部眾而申儆之或解說周易以自遣時別賊陷饒州弋陽公入江西援剿大戰弋陽克之賊陷廣信又戰信州克之又以其間收復德興景德鎮東路甫定而義甯復陷公軍渡湖漢而西至則示形杭口而暗進鼇嶺屯高峰以瞰敵設三伏以要之四戰而賊大燬義甯既克有

詔加布政使銜公以書抵國藩具論吳楚形勢欲取九江湖口法當先圖武昌欲取武昌法當先清岳鄂之交於是馳疏以公回援武漢朝廷嘉焉遂略通城克崇陽挫衄於濠頭堡大捷於蒲圻將達武昌巡撫胡文忠公歡迎勞問凡事咨而後行城外賊壘鏟除略盡殄滅有緒矣公以霧中搏戰中鎗子傷創甚咸豐六年三月初八日卒於軍春秋五十事聞

天子震悼照巡撫例

賜卹二子皆

賞給舉人三省建立專祠

予謚忠節公在軍四載論數省安危皆視為一家骨肉之事與其所注  
西銘之旨相符其臨陣審固乃發亦本主靜察幾之說而行軍好相度  
山川脈絡又其講求輿圖之效君子是以知公之功所蓄積者夙也非  
天幸也配張氏

誥封夫人妾周氏子兆作配胡氏兆升配曾氏國藩第三女也余與公  
以學行相勛又相從於金革申之以婚姻迺撫其大節銘諸墓道銘曰  
漸車之澗積潦縱橫崇朝即涸卷勢收聲大江西來其源萬里澤溥寰  
區不矜厥美無本者竭有本者昌羅公淵默所蓄孔長洞徹天人潛睇  
往聖一物未康終虧吾性提師苦戰荆揚二州斧彼凶豎為民復讐矯  
矯學徒相從征討朝出鏖兵暮歸講道洛閩之術近世所捐姚江事業  
或邁前賢公慎其趨既辨其詭仍立豐功一雪斯恥大本內植偉績外  
充茲謂豪傑百世可宗

又羅忠節公別傳 李元度

公諱澤南字仲嶽號羅山湘鄉人幼穎悟十歲能文家酷貧溺苦於學  
夜無油把卷讀月下倦即露宿達旦年十九喪母明年大父及兄嫂歿  
二十九長次子及三子皆殤是歲為道光乙未大旱饑疫作公罷試徒

步歸夜半啟門則其妻方以哭子喪明時飢甚索米為炊無有也己亥  
補縣學生年三十有三矣又八年始食廩餼公自少篤志正學好儒先  
性理書賀制軍長齡唐太常鑑皆重之制軍延課其子咸豐元年  
詔舉孝廉方正當事以公應二年粵逆犯長沙縣令屬公練丁設防號

湘勇明年侍郎曾公奉

命督治團防江西上猶土匪竄桂東檄公進剿行次衡山忽草市寇起  
眾千餘公禽首逆劉積厚等進擊桂東賊走之時粵寇圍南昌公帥湘  
勇赴援既至土賊陷泰和安福圍吉安公與劉公長佑往援剿賊解圍  
遁公追至安福復縣城日夕賊大至敗之明日又至我軍屢戰斬馘無  
數敗賊竄入湖南巡撫駱公秉章檄公回剿賊尋遁會永興土寇亂曾  
侍郎檄公往剿戰於油榨墟平之公初以湘勇三百破安福賊數千與  
李公績賓分典中右營共七百人至是增至千人屯衡州再平草市土  
寇斬首逆王大漢四年夏湘潭賊退公與提督塔忠武公會師東下六  
月攻岳州公以大橋路為賊所必爭帥所部扼橋守三戰皆捷殲賊千  
閏七月二日破高橋賊壘九賊退踞城陵磯公與塔公乘勝進擊連破  
賊營三賊宵遁是役也公獨當大橋一面功最偉云尋自臨湘進屯長

安驛賊分四路來犯公令偃旗息鼓乘閒突起擊之賊大潰又破賊羊樓崗追至百花嶺再破之佛嶺進次虎爪市連破桂口大沙坪賊壘復崇陽時武昌賊分黨由金牛入咸甯公擊走之追敗之官步橋又敗之金牛遂進壁江夏之紫坊始曾公約諸君會紫坊及是召諸將至金口議攻武昌策公出所績圖言紫坊出武昌有二道一洪山大路一沿江出花園當以重兵勦花園而分兵扼洪山防反竄諸將未決公請身任其難遂自攻花園而令塔公出洪山時花園悍賊萬餘築堅壘一枕大江一頻青林湖一跨長隄深溝堅柵列巨礮爲固八月二十一日官軍水陸進攻公直趨花園賊憑木城轟拒我軍伏地進分兵奪賊舟數十舟賊退營賊亦亂乘勢踰溝摩其壘同時並下翼日攻鮎魚套賊營川勇卻公擊賊隄上隔溪不能救街口賊乘機出逼公奮擊敗之李公由江岸回援又大敗之賊竄洪山爲塔公所薄是夕棄城遁二十三日武漢城皆復距會議時七日耳鄂城之克實本公謀也九月師出金牛敗賊於沿埠頭克興國塔公復武昌大治遂規取田家鎮鎮居大江北岸其南爲半壁山舊設防兵陷於賊賊更爲鐵鎖以截水師而用重兵屯半壁夾江以守十月朔公擣半壁賊數路來犯公策馬衝陣賊敗走江

干蹙之墮水死者千初四日塔公造浮橋渡小河爲賊所遏賊自半壁  
傾巢出北岸賊渡江助戰者萬人僞王坐將臺督戰龍旗黃蓋勢張甚  
時公所部勵二千六百人眾色沮有潛遁者李公飛騎追三卒回手刃  
之軍心乃定公令堅伏弗動度賊銳已竭突起急攻賊大潰奔半壁山  
而後路爲我軍所扼不得上皆觸石墜崖死凡數千水師亦蔽江下斷  
橫江鐵鎖燔賊舟數千火光夜照數十里水陸夾擊田鎮平尋渡江次  
菩提壩塔公已先至兩次伏賊起皆擊敗之禽斬千三百遂復廣濟十  
一月進軍雙城驛賊扼險而營一鼓登山平其壘抵黃梅與塔公奪柵  
人縱火攻之城復遂進軍濁港遇悍賊解衣出戰堆積市肆閒公焚之  
斬馘千餘餘賊退保孔隴驛賊酋羅大綱復從湖口率萬人至公分兵  
抄襲街口賊賊敗歸壘攻破之大綱逸去是役以五千人破賊二萬賊  
遂盡撤沿江各營併力守九江矣塔公渡江圍潯城公別勦盩山遏湖  
口上援之賊攻梅家洲賊壘不下會水軍自湖口入彭蠡盡燔賊艘賊  
亦潛以小舟縱火襲我外江輜重船水師潰公回駐九江會北岸小池  
口有賊公與李公率勇千四百人進勦塔公往助之渡江賊大至刃旣  
接我前軍卻公急斂兵歸時十二月二十九日也五年正月北岸賊由

黃梅廣濟上犯武昌復失曾侍郎入南昌別賊由浮梁陷饒州及弋陽  
 檄公往援勦時公所部三營李公將左蔣君益澧將右公自將中營唐  
 君訓方劉君希洛各率勇從之三月大戰五里亭克弋陽賊隨陷廣信  
 公壁城西烏石山賊三路來犯公方築壘不爲動俟其疲乏乘之大獲  
 翼日賊復大至見我軍不動亦不敢前相持兩時許忽起乘賊大敗之  
 遂四面薄城賊啟東門遁初賊驟至民不及避殺戮甚慘公至不三日  
 復其城士民歡躍焚香遮道迎遂復德興及景德鎮未幾有進勦義甯  
 之役七月次梁口賊分兩路來拒我軍三伏以待之賊潰伏兵從山後  
 出賊之抄我後者我軍反蹙其後斃賊六七百人越日進駐棋盤嶺以  
 鼇嶺爲州城屏蔽急據之嶺距州七里左曰鳳凰山其右最高者曰雞  
 鳴峰峰下卽西門擺百貨所輳也軍據此全城在目矣十四日大戰殪  
 賊六七千賊奪氣閉城不出次日復戰又敗之盡焚濱江賊壘是夕賊  
 棄城遁義甯旣克公上書曾侍郎其略曰武昌居吳楚上游九江爲豫  
 章門戶今皆爲賊據崇通等處羣盜出沒江西之義甯武甯湖南之平  
 江臨湘均無安枕日欲克九江必繇武漢下欲克武昌必自崇通入曾  
 公因奏派公回援武漢而以彭君三元普君承堯所部寶勇隸之九月

進攻通城悍賊萬餘人見官軍至突出薄之公令軍士席地坐無譁待賊逼大呼奮擊斬賊將三人乃崩潰明日破城外三營奪門入克之尋進攻桂口令會攻通城之李原濬何忠駿等率平江勇駐守而自率所部克崇陽尋以分兵攻梯木山有濠頭堡之敗公整軍再戰復大捷進攻蒲圻克之遂復咸甯自是武昌以南無賊蹤而逆渠石達開自崇陽乘虛入義甯江西賊勢日棘矣十一月師抵紫坊與巡撫胡文忠會合又會提督楊公岳斌於金口商進取策定議公率湘勇從東路壁洪山胡公從中路壁城南隄上而令九溪營屯金口爲水師犄角時賊於武昌城外築堅壘十三高者與城埒公至方修壘胡公亦始至悍賊二萬從十字街出胡公擊卻之數卻數至公與李公潛師出養湖隄分兩路繞抄胡公所部見湘勇至佯敗走賊追之旋反擊則公等已抄出堅壘北遂破十字街營盡殪追賊無脫者於是賊皆縋城入盡毀城東南賊壘造浮橋於鮎魚套進攻八步街以奇兵逼望山門襲賊壘後立平之於是西路賊壘亦盡尋攻塘角賊營毀漢陽門外一壘焚其船廠殲賊千城賊由竇出截我軍後路公與李公夾擊之又殺賊數百環西北路賊壘皆盡是夜賊於望山門外葺石壘二高與城等我軍蹋平之李公



出窯灣截賊餉道賊七八千人由塘角沿湖下抄其後公令劉君騰鴻  
等出洪山之東自率中營出洪山之西夾擊之殄賊千餘賊自此閉城  
不復出六年正月公率中營移屯洪山絕頂後右各營壁南岡賊乘夜  
襲中營摩壘矣我軍築石投之登者皆殪嗣是每夕輒至公設伏痛殲  
斬首四百賊始不敢復襲營二月公分軍扼窯灣賊出爭大戰小龜山  
斬級六七百遂以二營駐其地明日賊由武勝門出萬餘人與我軍戰  
隄上殲賊數百公追至城下繞城審視賊不敢出二十九日夜有大星  
隕於西北三月朔大霧次日城賊出公親搏戰走之已而賊窺我守壘  
兵少大舉來犯公追賊至城下賊礮如雨中公右額裹創戰逾時歸而  
創劇日夜危坐不寐越三日病甚不能起語喃喃皆時事口占忠義祠  
楹聯使人書之忽開目索紙筆仰臥書曰亂極時跼得定纔是有用之  
學初八日晨起汗出如瀋握胡文忠手曰武漢未克江西復危不能兩  
顧死何足惜恨事未了耳其與迪菴好爲之迪菴李忠武字也語畢而  
瞑年四十有九公貌樸氣沈究心濂洛之書通知世務期見諸施行在  
軍毅然以滅賊自任所部將弁皆其鄉黨信從者前後克城二十大小  
二百餘戰其臨陣以堅忍勝如其爲學或問制敵之道曰無他大學知

止數語盡之矣左氏再衰三竭之言其注腳也公初以團練敘訓導

知縣平安福晉直隸州知州克岳州擢知府  
賞戴孔雀翎武漢克復授浙江甯紹台道以田鎮戰功加按察使銜克

廣濟黃梅  
賞葉普鏗額巴圖魯號凡勇號多由外請此出  
特恩異數也義甯之役加布政使銜死事狀上

優旨照巡撫陣亡例

賜卹父嘉旦

賞頭品頂戴子兆作兆升並

賞舉人

詔湖南湖北江西各建專祠

賜祭葬

予諡忠節同治元年

詔湖南巡撫遣官卽家

賜祭一壇三年克復江甯

特旨加雲騎尉世職所著小學韻語一卷詩文集八卷周易附說讀孟

子劄記西銘講義人極行義

皇輿要覽皆行於世贊曰

國朝武功邁前古所用皆八旗東三省勁旅及各直省綠旗兵嘉慶初平川楚教匪始兼用鄉勇然十裁二三耳迨粵寇起而楚勇湘勇名天下楚勇自江忠烈始公以老諸生帥湘勇轉戰大江南北往輒有功所繇與忠烈江公同張大楚國也哉雖然公以戰績顯時會使然耳公遂於閩洛之學淵乎莫測其際也世所傾慕者抑猶其外見之一端歟

江壯節公傳

陳繼聰

江公忠濟字汝舟忠烈公之叔弟也幼從忠烈學長而驍果絕人性好讀書每覽史傳遇忠孝大節輒慷慨歎歎勃然興起道光季年李元發亂新甯據縣城時公仲兄忠潛從忠烈公官浙公令其季弟忠淑護送父母至寶慶避難而首倡遠近鄉勇圍城助勦已而官軍麤至相持月餘不下公穴城火之賊知不可守夜遁官軍縱不擊公追賊轉鬪眾寡不敵幾被害匿叢莽始逸旋復合眾窮追賊遂竄入粵境縣城以復咸豐二年粵賊洪秀全走湖南陷道州趨桂陽陷郴州忠烈與提督和春會勦公實從七月賊首蕭朝貴進犯長沙忠烈偕和公倍道追而賊大

隊尙踞郴州公以壯士助官軍圍攻知賊必竄嚴爲備賊果突走同總  
兵某追之而不敢近逼公率所部馳擊賊敗去追及諸河縱兵斬首百  
七十餘級奪獲器械馬匹無算總兵攘其功公不與爭乃疾抵長沙佐  
忠烈守城賊尋解圍遁是冬忠烈討瀏陽賊周國虞被圍公率四百人  
閒道入救我兵夾擊賊眾披靡遂平瀏陽三年忠烈赴武昌以舊部千  
人屬公與劉公長佑留長沙勤土寇及忠烈擊賊通城時崇陽嘉魚羣  
盜蠶起忠烈兵單檄公與劉公倍道往援抵崇陽大破賊斬首逆陳百  
斗及餘黨數百人進攻通城賊數萬圍官軍數日忠烈拊公背曰非弟  
不能破此賊語未竟公挾雙刀大呼躍出眾從之忠烈援枹助戰士殊  
死鬪賊大潰生禽渠魁張西袁等二十餘人斬獲無算土寇肅清四年  
五月忠烈守南昌賊轟城卅十餘丈公督壯士囊土填之俄而太圯築  
者悉陷公跳而免越二日地雷復發城坍八十餘丈賊謀而登公斬先  
登者二人賊乃退麾兵急築之復穿地道公鑿濠城下引水注之道盡  
廢南昌獲全公先以功保舉通判加五品銜

賜孔雀翎至是以解江西行省  
詔擢知府其冬十二月忠烈殉難廬州公護柩歸葬適弟忠淑奉檄勤

賊通城患疾請假巡撫駱文忠公以忠淑所部皆楚勇命公往代尋調赴永州防堵粵賊敗之藍山再敗之嘉禾甯遠連復三城斃賊數千詔以道員用五年武漢再陷湖南震驚公奉駱公檄統兵三千駐防岳州兼堵崇通之賊已而通城失守公欲率師往勦而以岳州綰轂江湖最爲重地未便移鎮乃使部將徐以祥江孝聞等帶勇屯通坊邊界相機進攻連與賊戰於土坳馬家橋禽僞目簡金堂賊棄通城而走公卽命徐以祥守之六年正月武昌賊使僞指揮何某僞將軍謝國俊率眾三千至崇陽糾合通山興國土寇將犯通城公慮徐以祥等軍單不能抵禦而通城士民又懇請濟師公遂馳赴通城督戰二月何逆驅眾來犯公擊敗之陣斬賊目四人其一卽謝國俊也何逆遁去由通山竄江西之義甯州復將句結土寇爲再舉計於是通城士民益皇皇然惟恐楚勇之去而公亦以賊方往來湖北江西接壤之處通城適介其間不可不留兵以資控扼遂日夜辦團練冀由通城而漸及通山崇陽俾賊不得蔓延四竄庶於三省大局有裨其時通城之團丁赴營點驗者一萬五千餘人公以其事馳告於駱公駱公壯其志不忍抑之而心慮其疏手書誡之曰通山崇陽民情叵測官軍獲勝則雉髮反正貌爲良民

及賊勢稍張則白梃紅巾甘爲賊役通城民情雖不如各處之頑悖性  
成然苦於柔靡成風不能振作恐團練雖成仍不足恃也四月何逆又  
與僞指揮姜某等從義甯入通山至崇陽桂口合諸處之賊萬人於初  
三日突犯公營相距僅里許公急率軍禦之敗其前驅追至山岡賊方  
築壘遽前薄之毀其四壘而還明日何逆仍合衆來犯并約通城塘湖  
麥園等處土匪爲助公見賊勢浩大召本地團勇千人置營後以張聲  
威而遣各營將士分隊出擊自辰至申殺賊甚多正鏖戰聞忽後營圍  
勇火起公督軍回救賊四面圍之公左右衝突身受十餘創猶掣佩刀  
連刃悍賊力竭遇害年三十有八公爲人慷慨有膽略每遇賊戰奮身  
先往雖瀕死不少挫與小敵遇猶與眾商遇大敵則急起直前如神鷹  
攫物迅急飄忽猝不可防以此屢著戰功行軍紀律甚嚴所至閭里晏  
如待人設城府信其人卽終身倚之不少加察坐是多爲人任咎通  
城之敗麾下某者公素所重遇勇多刻故後營疏防賊至弗知卒以身  
殉願是役全部三千人死幾盡無一降者豈非忠義之激於平日者爲  
至深耶喪柩所過鄉村士民咸爲焚香拜送駱文忠公後以公死狀聞  
詔贈按察使銜

予謚壯節附祀兄忠烈祠

論曰李次青方伯先正事略江壯節公傳歷敘其戰功而於通城之敗書之甚略其實是役楚師大挫由於團勇內應不可不詳其事也督辦團練本是正法未為失策病在此時賊未大創民多觀望雖入團丁之籍尚有攜貳之心壯節公行之太速耳駱公手書已燭民隱讀之令人三歎息云

何君殉難碑記 曾國藩

嗚呼軍興十載士大夫君子橫死者多矣獨吾友何君丹畦尤深痛不忍聞自近古以來未有行善獲禍如是之烈者也豈不悲哉君以咸豐

四年五月由翰林院侍講

上書房行走為安徽甯池太廣兵備道時則安慶暨濱江府縣淪沒賊中廬州新立行省亦陷於賊副都御史袁公軍臨淮提督和公巡撫福公軍廬州君當之官不克南渡袁公欲資君以兵西會楚師福公亦具疏留君江北檄君募勇出征公私匱乏沮傷百端最後得二百餘人率之以西至霍山徵集潰兵團勇三千餘人推誠獎勵遂以十月二日大破捻匪李兆受於城東追至麻埠又五日至流波撞檄商城固始

團練堵其北金家寨團丁禦其東而自率所部遏其西捻黨洵懼李兆受與馬超江等相繼投誠挺散脅從遠近大悅環三四縣爭輸豬雞糗糒金錢之屬聲終宵不絕先是大府帥檄君採援廬江檄未至而城先陷至是奉被劾革職之

命軍士懷不能平雖百姓亦惘惘也方楚師之出岳州而東也克武昌下黃州破田家鎮水陸電邁席捲千里其後塔齊布羅澤南兩君由黃梅南渡以圍九江賊循北岸而上復陷蘄黃竄武漢自長淮以南天柱內外所在蜂屯君以孤軍流離西與楚師不相聞東與廬州大府隔絕朝不謀夕齧指誓眾五年正月進攻蘄水克之又分軍克復英山又殲劇賊田金爵大府帥以君西征有效疏令留駐英山君出師至是凡八閱月僅支見銀三百兩士卒及民團相從者增至三千人又益以李兆受新降之眾無以爲食居無帳幕雨無薪木村郭無居民遠近無援傷亡無以爲卹始什人賦麪一斤繼而削減半之旣又半之而賊來益盛日提飢卒轉戰不得休五月十二日軍敗徒行泥淖中鄉民或哀而進食君雖強自振厲然憊甚瘦瘠發體氣亦少餒矣李兆受者故反側持兩端感君忠勤不忍遽背負絕糧旣久怪君無以活之意望甚又同時



降人馬超江爲匪徒所殺怨官不能捕誅以抵罪也則大戚議爲馬超江復仇設位受弔捻黨畢集於是安徽河南兩省皆以兆受復叛入告而縣令亦懸賞購兆受頭千金兆受亦不自安匍伏詣君自陳無他君撫慰稍稍綏定矣會大府帥有密書抵君教以圖翦叛賊毋後人發爲兆受所得遂陽爲置酒高會而伏兵戕君於英山之外南門遺骸殘燬同遇難者四十七人咸豐五年十一月初三日也君諱桂珍字丹畦雲南師宗人道光甲午科舉人戊戌科進士翰林院編修丙午提督貴州學政旋晉侍講入直

上書房數抗疏陳軍事得失推本君德又采朱子真西山大學之說傳以已意引伸條例手繕成帙隨疏奏進君之意嘗以謂聖人者事無不可爲功無不可就獨患人不自克不能竭其心與力之所竟耳及君出而莅事饑餓經年而百戰不息儻所謂自克者耶竭吾心與力而不遺者耶卒其獲禍如是之烈而或不免身後之餘責然則爲善者何適而不懼哉咸豐十年國藩屯軍江北詢君患難馳驅之所乃立石英山綴以銘詩俾來者有考焉銘曰

饑寒逼身難顧廉恥聖主不能安其民慈母不能撫其子況於揭竿烏

合之徒亡命歸誠之始倏順忽逆朝人暮豕封豕負塗積疑張弧鋸牙  
鉤爪瘡我閎儒赤舌燒城死有餘議羣毀所歸天地易位悠悠之舌難  
可遠勝我銘諸石少待其定上訊三光下訊無竟

又何丹畦墓表

倭仁

惟咸豐五年十有一月初三日清故分巡安徽徽甯池太廣兵備道何  
君殉難於英山之小南門嗚乎哀哉初粵匪造寇徑據武昌乘勢東趨  
安慶不守後巡撫李公棄安慶駐廬州立行省焉雖王旅致討重臣督  
師而將牢太過觀望不前俾廬州繼陷江公致命瀕江專城墨綬十數  
奔走失守均爲賊巢其時君適兵備徽甯奉母之官道出汜水其兄懷  
珍方防河於斯因屬善事慈親慷慨告別兄諷以養親君曰仕者內其  
祿外其身今所以養母者君之祿也身安得自有耶況今時多故食焉  
而欲避其難可乎副都御史袁公辦賊臨淮素有威望既見君稔君膽  
智沈毅忠慨可任以爲起兵已來於茲數載秉鉞相望未有奮擊之功  
而互競利便更相煽惑就君深相諮諏議弭禍亂欲資君以兵西會塔  
齊布羅澤南兩公商所以克濟之者當是時也楚師魚儷漢舳電疾颯  
馳武漢黃州相繼克復君果西上簡振精銳堪能深入直指廬州又袁

公軍臨淮賊不敢北向則安徽大勢振已乃議甫成而福巡撫疏奏留君江北募勇是以論者至今惜之君既募勇久之得二百餘人又糾率霍山潰卒練兵得三千餘人於四年十月二十二日破捻匪李兆受追至麻埠又追之至流波礮君率所部遏其西檄商城固始練兵堵其北丁家寨練兵禦其東兆受窮乞降五年正月克蘄水又分軍克英山又殲賊酋田金爵大府疏上君功留駐英山自君出師兵勇相隨凡三千餘又益兆受降眾至是八閱月僅用餉三百兆受以絕糧故望君又降人馬超江者爲所怨殺其黨忿官不爲捕抵益大譁超江者前兆受與降者也於是當事具疏稱兆受復叛縣令承望風旨購兆受千金兆受恐不免詣君自訟君慰之兆受安屬當事祕致君書曰急誅兆受書未抵君爲兆受得遂手戕君吁可痛哉君承殘破之後掇拾之餘兵卒單寡公事瓶罄赤立儲畜無素兆受又新附不相保持人心危恐慮將有變而君忠誠感發使新舊用命猶日率飢眾轉戰不休可爲難矣雖兆受故反側皖豫二省以復叛聞至所在捕馘之然猶詣君自陳不忍遽背尙有盜竊之道焉設當事無密書則君之於兆受殆所謂繼食鷹鷂惟其鷙而烹之將何用哉或曰當事實甚君故宣露其書因以報隙耳

噫此非予所敢知也君諱桂珍字丹畦由翰林院編修入值

上書房嘗彈湖廣總督某不職

報可抗疏論政體得失原本

君心識者韙之尤服膺朱子真西山大學之說析理多精邃著有補輯講義二卷衍義附編四卷君娶陳氏無子女三以兄子某嗣君爲余道光乙未科所薦士議論激發相視莫逆君監司安徽當獷賊虓闕獨以烏合嬰其鋒艱難之際忠義惟塵雖投袂鞠旅功未克竟其志有足稱者夫誠正之所本始其與喻人之怨異乎不幸積疑哮噬見殞毒手子曰道之將廢也歟命也古之循善自求多福今之爲善身死非所悲夫君逝逾稔長子福咸守君之官奮君之節捐軀巷戰畢命鋒鏑鬼雄相遇應齋恨地下誓與賊爲厲以答

君父表君及之不自覺老淚泫泫下也

又何文貞公別傳

李元度

公諱桂珍字丹畦雲南師宗人道光十八年進士選庶吉士年甫冠乞假歸娶旋授編修督貴州學政擢侍講直

上書房公所學以宋儒者爲宗柘城竇先生克勤著書明理學流派曰

正宗公續之於朱陸異同辨最晰又以己意增輯西山真氏大學衍義手繕進

優詔納之廣西盜起數抗疏言軍事得失論前大學士賽尙阿前總督徐廣縉誤

國不宜發軍前疏留中天下想望風采咸豐四年五月出爲徽甯池太廣兵備道時安徽久陷改省會廬州仍被踞巡撫福濟公提督和春公軍廬屬之店埠公所治在江南阻於賊大府遂疏留江北檄公募勇隨征餉無所出久之得二百餘人率以西至霍山號召鄉兵得三千有奇激以忠義以十月二日破李兆受於霍城東追擊至麻埠又五日至流波瞳李兆受者故河南捻匪魁也有眾數萬至是爲公破又檄商城固始諸團丁扼歸路而自率所部進追捻黨大患兆受與馬超江等相繼降散脅從萬計百姓懽呼餽糧不絕先是大府檄公援廬江檄未至廬江陷竟劾公奪職軍民皆不能平會曾侍郎督楚師克武漢大破賊田家鎮遂圍九江公通牒楚軍言戰狀侍郎具疏於

朝副都御史袁公時軍臨淮亦欲資公兵西與楚師會公至蘄水矣爲地方吏所尼不得前居亡何九江軍失利武昌再陷侍郎入江西遂隔

絕不相聞公孤軍轉戰瀟霍閒五年正月克蘄水旋克英山殪悍酋田金爵大府檄公駐英山然公任事八閱月支見銀止三百兩不足供一夕炊民兵相從日多又益以兆受降卒無所得食初人日餉麩一斤遞殺至四之一猶弗給五月十一日師遂潰方兆受之降也公請縻以官秩大府難之至是絕糧意不能無望徒感公忠誠不忍背無何超江爲土人所殺兆受顛公拘其仇弗得益大恚則設位哭弔捻黨麇集於是皖豫諸帥爭以兆受反狀

聞榜於衢購兆受頭千金兆受詣公自陳公推赤心拊慰之稍定矣會當道以密書繇驛達公屬先發制之書爲兆受得兆受謂公賣已也遂以十一月三日伏兵戕公於英山之小南門焚其屍颺之從死者四十七人公正命時有白氣如疋練自屋瓦出逾時乃滅年三十有九後二年當事復招兆受降累擢江南提督而公之死無過問者或反用爲詔賜侍郎駐軍宿松爲立石英山紀其事及克江甯特疏訟公屈

予諡文貞

賜祭葬如令典

贊曰公以書生提空名殺賊無餉無軍資無賞罰權而日與反側子居失廬江在奉檄前遽入公罪又以一紙速之死烏虜公何負於人而至此極哉公在翰林劾權貴中外久仄目謁大帥侃侃陳軍事若將為之師者然以是積嫌公公且死不知悟也禍所從來微矣哉雖然古蓋臣烈士蓋未有不橫被冤酷而能不傲於千載者也

何文貞公傳

陳繼聰

何公桂珍字丹畦

一字丹翁

雲南師宗人幼有至性事親敬兄行誼肫摯道

光十八年

成進士選庶吉士年甫冠乞假歸娶士林榮之旋授編修從

太常卿唐確慎公鑑講學期於躬行實踐以宋儒為宗先是柘城竇先

生克勤嘗著書明理學流派曰正宗公續之於朱陸異同辨最晰都下

翕然稱為醇儒二十六年視學貴州晉侍講入直

上書房會粵西盜起數抗疏陳軍事得失論前大學士賽尚阿前總督

徐廣縉誤國不宜發軍前又言治亂在乎君德采朱子真西山大學之

說傳以己意引伸條例手繕成帙隨疏奏進

上嘉之四年五月出為徽甯池太廣兵備道既至皖所屬殘破阻於賊

不得赴任乃謁大帥於廬州軍營

時安徽巡撫福濟

侃侃而談若將為之師者

大帥愕然公又見諸將多擁兵玩寇心甚憤鬱形於吟詠或譏之帥府益爲所嫉檄公募勇西征公私匱乏僅得二百餘人率之以行至霍山徵集潰兵團勇三千有奇推誠獎勵遂以十月二日大破擒渠李兆受於霍城東追至麻埠又五日至流波磔檄商城固始團練堵其北金家寨圍丁禦其東而自率所部遏其西李兆受大懼挈黨馬超江等降公受之散脅從萬計遠近懽悅爭輸糗糧金錢之屬不絕始大府聞公摧破擒寇陰忌之移檄催援廬江檄未至而城先陷竟劾公落職軍民皆不能平會侍郎曾文正公督師圍九江公遣人通牒言戰狀侍郎疏奏於

朝副都御史袁端敏公方軍臨淮亦欲資公以兵俾與楚師會而大府又檄公攻蘄水矣時長淮以南賊所在蜂屯公以孤軍流離西與九江之楚軍不相聞東與廬州大營隔絕朝不謀夕齧指誓眾五年正月攻克蘄水旋率知縣蘇秀槐勦賊英山適羅田令彭惠疇與公善亦遣壯勇相助一戰克之公又殲劇賊田金爵大府乃令留駐英山公出師至是入闕月士卒及民團相從者旣多益以李兆受之降眾無以爲食請餉又不至始猶什人賦麩一斤繼而削減半之旣又半之而賊來愈盛



日提饑卒轉戰不得休五月十二日軍敗徒行泥淖中鄉民或哀而進食公雖強自振厲而體已憊甚矣未幾李兆受之變作兆受本反側持兩端當其初降公請縻以官秩大府難之及絕糧久懷怨望徒感公忠誠不忍背其同降馬超江又爲土人所殺恨官不能捕誅以抵罪遂大怒招集捻黨謀爲超江報仇於是皖豫諸帥皆以兆受復叛入告榜於衢購其頭千金兆受詣公自陳無他公撫慰之事稍定適當道以密書由驛達公屬先發制之書爲兆受得因謂公賣已也遂以十一月三日陽爲置酒高會而伏兵戕公於英山小南門遺體殘毀同遇難者四十七人公正命時有白氣如疋練自屋瓦出逾時乃滅年三十有九公旣死主者猶以兆受反爲公罪身後尚有餘議迨同治三年秋江甯克復曾公疏陳公率鄉團勦賊時饑餓艱危厯人閒未有之苦卒以機事不密爲叛人所害天下冤之在已尤引以爲咎籲請加

恩旌卹得

旨俞行

贈侍郎銜

予謚文貞並賜祭葬世襲騎都尉建祠英山

論曰何文貞公之西征也率潰卒鄉勇烏合之眾能一戰而大破悍捻於霍山可謂將略之超羣矣奈何大府不以爲功反從而扼抑之卒至備嘗艱苦負屈以死若非曾公超雪之誰復知蓋臣之冤哉嗟乎行善獲禍士何以勸讀曾公所撰殉難碑文其詞絕痛雖然讒口翕張久則必消人誰不死貴受其正彼多方排擠者適以成賢者之名耳

劉武烈公別傳

弟騰鶴

李元度

劉公諱騰鴻字峙衡湘鄉人少讀書應童子試不遇遂服賈浪跡江湖聞咸豐三年秋鄂軍潰於田家鎮公夜泊湘江有戎裝數十輩來掠舟公察其語音潮勇也舟有巨礮十數公好言慰之與俱至湘潭告邑令禽鞠之具得其潰逃攜掠狀寘諸法公繇是知名五年夏巡撫駱公命率湘勇五百人勦巴陵土匪李日逢於毛田平其黨數千遂駐岳州九月敗粵賊於通城之莊田十月再敗之羊樓崗乘勝復蒲圻以功敘從九品

賞戴藍翎未幾復咸甯敗賊於紙坊遂抵武昌會攻望山門敗賊鮎魚套當是時羅公澤南方統湘軍攻武昌一見公知爲將才命增募五百人六年正月進壁城下會大雪公策賊且出劫營漏三下率壯士伏營

外約諸營以火箭爲號亡何賊果至皆衣白衣火箭發諸營夾擊之無脫者越日又敗賊於青山得

旨以知縣用時羅軍壁洪山公移屯窯灣攻漢陽門苦戰十數次皆捷公所將曰湘後營樹黑幟賊望見輒走以爲不可當亡何羅公卒於軍李公續賓代領其眾僞翼王石達開自通城竄江西連陷瑞臨袁諸郡曾公國藩駐南昌江楚道梗軍報數月不通鄂撫胡公林翼檄公及同知曾公國華吳君坤修參將普君承堯帥師援江西命再增募五百人四月克咸甯敗賊於通山會江公忠濟敗沒通城乃繇蒲圻崇陽轉戰至通皆復其城追賊於毛田及湘陰之長樂賊遂繇瀏陽竄江西六月師抵萬載復新昌上高遂進攻瑞州郡治貫蜀水有南北二城南曰民城北曰官城聯以石橋七月朔公帥將領察形勢猝與城外賊遇敗之越日進壁西門外僞北王章昌輝自臨江來援比至我軍已拔南城月既望六戰皆捷曾公國藩檄知縣羅君萱等帥江軍來會越日江楚兩軍會剿賊窺江軍新至壘未堅乃分黨犯楚軍而以全力撲江軍新壘鏖鬪竟日江軍有潰者壘垂破矣公帥銳卒數十人大呼出橫貫賊陣賊大奔追殺至城壕礮斃公坐騎公攻益力盡殄濠外賊始從容步歸

未幾楚軍出隊迎餉賊分道出犯殊死戰又大創之於是曾公及江撫文俊公合疏上公功得

旨以直隸州知州留江西補用

賜號衝勇巴圖魯八月朔逆渠黃酋悉悍黨來援眾四萬列陣山岡我軍靜以俟之相持一時許別賊自東北馳至預截我後路山岡賊乃下撲呼聲震屋瓦公俟其逼近發劈山礮擊之退而復進再擊再敗之乃崩奔追擊三十里賊方分路逃而石逆適自九江勾黨來勒敗賊還瑞築五壘於東北路與城賊犄角號稱十萬公與諸將議曰石逆新至不急勦之使壘成禍無底矣遂令楚軍防城賊江軍進勦公率死士三百人督戰行未數里賊大至繞出我軍之後瞰公兵少先犯之三百人植立如塑寂無聲待賊近始發劈山礮殲之賊卻三百人植立如故再近再殲之凡六七次賊氣沮各營併力猛攻遂大捷賊數返鬪數敗之公大呼破其一壘及回軍復擊敗城賊之出犯者時初四日也初江楚兩軍攻瑞不及萬人當往來數萬之賊勢危甚自有此數捷道始通尋分克上高敗傅家墟援賊方官軍之拔南城也賊黨盡萃北城路通臨江大小數十戰莫能斷其接濟公議於南岸築壘斷外援又於北岸石鼓

嶺築新城視舊城尤險固至是賊惟株守舊北城耳十二月公移屯南岸七年正月闕長濠以困之先後遏援賊於馬鞍嶺陰崗嶺皆大破之四月西安將軍福公來視師歎曰吾行軍八年未見有結營平地扼賊而外不能援內不能突如此者會李公績賓進攻九江胡公疏調公回鄂公以功在垂成先遣一軍應之而攻城益力賊夜竄出公追殪之於灰埠六月奪賊南門礮臺七月攻東門毀其城樓十一日破南岸礮臺明日公親督戰中鎗子凡五臥勿能起又明日坐肩輿裹創督攻破卡三奪礮臺一遂攻橋北礮臺城且破忽巨礮中公左脅洞穿遂死之弟騰鶴督勇奮進至夜而城拔矣公貌樸氣靜膽識絕人攻武昌時獨巡濠上城賊大譟礮擊之公呼曰吾且不動任指擊三礮不中者爾當獻城降也賊果三擊之見者咋舌公待弁勇有恩信請告必允亦如期輒至而軍律特嚴無賭博吸鴉片者卒取民間一鴨立斬以徇屯瑞經年民安其業鄉民助餉至二十萬緡毀家無怨其卒也民哀思之作紀恩錄臚陳十四事立祠數十處祈禱輒應其屯軍處一祠尤著靈異云公卒年三十有八

詔視道員例從優議卹

贈光祿寺卿

敕建專祠

子世職同治三年江甯復

優詔追錄前勳

賜諡武烈子一曰青甸

騰鶴字杰人將中營會攻瑞州咸豐七年四月戰南城礮傷左臂創甚  
兄命歸休持不可七月十三日大舉攻城城垂破武烈中礮卒君號痛  
督師急攻比夜城破賊盡殲而武烈不及見矣江西巡撫命接統湘後  
軍遂進援臨江賊敗走乘勝破峽江賊數萬復其城十月會攻吉安壁  
城下闕長濠困賊獨當西南路八年七月江水漲賊乘勢衝出督隊截  
剿無脫者八月十日賊再由江干突圍出擊走之仍逼入城十五日城  
拔君獨率所部窮追數百里斬馘大半時臂創未愈方乞假省親而當  
事已調防九江不獲辭十月屯彭澤九年二月戰勝於牯牛嶺遂進規  
建德擣風雲嶺賊巢破堅壘二忽後隊火藥發賊乘隙來撲眾十倍圍  
之數重君力戰逾時已潰圍出矣慮全軍不支復大呼馳入陣力竭死  
之年二十有八時二月二十八日也是日以勇丁失火敗賴君力戰所

損傷僅百餘人軍械無所失君累功保記名知府

詔視道員例從優議卹

子世爵如制

贊曰公父名象觀郡學生手書誨子諄諄以貪怯爲厲禁公兄弟皆服膺焉公性伉直同事有僉壬時或攘功推過公意常憤憤及卒公父書偶語弔之曰不死於賊必死於小人今而後吾知免矣未能事君惡能事父母已焉哉天實爲之烏虜其言沈痛若此公兄弟所從來有自矣

按察使銜署安徽廬鳳潁道剛愍公墓志銘

馮桂芬

粵賊所至旁近數百里間輒自亂自潰如蝸蟪沸羹而賊亦旋至汔於不守雖吳越馴弱之地皆然矧江之北淮之南民風剽輕平時所稱盜藪哉乃癸丑之變劇寇蔓延而於四境羣盜蜂起獨能以偏隅展轉枝梧五年之久廣袤千餘里中屹然不可動搖者誰之功與曰故署廬鳳道天津金公公諱光筋字念直號濂石系出漢中山王劉氏世居浙江山陰縣五代時避錢鏐嫌名爲今姓七世祖諱世英明季官北直薊鎮標守備殉闖賊難子諱世芳八齡隨母家天津遂占籍焉曾祖諱承基曾祖母徐祖諱嬰祖母胡父名鎔道光乙酉舉人知州銜江蘇睢甯縣

知縣母田三代皆

贈封如公官公屢困童試家貧授徒自給封公官江南公奉胡太夫人  
就養廨齋留心吏治箋注律例成帙爲法家所服尋以例得通判發甘  
肅署巴燕戎格通判往時回番爲民害官率不問公獨往捕之傷於臂  
蓋公愛民嫉惡爲性一生建樹兆端於此久之改安徽知縣會大水青  
陽民以督賦急將爲變撫部檄公往視之公單騎至呼父老曉以大義  
陳說利害民感畏事遂解署定遠縣故多盜公巡鄉甚寒暑若小疾無  
閒捕治輒滿品盜風稍戢民安之尋補建平復調定遠鑪橋土匪陳小  
喚子暴鄉里公下車手刃之民大快移壽州公見獄囚眾晝夜讞鞫旬  
日結案九十餘獄一空咸豐二年冬旌德呂文節公薦公才

命赴軍營大吏以寇近州劇留之明年春安慶陷州聞警姦民聚語將  
爲亂公自鄉馳歸夜漏三下入城始不敢發獄囚有逾垣者手戮數人  
詰且集紳士議團練不數日戰守之具皆完定遠匪陸霞林自安慶獄  
逸出糾黨數千大掠於壽州合肥定遠之邊撫部周文忠公親勦之檄  
公堵截公率勇入賊巢禽霞林父子五人其黨四十餘人送行轅迎謁  
文忠突出抱持公褫其冠易以花翎藍頂冠曰好朋友公大驚文忠曰



霞林巨憝吾慮其南連粵匪爲大患故星夜督兵來君乃探囊取之吾何憂遂專疏薦舉奉

旨賞戴花翎以知府用旣而賊連陷臨淮鳳陽懷遠皆距壽百餘里民一夕數驚公令兩河口以東植竹籤置水營八公山以北雜張旗幟嶺腰林杪皆徧爲疑兵山隘分列礮石州匪談家寶鳳臺匪張茂皆嘯聚數千人公降之後皆效死是冬廬州陷江忠愍公死之四年春六安繼陷州於是乎四面皆賊距城六十里有正陽關爲自南而北之門戶賊大舉犯關公據關爲營迎擊戰酣雨大至火器不熱賊又一軍自旁來公曰天也欲死之左右曰公死城必陷今退入城城陷死未晚公然之多設疑陣聲東擊西且前且卻遂退經一水無舟不得渡頃之居民拏小舟來曰小人有母妻及子買此舟以避難也子號哭不行而止天殆遺此舟以渡我賢父母乎遂全師而濟賊疑有伏亦退賊先後凡五犯關公輒截之大軍攻廬州無後顧憂者公力也于家圍匪季學盛集眾數千聯絡數十里儼然巨寇公先後七閱月督兵再舉始殲焉時又有馬四馬五陳常四汪履祥吳雲程尹傳貴等在州境及定遠六安霍邱合肥境者不下數十股皆劇賊蓄黨千百計兩年中公不分畛域次第

討平之次年大軍復廬州大府選公爲守壽民請留公宵分輕騎出城廂燈火熒熒見公去多泣者公亦爲之淚下一日抵暮廬城火起公馳救令曰譁者斬一人譁禽之又指跣足婦四令並禽之皆賊謀合肥匪顧四匿城中公丙夜潛出署至其處誅之無知者民咸以爲神六年大旱蝗赤地千里公設局平糶下其法於新復之無爲巢廬諸處全活以十萬計勦巨匪王亮彩鄧三虎三虎尤悍煽飢民爲亂公手刺之馬上旣誅威震遠邇姦民無復逞者撫部福公濟列治行以聞奉

旨以道員記名冬署廬鳳潁道至臨淮張捻等已破周鎮王莊犯三十鋪公渡河賊遁無何賊數萬騎千餘大至縱橫四十里公背水爲陣令曰進則生退則死死於敵不勝死於水邪眾曰然遂分三路迎戰公手燃大礮誤擊地地陷祭礮復發血流二三里賊佯走公傳令勿追賊旋從左右兜圍公令中軍截擊之賊後隊踵至又令左右軍合擊之呼聲動天地無不一當百賊大敗死者無算是役也俘云起事來未經此大創公兵纔八百人無一傷者眾以爲有神助頃之無爲巢縣復陷其明年春撫部檄守柘皋柘皋廬之屏障也會疾作檄回臨淮二月龔捻蘇捻大掠正陽關左側公扶疾出師追勦半日行七十里至霍邱與賊戰

於郊援賊大至呼城中并力不應乃退未幾霍邱陷桐城賊突圍出破六安水陸並進直抵關眾議多寡不敵守壽州恐不支不如退保臨淮全廬州後路公曰是怯也賊且輕我必守壽州賊必懼我躡其後若不支有死而已遂入壽公是時已統帶陝甘壽春四川各營兵而在部下則僅千人民望見公旌纛迎呼聲滿山谷公曰無恐吾與此城存亡耳入城賊圍之數日城中知公至皆攘臂登陣輸芻糧治守具不令而集令勇目李士甲等縋城出賊方食譟而乘之敗賊南門外眾以賊地雷爲憂公用地聽法應之果驗地聽者掘深塹置水囊浮銅鉦其上令警者伏聽之賊穴城外卽銅鉦作水漾聲始見墨子蓋古法云一日藥局火公從容偵獲數十賊謀斬之賊攻城多死公令城上多列旗幟而數易之時募死士夜入賊營取一二首級賊輒夜驚有聲公曰懼我矣圍城之八夕星暗雲迷銜枚出師設伏八公山爲應分三道襲賊營賊驚逸而八公山火起賊自相踐踏轉戰終夕賊壘悉平遲明見積尸滿野遺屍百車敘功加按察使銜公遂進攻正陽自唐家店至枸杞園毀賊營三禽逆首吳守剛張定邦楊得應等進師三十鋪令知縣劉錫齡守備黃鳴鐸游擊成桂吉昌率水師會於黃天澗毀賊營四十餘殺四千

餘人淮水盡赤水陸環攻五晝夜三登三郤平且復登遂復正陽關  
賞鏗色巴圖魯勇號無何張捻等自三河尖東犯公沿淮拒戰互有勝  
負粵賊偵公在外潛師復陷正陽公聞馳還至沫河口屠家窯見賊營  
四一鼓下之直擣北關屢戰屢勝會都統勝公保師抵八里塚隔河而  
軍公晉謁議造浮橋渡騎兵未成賊突至勝公檄公迎戰公在舟中左  
持矛右握纛一躍登岸兵凡千人自辰至未戰不利左右奪公冑請走  
公不許轉戰渡河而歿時咸豐七年閏五月四日也公生於嘉慶二十  
一年某月某日春秋四十有二公尸屹立水中顏色如生弁兵護之歸  
壽民皆縞素哭失聲前一夕營西北有大星隕公曰不日恐折大將乃  
自應之悲夫州有童謠云小將不如老將勝西風吹斷壽陽橋及是果  
應事聞

上嘉悼

命視布政使陣亡例賜卹世襲騎都尉諡剛愍祀昭忠建專祠公忠孝  
本於天性嘗謂弟思度耀庚曰時事日棘吾必死雙親春秋高侍養事  
汝二人任之矣言訖淚下又謂幕賓汪君榮桂曰吾自英夷兵起便以  
身許

國何待今日哉節儉廉潔守正不阿軍興廳事不設讌妻子或彌月不  
 相見在軍食藜藿藉草蓐與士卒同甘苦蠲一切陋規所至卻供張曰  
 我取於彼彼取於民民方倒懸不救之轉累之乎大帥行營距不百里  
 不通一柬以是失大帥心在壽州某觀察巡河從者求站費公欲置諸  
 法乞哀乃釋之初至廬廬新復大兵未去或奪民財公懲以法卒結隊  
 入城公亦率兵與巷戰卒不能勝始伏罪翼日負荆大帥門大帥笑謝  
 之舉僚屬極愼曰中人以下無不以得失爲心稍靳之使有所羨斯可  
 盡其力用兵善持重多勝少敗賊畏公比之黑虎追賊正陽關外所過  
 隘口賊皆粉書畏服君威幸勿窮追字公之入壽州賊首陳玉成聞跌  
 足曰事不濟矣令其下裹糧而宿夜聞風葉聲輒起視云其論兵有曰  
 上則操必勝之術次則立不敗之地上雖高於次次實要於上兵法所  
 謂先爲不可勝以待敵之可勝也上書大府論時弊略言大兵宜攻不  
 宜守地方官宜守四境不宜守孤城時皆以爲名言戰勝歸輒愀然不  
 樂曰死者皆民也甘心爲賊者十之一二耳軍暇賦詩見志有古名將  
 風愛民如子壽民感之誕日萬家香火以爲常丹旒出臨淮五河送祭  
 者凡數千人蓋功德入於人心有如此配郭夫人津庠生象謙女子厚

增候選直隸州知州龔世職女二長字張郁昌次未字先是封公侍胡  
太夫人寓蘇州道梗未北歸厚增奉公殯至蘇卜以某月日葬於吳縣  
某原以祖命齎行狀來乞銘墓余子芳緝與厚增爲僚壻表章忠義又  
夙志也不敢辭銘曰

雕捍之俗崇達之區豺虎一縱先之羣狐沸騰煽熾蔓不可圖硯硯金  
公傲若有餘指揮料量苗薈髮梳博碁九子轉之覆孟握蛇騎虎目蓼  
口茶隻手搯拄五載崎嶇在垣有寇井里晏如功在江淮豈惟鳳廬壽  
城十雉箕稈空虛焦炊戶汲梁欄松芻薰以穢火偵以瓶壺凡八晝夜  
法墨窮輸開關延敵起痍奮呼我我正陽雄絕當途懸布一躍拉朽摧  
枯焚焚羣兇嫉公剝膚蜂屯蟻聚有億其徒鞍圍鋒林雨矢星珠彼淮  
之陽萬隊貔獅霽雲齧指援闕力孤張脊慷慨盪決先驅在險彌亮臨  
危不渝佻身飛鏃誓命清渠大星宵隕陽曦晝糊街號巷哭幼攜老扶  
公之矢志與捧檄俱龍淵太阿謂汝知予雙門並擬乃白不朱長城旣

壤

至尊悼吁飾終之典常儀有逾北行道第營窆始蘇九龍蜿蟺環護幽  
墟忠魂毅魄聿安厥居英風萬古重我三吳

又記壽州金刺史禽陸遐齡事

戴鈞例

陸遐齡定遠縣巨猾也以罪幽安慶獄中待決粵賊破安慶出之獄使歸結黨爲北路諸郡應是時東阿周公奉

命爲欽差大臣檄定遠令葛某禽之令辭曰遐齡建逆黨號黨數千人某庸懦書生公雖斬某某不能禽也必欲禽者其壽州金刺史乎公遂飛檄召君君將行壽州士民來請曰使君且去則壽州夕以亂君曰欽差檄不可違當親往謝之數日卽歸無慮也至則訪遐齡所在周公命壽州游擊守備率兵隨往莫敢前君乃偕一人至其地詐言與遐齡有舊請見直入臥內出不意禽之遐齡左右起持刀君曰我壽州知州金某也奉周公命來赦汝使殺賊立功左右若擊我汝必死矣君先爲定遠令以武勇著聲偕往者某又久以雙刀號千人敵故左右相顧莫敢發遂禽以見周公斬之而其黨散時遐齡將以後數日率眾往金陵與粵賊合也子友孫海岑客壽州爲言其略如此

戴鈞衡曰刺史之功偉矣聞周公奏請以知府用加道銜

賞戴花翎宜也乃其後以部議奪去嗚呼不世出之才當危難之際破格超遷猶恐不足以勸能者而部臣必欲奪之何心耶是年冬賊破廬

續碑傳集卷五十八  
州分隊入壽春刺史殺之盡自後賊不敢犯海岑曰刺史忠勇由天性  
不以功名得失爲念刺史則誠賢矣予獨悲逆賊所至諸大臣勢如瓦  
解而才如刺史者僅得以一州抗賊也惜哉刺史名光筋直隸大興人



續碑傳集五十九

江陰繆荃孫纂錄

忠節六

劉觀察傳

馮桂芬

君諱存厚號仲山四川榮縣人祖廷選父光德叔父某無子以君爲後  
早卒母曹淑人撫之榮爲癩匪出沒之地君家恆結砦自衛故自幼習  
武事試不中以例得刑部主事咸豐三年軍興侍郎王公茂蔭以知兵  
薦奉

旨參大城向忠武公榮軍務從圍江甯忠武亦蜀人願以文臣故不甚  
見禮副帥江蘇巡撫錢塘許公乃釗獨奇之幕府長洲馬中書釗尤與  
君善是夏中書與程中丞庭桂暨余謀以下游鄉兵不足恃請之副帥  
捐資募勇別爲一軍屬蘇撫名曰撫勇下游無事則從勦有警則馳援  
以君領之軍甫成秋八月上海劉麗川反青浦嘉定寶山南匯川沙六  
城相繼陷君聞策馬倍道來援夜薄青浦城未至數里誠人持一營潛  
行登陴而蒸之至則君一躍登城攬數賊殺之投城中火烈具舉賊大  
驚潰遂克之分兵徇嘉定等四城賊皆走無何副帥至遂進師上海圍

攻凡十有八月更許公暨長白吉勇烈公兩帥始克之君之功居多君  
先留江蘇以同知用敘青浦功擢江甯府知府上海平

記名以道員用五年春二月從吉公攻鎮江郡西南多高山君霧夜進

兵盡埽山下諸賊壘遂壁其顛賊始不敢輕出城六年正月江甯賊數

萬援鎮江屯下蜀街君偕提督張忠愍公禦之屢戰屢捷殲賊以萬計

河水爲赤三月瓜洲兵潰江北賊南渡犯高資君從吉公馳援吉公陣

歿君護其屍賊糜至奪尸去君還求之馳突萬賊中所殺數十百人馬

陷於淖遂死時六年四月晦也事聞

賜卹如今甲越二年官軍克鎮江君部卒夢君示死所且而迹之信乃

擇地鎮城外竹林寺側葬之

舊史氏曰君之攻上海也制軍檄君屬於署臬使吉公公以令箭招君

君不受詣公以冠提地下謂公曰吾不能爲此官內司外司同官耳縱

吾忍之如辱

朝廷何公負荆謝乃已公嘗謂余曰此軍無劉某且殆吾爲

國事屈也已而交大驩至以死從公君固絕特吉公亦可謂知人哉

徐觀察傳 陳繼聰

徐公榮字鐵生漢軍正黃旗人先世駐防廣州公生有異質幼而能文年十五補諸生旋以舉人大挑爲藁城訓導中道光十六年進士試令浙江歷宰遂昌嘉興臨安諸縣俱以清廉著聲嘗奉檄撫卹奉化難民所過拒絕饋送一日途中絕糧僕從皆愠公獨晏然自如賦餓鄉詩以見志撫軍劉公韻珂甚器重之適值海疆軍務已竣會城設報銷局撫軍委公任其事嚴浮冒杜侵漁綜核精當不染錙銖遷玉環同知升紹興知府辦理水災散粟振饑民咸德之調守杭州姦徒希圖搶掠每宵縱火城外又多盜斫蔭木皆捕而懲治之其患乃除復嚴行保甲法巷限以柵守以邏卒夜必躬巡不辭勞瘁咸豐三年署杭嘉湖道於潛趙四喜兄弟聚黨屯天目山謀據縣城作亂公督兵勇掩之擣其巢於昭明寺禽斬兇悍百餘人餘黨悉平會粵賊自江西竄擾浙境大府命公籌辦防堵事宜公乃增設常山開化之戍以及貴溪弋陽等處亦相要害而布置之賊見守嚴引去四年祁門失守公以皖南新轄浙江天子亦有保徽卽以保浙之旨方抱疾臥聞警請行率兵馳至嚴州復往徽郡親歷各嶺扼險防守勸諭紳耆勤加團練連次殺賊同諸大將收復東流建德二縣五年二月賊又驅眾大至土寇望風迎導攻陷黟

縣公急檄催他將進兵自率新軍屯營漁亭遇賊禦之中矛被害年六十四同死者都司許上達知事張穎實等數人公子慮善奪公尸以歸

時

朝廷適有福建汀漳龍道之命而公已先歿矣妾伍氏在省城聞訃亦投繯死公狀貌清癯生平最嚴義利之辨恆以行無悔事讀有用書二語自勸晚尤服膺先儒呂新吾劉念臺之書律已嚴而待人必恕士有片長獎許惟恐不至著有大戴禮補注日新要錄懷古田舍詩集撰述甚富其志節尤錚錚自矢爲杭守時淞江多警嘗命鑿井於署語家人曰此卽古人止水亭也一旦有變吾當以此爲葬骨處卒踐其言歟賊而死

天子深爲軫惜以正三品

賜卹世襲騎都尉崇祀浙江名宦祠伍氏亦以貞烈蒙旌

論曰公自爲諸生肄業粵秀書院舉爲學海堂齋長已盛有才譽工詩精隸書善畫梅時人以三絕推之作令放衙輒喜吟詠太傅阮文達公嘗呼爲詩縣令其宦浙二十載清而惠持躬無過失終以馳驅王事慷慨殉難蓋文章經濟道德氣節公實兼而有之也

贈布政使銜防堵六合候補道溫公祠碑

徐勳

公諱紹原號北屏先世大興人伯祖屏山公以乾隆辛未進士歷官湖北漢黃道遂家焉贈公某某司訓以明經起家生子四人公居長幼慧讀史識大義工吟詠以家貧棄舉子業囊筆游楚北州府交辟初筮仕淮南厭鹺務事改地方官大府器之

今上御極之元年七月檄公署六合縣事甫莅任除前令苛政省役減賦月進諸生而課之士民大悅西北鄉強梗難治官有親行踏勘事往往中途反公曰官之於民如家人父子不見面則猜嫌生率家丁數人徧歷邊堡男婦數十年不見官長聞公至歡呼跪迎公察民情之可用也勸捐義穀數萬石就各堡儲之鳩工庀餽甌修城垣之圯者時賊方遠在粵西而公督促司事者日數至眾未以為急務三年癸丑正月工甫竣而賊已陷九江安慶且逼金陵矣先數月公勦團練法合三四堡為一聯戶出壯丁製旗幟器械約賊至以鳴鑼為號別募壯士數百人親教之戰賊既陷金陵連陷鎮江揚州分兵犯我東溝瓜埠皇廠河鄉民殲其二十七騎四月初八日壬午賊大至公禦之龍池眾寡不敵千總徐琳外委達成榮戰死公單騎緩轡而殿賊疑有伏不敢逼退踞南

關意城且旦夕下酒脯羣飲夜未半四面火起賊駭爲神大亂兵勇躡之殺僞丞相一僞統制四餘賊殲焉賊自起廣西殘全楚突江西順流數千里莫敢攖其鋒至六合輒敗忿甚顧不敢深入掠沿江諸堡公督守備秦懷揚千總夏定邦王家幹等隨機禦之禽獲過當扼要路浚品字坑埋地雷火礮置梅花椿於港汊以斷賊徑別募水勇掉小舟泗水與之上下賊技益窮爲之語曰鐵鑄六合是時江南北督師者各一帥六合歸北帥轄而兼承南帥之令冬十二月南帥向軍門列公禦賊狀於

朝謂爲江南北第一出色之員擢知府

賞戴花翎賊初謀由六合夾攻甘泉山大營旣屢不得志於我乃築營九伏洲扼金陵達廬鳳之路結木簾長數十丈上築壘穴旁置礮順流以竄下游眾謂事不在六合公笑曰大局壞一隅能獨保乎四年甲寅九月焚賊簾於八卦洲十月會官兵攻九伏洲乘霧破其壘斬賊數千人是役也公寔首事比北帥論功他將帥晉階而公僅予一級賊於上游鐵鎖斷江路向軍門謂賊且下竄謀於下游黃天蕩亦置鐵鎖以阻之計非公不足任而慮其以九伏洲事介懷私書慰藉公曰賊一日未

平紹原敢論功乎鑄鐵鍊數千斤設礮船及火攻子母船以守之賊數  
衝突輒敗去又親過艇師總兵吳全美船勸以立功弭謗吳感公義卽  
日冒死斬賊練駛船直上江路以通是時賊不敢窺北渡專力下游故  
沿江百姓稱安堵而我勇弁顧踴躍思鬪乃截擊賊下駛之船於江七  
出七勝破南岸之七里洲營燬其船賊慮水路梗乃出陸路下竄乘閒  
築壘於高資下蜀街重濠周之六年丙辰正月巡撫吉爾杭阿來檄六  
合勇助勦公命弟同知綸與守備夏定邦率千餘人以往賊望見六合  
旗幟輒退走進平其壘方冀會江南官軍復鎮江而江北揚州大營爲  
賊所襲北帥托明阿棄軍走蔣王廟賊勢復張與皖省捻匪相呼應二  
月陷江浦進犯浦口總兵武慶棄營走賊踞六合之葛塘集會南帥向  
軍門檄總兵張國樑來援公督秦懷揚等會師戰於龍池大破之追至  
藏軍營盤城集再戰再破之十九日丁未復浦口二十一日己酉復江  
浦初賊東西兩路夾攻志在必克及陷儀徵而聞西路之敗乃棄不守  
遁回瓜洲公與在籍贊善徐鼐交章劾武慶罪代北帥者爲都統德興  
阿檄撤武慶而以總兵安勇將其軍諸將心益堅五月賊另股自江西  
來舳艫蔽江下吉撫軍歿於陣鎮江九華山大營悉潰向軍門退守丹

陽句容灤水相繼陷江浦復失江以南數千里烽火相望而江北大旱蝗斗米銀一兩桶水錢二十天長梟匪嘯聚數千人來安山匪結金陵賊突踞縣城築寨石鼓山公謂此烏合眾必先勦後撫親督守備王家幹千總俞承恩由施官集進討一日三戰大破之旋遣幹役入山招撫不旬日鄰境肅清先是公署江甯府德帥奏擢公以道員用公謂拜恩私室爲近世陋習執屬員禮如故暨公再上來安將弁功德帥謂公越境邀功公執脣亡齒寒意苦相抵德帥乃疏劾公干預保舉

天子稔知公無罪而重違帥意褫公職

諭以防堵江北自效不數月制軍何桂清疏訟公冤

詔開復知府是年冬十一月南副帥張國樑急攻鎮江賊撤江北瓜洲眾將并力出逸德帥亦以其閒復瓜洲德帥雖於公有舉劾事顧未識面旣復瓜洲則移大營於浦口道出六合公陳復江浦策東門外之某山爲賊所必爭公請以所部任之德帥亦心動明年戊午春二月公督秦懷揚等攻克江浦德帥奏復公官賊旁陷來安公復率眾復之奏加公鹽運使銜是時皖省捻匪與粵匪合勢大熾秋七月廬鳳連陷賊前隊犯滁州之水口鎮公檄夏定邦駐雷官集俞承恩駐大殷集與都統



富明阿副將鄧鳳林之駐施官集者相策應以備賊自西來謂帥營在南路也八月二十日壬戌賊自和舍犯大營未交鋒而營中火忽起德帥倉卒登廣艇遁眾大潰有都統穆某率眾自六合東竄公挽之不可止乃檄西路兵勇回城守禦癸亥賊奄至南關公焚浮橋畫河而守王家幹俞承恩敗賊於壺蘆套賊少卻賊帥號四眼狗陳天安者謀曰六合所以不可破者以兵勇與土團相救應也今聞大營破土團必膽落我以眾抵城下使兵勇不敢離城而別遣驍銳四出破其土團且收旁縣使城中勢孤則可圖矣丙寅天大霧賊自楊家河以木簰潛渡富明阿鄧鳳林不能禦賊乃沿河西走掠桂家營程駕橋竹墩雷官施官諸集鎮巴山土團與戰殲焉北行者焚馬家集四合墩遂破天長賊既破我土團乃大集城下射書城中誘降莫之應晝夜急攻城上多方禦之又自西北門暗掘地道城中亦以地道應之凡三掘三穿賊多傷小東門濱河沮洳城中掘尺餘輒見水賊於城外民房掘得燥土乃礮石伴急攻而潛洞地以達城腳火藥實空棺轟之城遂陷時戊午九月十九日丁卯也公遇害夫人王氏孀婦陳氏次子輔材殉焉先是公募能伏水中行者齋血書告急於南北大營張國樑勝保各督兵來援先後抵

城外數十里而城已陷矣同時殉難者都司夏定邦守備俞承恩王家幹千總海從龍知六合縣李守誠典史周錫光葉楸奎及紳士城守者數十人皆助公守禦有功者也事聞

天子震悼

贈公布政使司銜立專祠家屬及官弁之著者并耐祀焉

臣肅曰壬子之冬肅以檢討乞假歸省抵里而聞楚警紹原詳請留辦捐輸團練五載之中無役不從紹原遇危事則身先之金陵之初陷也英夷火輪船駛入長江紹原獲夷人通賊書以聞向軍門檄紹原偕臣肅犒遣之火輪船賊船旁紹原手白旗招之賊噪呼殺妖不爲動又有言鹽艘通賊者率眾搜捕艘數百歸巨如山眾疑不敢前紹原手攀鐵錨躍而上眾從之徧歷諸艘而返四年二月與賊戰通江集失利慮歸路狹爲賊所乘手大刀殺退者數人眾乃止整隊再進植坐燾於江干賊收入觀音門始麾軍退六年七月攻江浦飛礮落足前不盈咫尺不爲動臣肅嘗從容言公一身係安危宜持重自愛紹原慨然曰足下愛我言誠是顧紹原何人乃辱

皇上知敢愛身乎且死生命也既大軍移營江浦紹原謂臣肅曰以彈

丸邑養勇數千人費錢千百萬哀我人斯亦既勞止今大營足爲吾邑衛君輩可少息肩矣時眾紳多奉檄之官臣肅亦以知府需次京師授福建福甯府戊午七月三日謝

恩勤政殿

上詢紹原年齒起居及防堵事甚悉臣肅具以對

上曰汝來京六合捐輸團練事孰任之乎臣肅對曰始紹原任地方官事煩臣勉力襄事自紹原革職辦防堵臣慮其呼應不靈已將臣事全付之以一事權矣

上曰新令李守誠能了事乎臣肅對曰守誠亦清勤好官惟六合逼金陵西接滁來實爲廬鳳管轄防堵事非紹原不可了

上頷之至再方擬便道回里述

天眷以告紹原九月朔日抵清江浦則六合已不可歸矣嗚呼六合以小邑當賊鋒向時揚州大營遠在百五十里外救援不相及五載來大小數十戰挫賊鋒者屢矣今大營勝兵數萬碁布星羅謂可聊固吾圉而卒以長木之標受池魚之殃使一邑文武及招集四方驍銳之士騰蹕奮發而無前者如岸龍奔虎智勇不及設施倉卒鈐縛以同灰燼此

固事勢所不可解而亦臣肅與紹原所不及料也紹原死後而江北事始不可爲矣嗚乎豈非天哉

又溫令君傳

方濬頤

溫紹原字北屏湖北江夏人由鹽運司知事捐升知縣分發江甯咸豐元年代理六合爲民所留因署縣事二年冬粵賊陷武昌紹原亟修城垣工甫竣總督陸建瀛已由九江潰還江甯而賊踵至琦文勤公以軍救江甯抵六合聞江甯陷揚州亦相繼陷遂率眾圍揚州拒賊北上而留黑龍江兵二千駐浦口吉林八起馬隊駐六合四月賊以十二軍犯浦口黑龍江兵潰進犯六合紹原督千總徐琳外委達成榮拒之於龍池時天大雨成榮著皮鞞腰刀執環仗連殺十數人賊辟易會賊十二軍畢集成榮與其婿李祥和死之紹原聞敗以餘眾退入城密遣死士縋出賊後夜縱火賊方毀火神廟推其像不仆大驚火旋起益詫爲神大亂紹原率吉林兵自火中突出橫擊之賊遂遁紹原請兵於文勤爲賊再至計文勤命總兵武慶總浦口軍以睢甯人王家幹署城守代徐琳紹原益募勇令千總夏定邦駐卸甲店家幹及秦懷揚楊升駐城中武生陸占魁鄉董任瞻如阮悅三帶練勇分駐各鄉時六合駐防兵勇

合浦口官兵得八九千人賊遂不敢正視十月賊犯東溝外委胡某戰死定邦力卻之嗣揚州調回吉林軍以都司鄧鳳林督固原兵三百來駐治浦橋分家幹督徐州勇守東城千總徐鎮海守南城占魁守西城武舉楊士義督民勇守北城哈連陞東南角達孝侯東北角皆回勇吉林馬隊及懷揚楊升瞻如悅三爲游兵四年復移支應局於城中規模大定與揚州江甯軍聲相應商賈輻輳全盱泗皆由瓜步渡江上游商賈市米穀者漸至分置卡隘按千錢收釐三分計十七局用益饒二月賊犯浦口武慶擊敗之紹原令水勇拏小舟徑入賊寨奪賊船無算賊橫鐵鎖三重於白河口北通九洲截艇師不得上駛時艇師吳全美以事被議懷觀望紹原詣其舟說之且請於向忠武公以百口保全美全美感奮斷鐵鎖三重江路以通五年春賊援鎮江聯巨筏爲四牌施樓櫓中載糗糧障以牛皮名曰龜船順流東下拖簷紅單諸戰船左右夾擊紹原令水勇沿江燒之其竄入泗源溝者亦爲艇師所截紹原乃議於段腰口橫江設鎖復親詣相度潛至觀音門七里洲時南岸之民已從賊紹原陰撫之南岸民亦陰以賊事輸紹原夏吉林馬隊調往揚州遣前戍六合七八兩起及曹州鎮多隆武勇五百人來戍紹原與

多隆武議勅築土城七月立上下兩河釐局令附生陳慶華王鶴齡駐  
迎秀庵防水道姦宄十月命四鄉整飭團練設火藥局十一月懷揚家  
幹擊賊於九洲遂破之紹原擢知府  
賞戴花翎懷揚等升賞有差是月江蘇巡撫吉爾杭阿調六合勇至鎮  
江紹原命定邦頭起五百人往二起三起繼之定邦至鎮江擊賊頗有  
功六年春賊犯浦口總兵武慶敗退走六合浦口陷紹原飛書請援於  
忠武忠武遣漳州鎮總兵張國樑率兵四千由石埠橋渡江築五營於  
龍池賊回攻國樑國樑擊其前紹原率懷揚及千總海從龍邀其後大  
破賊於毛許墩賊由葛塘遁紹原從國樑連克浦口江浦二城會賊由  
儀徵入揚州紹原亦退歸浦口因請益兵於忠武忠武派副都統明安  
泰督兵二千駐治浦橋儀徵復撤回紹原又請於吉爾杭阿將三起練  
勇撤回軍乃振五月吉爾杭阿兵敗於九華山死之江甯府知府劉存  
厚從死於是紹原擢江甯府知府留駐六合以李守誠補六合令七月  
大營兵潰忠武退丹陽江北旱土匪蠶起於天長之三龍岡紹原馳  
往斬一人亂乃定八月土匪又起來安紹原率懷揚家幹大戰於施官  
鎮賊退保鼓山紹原移書來安令招撫之淮南鹽運不通窮民由邵伯

鎮秦蘭鎮擔負以往輒指爲私販紹原設局抽釐販私者始安時鈔法  
大壞當百當五十錢不行當十鈔錢三七配搭鈔苦窳而制錢益少紹  
原先設局發票每張起五十文至三百文爲度自往局中署押復設局  
開鑄以應支付當百當五十悉銷煨新鑄之錢質雖輕民便之冬紹原  
攻江浦不克七年春都統德興阿劾紹原干預保舉鐫職仍予辦六浦  
兩縣團練時西北捻匪猖獗勇索餉譁於南門紹原出斬一人始定三  
月東鄉土匪糾眾劫掠紹原往勦之五月總督何桂清上其功奏請開  
復原官仍留六合署江甯府事九月紹原以捻匪日熾掘七濠東由靈  
巖山腳入河南通龍池西北去城三里周圍築土城高四尺十一月瓜  
鎮相繼克復德興阿移鎮浦口紹原請攻江浦率懷揚家幹會大軍攻  
江浦克之進屯七里洲惟九洲爲賊餉道紹原遂裁撤治浦橋各營  
懷揚以事勒休留揚州勇一隊減徐勇十之四以節軍費德興阿上江  
浦功紹原從優議敘八年二月賊自福建竄常山杭蘇大震桂清調六  
合勇過江南紹原遂詣桂清於常州將赴援浙西三月賊破和州大營  
結捻匪連陷全椒滁州來安浦口戒嚴初七日賊窺六合西鄙去城四  
十五里知縣李守誠請於桂清撤回紹原十四日紹原至六合會官軍

出攻來安克之留總兵羅玉斌駐守德興阿上其功加鹽運使銜奏充  
大營翼長四月候補道今四川總督吳棠督旣泗團練攻滁全不克馳  
書紹原請於德興阿德興阿以地非所轄卒不往五月鳳陽五河相繼  
陷六合池西無完土秋僞丞相四眼狗定計率悍賊東下攻浦六以解  
江甯圍八月十一日官軍敗績於小店精銳失數千人浦六大震紹原  
病甚亟請救於欽差大臣和春令參將馮子材星夜督兵四千渡江來  
援賊以偏師綴之於江浦而以大隊攻浦口二十日總兵向奎率兵二  
千繼至營壘未立賊大進奎軍潰守浦口總兵安勇出援奎亦戰沒德  
興阿乘艇船從江上東走各營瓦解馮子材亦棄江浦回江甯紹原聞  
變亟議城守知縣李守誠邀德興阿於紅山窰請移駐六合德興阿不  
聽遂延庶吉士唐嘉德往江甯求救撤富春鄧鳳林夏定邦俞承恩諸  
軍入城留陸占魁一軍於程家橋防賊偷渡二十一日賊至龍池家幹  
擊之不克退入城賊踵至時楊升所帶壽州勇悉潰徐州勇止存其半  
紹原登南門鎗礮對舉相持至三鼓復派家幹突圍焚龍津浮橋二十  
二日黎明夏定邦俞承恩至日午羅玉斌及富春鄧鳳林王福來哈連  
陞先後至紹原令海從龍督回勇守東門俞承恩守南門夏定邦守西



門羅玉斌守北門其餘馬步隊四面策應二十三日北鄉九保勇悉潰是日馮子材復提兵二千至冶浦橋二十五日賊分兩股一由三里營繞至東北角陳於泰山墩一由南路東抵羅星石紹原令子材鳳林抵東路家幹福來抵南路富春往來策應戰甫合賊由龍窩偷渡出我軍後富鄧諸軍悉潰而北至邵伯鎮子材潰而東南退守瓜洲家幹福來爲賊所截投水死賊遂陷儀徵天長諸州縣二十八日賊擾北鄉董事方寶華合村死之二十九日賊破瓜雙鋪阮悅三死之四鄉皆賊紹原閉城自守九月初五日賊攻小北門定邦縋城出戰賊始退賊又築月牙城內嚮環設大礮攻益急紹原募能出城請救予重賞迄無應者乃釋重囚啗以利齧血作書二通一乞援於勝保勝保以六合非所轄且天長有賊不應一乞援於和春時揚州先於初三日失守和春命總統張國樑由揚州援六合以致久不至俞承恩請潰圍出奔紹原大集將士告之曰賊眾援絕城中數萬性命恃我等爲存亡舍之去如老弱何定邦曰賊眾我寡出必不免請誓死以待援紹原曰定邦之言是也敢言出者斬國樑於十五日克揚州十六日復儀徵十七日與賊戰於陳板橋日已晡止焉四眼狗聞國樑至急攻西北門三掘地道紹原三應

之賊乃於小東門外濠掘塹穿濠指木板沈竹筏上施牛皮舁火藥兩  
櫬入地道十八日寅刻藥作賊蟻附上紹原巡警至東城聞變投水死  
子輔才以復浦口功保舉縣丞城將陷紹原使之行輔才涕泣請留城  
陷與紹原妻王氏並遇害事聞

贈紹原布政使賜卹雲騎尉世襲紹原投水後知縣李守誠自縊於堂  
上羅玉斌至校場大呼曰我總兵羅玉斌也手刃數賊力竭而死夏定  
邦自刎於城上俞承恩墜城而死典史葉懋金千總海從龍同父定國  
千總朱金標把總毛國祥委員馮明本周錫光李作霖朱青雲朱廷碩  
朱安祺劉承炳榮炳陳慶榮慶華俱為賊殺孫應奎陳樹德唐嘉謨王  
鶴齡陳樹泳陸沆金蘭芳俱闔門殉難城中男丁無大小悉斃婦女自  
縊及投水者池井皆滿西北城兵勇悉戰於連家巷殲焉其縊城倖脫  
者止二百餘人

方濬頤曰予曩家居聞温君守六合為江北諸邑之冠及至京師晤徐  
彝舟同年復道其戰功彝舟故居六合親見之言綦詳迨己巳之春予  
由廬州赴揚州道六合阻雨宿縣治欲以詩弔温君索其事蹟不得悵  
然久之今獲董策三農部從友人處借鈔温君之狀因詮次於篇以著

夫使爲邑令者盡如温君則粵賊奚至所向無敵蹂躪幾徧天下耶張忠武來援不幸爲揚州所牽制而六合遂陷於賊温君死之同時殉難者一一姓名具在嗚呼烈已於此可知温君平日之訓練有方而多士之馳驅用命也惜乎不令其親見金陵克復大難削平同膺懋賞也不亦大可悲哉

又温壯勇公事狀

程晚

公姓温名紹原號北屏黃陂人幼慧識大義長游幕州府交辟初仕淮南鹽知事已而改地方官咸豐元年七月大府檄署六合縣事蒞任除前苛政省役賦民大悅西北鄉強梗難治官憚親往公率數人徧歷之民以數十年不見官長聞公至歡呼跪迎公察民情可用勸捐義穀完堡障修城垣時賊遠在廣西而公督之急三年癸丑正月工甫竣賊且逼江甯先數月公創團練法合三四堡爲一戶出壯丁製旗幟器械約賊至鳴金爲號別募壯士千人親教之戰賊旣陷江甯連陷鎮江揚州分兵犯東溝鄉民殲其游騎四月八日賊大至公禦之龍池眾寡不敵千總徐琳外委達成榮戰死公單騎緩轡殿賊疑之不敢追進踞南關城旦夕下歡呼酣飲夜半四面火起賊駭爲神大亂兵勇乘之殺僞丞

相一餘賊殲焉賊自起廣西殘全楚突江皖順流數千里守土官鮮與  
抗者至是忿甚顧不敢深入掠沿江諸堡公督守備秦懷揚千總夏定  
邦王家幹等隨機禦之賊不得逞爲語曰紙糊金陵城鐵鑄六合縣時  
江南北督帥各一六合歸江北而兼承南帥令冬十二月南帥向忠武  
列公戰狀於

朝擢知府

賞戴花翎賊初謀由六合夾攻揚州大營旣不得逞乃築營九泐洲扼  
江甯達廬鳳之路結木簰長數十丈築壘穴旁置礮以竄下游眾謂事  
不在六合公曰大局壞一隅能完乎四年甲寅九月會官軍攻九泐洲  
乘霧登其壘斬馘數千公之功爲多北帥論他將功而公僅予一級賊  
於上游置鐵鎖斷江路向忠武謂賊且下竄謀於下游黃天蕩亦置鐵  
鎖阻之計非公不足任慮公怨望私書慰之公曰賊一日不平功於何  
論鑄鐵練數千斤設礮船守之賊屢犯敗去沿江安堵而弁勇踴躍思  
鬪乃截擊賊下駛之船於江七出七勝破南岸之七里洲賊營毀其舟  
賊慮水路梗乃出陸路下竄壘高資下蜀街六年丙辰正月吉忠烈檄  
六合勇助勦公命千人往賊望見旗幟輒走進平其壘方冀會江南官

軍復鎮江而江北大營爲賊所襲北帥托將軍棄軍走賊勢復熾與亭  
捻相呼應二月陷江浦進犯浦口總兵武慶棄營走賊進踞六合之葛  
塘集會南軍張忠武來援公會師於龍池大破之十九日復江浦廿一  
日復浦口初賊東西夾攻志在必克及陷儀徵聞西路之敗乃遁回瓜  
洲公與在籍贊善徐鼐上書劾武慶代北帥者爲都護德與阿檄撤武  
慶以總兵安勇將其軍軍心益堅五月賊別股自江西來舳舻蔽江吉  
忠烈戰歿鎮江大營潰向忠武退守丹陽句容溧水俱陷江浦復失江  
以南數千里烽火相望江北大旱斗米銀一兩天長梟匪嘯聚數千人  
來安山匪結江甯賊踞縣城築壘石鼓山公謂烏合之眾必先勦後撫  
親督軍進勦一日三捷盡降其眾鄰境肅清先是公署江甯府德帥奏  
公以道員用公謂拜恩私室近世陋習執屬員禮如故暨公再上來安  
將弁功德帥謂公越境徼功公執脣亡齒寒苦相抵德帥乃劾公干與  
保舉

天子知公無罪重違帥意褫公職

諭以防堵江北自效不數月何制軍訟公冤  
詔開復知府是年冬副帥張忠武急攻鎮江賊撤江北之眾迸力逸德

帥因之復瓜洲德帥於公有舉劾事顧未識面既復瓜洲則移營浦口道六合公陳復江浦計東門外某山賊所必爭請自任之德帥亦心動明年戊午春二月公督秦懷揚等克江浦德帥奏復公職賊旁陷來安公又復之奏加公運使銜時毫捻與粵匪合勢大熾秋七月廬鳳連陷賊前隊犯滁之水口鎮公檄夏定邦駐雷官集俞承恩駐大殷集與官軍之駐施官集者相應備賊西來以德營在南路也八月廿日賊自含和來犯大營鋒未交營中火起大帥倉皇登廣艇眾遂大潰有道六合者公挽之同守不可乃檄西路兵勇回城廿一日賊奄至南關公焚浮橋畫河以守王家幹俞承恩敗賊於壺蘆套賊小卻賊酋四眼狗計曰六合不可破以兵勇與土團合也今聞大營破土團膽落我以眾抵城下俾兵勇不敢離城而別遣眾四出破其土團收其旁縣則城中勢孤可圖矣廿四日大霧賊自揚家河濟官軍不能禦賊沿河走掠桂家營程駕橋竹墩雷官集施官集巴山土團與戰殲焉北行者焚馬家集四合墩遂破天長突揚州繞儀徵包六合於圍中土團既破乃大集城下射書誘降不應晝夜急攻城上多方禦之殺賊無算而勢不少挫又於西北門暗掘地道城中亦以地道應之三掘三穿賊多淹斃小東門濱

河沮洳城中掘尺餘輒見水賊於城外民房掘得燥土乃礮石佯急攻而潛洞地道以達城腳火藥實空棺轟之城遂陷公遇害夫人王氏孀婦陳氏次子輔材殉焉時戊午九月十九日也先是公募能伏水中者齋血書告急於南北大營張忠武勝保各督兵來援先後抵城外數十里而城已陷同殉者都司夏定邦守備俞承恩王家幹千總海從龍知六合縣李守誠典史周錫光葉樊奎及紳士城守者數十人皆助公守禦有功者也而兵勇巷戰義民被戕死者以億萬計賊誘之降終不屈婦女兒童至死罵賊不輟賊亦感動謂爲罕見事聞

天子震悼

贈公布政使銜立專祠家屬及員弁之著者耐焉

論曰儀徵東界揚州南枕大江北接天長西連六合自癸丑賊陷江甯揚鎮相繼失守大江之中賊帆相屬其間儀徵屢陷居民伏處草莽苟全性命則以六合巍然獨存賊畏如虎之故顧自戊午六合失陷公歸天上而儀徵不可復居矣茲本廟碑參以傳聞敘其顛末俾我邑人知予遺之存實公六年保障之力云爾

贈太常寺卿孫君丁君別傳

李元度

孫君諱守信字小石長沙人少讀書不遇遂走京師供事內閣敘勞得從九品試用湖北工楷書總督留繕摺奏道光三十年李沅發反新甯君隨大軍進剿事平擢知縣咸豐二年粵賊犯長沙君以解餉入城協守有功圍解君隨江忠烈勦平巴陵土匪晏仲武擢同知

賞戴藍翎尋署蒲圻縣事有惠政五年武昌再陷羅忠節澤南自江西援鄂壁洪山君從之六年援賊古隆賢等悉銳犯洪山後路冀解城圍巡撫胡文忠命君與鄒君漢章蔣君益澧等迎擊破賊於豹子海追奔至樊口又敗之十一月武昌復以功晉知府換花翎官軍尋復大冶興國武昌諸州縣君皆在事有功擢巡守道李忠武續賓進攻九江賊渠堅守未卽下七年援賊自臨江竄興國君與周副將寬世帥師擊敗之八年與趙副將克彰勦賊於麻城賊遁遂從忠武大軍征皖連克潛山太湖桐城舒城十月師次三河鎮會援賊大至我軍困重圍初十日忠武死之君與丁君銳義等猶以忠義激厲士卒堅守營壘鏖戰四晝夜至十三日鉛藥水米均盡壘破並死之

詔旌按察使陣亡例議卹  
賜祭葬



贈太常寺卿

賞騎都尉世職祔祀李忠武專祠

丁君諱銳義字篁村亦長沙人父敦忠世父敘忠叔父取忠並以學行重於時君性豁達習兵家言粵賊犯城集里中子弟籌守禦鄉人恃以無恐咸豐四年胡文忠方爲貴東道耳君名檄募壯士百人同赴鄂旋益募至千人曰義字營累功擢縣丞六年羅忠節攻武昌以礮創卒賊渠古隆賢率黨萬餘犯官軍後路屯豹子海時軍中新失大帥諸將皆不欲戰君忼慨言曰我軍頓城下六閱月矣賊堅守不出今幸援賊來求我願假精兵四千出賊不意可一鼓破也文忠壯其言夜漏三下密檄君與唐君訓方蔣君益澧孫君守信等銜枚掩擊大破之斬首千餘級追敗賊至新店隆賢僅以身免遂自洪山進屯華容埠當是時賊水陸並宿重兵拒我師君等先自上游攻之會楊公岳斌水師亦至賊敗潰遂復武昌縣賊退走黃州

詔加鹽提舉銜

賞換花翎會大水諸將請回軍君奏記文忠曰今樊武破賊膽已寒興治賊必不敢上竄若再乘勢克蕪黃則糧盡援絕武漢不攻自拔矣文

忠謹其策遂渡江壁黃州城外一夕賊來劫營營眾亂君帥所部奮擊賊敗入城諸軍固請回軍君爭之不得乃自請屯青山斷賊餽道十一月武漢復君擢知縣加運同銜八年春大破賊於黃泥畝青天畝等處夷賊壘數十擢同知五月再破賊於南陽河阿彌鎮復夷賊壘數十自是宿松太湖賊皆遁君乃招流亡勸耕種太湖大饑復倡捐煮粥以振詔晉鹽運司運同七月李忠武征皖檄君從君以大父喪乞假不許遂同破石簪賊壘連克潛山太湖桐城進攻三河鎮君以三河爲廬賊必爭之地請先攻廬江廬江下則與將軍都公提督鮑公二軍合攻安慶然後水陸並進舒城三河廬州皆可計日破而忠武銳意攻廬州九月舒城下十月二日破三河賊壘君再從弟藍翎把總曙樓死之君以連日血戰精銳多夷傷請退屯桐城濟師再進忠武不可已而援賊大至餉道斷初十日大舉來犯我軍竟日不得食遂敗忠武死綏君營亦被陷乃衝入忠武營中與孫君拒守四晝夜至十三日乃陷君以重創仆地賊問爲誰君罵曰我義勇營統領丁某也賊豈不知何問爲遂遇害年三十有八君寡言笑耳重聽眾號丁龔而膽勇絕倫嘗以孤軍遇眾賊手大旗左右揮賊疑有伏左右顧遂大呼乘之賊大敗退性廉所得

俸賞悉分其部曲家無餘財

詔贈鹽運使

子祭葬

賞騎都尉世職

加贈太常寺卿

敕本籍建專祠所部陣亡者耐焉而太湖士民懷君德醵金建祠陳德

園君舊駐師處也

贊曰兩君皆吾故人也孫君恂恂吏才未嘗獨將而臨陣能執銳摧堅

丁君議論飄發敢獨為其難而策三河進止特詳慎嚮從其言安有覆

軍之變耶忠武名將也是役獨違眾深入烏虜豈數有不可回者歟然

兩君並以千古矣

又丁銳義傳 王闕運

丁銳義字伯冕長沙人家世儒者世父敘忠以篤學淳行有名於時銳

義少跌踴不好章句所學輒不終三十無所成名諸父頗患之咸豐初

始

詔天下團練丁氏故有望其鄉銳義乃約結子弟以靖閭里始奮發欲

以功名顯然末由自致也胡林翼之出貴州領偏師裴回湘岳閒意氣名譽頗減所領軍不足當賊人亦無肯隨胡軍者銳義故林翼通家子乃求從軍行募百人隸一守備部下自岳州至九江胡軍最少弱而塔齊布羅澤南諸軍鋒銳氣盛所向無前常侮笑林翼軍銳義憤怫每躬山掃戰湖口城下爲飛石所中墮馬幾死林翼獨私厚遇之咸豐五年春正月九江水師潰敗賊復上破武昌漢陽據之林翼先已授湖北按察使因援省城以銳義領一營爲偏將相持數月無功被病告歸五月林翼軍潰已而羅澤南援武昌屢戰大捷林翼亦已爲湖北巡撫兵勢稍盛卽檄銳義出募兵合千人號曰義勇營當是時江兩岸兵數十萬名將輻輳爭以勇敢爲先諸文武官皆短衣縛袴冒突飛礮奔命爭利而銳義爲尤戇由是義勇名聞湖北六年夏武昌圍賊急賊圖解城圍萬方古隆賢者賊裨將率萬餘人從武昌縣步上欲襲洪山官軍巡撫大會諸將議戰守言人人殊酒罷林翼不悅銳義後至乃曰諸將議皆非也夫官軍頓於堅城下自冬及夏無尺寸之功所以然者賊不出戰故也今古隆賢以萬人輕嘗我誠得精兵四千銜枚疾趨一鼓必破矣林翼從之其夜遣五將將二千人馳赴之果大破賊追兵三十里或

憚深入收兵而止捷聞林翼恨不窮追卽以銳義將五百人繼往比至諸軍已還越五日賊復上銳義又議迎戰諸將不可且曰賊敗去復至必誘我也往卽墮其計宜待賊近擊之銳義曰古隆賢自奮而來再敗於我旣思且恥故出不得已之計招聚殘賊洋洋而來以外示有餘非有謀也若養賊不擊彼得自固與城賊前後夾我軍事敗矣林翼猶豫不能決於是李續賓統湘勇最爲知兵銳義乃請續賓告林翼卽從其計仍遣前將及銳義往賊方憑葛店屯駐作大壘二深溝自固銳義等進擊之賊殊死拒乃分三道中軍徐進縱火以助兵勢左右二軍繞賊後交馳之賊大奔走平其壘斬賊上將二進兵武昌水師亦來會諸將皆至樊口望賊賊橫船截江築長圍於岸水陸相護銳義欲先燒其船或曰姑出兵嘗之卽發礮擊賊小船賊避入壘銳義等遣壯士數十人泅水奪船賊驚遽走水師乘之遂大潰渡水追之賊不暇入城繞城散走城賊驚亦走遂復武昌明日渡江圍賊黃州連戰未下會大雨諸將旣連勝因此欲追銳義上書巡撫曰樊武者賊之肩臂也蕪黃其咽喉也武漢腰腹也武漢之賊仰資於蕪黃待援於興國今克樊武足制興國則賊援盡矣若克黃州賊糧道絕矣援盡糧絕則武漢兩大城取之

反手耳然則攻漢武不如攻斬黃明矣論者動以深入爲行險多傷士卒爲損威此不思之甚者也且軍不能戰深入亦敗退守亦敗士卒惜死攻賊亦傷賊攻亦傷今得制賊之要乘全勝之勢舍而不取時不可再羣言易淆願深察焉巡撫報書用其策遂大修攻具薄城而營諸軍輕賊屢敗往往解怠賊乃夜開城二門突官兵兵士方熟寢賊至大亂獨銳義及何慶先等三營出擊賊斂眾入師得不潰而諸將益疚銳義貪功致敗又以援賊至大治宜還救大營會巡撫傳令諸軍力圖黃州毋以大營爲念諸將相顧失色頃之李續賓令至召諸軍還守眾又大喜銳義亦默不得意再上書巡撫曰仰承發縱遂統偏師出擊援賊庶展微效受令以來且夕憂皇幸憑威靈同官協和士卒用命踴躍載馳故一捷葛店再勝華容三奪樊口遂復武昌賊望風奔逃勢若破竹渡江以來部署已定黃州伏醜假息漏刻而軍吏輕敵偶致失機此雖將領之罪要亦兵家之常勢也乃頃者以來諸將參差羣口謹囁氣餒心疑有議無戰動請退守反悔輕進追原本謀發自銳義閉戶結舌猶尙有咎尚敢論兵事乎然以愚耳目之所及拙直之懷誠未敢如議者云云也賊今揚言欲攻洪山此詭解黃州之圍也賊趣洪山非由他道當

由山坡直上紙坊我軍在黃足以回顧古揚二酋本非強寇其徒卽眾  
一戰可破賊欲襲我後而我固已制其後矣成軍而出非敗是憇若一  
小挫動便回軍則水師勢孤亦復當退興治之賊復上樊武樊武再失  
梁子湖非復我之有也先虛後路以待賊至賊至無時又將坐受其困  
乎今急攻黃州縱不能克武漢之賊餉道猶斷萬一回軍飢賊重生就  
克武漢賊可退保蓄糧相持少支數年坐失事機誰執其咎二者爲計  
孰便孰否儻不如所陳願先斬銳義之頭以戒妄言巡撫以諸將懷意  
見恐未有功仍令軍退銳義常以爲恨於後武漢旣復黃州常爲兵衝  
銳義常率師屯防留斲黃閒與鄉民相犄角屢破賊戰功甚著斲黃民  
爲建生祠立石述其功八年七月李續賓奉

詔征賊於皖請銳義自隨續賓統湘勇十年戰功顯赫名聞天下自以  
無戰不克非善戰名將不與從事銳義亦素善續賓言聽計合以爲可  
其功名於是遂行湘勇名旣久盛以少擊眾賊無不奔走乃大破賊於  
石牌推鋒而前旬月之間克太湖潛山桐城三縣續賓處處分兵留守  
率餘軍直進攻舒城銳義諫曰舒城合肥賊巢穴必爭之地也兵勢益  
分而深入無已固不如先攻廬江與都鮑二軍合攻安慶我水師已在

下游得公重威則安慶可計日下也既下安慶水陸并進賊亡決矣都  
鮑者都與阿鮑超也與續賓分道擊賊故銳義欲合其軍續賓不聽九  
月遂攻下舒城銳義仍欲攻廬江續賓直進向廬州攻賊屯於三河鎮  
銳義進說曰公以孤軍深入賊地留兵四城分力之半連日攻戰死傷  
復多士卒罷乏將領驕滿賊援將集而貪進不已復擊三河此所謂強  
弩之末也使賊援斷後絕我餉道舒桐潛大留兵稀少見勝則怠見敗  
必潰前進不得後退無所所克四城將并覆矣若及今日退師桐城憑  
城休息以待援賊兵氣一新創痍稍蘇猶僅可不敗耳續賓見形勢已  
成且自負勇略拒而不納銳義乃猶飛書請援且言將敗是時胡林翼  
以母喪去位湖北大官以為續賓用兵如神而銳義章皇莫不笑之續  
賓亦讓之曰君嘗以千人破賊數萬今何怯也銳義歎曰吾屬無葬地  
矣十月二日又攻破賊外壘其夜援賊大至連結皖豫羣盜眾數十萬  
圍我軍十餘重十日續賓出輕軍搏戰自辰至酉賊益兵迭戰兵士困  
餓日暮大散遂奔潰賊遂圍續賓中軍銳義自率中營急救續賓身被  
數創所部左右軍皆潰續賓乘夜突圍出戰死銳義堅守其壁發礮擊  
賊鉛彈盡碎甃碗為礮子賊死傷相積遙呼銳義等早下毋自苦為也



守三日軍中水火皆盡大營破銳義中傷墮地賊問其名遂罵而死全軍俱覆所得四城盡失湖北大震不敢復出兵言戰後五年既克安慶廬州乃平銳義耳聾體羸然好議論遇戰則精采奮發嘗論戰有三要曰忍穩緊持滿而發見可急進故用兵最敢深人三河之役獨以輕進爲戒屢說不用卒及於敗胡林翼上其事

天子悼惜銳義以積功官鹽運同知乃超二級

追贈鹽運司使加太常寺卿銜

優卹如例死年三十八

論曰李忠武以八千之卒深入賊中數百里橫刀而前賊望風披昌若以沸湯沃殘雪兵不踰時遂定四城皆奪之於虎口探之於虺腹當此之時自謂江淮羣醜可一呼而定其意度可謂壯哉於是陳玉成以策黠之首結奔突之黨北迎河汝南牢江淮呼嘯徒眾號稱百萬晝夜奔命死力以赴之重塹堅壁連數十里而守之我軍介於其間曾不若孤肉之投百犬也乃能力格旬日斬殺萬數水火並絕然後散破主將既隕士卒猶厲烈烈乎其敗也而銳義獨以策料於前以義徇於其後斯猶古人之所謂不懟者乎余嘗聞三河敗卒言營破時出逃百里所在

賊聚立如市謹譁叫呼不聞語聲官軍逃者與賊相推擠交臂行數里亦不暇問也兵敗賊勝皆營營者數日自軍興以來勇將悍卒盡於此戰而後衝刃陷陣之事稀焉斯可謂巨敗矣鄉使早從銳義之言少察形便之勢合兵樅陽消醜醜徒則廝養走卒皆封侯之賞成十全之功垂於竹帛久矣曷乃守死併命使論者至今日猶神王而色變也哉

母弟溫甫哀詞

曾國藩

咸豐五年十月賊目偽翼王石達開引其黨自湖北通城竄入江西別有廣東匪徒曰周培春葛耀明關志江者自湖南茶陵州竄入與石逆相聚於新昌縣周培春等投歸石逆部下願為前驅石逆授之偽職將軍總制軍師旅帥之類兩逆黨者合之為一江西亂民從之如歸贛水以西望風瓦解十一月初一日攻陷瑞州府明日陷臨江晦日袁州繼陷遂圍吉安明年正月二十五日陷之予檄副將周鳳山率九江之師入援二月十八日軍敗於樟樹鎮而撫州建昌兩府以是月之季相踵淪沒國藩躬率水陸諸軍自湖口入援而南康又沒於賊矣九江自為賊踞如故凡江西土地棄之賊中者為府及為州若縣若廳五十有奇天動地岌人心惶惶訛言一夕數驚或奔走奪門相踐死楚軍困於江

西道閉不得通鄉書則募死士蠟丸隱語乞援於楚賊亦益布金錢購  
民間捕索楚人致密書者殺而榜諸衢前後死者百輩無得脫免吾弟  
國華溫甫自湘中閒關走武昌乞師以拯江西於是與劉騰鴻峙衡吳  
坤修竹莊普承堯欽堂率五千人以行而巡撫胡公奏請以溫甫統領  
軍事出入賊地盛暑鏖兵凡攻克咸甯蒲圻崇陽通城新昌上高六縣  
以六月十三日銳師翔於瑞州由是江西湖南始得通問而溫甫亦積  
勞致疾矣七月十六日棹小舟昇疾至南昌兄弟相見深夜愔愔喜極  
而悲涕注如雨弟疾寢劇治之多方不效至九月乃痊復還瑞州營次  
瑞州故有南北兩城蜀中兵貫其中劉騰鴻軍其南溫甫與普承堯軍  
其西北賊於東隅通外援市易如故七年正月子率吳坤修之師自奉  
新至東路始合長圍掘塹周三十里溫甫則大喜吾攻此城久不舉今  
茲事其集乎不幸遭先君子大故兄弟匍匐奔喪入里門宗族鄉黨爭  
來相弔亦頗相慶慰國藩得拔其不肖之軀復有生還之一日溫甫力  
也溫甫既出嗣叔父以咸豐八年二月降服期滿復出抵李君續賓迪  
庵軍中李君與溫甫爲婚姻益相與講求戎政晨夕諮議是時九江新  
破強悍深根之寇一掃刮絕李君威名聞天下又克麻城蹙黃安喋血

皖中連下太湖潛山桐城舒城四縣席全盛之勢人人自以無前師銳  
甚溫甫獨以爲常勝之家氣將絕矣難可深恃時時與李君深語悚切  
以警其下亦以書告子盱上竟以十月十日軍敗從李君殉難廬江之  
三河鎮嗚呼痛哉曩吾弟以新集之師千里赴援摧江西十萬之賊而  
無所頓今以皖北百勝之軍萃良將勁卒四海所仰望者而一覆之而  
吾弟適丁其厄豈所謂命耶常勝之不足深恃吾弟之智旣及之矣而  
不肯退師以圖全營壘以十三夜被陷而吾弟與李君以初十之夕併  
命同殉又不肯少待以圖脫免豈所謂知命者耶遂綴詞哭之詞曰  
觥觥吾祖山立絕倫有蓄不施篤生哲人我君爲長魯國一儒仲父早  
世有季不孤恭惟先德稼穡詩書小子無狀席此慶餘粲粲諸弟鴈行  
以隨吾詩有云午君最奇挾藝千人百不一售彼粗穢者乃居吾右抑  
塞不伸發狂大叫雜以嘲詼萬花齊笑世不吾與吾不世許自謂吾虎  
世棄如鼠相舛相背逝將去女一朝奮發仗劍東行提師五千往從阿  
兄何堅不破何勁不摧躍入章門無害無災填篋鼓角號令風雷昊天  
不弔鮮民銜哀見星西奔三子歸來弟後季父降服以禮市歲告闕靡  
念苞杞出陪戎幄匪辛伊李旣克潯陽雄師北邁剗潯剗桐羣舒是嘖

豈謂一蹶震驚兩戒李旣山頽弟乃梁壞覆我湘人君子六千命耶數  
耶何辜於天我奉

簡書馳驅嶺嶠江北江西夢魂環繞卯慟抵昏酉悲連曉莽莽舒廬羣  
凶所窟積骸成岳孰辨弟骨骨不可收魂不可招崢嶸廢壘雪漬風飄  
生也何雄死也何苦我實負弟茹此終古

曾愍烈曾靖毅公別傳

李元度

曾公諱國華字温甫湘鄉相國文正公三弟也幼出後叔父驥雲生有  
大志好讀史能爲奇論有特見時雜以詼嘲隨兄讀書京師以國子生  
應京兆試不遇歸益講求經世略咸豐五年文正督師江西冬十月僞  
翼王石達開自通城竄江西廣東賊周培春等復自茶陵州竄至併爲  
一疊陷名城列郡無完土當是時江楚道閉文報家問不通凡數月公  
請於封公倍道走武昌乞師以拯江西六年三月鄂撫胡文忠檄公與  
劉君騰鴻吳君坤修普君承堯帥五千人行而疏請以公統領軍事遂  
攻克咸甯蒲圻崇陽通城新昌上高六縣以六月杪抵瑞州自是江楚  
始得通問瑞故有南北城蜀水貫其中劉君軍其南公與普君軍其西  
北吳君別勦爲游兵賊於東隅通外援市易如故始至援賊與城賊合

犯屢破之七年正月文正躬赴瑞郡督攻調吳軍至自奉新東路始合  
長圍掘塹周三十里斷賊接濟會公丁本生父憂隨文正奔喪歸是年  
七月瑞州拔八年二月降服期滿李忠武奉

命督勦皖中公與忠武姻家也忠武招公襄辦軍務連下潛山太湖桐  
城舒城四縣遂乘勝擣三河鎮以窺廬州時湘軍挾百勝之勢鋒銳甚  
公獨以爲常勝之家氣將竭矣難可深恃時時與忠武深語悚切並以  
書告文正亡何援賊大至軍深入被圍十月十日公從忠武力戰死之  
事聞

詔繇同知

贈巡守道旼道員例從優議

卹十一年官文恭胡文忠合疏陳公兄弟忠盡狀請破格加

恩示激勸

特旨賜諡愍烈

敕本籍建專祠

曾公國葆字季洪易名貞幹字事恆文正公季弟也少時落落自將脫  
出畦町視人世毀譽及書史褒譏嫩刺不甚措意亦不隨眾爲疑信時

或詰難參伍大破羣惑逾冠補諸生屢冠其偶已而厭薄舉子業究心  
手搏擊刺法粵寇起文正奉

詔討賊公帥六百人從咸豐三年冬平常甯洋崗土寇時楊公岳斌方  
爲把總彭公玉麟方爲諸生皆客公所爲僚佐公亟薦諸文正曰兩君  
英毅非常器也某願下之四年三月岳州兵敗公又亟白諸將無罪已  
願獨坐之其後彭楊果以水師雄視東南而諸將亦次第登用多建牙  
專閫獨公邑邑罷歸築室紫田山中柴門絕人事八年冬愍烈戰歿三  
河鎮公聞變則大慟誓出殺賊以報兄仇雪前恥明年抵湖北胡文忠  
與語大合檄分領千人署曰湘恆營自黃州進屯松子關十年二月攻  
克太湖敘訓導加國子學正銜當是時公四兄今宮保威毅伯國荃方  
帥師圍安慶公與威毅軍合用長圍困賊明年八月克之晉同知直隸  
州

賞戴孔雀翎九月帥師駐樅陽鎮固皖東門戶同治元年正月威毅伯  
統大軍渡江公師次三山三山者宣池羣賊薈萃區也我軍深人援絕  
賊十倍於我乃用黃君潤昌策招降三縣義民之陷賊者得四千人編  
伍約法遂解重圍賊大創而去尋破魯港克繁昌下南陵

特旨賞迅勇巴圖魯號未幾克蕪湖而威毅伯亦以是時克東西梁山  
徇和州當塗奪采石兄弟復會師進薄江甯雨花臺江東久悴於兵沴  
疫繁興將士物故相屬公病屢瀕危方請急養病而偽忠王李秀成率  
援賊數十萬至公強起籌戰守自當西路衛餉道與賊血戰四十六日  
夜賊死蹕不得逞解圍遁

詔晉知府而公不及見矣公以十一月十八日卒於江東橋營次年三  
十有五文正初不欲

上聞會有

詔詢知府曾貞幹見駐營何處文正始以積勞病故覆陳

溫旨贈按察使卽照按察使立功後病故例議卹以示優異蘇撫李公  
鴻章復臚陳公戰績及積勞致病之繇奉

特旨照二品例議卹

予諡靖毅加

贈內閣學士銜

敕本籍及死事地方各建專祠仍宣付史館立傳公在軍習勞能忍饑  
寒隆冬不御裘嘗跣足行積雪中了無所苦嗣子紀渠廕知縣江甯克



復

賞直隸州知州

贊曰兵法云將受命則忘其家臨軍約束則忘其親援枹鼓則忘其身之三者文正昆仲兼之矣文正之墨衰從戎也疏陳雖有功不敢邀甄敘岳州敗靖毅登白簡及後有功未嘗輒以

聞愍烈援江西以急難故瑞州拔則功歸諸將烏虜茲豈恆情所有哉然

兩朝詔書於愍烈有一門忠義之

褒於靖毅則曰朝廷早欲擢用以曾國藩再三辭賞留待江甯之克抑何其

一德相孚及此耶未二年兩兄卒克江甯二公當拊髀九原矣

繆武烈公事狀

趙之謙

咸豐十年春之謙阻寇清江倉皇南下二月十九日舟過長安鎮鎮人惛然街號巷哭急詢故則粵賊自武康來已薄杭州城下乃返走嘉興澈浦泛海入餘姚時殘卒僨將落驛道路從詢杭州事僉言二十七日城陷最後遇鄞人林彪衢州軍中素識者留與語乃云城之陷賊入清

波門鹽運使某死城上某某皆死某啟城出同某某行有傑勇者亦衢  
舊部先生三子植禮之所轄也之謙歸以三月一日五日而賊遁先生  
長子德棻次子星適始奔歸泣述城中事已知先生殉節後將軍瑞昌  
公副都統來存公奏

聞請卹矣夫何江南變作浙西危殆夏秋之交一日數警民情震懼方  
謀徙家山中胡子培系自杭州寄書言今巡撫王公有齡劾先生創議  
株守荼毒生靈請奪卹第三子候選同知繆植禮帶寶勝勇先內亂城  
破遁走請下郡嚴議有

旨卹典撤銷植禮革職具錄奏牘以示之謙嗚呼兵敗城陷雖以身殉  
責之殃民誤國其疇敢辭若植禮縱軍構禍臨難倖生如奏言且不容  
於死猶賴

聖主矜宥罪疑惟輕此在繆氏子孫所當世世感戴無有怨尤者也之  
謙事先生久又先後侍軍中者三年尙知先生立身行己之大奚忍選  
蠕觀望猗違於時亟述事狀以寄先生諸孤俾永藏守公道未亡文字  
不滅兵刃湯火無能劫也先生諱梓字南卿江蘇溧陽縣人康熙初有  
諸生丹鳳字若木者伉直負文譽嘗小試搜檢役視其衣投卷出終身

不應科舉先生族祖也曾祖惠成祖國楹皆以儒名父壬縣學生先生  
幼而慧齊孝友時格遭父母喪哀毀逾成人家故貧力學求自立年十  
九學使者辛公從益見其文奇之補諸生第一道光八年戊子科以第  
五人舉於鄉六試禮部不中選十五年乙未大挑一等以知縣分浙江  
十九年始各取到省先生之仕浙也初權仙居令仙居邑萬山中民獷  
悍算事廢負境故多盜時催科則給令曰某家盜盍執之誘入室脅且  
辱先生至乃坐堂皇召胥吏盡發習惡刑曰勿犯令非畏事者練丁壯  
禽黠渠一二人寘諸法姦民憚之盜亦少息二十一年夷酋入甯波浙  
始用兵布政使卞公士雲從揚威將軍奕經公來典兵事知先生才欲  
檄赴軍中浙布政使宋公執不可尋攝石門令旋任奉化令先生令奉  
化者七月調充甲辰科同考官已而奉化民變大吏糾前令罪先生亦  
坐失察鑄級去官冲漢恕退日爲及門講授經義如施教里門時二十  
八年布政使汪公本銓蒞浙浙方清查倉庫四載未畢事汪公求屬吏  
通知政事者及先生詢始末則詳陳二十餘年來那補攤賠糾紛膠轕  
之故汪公驚異令理董清查交代先生竭心日力鉤稽虧盈無徇無苛  
眾論翕服二十九年浙大水秀水被災尤巨汪公言於巡撫吳文節公

檄先生往籌振撫時權令爲江忠烈公忠源與語意合乃集邑士議勸輸周察戶口定分法輸錢至二十萬米亦五六萬爲嘉興七邑最復贖資輸米復原官改同知旋署杭州府總捕同知故事總捕同知司科場事咸豐二年王子科先生在闈中監臨爲前巡撫黃公宗漢是歲東南苦旱漕艘不行豐工又決部臣咨令南漕變價漕帥主截浙漕江督主截湖廣漕議不下浙撫請湖漕變價價紬部議復不行湖漕仍起運仍起運不得渡黃已渡黃不得回空舊漕再設新漕黃公以爲大憂一夕呼先生議漕事先生曰濟新漕海運可浙屢議海運矣卒不行爲海道故爲船故爲經費故且憚創始憚旗丁構釁今舊漕尙未行無慮構釁事於浙創始江南成案在焉從其同等其異可也海道不出乍浦不出甯波以附上海無鐵板沙三江五壩阻矣船責甯波若沙若衛濟之足矣經費準河運酌州縣幫費以爲津貼充矣事當上聞公任之當下行某任之毋搖惑毋牽制黃公曰然飛章入告得旨允行先生乃釐定章約周歷屬縣詳說諭導羣疑朋興力任終始剋期而舉六月蒞事黃公以聞於

朝奉

旨免補三班以知府留浙卽補異數也是年署紹興知府時江忠烈公  
升任安徽巡撫奉調先生赴營奉

旨允准會上海逆徒劉麗川等滋事陷嘉定寶山南匯青浦通松江郡  
城巡撫黃公復檄先生赴東汶督軍禦賊賊有二謀往來濟軍械戰守  
具密遣邏卒獲其一斬之又迭次擊敗出城拒戰之賊賊氣沮然踞守  
如故於是海運議改道劉河旋奉檄歸浙治運事四年題補甯波知府  
調署杭州知府海運再竣奉

旨開缺以道員補用及官軍復上海江蘇巡撫勇烈吉爾杭阿公以先  
生督兵助剿疊著戰功奏請

賞戴花翎巡撫黃公之擢川督也代者爲前兩江總督何公桂清甫下  
車調今巡撫王公知杭州府亦以先生爲老於事改署杭嘉湖道兼鹽  
運使浙綱久敝商困益玩私張愈鉤淮運方阻江西行浙鹽抵餉先生  
議設官運置巡商減價敵私化私爲官冀整頓白何公何公弗願也六  
年春署按察使受事日軍報迭至賊渠石達開已陷江西撫州建昌諸  
郡縣窺浙西置遂奏以先生赴衢州督軍事衢州舊駐二軍典軍者一  
爲廣東按察使周公起濱一爲貴州安義鎮今提督饒公廷選先生奉

命往所部僅七百五十人事權紛出泊周公赴廣東始與饒公分統其  
軍八月賊從貴溪弋陽攻廣信府城知府沈公葆楨來乞師饒公軍玉  
山拔營赴援以益兵請發兵應之留五百人駐玉山饒公又調以往先  
生不可與之書曰浙軍援江西獨不留一軍顧浙乎後勁失賊襲之廣  
信未必安浙危矣廣信安不願同功浙危不能同過七日而廣信圍解  
巡撫何公嚴檄已至責以擁兵自衛不顧大體告者言圍不解禍且不  
測是年冬何公引疾去撫浙者爲晏公端書始以先生奏補金衢嚴道  
饒公亦調衢州鎮七年十二月石達開復出撫州金谿東鄉貴溪大舉  
犯浙謀者見賊過河口鎮行七日夜不絕號八十萬人先生與饒公議  
賊眾我寡雖待援宜自守度賊來必先經廣豐窺玉山攻我左右請分  
二千人駐廣豐公盡起常開之兵屯玉山留一軍守白沙關某率親軍  
五百人營常山相策應八年二月朔我軍前隊抵廣豐賊疾合圍後軍  
不能進饒公引軍至大南橋爲賊所敗退至常山賊遂越廣豐犯江山  
衢爲浙上游江山爲衢上游當南路九十里而近亟分兵救江山與饒  
公歸保郡城甫至郡江山報陷敗兵紛紛來約東部伍未定賊騎薄南  
門倉卒不得備遂自將數百人與戰城下大破之乃與饒公約某二人

者職守土城陷有死公但督率將士若調度進退某一身當之饒公許諾乃下令守城守二日西安將軍福興公督師五千人自江西來援賊已大至南城下列營二十餘處將軍督諸軍逆擊盡焚賊營夜中賊壘復立且隔河連營橫互二百餘里西陷常山開化南陷遂昌松陽入處州過永康趨金華賊圍衢郡凡九十有一日大小數十戰掘地道者五卒不得逞已而九江鎮李公定太復自壽昌引兵來賊宵遁既解嚴餘郡縣次第復克敘功上有

旨加按察使銜九年調署按察使再署鹽運使十年春南陵賊眾自青弋江入廣德陷安吉長興孝豐武康進圍杭州先是大府以甯國徽州爲浙西門戶歲資三百餘萬金濟兵食皖南警則調浙軍應援以爲鍵固賊逼廣德州巡撫羅公遵殿已飛書江甯大營乞師先生請并咨江督近調黃池灣沚諸營及前此援皖之軍自救而何公桂清復書責浙不豫防冀鄰省棄地與賊皆不許賊至城無守兵臨時調集不滿四千垣周甚廣凡四千九百餘堞堞一人猶闕承平久民不知兵猝遇變是非蜂起賊至閉城則譁曰烏有賊徒張皇既知有賊又譁曰但速戰胡畏縮且惡兵曰無兵非賊先生時治營務處奔走計守禦購死士縋城

焚賊巢雨甚火不發再戰不利兵力不足恃驅市人不可用援師竟不  
至憂勞無方邵部郎懿辰者以講學爲閩里所推重至是亦數數爭啟  
城爭急戰爭諸軍皆賊正告之不遜斥之去遂相仇民又仇兵外寇環  
伺內難將作先生知不可爲誓死守清波門之雲居山當賊衝露宿城  
上七日夜督仁和令李福謙依山治內濠以雨故工不得就城陷之日  
雨忽止傳令集軍地道猝發賊已壓城入遂率兵從十餘人大呼陷陣  
身被數十創猶屹立復爲火器轟折右足始仆方賊上城先生有僕曰  
衛榮率福請急走先生叱之曰若可走我死此矣僕卻立頰已中賊矛  
僞死於側覘死時狀甚悉僕逃歸爲之謙告如此咸豐十年二月二十  
七日也同殉者守備孫遇龍傭卒丁春漢春漢長偉多力手能舉五百  
斤猶知大義事先生十餘年不避難者也先生生嘉慶十二年二月二  
十六日年五十四配王氏子六德棻星適植禮鈺彝鞏女三孫二女孫  
五先生於書無所不窺蚤歲多病專力詩古文詞二十歲後潛心經世  
之務用兵治獄行鹽轉漕防河籌海上下縱橫洞達利病勤學好問雖  
服官未嘗一日輟業甲乙部皆有論著凡數十巨冊未成書身歷山川  
城郭村落墟市道里險阻手自紀載亦數十冊思饌補顧氏肇域志不



杲為文宗周秦不多作亂後存者集數卷而已自言少日性剛長乃斂抑甚喜怒無動於中與人慎許可惟江忠烈公一見心折忠烈以憂去先生語人曰此君大有為去可惜時無信者後果如言教學主明體達用惡拘牽猥瑣之士曰能敗事然一材藝無不容遠方來學影附響和而齟齬於俗雖以死勤事猶遭排迮嗚呼東南疆域日蹙百里人生實難朝不慮夕幸全性命終將伏

闕訟冤不幸死難亦願留此事實俟後世有知者察之咸豐十年九月一日門下士趙之謙謹狀之謙既撰事狀一篇十一年作客温州值故年避地間中與仁和邵太守雙元諸人一上書閩撫徐公宗幹二年入都再訴於都察院奏聞請旨三年十月閩浙總督兼署浙撫一等伯左公宗棠據實覆奏蒙聖恩賞還卹典國檢照舊案刻之凡刪去述傾軋始末四百九十餘字敬錄前後諭旨附奏續文狀別為雷忠錄云同治三年十一月謙記

續碑傳集卷五十九